







Digitized by the Internet Archive  
in 2011 with funding from  
LYRASIS members and Sloan Foundation







*Livius, Titus*

TITI LIVII

PATAVINI


HISTORIARUM LIBRI

QUI SUPERSUNT OMNES

---

TOMUS TERTIUS

*Nov. 1849*



---

MANNHEMII

Cura & Sumptibus Societatis literatæ

M DCC LXXIX



TITI LIVII PATAVINI  
HISTORIARUM  
AB URBE CONDITA  
LIBER VII

---

EPITOME

*D*UO novi magistratus adjecti sunt, prætura & curulis ædilitas. Pestilentia civitas laboravit, eamque insignem fecit mors Furii Camilli : cujus remedium & finis quum per novas religiones quæreretur, ludi scenici tunc primum facti sunt. Quum dies L. Manlio dicta esset a M. Pomponio tribuno plebis propter delectum acerbe actum, & T. Manlium filium rus relegatum sine ullo crimine; adolescens ipse, cujus relegatio patri objiciebatur, venit in cubiculum tribuni, strictoque gladio coëgit eum in verba sua jurare, non perseveraturum se in accusatione. Quum telluris hiatu tota ad ultimum territa patria

foret, tunc omnia pretiosa missa sunt in præaltam voraginem urbis Romanæ : in eam Curtius armatus, sedens equo, se præcipitavit, eaque expleta est. T. Manlius adolescens, qui patrem a tribunicia vexatione vindicaverat, contra Gallum, provocantem aliquem ex militibus Romanis, in singulare certamen descendit, ei-que occiso torquem aureum detraxit, quem ipse postea tulit, & ex eo Torquatus est nuncupatus. Duæ tribus additæ, Pompina & Publilia. Licinius Stolo lege ab ipso lata damnatus est, quod plus quingentis jugeribus agri possideret. M. Valerius tribunus militum Gallum, a quo provocatus erat, infidente galeæ corvo, & unguibus rostroque hostem infestante, occidit, & ex eo Corvi nomen accepit; consulque proximo anno, quum annos viginti tres haberet, ob virtutem creatus est. Amicitia cum Carthaginensibus juncta. Campani, quum urguerentur a Samnitibus bello, auxilio adversus eos a senatu pe-

*tito, quum id non inpetrarent, urbem  
atque agros populo Romano dediderunt:  
ob quam caussam ea, quæ populi Romani  
facta essent, defendi bello adversus Sam-  
nites placuit. Quum ab Cornelio consule  
exercitus in iniquum locum deductus in  
magno discrimine esset, P. Decii Muris  
tribuni militum opera servatus est. Qui,  
occupato colle super id jugum, in quo  
Samnites confederant, occasionem consuli  
in æquiore locum evadendi dedit: ipse  
ab hostibus circumfessus erupit. Quum  
milites Romani, qui Capuæ in præsidio  
erant relictæ, de ea occupanda urbe conspi-  
rassent, & detecto consilio, metu supplicii  
a populo Romano defecissent, per M. Va-  
lerium Corvum dictatorem, qui consilio  
suo eos a furore revocaverat, patriæ resti-  
tuti sunt. Res præterea contra Hernicos,  
& Gallos, & Tiburtes, & Privernates,  
& Tarquinienses, & Samnites, & Volscos  
prosperè gestas continet.*

# I.

*U. c. 389.*

*a. C. 363.*

*L. Sextio,*

*L. Æmilio*

*Coss.*

*Primus de  
plebe con-  
sul.*

*Prætor &  
ædiles cu-  
rules pri-  
mum crea-  
ti.*

**A**NNUS hic erit insignis novi hominis consulatu, insignis novis duobus magistratibus, prætura & curuli ædilitate. Hos sibi patricii quæsiwere honores pro concessio plebi altero consulatu. Plebes consulatam L. Sextio, cujus lege partus erat, dedit : Patres præturam Sp. Furio M. filio Camillo ; ædilitatem Cn. Quinctio Capitolino & P. Cornelio Scipioni, suarum gentium viris, gratia campestri ceperunt. L. Sextio collega ex Patribus datus L. Æmilius Mamercinus. Principio anni & de Gallis, quos primo palatos per Apuliam congregari jam fama erat, & de Hernicorum defectione agitata mentio. Quum de industria omnia, ne quid per plebeium consulem ageretur, proferrentur, silentium omnium rerum ac justitio simile otium fuit : nisi quod, non patientibus tacitum tribunis, quod pro consule uno plebeio tres patricos magistratus, curulibus sellis prætextatos tamquam consules sedentes, nobilitas sibi sumisset, prætorem quidem etiam jura reddentem, & collegam consulibus, atque iisdem auspiciis creatum, verecundia



inde inposita est senatui ex Patribus jubendi  
 ædiles curules creari. Primo, ut alternis an- *U. c. 390.  
a. C. 362.*  
 nis ex plebe fierent, convenerat : postea  
 promiscuum fuit. Inde, L. Genucio & Q. Ser- *L. Genu-  
cio, Q.  
Servilio*  
 vilio consulibus, & ab seditione & a bello  
 quietis rebus, ne quando a metu ac periculis *Coss.*  
 vacarent, pestilentia ingens orta. Censorem, *Pestilentia*  
 ædilem curulem, tres tribunos plebis mor-  
 tuos ferunt, pro portione & ex multitudine  
 alia multa funera fuisse. Maximeque eam  
 pestilentiam insignem mors quam matura, tam  
 acerba, M. Furii fecit. Fuit enim vere vir *Camilli  
mors.*  
 unicus in omni fortuna : princeps pace bel-  
 loque prius, quam exsulatum iret ; clarior  
 in exilio vel desiderio civitatis, quæ capta  
 absentis inploravit opem, vel felicitate, qua  
 restitutus in patriam secum patriam ipsam  
 restituit. Par deinde per quinque & viginti  
 annos (tot enim postea vixit) titulo tantæ  
 gloriæ fuit, dignusque habitus, quem se-  
 cundum a Romulo conditorem urbis Romanæ  
 ferrent.

II. Et hoc & infrequenti anno, C. Sulpi- *U. c. 391.  
a. C. 361.*  
 cio Petico, C. Licinio Stolone, consulibus,  
 pestilentia fuit. Eo nihil dignum memoriæ  
 actum, nisi quod pacis Deum exposcendæ *C. Sulpi-  
cio, C.  
Licinio*  
*Coss.*

U. c. 391.  
a. C. 361

*Ludi scenici primi.*

caussa tertio tum post conditam urbem lecti-  
sternium fuit. Et quum vis morbi nec huma-  
nis consiliis nec ope divina levaretur, victis  
superstitione animis, ludi quoque scenici,  
nova res bellicoso populo, (nam circi modo  
spectaculum fuerat) inter alia cœlestis iræ  
placamina instituti dicuntur. Ceterum parva  
quoque (ut ferme principia omnia) & ea  
ipsa peregrina res fuit. Sine carmine ullo,  
sine imitandorum carminum actu, ludiones  
ex Etruria adciti, ad tibicinis modos saltan-  
tes, haud indecoros motus more Tusco da-  
bant. Imitari deinde eos juvenus, simul in-  
conditis inter se jocularia fundentes versibus,  
cœpere; nec absoni a voce motus erant.  
Accepta itaque res sæpiusque usurpando exci-  
tata. Vernaculis artificibus, quia hister Tusco  
verbo ludio vocabatur, nomen histrionibus  
inditum: qui non, sicut ante, Fescennino  
versu similem incompositum temere ac rudem  
alternis jaciebant; sed inpletas modis saturas,  
descripto jam ad tibicinem cantu, motuque  
congruenti peragebant. Livius post aliquot  
annos, qui ab saturis ausus est primus argu-  
mento fabulam ferere, (idem scilicet, id  
quod omnes tum erant, suorum carminum

actor) dicitur, quum sæpius revocatus vo-  
 cem obtudisset, venia petita puerum ad ca-  
 nendum ante tibicinem quum statuisset, can-  
 ticum egisse aliquanto magis vigente (a) motu,  
 quia nihil vocis usus inpediebat. Inde ad ma-  
 num cantari histrionibus cœptum, diverbia-  
 que tantum ipforum voci relicta. Postquam  
 lege hac fabularum ab risu ac soluto joco  
 res avocabatur, & ludus in artem paullatim  
 verterat; juvenus, histrionibus fabellarum  
 actu relicto, ipsa inter se more antiquo ridi-  
 cula intexta versibus jactitare cœpit: quæ  
 inde exodia postea adpellata, consertaque  
 fabellis potissimum Atellanis sunt. Quod ge-  
 nus ludorum ab Oscis acceptum tenuit juven-  
 tus, nec ab histrionibus pollui passa est. Eo  
 institutum manet, ut actores Atellanarum  
 nec tribu moveantur, & stipendia, tamquam  
 expertes artis ludicræ, faciant. Inter aliarum  
 parva principia rerum, ludorum quoque pri-  
 ma origo ponenda visa est: ut adpareret,  
 quam ab sano initio res in hanc vix opulen-  
 tis regnis tolerabilem insaniam venerit.

U. c. 391.  
 a. C. 361.

Exodia:  
 Atellanæ.

III. NEC tamen ludorum primum initium,  
 procurandis religionibus datum, aut religione

(a) *vigenti* Gron. Crev.

animos, aut corpora morbis levavit. Quin etiam, quum medios forte ludos circus Tiberi superfuso inrigatus inpedisset, id vero, velut averfis jam Diis adspernantibusque placamina iræ, terrorem ingentem fecit. Itaque

*U. c. 392.  
a. C. 360.*

*Cn. Genu-  
cio, L.  
Æmilio II  
Coss.*

Cn. Genucio, L. Æmilio Mamercino secundum consulibus, quum piaculorum magis conquisitio animos, quam corpora morbi, adficerent, repetitum ex seniorum memoria dicitur, pestilentiam quondam clavo ab dictatore fixo sedatam. Ea religione adductus fenatus dictatorem clavi figendi causa dici iussit.

*Manlius  
dictator  
clavi  
figendi  
causa  
dictus.*

Dictus L. Manlius Imperiosus, L. Pinarium magistrum equitum dixit. Lex vetusta est, priscis literis verbisque scripta, ut, qui prætor maximus sit, Idibus Septembribus clavum pangat. Fixa (b) fuit dextro lateri ædis Jovis optimi maximi, ex qua parte (c) Minervæ templum est. Eum clavum, quia raræ per ea tempora literæ erant, notam numeri annorum fuisse ferunt: eoque Minervæ templo dicatam legem, quia numerus Minervæ inventum sit. Volsiniis quoque clavos, indices numeri annorum fixos in templo Nortiæ,

*Clavus  
annorum  
index.*

(b) *Fixus Gron. Crev.*

(c) *ea ex parte, qua Gron. Crev.*

Etruscæ Deæ, comparere, diligens talium *U. c. 392.*  
monimentorum auctor Cincius adfirmat. M. *a. C. 360.*

Horatius consul ex lege templum Jovis optimi maximi dedicavit anno post reges exactos : a consulibus postea ad dictatores, quia majus imperium erat, sollempne clavi figendi translatum est. Intermissio deinde more, digna etiam per se visa res (d), propter quam dictator crearetur. Qua de causa creatus L. Manlius, perinde ac reipublicæ gerendæ, ac non solvendæ religione, gratia creatus esset, bellum Hernicum adfectans, delectu acerbo juventutem agitavit; tandemque omnibus in eum tribunis plebis coortis, seu vi, seu verecundia victus, dictatura abiit.

*Manlius delectum habere conatur, frustra.*

IV. NEQUE eo minus principio insequentis *U. c. 393.*  
anni, Q. Servilio Ahala, L. Genucio consulibus (e), dies Manlio dicitur a M. Pomponio tribuno plebis. Acerbitas in delectu, non *a. C. 350.*  
damno modo civium, sed etiam laceratione *Q. Servilio II. L. Genucio II. Coss. Manlio dies dictæ.*  
corporum lata, partim virgis cæsis, qui ad nomina non respondissent, partim in vincula ductis, invisa erat : & ante omnia invisum ipsum ingenium atrox, cognomenque Impe-

(d) est res Gron. Crev.

(e) secundum consulibus Gron. Crev.

U. c. 393. riosi grave liberæ civitati, ab ostentatione  
 a. C. 359. sævitiae adscitum, quam non magis in alie-  
 nis, quam in proximis, ac sanguine ipse suo  
 exerceret. Criminique ei tribunus inter cete-  
 ra dabat, « quod filium juvenem, nullius  
 » probri compertum, extorrem urbe, domo,  
 » penatibus, foro, luce, congressu æqualium  
 » prohibitum, in opus servile, prope in  
 » carcerem atque in ergastulum, dederit:  
 » ubi summo loco natus dictatorius juvenis  
 » quotidiana miseria discerét, vere imperioso  
 » patre se natum esse. At quam ob noxam?  
 » quia infacundior sit, & lingua inpromptus.  
 » Quod naturæ damnum utrum nutriendum  
 » patri, ( si quidquam in eo humani esset )  
 » an castigandum ac vexatione insigne facien-  
 » dum fuisse? ne mutas quidem bestias mi-  
 » nus alere ac fovere, si quid ex progenie  
 » sua parum prosperum sit. At, Hercule, L.  
 » Manlium, malum malo augere filii, & tar-  
 » ditatem ingenii insuper premere; &, si  
 » quid in eo exiguum naturalis vigoris sit,  
 » id extinguere vita agresti & rustico cultu,  
 » inter pecudes habendo. »

*Filii ejus  
 pietas.*

V. OMNIUM potius his criminationibus,  
 quam ipsius juvenis, inritatus est animus:

quin contra, se quoque parenti causam in- U. c. 393.  
a. C. 359.  
vidiæ atque criminum esse, ægre passus,

(ut omnes Dii hominesque scirent, se parenti  
opem latam, quam inimicis ejus, malle) ca-  
pit consilium, rudis quidem atque agrestis  
animi, & quamquam non civilis exempli,  
tamen pietate laudabile. Inscientibus cunctis,  
*Julius* cultro subcinctus, mane in urbem, atque a  
porta domum confestim ad M. Pomponium  
tribunum pergit : janitori, « opus esse sibi  
» domino ejus convento extemplo, [ait] nun-  
» ciaret, T. Manlium Lucii filium esse. »  
Mox introductus, ( etenim percitum ira in  
patrem spes erat aut criminis aliquid novi,  
aut consilii ad rem agendam, deferre) salute  
accepta redditaque, « esse [ait] quæ cum  
» eo agere arbitris remotis velit. » Procul  
inde omnibus abire jussis, cultrum stringit :  
& super lectum stans ferro intento, nisi,  
in quæ ipse concepisset verba, juraret, « se  
» patris ejus accusandi causâ concilium ple-  
» bis numquam habiturum, » se eum extem-  
plo transfixurum minatur. Pavidus tribunus  
(quippe qui ferrum ante oculos micare, se  
solum, inermem; illum prævalidum juve-  
nem, & quod haud minus timendum erat,

*U. c. 393.* stolide ferocem viribus suis cerneret) adju-  
*a. C. 359.* rat, in quæ adactus est verba; & præ se  
 deinde tulit, ea vi subactum se incepto desti-  
 tisse. Nec perinde, ut maluisset plebes, sibi  
 suffragii ferendi de tam crudeli & superbo  
 reo potestatem fieri; ita ægre habuit, filium  
 id pro parente ausum: eoque id laudabilius  
 erat, quod animum ejus tanta acerbitas patria  
 nihil a pietate avertisset. Itaque non patri  
 modo remissa causæ dictio est, sed ipsi etiam  
 adolescenti ea res honori fuit: & quum eo  
 anno primum placuisset, tribunos militum ad  
 legiones suffragio fieri, (nam & antea, sicut  
 nunc, quos Rufulos vocant, imperatores ipsi  
 faciebant) secundum in sex locis tenuit,  
 nullis domi militiæque ad conciliandam gra-  
 tiam meritis; ut qui rure & procul cœtu  
 hominum juventam egisset.

*Vorago in* VI. EODEM anno, seu motu terræ, seu  
*foro.* qua vi alia, forum medium ferme specu vasto  
 conlapsum in inmensam altitudinem dicitur:  
 neque eam voraginem conjectu terræ, quum  
 pro se quisque gereret, expleri potuisse prius,  
 quam Deum monitu quæri cœptum, quo  
 plurimum populus Romanus posset? Id enim  
 illi loco dicandum, vates canebant, si rem-



publicam Romanam perpetuam esse vellent. *U. c. 393.*

Tum M. Curtium, juvenem bello egregium, *a. C. 359.*

*innotuit* castigasse ferunt dubitantes, an ullum magis

Romanum bonum, quam arma virtusque, *In eam se*  
esset. Silentio facto, templa Deorum immor- *M Curtius*  
taliū, quæ foro imminent, Capitoliumque *inmittit.*

intuentem, & manus nunc in cœlum, nunc

in patentes terræ hiatus ad Deos manes por-

*innotuit* rigentem, se devovisse; equo deinde, quam

poterat, maxime exornato insidentem, arma-

tum se in specum inmisisse, donaque ac fru-

ges super eum a multitudine virorum ac mu-

lierum congestas; lacumque Curtium, non

ab antiquo illo T. Tatii milite Curtio Metto,

sed ab hoc adpellatum. Cura non deesset, si

qua ad verum via inquirentem ferret: nunc

fama rerum standum est, ubi certam dero-

gat vetustas fidem, & lacus nomen ab hac

recentiore *innotuit* insignitius fabula est. Post tanti

prodigii procurationem, eodem anno de Her-

nicis consultus senatus, quum feciales ad

res repetendas nequidquam *innotuit* misisset, primo

*innotuit* quoque die ferendum ad populum de bello

indicendo Hernicis censuit; populusque id

bellum *innotuit* frequens iussit. L. Genucio consuli

ea provincia forte evenit. In expectatione

*Bellum*  
*cum*  
*Hernicis.*

U. c. 393.  
a. C. 359.

*Genucius  
male rem  
gerit.*

civitas erat, quod primus ille de plebe consul bellum suis auspiciis gesturus esset; perinde ut eveniret res, ita communicatos honores pro bene aut secus consulto habitura. Forte ita tulit casus, ut Genucius, ad hostes magno conatu profectus, in insidias præcipitaret (f); legionibus nec opinato pavore fusis, consul circumventus ab insciis, quem interfecissent, occideretur. Quod ubi est (g) Romam nunciatum, nequaquam tantum publica calamitate mœsti Patres, quantum feroces infelici consulis plebei ductu, fremunt omnibus locis: « Irent, crearent consules ex » plebe, transferrent auspicia, quo nefas » esset. Potuisse Patres plebiscito pelli honoribus suis: num etiam in Deos immortales inauspicatam legem valuisse? Vindicasse » ipsos suum numen, sua auspicia: quæ ut » primum contacta sint ab eo, a quo nec jus » nec fas fuerit, deletum cum duce exercitum documento fuisse, ne deinde, turbato » gentium jure, comitia haberentur.» His vocibus curia & forum personat. Ap. Claudium, quia diffuaserat legem, majore nunc aucto-

*Ap. Clau-  
dium dicta-  
tor.*

(f) *præcipitaretur Gron. Crev.*

(g) *est del. Gron.*

auctoritate eventum reprehensi ab se consilii *U. c. 393.*  
 incusantem, dictatorem consensu patriciorum *a. C. 359.*

Servilius consul dicit, delectusque & iustitium indictum.

VII. PRIUSQUAM dictator legionesque novæ in Hernicos venirent, ductu C. Sulpicii legati res per occasionem gesta egregie est. In Hernicos, morte consulis *ad h. h. h. h. h.* contemptum ad castra Romana cum haud dubia expugnandi spe succedentes, hortante legato, & plenis iræ atque indignitatis militum animis, eruptio est facta. Multum ab spe adeundi valli res Hernicis afuit; adeo turbaris inde ordinibus abscessere. Dictatoris deinde adventu novus veteri exercitus jungitur, & copię duplicantur: & pro concione dictator laudibus legati militumque, quorum virtute castra defensa erant, simul audientibus laudes meritas, tollit animos; simul ceteros ad æmulandas virtutes *ad h. h. h. h. h.* acuit. Neque segnius ad hostes bellum adparatur, qui, & parti ante decoris memores, neque ignari auctarum virium hostis, suas quoque vires augent. Omne Hernicum nomen, omnis militaris ætas *ad h. h. h. h. h.* excitur. Quadringenariæ octo cohortes, lecta robora virorum, scribuntur. Hunc eximium florem

*U. c. 393.  
a. C. 359.*

juventutis eo etiam, quod, ut duplex acciperent stipendium, decreverant, spei animorumque inplevere. Inmunes quoque operum militarium erant, ut, in unum pugnae laborem reservati, plus sibi, quam pro virili parte, adnitendum scirent. Extra ordinem etiam in acie locati, quo conspectior virtus esset. Duum millium planicies castra Romana ab Hernicis dirimebat; ibi pari ferme utrimque spatio in medio pugnatum est. Primo stetit ambigua spe pugna; nequidquam saepe conatis equitibus Romanis inpetu turbare hostium aciem. Postquam equestris pugna effectum, quam conatibus, vanior erat; consulto prius dictatore equites, permissu deinde ejus, relicti equis, clamore ingenti (h) provolant ante signa, & novam integrant pugnam: neque sustineri poterant, ni extraordinariae cohortes pari corporum animorumque robore se objecissent.

*Arox  
pugna.*

VIII. TUNC inter primores duorum populorum res geritur. Quidquid hinc aut illinc communis Mars belli aufert, multiplex, quam pro numero, damnum est: vulgus aliud armatorum, velut delegata primoribus

(h) *ingenti* del. Gron.

pugna; eventum suum in virtute aliena ponit. Multi utrimque cadunt, plures vulnera accipiunt. Tandem equites alius alium increpantes, « quid deinde restaret [quærendo] » si neque ex equis pepulissent hostem, neque pedites quidquam momenti facerent? » quam tertiam exspectarent pugnam? quid » ante signa feroces profiluissent, & alieno » pugnarent loco? » His inter se vocibus concitati, clamore renovato, inferunt pedem: & primum gradu moverunt hostem, deinde pepulerunt, postremo jam haud dubie averunt. Neque, tam vires pares quæ superaverit res, facile dictum est, nisi quod perpetua fortuna utriusque populi & extollere animos, & minuere potuit. Usque ad castra fugientes Hernicos Romanus sequitur: castrorum obpugnatione, quia serum erat diei, abstinere. Diu non perlitatum tenuerat dictatorem, ne ante meridiem signum dare posset: eo in noctem tractum erat certamen. Postero (i) die deserta fuga castra Hernicorum, & faucii relictæ quidam inventi; agmenque fugientium ab ignis, quum præter mœnia eorum infrequentia conspecta signa (k) essent, fufum,

U. c. 393.  
a. C. 359.

*Vincuntur  
Hernici.*

(i) *postera* Gron. Crev.

(k) *signa conspecta* Gron. Crev.

ac per agros trepida fuga palatum est. Nec Romanis incruenta victoria fuit : quarta pars militum amissa; &, ubi haud minus jacturæ fuit, aliquot equites Romani cecidere.

*U. c. 394.  
a. C. 358.*

*C. Sulpicio  
II. C. Licinio II.  
Coss.*

*Bellum  
cum  
Tiburtibus*

*T. Quinctius  
Pennis dicta-  
tor.*

*Bellum  
Gallicum.*

IX. INSEQUENTI anno, quum C. Sulpicius & C. Licinius Calvus consules in Hernicos exercitum duxissent, neque inventis in agro hostibus, Ferentinum urbem eorum vi cepissent, revertentibus inde eis Tiburtes portas claufere. Ea ultima fuit causa, quum multæ antea querimoniæ ultro citroque jactatæ essent, cur, per feciales rebus repetitis, bellum Tiburti populo indiceretur. Dictatorem T. Quinctium Pennum eo anno fuisse, satis constat, & magistrum equitum Ser. Cornelium Maluginensem. Macer Licinius comitiorum habendorum causa, & ab Licinio consule dictum scribit, quia, collega comitia bello præferre festinante, ut continuaret consulatum, obviam eundem pravæ cupiditati fuerit. Quæsitæ ea propriæ familiæ laus leviolem auctorem Licinium facit. Quum mentionem ejus rei in vetustioribus annalibus nullam inveniam, magis, ut belli Gallici causa dictatorem creatum arbitrer, inclinatur animus. Eo certe anno Galli ad ter-

tium lapidem Salaria via trans pontem Anienis castra habuere. Dictator, quum tumultus U. c. 394.  
a. C. 358.

Gallici causa iustitium edixisset, omnes juniores sacramento adigit, ingentique exercitu ab urbe profectus, in citeriore ripa Anienis castra posuit. Pons in medio erat, neutris eum rumpentibus, ne timoris indicium esset. Prælia de occupando ponte crebra erant, nec, qui potirentur, incertis viribus, satis discerni poterat. Tum eximia corporis magnitudine in vacuum pontem Gallus processit; & quantum maxima voce potuit, « Quem nunc [inquit] Roma virum fortissimum (1) habet, procedat, agendum, ad pugnam, ut noster duorum eventus ostendat, utra gens bello sit melior. »

X. Diu inter primores juvenum Romanorum silentium fuit, quum & abnuere certamen vererentur, & præcipuam sortem periculi petere nollent. Tum T. Manlius, Lucii filius, qui patrem a vexatione tribunicia vindicaverat, ex statione ad dictatorem pergit: « Injussu tuo [inquit] imperator, extra ordinem numquam pugnaverim, non si certam victoriam victoriam videam. »

*Singulare certamen T. Manlii cum Gallo.*

(1) fortissimum virum Gron. Crev.

U. c. 394.  
a.. C 358.

» Si tu permittis, volo ego illi belluæ offen-  
» dere, quando adeo ferox præfultat hostium  
» signis, me ex ea familia ortum, quæ Gal-  
» lorum agmen ex rupe Tarpeia dejecit. »  
Tum dictator, « Macte virtute [ inquit ]  
» ac pietate in patrem, patriamque, T. Manli,  
» esto. Perge, & nomen Romanum invictum,  
» juvantibus Diis, præsta. » Armant inde  
juvenem æquales: pedestre scutum capit,  
Hispano cingitur gladio, ad propiorem habili  
pugnam. Armatum adornatumque adversus  
Gallum stolide lætum, & (quoniam id quo-  
que memoria dignum antiquis visum est)   
linguam etiam ab inrisu exferentem, produ-  
cunt. Recipiunt inde se ad stationem: & duo  
in medio armati, spectaculi magis more, quam  
lege belli, destituuntur, nequaquam visu ac  
specie æstimantibus pares. Corpus alteri  
magnitudine eximium, versicolori veste pic-  
tisque & auro cælatis refulgens armis: media  
in altero militaris statura, modicaque in ar-  
mis habilibus magis quam decoris species.  
Non cantus, non exultatio armorumque agi-  
tatio vana, sed pectus, animorum iræque  
tacitæ plenum, omnem ferociam in discrimen  
ipsum certaminis distulerat. Ubi consistere



inter duas acies, tot circa mortalium animis  
 ipse metuque pendentibus, Gallus, velut  
 moles superne imminens, projecto læva scuto,  
 in advenientis arma hostis vanum cæsim cum  
 ingenti sonitu ensē deiecit. Romanus, mu-  
 crone subrecto, quum scuto scutum (m)  
 inum perculisset, totoque corpore interior  
 periculo vulneris factus, insinuasset se inter  
 corpus armaque, uno alteroque subinde ictu  
 ventrem atque inguinā hausit, & in spatium  
 ingens ruentem porrexit hostem. Jacentis  
 inde corpus, ab omni alia vexatione intac-  
 tum, uno torque spoliavit: quem respersum  
 cruore collo circumdedit suo. Defixerat pa-  
 vor cum admiratione Gallos. Romani, alacres  
 ab statione obviam militi suo progressi, gra-  
 tulantes laudantesque ad dictatorem perdu-  
 cunt. Inter carminum prope modum incondita  
 quædam militariter joculantes, Torquati  
 cognomen auditum; celebratum deinde, pos-  
 teris etiam familiæque honori fuit. Dictator  
 coronam auream addidit donum, mirisque  
 pro concione eam pugnam laudibus tulit.

XI. Et, Hercule, tanti ea ad universi belli  
 eventum momenti dimicatio fuit, ut Gallo-

*Galli in  
 Campa-  
 niam tran-  
 seunt.*

(m) *scutum scuto* Gron. Crev.

*fieri*  
 rum exercitus proxima nocte, relictis tre-  
 pide castris, in Tiburtem agrum, atque inde,  
*bellum*  
 societate belli facta, commeatuque benigne  
 ab Tiburtibus adjutus, mox in Campaniam  
 transierit. Et fuit causa, cur proximo anno

*U. c. 395.*

*a. C. 357.*

*C. Patellio,*

*M. Fabio*

*Coss.*

C. Pœtelius Balbus consul, quum collegæ  
 ejus M. Fabio Ambusto Hernici provincia  
*ad bellum*  
 evenisset, adversus Tiburtes jussu populi  
 exercitum duceret. Ad quorum auxilium

quum Galli ex Campania redissent, foedæ  
*liberitas*  
 populationes in Lavicano, Tusculanoque, &

Albano agro, haud dubie Tiburtibus ducibus,

sunt factæ. Et, quum adversus Tiburtem  
*procurator*  
 hostem duce consule contenta respublica esset,

Gallicus tumultus dictatorem creari coëgit.

*Q. Servi-*

*lius dicta-*

*tor.*

Creatus Q. Servilius Ahala T. Quinctium  
*dictator*  
 magistrum equitum dixit; & ex auctoritate

Patrum, si prospere id bellum evenisset, lu-

dos magnos vovit. Dictator, ad continendos

proprio bello Tiburtes consulari exercitu

jussu manere, omnes juniores, nullo detrec-

tante militiam, sacramento adegit. Pugnatum

*Atror*  
*pugna cum*  
*Gallis.*

haud procul porta Collina est totius viribus

urbis, in conspectu parentum conjugumque

ac liberorum: quæ magna, etiam absentibus,

hortamenta animi, tum subiecta oculis, simul

*Procul* *Miseria*  
verecundia misericordiaque militem accende- *U. c. 305.*  
bant. Magna utrimque edita cæde, avertitur *a. C. 257.*  
tandem acies Gallorum. Fuga Tibur, sicut  
*San* arcem belli Gallici, petunt : palati a consule  
Pœtelio haud procul Tibure excepti, egressis  
ad opem ferendam Tiburtibus, simul cum  
his intra portas *suburbibus* compelluntur. Egregie quum  
ab dictatore, tum ab consule res gesta est.  
Et consul alter Fabius præliis primum par-  
vis, postremo una insigni pugna, quum hos-  
tēs totis adorti copiis essent, Hernicos de-  
vincit (n). Dictator, consulibus in senatu &  
apud populum magnifice conlaudatis, & sua-  
rum quoque rerum *inde omnibus idem* illis remisso honore,  
dictatura se abdicavit. Pœtelius de Gallis  
Tiburtibusque geminum triumphum egit.  
Fabio fatis visum, ut ovans urbem iniret.  
Inridere Pœtelii triumphum Tiburtes; « Ubi  
» enim eum secum acie *suburbibus* conflixisse? specta-  
» tores paucos fugæ trepidationisque Gallo-  
» rum, extra portas egressos, postquam in se  
» quoque fieri inpetum viderint, & sine discri-  
» mine obvios cædi, recepisse se intra urbem.  
» Eam rem triumpho dignam visam Romanis?  
» Ne nimis mirum magnumque censerent,

*Hernicō  
victi.*

(n) devicit Gron. Crev.

» tumultum exciere in hostium portis , ma-  
 » jorem ipsos trepidationem ante moenia sua  
 » visuros.»

*U. c. 396.  
 a. C. 356.*

*M. Poppil-  
 lio , Cn.  
 Manlio  
 Coss.*

XII. ITAQUE insequenti anno , M. Popillio  
 Lænate , Cn. Manlio Consulibus , primo si-  
 lentio noctis ab Tibure agmine infesto pro-  
 fecti , ad urbem Romam venerunt. Terrorem  
 repente ex somno excitatis subita res & noc-  
 turnus pavor præbuit : ad hoc multorum  
 incertitia , qui , aut unde , hostes advenissent.  
 Conclamatum tamen celeriter ad arma est ,  
 & portæ stationibus , murique præfidiis fir-  
 mati : & ubi prima lux mediocrem multitu-  
 dinem ante moenia , neque alium , quam Ti-  
 burtem , hostem ostendit , duabus portis  
 egressi consules utrimque aciem subeuntium  
 jam muros adgrediuntur : adparuitque occa-  
 sione magis , quam virtute , fretos venisse :  
 adeo vix primum inpetum Romanorum susti-  
 nuere. Quin etiam bono fuisse Romanis ad-  
 ventum eorum constabat , orientemque jam  
 seditionem inter Patres & plebem metu tam  
 propinqui belli compressam. Alius adventus  
 hostium fuit proximo bello , agris , quam  
 urbi , terribilior. Populabundi Tarquinienfes  
 fines Romanos , maxime qua ex parte Etru-

*Tiburtes  
 ad Romæ  
 moenia  
 victi.*

*Tarqui-  
 nienfe  
 bellum.*

riam adjacent, peragravere: rebusque nequidquam repetitis, novi consules C. Fabius & C. Plautius jussu populi bellum indixere; Fabioque ea provincia, Plautio Hernici evenere. Gallici quoque belli fama increbrescebat. Sed inter multos terrores solatio fuit pax Latinis petentibus data, & magna vis militum ab iis ex fœdere vetusto, quod multis intermiserant annis, accepta. Quo præsidio quum fulta res Romana esset, levius fuit, quod Gallos mox Præneste venisse, atque inde circa Pedum consedissee, auditum est. Dictatorem dici C. Sulpicium placuit: consul ad id aditus C. Plautius dixit: magister equitum dictatori additus M. Valerius. Hi robora militum, ex duobus consularibus exercitibus electa, adversus Gallos duxerunt. Lentius id aliquanto bellum, quam parti utriusque placebat, fuit. Quum primo Galli tantum avidi certaminis fuissent, deinde Romanus miles, ruendo in arma ac dimicationem, aliquantum Gallicam ferociam vinceret; dictatori neutiquam placebat, quando nulla cogeret res, fortunæ se committere adversus hostem, quem tempus deteriorem in dies & locus alienus faceret, sine præparato com-

*U. c. 397.  
a. C. 355.*

*C. Fabio,  
C. Plautio  
Coss.*

*Sulpicius  
dictator.*

*Exercitus  
adversus  
Gallos  
ducti.*

*Dictatoris  
cunctatio.*

E. c. 397.

a. C. 355.*Ingrata  
militibus.*

meatu, sine firmo munimento morantem, ad hoc iis animis corporibusque, quorum omnis in impetu vis esset, parva eadem languesceret mora. His consiliis dictator bellum trahabat, gravemque edixerat poenam, si quis injussu in hostem pugnasset. Milites, ægre id patientes, primo in stationibus vigiliisque inter se dictatorem sermonibus carpere; interdum Patres communiter increpare, quod non iussissent per consules geri bellum. « Electum esse » eximium imperatorem, unicum ducem, qui » nihil agenti sibi de cœlo devolaturam in finum victoriam censeat. » Eadem deinde hæc interdiu propalam, ac ferociora his, jactare; « se injussu imperatoris aut dimicatu-ros, aut » agmine Romam ituros. » Inmiscerique militibus centuriones: nec in circulis modo fremere, sed jam in principiis ac prætorio in unum sermones confundi, atque in concionis magnitudinem crescere turba, & vociferari ex omnibus locis, « ut extemplo ad » dictatorem iretur: verba pro exercitu faceret Sex. Tullius, ut virtute ejus dignum » esset. »

XIII. SEPTIMUM primum pilum jam Tullius ducebat; neque erat in exercitu, qui quidem

pedestria stipendia fecisset, vir factis nobilior. *U. c. 397.  
a. C. 315.*  
 Is, præcedens militum agmen, ad tribunal  
 pergit; mirantique Sulpicio non turbam ma-  
 gis, quam turbæ principem Tullium, impe-  
 riis obedientissimum militem, « Scilicet,  
 » dictator [inquit] condemnatum se univer-  
 » sus exercitus a te ignaviæ ratus, & prope  
 » ignominiae causa destitutum sine armis,  
 » oravit me, ut suam causam apud te age-  
 » rem. Equidem, si tibi loco cessum, si terga  
 » data hosti, si signa foede amissa objici no-  
 » bis possent, tamen hoc a te inpetrari æquum  
 » censerem, ut nos virtute culpam nostram  
 » corrigere, & abolere flagitii memoriam  
 » nova gloria patereris. Etiam ad Allium fusæ  
 » legiones eandem, quam per pavorem ami-  
 » serant, patriam, profectæ postea ab Veiiis,  
 » virtute recuperavere. Nobis, Deum benigni-  
 » tate, felicitate tua populique Romani,  
 » & res & gloria est integra. Quamquam  
 » de gloria vix dicere ausim, si nos & hostes  
 » haud secus, quam foeminas, abditos intra  
 » vallum omnibus contumeliis eludunt; &  
 » tu imperator noster, quod ægrius patimur,  
 » exercitum tuum sine animis, sine armis;  
 » sine manibus judicas esse; & prius, quam

*Sexti Tul-  
lii ad dic-  
tatorum  
oratio mi-  
litum no-  
mine.*

*U. c. 397.* » expertus nos esses, de nobis ita desperasti,  
*a. C. 355.* » ut te mancorum ac debiliū ducem judi-  
 » cares esse. Quid enim aliud esse caussæ  
 » credemus, cur veteranus dux, fortissimus  
 » bello, compressis, quod aiunt, manibus  
 » fedeas? utcumque enim se habet (o) res,  
 » te de nostra virtute dubitasse videri, quam  
 » nos de tua, verius est. Sin autem non tuum  
 » istuc, sed publicum est consilium, & con-  
 » sensus aliquis Patrum, non Gallicum bel-  
 » lum, nos ab urbe, a penatibus nostris ab-  
 » legatos tenet; quæso, ut ea, quæ dicam,  
 » non a militibus imperatori dicta censeas,  
 » sed a plebe Patribus; quæ, sicut vos vestra  
 » habeatis consilia, sic se sua habituram dicat.  
 » Quis tandem succenseat, milites nos esse,  
 » non fervos vestros? ad bellum, non in  
 » exilium, missos? si quis det signum, in  
 » aciem educat, ut viris ac Romanis dig-  
 » num sit, pugnaturus? si nihil armis opus  
 » sit, otium Romæ potius, quam in castris,  
 » acturos? hæc dicta sint Patribus. Te, im-  
 » perator, milites tui oramus, ut nobis pug-  
 » nandi copiam facias. Quum (p) vincere

(o) *habeat* Gron. Crev.

(p) *tum* Gron. Crev.



» cupimus, tum te duce (q) vincere ; tibi *U. c. 397.*  
 » lauream insignem deferre ; tecum trium- *a. C. 355.*  
 » phantes urbem inire ; tuum sequentes cur-  
 » rum Jovis optimi maximi templum gra-  
 » tantes ovantesque adire.» Orationem Tullii  
 exceperunt preces multitudinis : & undique,  
 ut signum daret, ut capere arma juberet,  
 clamabant.

XIV. DICTATOR, quamquam rem bonam  
 exemplo haud probabili actam cernebat : ta-  
 men facturum, quod milites vellent, se re-  
 cepit ; Tulliumque secreto, quænam hæc res  
 sit, aut quo acta more, percunctatur. Tul-  
 lius magnopere a dictatore petere, « ne se  
 » oblitum disciplinæ militaris, ne fui, neve  
 » imperatoriæ majestatis, crederet : multitu-  
 » dini concitatae, quæ ferme auctoribus fimi-  
 » lis esset, non subtraxisse se ducem ; ne quis  
 » alius, quales mota creare multitudo sole-  
 » ret, existeret. Nam se quidem nihil non  
 » arbitrio imperatoris acturum : illi quoque  
 » tamen videndum magnopere esse ; ut exer-  
 » citum in potestate haberet. Differri non  
 » posse adeo concitados animos : ipsos sibi  
 » locum ac tempus pugnandi sumturos, si ab

U. c. 397. » imperatore non detur. » Dum hæc loquuntur,  
a. C. 355. tur, jumenta forte pascentia extra vallum Gallo abigenti duo milites Romani ademerunt. In eos faxa conjecta a Gallis : deinde ab Romana statione clamor ortus, ac procursum utrimque est. Jamque haud procul iusto proelio res erant, ni celeriter diremtum certamen per centuriones esset. Adfirmata certe eo casu Tullii apud dictatorem fides est : nec recipiente jam dilationem re, in posterum diem edicitur, acie pugnatu-  
 1  
 ro. Dictator tamen, ut qui magis animis, quam viribus fretus ad certamen descenderet, omnia circumspicere atque agitare cœpit, ut arte aliqua terrorem hostibus incuteret. Solerti animo rem novam excogitat, qua deinde multi nostri atque externi imperatores, nostra quoque quidam ætate, usi sunt. Mulis strata detrahi jubet : binisque tantum centunculis relictis, agasones, partim captivis, partim ægrorum armis ornatos, inponit. His fere mille effectis centum admiscet equites, & nocte super castra in montes evadere, ac silvis se occultare jubet : neque inde ante moveri (r), quam ab se acciperent signum, Ipse, ubi inluxit, in radicibus montium ex-

(r) *movere* Crev.

tendere

tendere aciem cœpit sedulo , ut adversus *U. c. 337.*  
montes consisteret hostis. Instructo (s) vani *a. C. 355.*  
terroris adparatu , qui quidem terror plus  
pene veris viribus profuit , primo credere  
duces Gallorum , non descensuros in æquum  
Romanos : deinde , ubi degressos repente vi-  
derunt , & ipsi avidi certaminis in prælium  
ruunt ; priusque pugna cœpit , quam signum  
ab ducibus daretur.

XV. ACRIUS invasere Galli dextrum cor- *Prælium ,*  
nu : neque sustineri potuissent , ni forte eo *quo*  
loco dictator fuisset , Sex. Tullium nomine *vincuntur*  
increpans rogitansque : « Siccine pugnatos  
» milites spondisset ? ubi illi clamores sint  
» arma poscentium ? ubi minæ injussu impe-  
» ratoris prælium inituros ? en ipsum impera-  
» torem clara voce vocare ad prælium , &  
» ire armatum ante prima signa. Ecquis se-  
» queretur eorum , qui modo ducturi fuerint ;  
» in castris feroces , in acie pavidi ? » Vera  
audiebant : itaque tantos pudor stimulos ad-  
movit , ut ruerent in hostium tela , alienatis  
a memoria periculi animis. Hic primo inpe-  
tus prope vecors turbavit hostes : eques  
deinde emissus turbatos avertit. Ipse dictator,

(s) *Instructo jam Gron.*

*Tom. III.*

C

*U. c. 397.* postquam labantem una parte vidit aciem ;  
*a. C 355.* signa in lævum cornu confert, quo turbam  
 hostium congregari cernebat ; & iis, qui in  
 monte erant, signum, quod convenerat, dedit.  
 Ubi inde quoque novus clamor ortus, &  
 tendere obliquo monte ad castra Gallorum  
 visi sunt ; tum metu, ne excluderentur, omiſſa  
 pugna est, cursuque effuso ad castra fereban-  
 rur. Ubi quum obcurriſſet eis M. Valerius,  
 magister equitum, ( qui, proſtigato dextro  
 cornu, obequitabat hostium munimentis ) ad  
 montes ſilvasque vertunt fugam : plurimique  
 ibi a fallaci equitum specie agafonibusque ex-  
 cepti ſunt : & eorum, quos pavor pertule-  
 rat in ſilvas, atrox cædes poſt ſedatum præ-  
 lium fuit. Nec alius poſt M. Furium, quam  
*Sulpicius triumphat.* C. Sulpicius, juſtiorẽ de Gallis egit trium-  
 phum. Auri quoque ex Gallicis ſpoliis ſatis  
 magnum pondus, ſaxo quadrato ſeptum, in  
 Capitolio ſacravit. Eodem anno & a conſu-  
*Hernici victi.* libus vario eventu bellatum. Nam Hernici &  
 C. Plautio devicti ſubaſtique ſunt. Fabius  
 collega ejus incaute atque inconſulte adver-  
*Contra Tarqui- nienſes res male geſta.* ſus Tarquinienſes pugnavit : nec in acie tan-  
 tum ibi cladis acceptum, quam quod trecentos  
 ſeprem milites Romanos captos Tarquinienſes

inmolarunt, qua foeditate supplicii aliquanto *U. c. 397:*  
 ignominia populi Romani insignitior fuit. *a. C. 355.*  
 Accessit ad eam cladem & vastatio Romani  
 agri, quam Privernates, Veliterni deinde,  
 incurfione repentina fecerunt. Eodem anno  
 duæ tribus, Pomptina & Publilia, additæ.  
 Ludi votivi, quos M. Furius dictator vove-  
 rat, facti: & de ambitu ab C. Poetelio tri-  
 buno plebis, auctoribus Patribus, tum pri-  
 mum ad populum latum est: eaque rogatione  
 novorum maxime hominum ambitionem, qui  
 nundinas & conciliabula obire soliti erant,  
 compressam credebant.

*Lex de  
ambitu.*

XVI. HAUD æque læta Patribus insequenti *U. c. 398.*  
 anno, C. Marcio, Cn. Manlio consulibus, *a. C. 354.*  
 de unciario fœnore a M. Duilio, L. Mænio *C. Marcio,*  
 tribunis plebis rogatio est perlata: & plebs *Cn. Man-*  
 aliquanto eam cupidius scivit accepitque. Ad *lio II.*  
 bella nova, priore anno destinata, Falisci *Coss.*  
 quoque hostes exorti, duplici crimine: quod *Bellum*  
 & cum Tarquinienfibus juventus eorum mi- *cum*  
 litaverat; & eos, qui Falerios perfugerant, *Faliscis*  
 quum male pugnatum est, repetentibus feciali- *&*  
 bus Romanis non reddiderant. Ea provincia *Priverna-*  
 Cn. Manlio obvenit: Marcius exercitum in *tibus.*  
 agrum Privernatem, integrum pace longinqua,

*U. c. 398.* induxit : militemque præda inplevit. Ad co-  
*a. C. 354.* piam rerum addidit munificentiam , quod ,  
 nihil in publicum fecernendo , augenti rem  
 privatam militi favit. Privernates quum ante  
 mænia sua castris permunitis confedissent ;  
 vocatis ad concionem militibus , « Castra  
 » nunc [ inquit ] vobis hostium , urbemque  
 » prædæ do , si mihi pollicemini , vos forti-  
 » titer in acie operam <sup>navaturos</sup> , nec prædæ  
 » magis , quam pugnae , paratos esse. » Sig-  
 num poscunt ingenti clamore : celsique &  
 spe haud dubia feroces in prælium vadunt.  
 Ibi ante signa Sex. Tullius , de quo ante dic-  
 tum est , exclamat : « Adspice imperator  
 » [ inquit ] quemadmodum exercitus tuus tibi  
 » promissa præstet : » piloque <sup>posito</sup> , stricto  
 gladio in hostem inperum facit. Sequuntur  
 Tullium antesignani omnes , primoque inpe-  
 tu avertere hostem : fusum inde ad oppidum  
 persecuti , quum jam scalas mœnibus admo-  
 verent , in deditionem urbem acceperunt.  
 Triumphus de Privernatibus actus. Ab altero  
 consule nihil memorabile gestum : nisi quod  
 legem novo exemplo ad Sutrium in castris  
 tributim de vicesima eorum , qui manumit-  
 terentur , tulit. Patres , quia ea lege haud

*Priverna-  
 tes victi.*

*Lex de  
 vicesima  
 manumif-  
 sorum in  
 castris  
 lata.*

parvum vectigal inopi ærario additum esset, *U. c. 398.  
a. C. 354.*  
auctores fuerunt. Ceterum tribuni plebis,  
non tam lege, quam exemplo, moti, ne quis  
postea populum sevocaret, capite sanxerunt:  
nihil enim non per milites, juratos in con-  
sulis verba, quamvis perniciosum populo,  
si id liceret, ferri posse. Eodem anno C. Li-  
cinius Stolo a M. Popillio Lænate sua lege  
decem millibus æris est damnatus, quod  
mille jugerum agri cum filio possideret, eman-  
cipandoque filium fraudem legi fecisset.

*C. Licinius  
sua lege  
damnatus.*

XVII. Novi consules inde, M. Fabius Am-  
bustus secundum & M. Popillius Lænas secun-  
dum (t), duo bella habuere. Facile alterum  
cum Tiburtibus, quod Lænas gessit: qui,  
hoste in urbem compulso, agros vastavit.  
Falisci Tarquinienesque alterum consulem  
prima pugna fuderunt. Inde terror maximus  
fuit, quod sacerdotes eorum, facibus arden-  
tibus anguibusque prælatis, incessu furiali  
militem Romanum insueta turbaverunt specie:  
& tunc quidem velut lymphati & adtoniti  
munimentis suis trepido agmine inciderunt:

*U. c. 399.  
a. C. 353.*

*M. Fabio  
Ambusto  
II. M. Po-  
pillio II.  
Coss.*

*Fabius a  
Faliscis  
fusus resti-  
tuit aciem.*

(t) iterum Gron. Crev.

U. c. 399.  
a. C. 353.

deinde, ubi consul (u) legatique ac tribuni  
puerorum ritu vana miracula paventes inri-  
debant increpabantque, vertit animos repente  
pudor; & in ea ipsa, quæ fugerant, velut  
cæci ruebant. Discusso itaque vano adparatu  
hostium, quum in ipsos armatos se intulif-  
sent; avertunt totam aciem: castrisque  
etiam eo die potiti, præda ingenti parta,  
victores reverterunt, militaribus jocos quum  
adparatum hostium, tum suum increpantes  
pavorem. Concitatur deinde omne nomen  
Etruscum, &, Tarquinienfibus Faliscisque  
ducibus, ad Salinas perveniunt. Adversus  
eum terrorem dictator C. Marcius Rutilus  
primus de plebe dictus, magistrum equitum  
item de plebe C. Plautium dixit. Id vero  
Patribus indignum videri, etiam dictaturam  
jam in promiscuo esse: omnique ope inpe-  
diebant, ne quid dictatori ad id bellum de-  
cerneretur, parareturve. Eo promptius cuncta,  
ferente dictatore, populus jussit. Profectus  
ab urbe, utraque parte Tiberis, ratibus exer-  
citu, quocumque fama hostium ducebat, tra-  
jecto, multos populos agra vago  
palantes obpressit. Castra quoque, necopinato

*Etruscum  
bellum.*

*C. Marcius  
primus  
dictator  
e plebe.*

*Vincit  
Etruscos.*

(u) consules Græci



adgressus, cepit : & , octo millibus hostium *U. c. 319.*  
 captis , ceteris aut cæsis, aut ex agro Ro- *a. C. 353.*  
 mano fugatis, sine auctoritate Patrum, populi  
 jussu , triumphavit. Quia nec per dictatorem  
 plebeium, nec per consulem , comitia con-  
 sularia haberi volebant, & alter consul Fab-  
 bius bello retinebatur , res ad interregnum  
 redit. Interreges deinceps Q. Servilius Ahala,  
 M. Fabius, Cn. Manlius, C. Fabius, C. Sul-  
 picius, L. Æmilius, Q. Servilius, M. Fabius  
 Ambustus. In secundo interregno orta con-  
 tentio est, quod duo patricii consules crea-  
 bantur : intercedentibusque tribunis, interrex  
 Fabius aiebat, « in duodecim tabulis legem  
 » esse, ut, quodcumque postremum populus  
 » jussisset, id jus ratumque esset; jussum po-  
 » puli & suffragia esse. » Quum (x) inter-  
 cedendo tribuni nihil aliud, quam ut differ-  
 rent comitia, valuissent; duo patricii consu-  
 les creati sunt, C. Sulpicius Peticus tertium,  
 M. Valerius Publicola : eodemque die ma-  
 gistratum inierunt.

XVIII. QUADRINGENTESIMO anno, quam *U. c. 400.*  
 urbs Romana condita erat, quinto tricesimo, *a. C. 352.*  
 quam a Gallis recipera, ablato post unde- *C. Sulpi-*  
*cio III. M.*  
*Valerio*  
*Coss.*

(x) Quumque Gron. Crev.

U. c. 400. a. C. 352. *Ambo Coss. patricii.* cinum annum a plebe consulatu, patricii consules ambo ex interregno magistratum iniere, C. Sulpicius Peticus tertium, M. Valerius Publicola. Empulum eo anno ex Tiburtibus haud memorando certamine captum; five duorum consulum auspicio bellum ibi gestum est, ut scripsere quidam; seu per idem tempus Tarquiniensium quoque sunt vastati agri ab Sulpicio consule, quo Valerius adversus Tiburtes legiones duxit. Domi majus certamen consulibus cum plebe ac tribunis erat. Fidei jam suæ, non solum virtutis, ducebant esse, ut accepissent duo patricii consulatum, ita ambobus patriciis mandare. Quin aut toto cedendum esse, si plebeius jam magistratus consulatus fiat, aut totum possidendum, quam possessionem integram a patribus accepissent. Plebes contra fremit: « Quid se vivere, quid in parte civium cen- » feri: si, quod duorum hominum virtute, » L. Sextii ac C. Licinii, partum sit, id ob- » tinere universi non possint? Vel reges, vel » decemviros, vel, si quod tristius sit imperii » nomen, patiendum esse potius, quam am- » bos patricos consules videant, nec in vi- » cem pareatur atque imperetur; sed pars

» altera, in æterno imperio locata, plebem *U. c. 400.*  
 » nusquam alio natam, quam ad serviendum, *a. C. 352.*  
 » putet.» Non desunt tribuni auctores turbarum;  
 sed inter concitatos per se omnes vix duces  
 eminent. Aliquoties frustra in campum descen-  
 sum quum esset, multique per seditiones acti  
 comitiales dies; postremo victæ perseveran-  
 tia consulum plebis eo dolor erupit, ut tri-  
 bunos, « actum esse de libertate » vocife-  
 rantes, « relinquendumque non campum jam  
 » solum, sed etiam urbem captam atque ob-  
 » pressam regno patriciorum, » mœsta plebs  
 sequeretur. Consules relictî a parte populi,  
 per infrequentiam comitia nihilo segnius per-  
 ficiunt. Creati consules ambo patricii, M.  
 Fabius Ambustus tertium, T. Quinctius. In  
 quibusdam annalibus pro T. Quinctio M. Po-  
 pillium consulem invenio.

*U. c. 462;  
 a. C. 351.*

*M. Fabio  
 III. F.  
 Quinctio  
 Coss.*

XIX. Duo bella eo anno prospere gesta,  
 cum Tiburtibusque ad deditionem pugnatum.  
 Saffula ex his urbs capta: ceteraque oppida  
 eandem fortunam habuissent, ni universa  
 gens, positis armis, in fidem consulis venis-  
 set. Triumphatum de Tiburtibus: alioquin  
 mitis victoria fuit. In Tarquinienenses acerbe  
 sævitum, multis mortalibus in acie cæsis,

*Triumphus  
 de Tiburti-  
 bus: supp-  
 licia de  
 Tarqui-  
 nienibus.*

*U. c. 401.  
a. C. 351.*

*Fœdus  
cum Sam-  
nitibus.*

*U. c. 402.  
a. C. 350.*

*C. Sulpi-  
cio IV. M.  
Valerio II  
Coss.*

Ex ingenti captivorum numero trecenti quin-  
quaginta octo delecti, nobilissimus quisque,  
qui Romam mitterentur: vulgus aliud truci-  
datum. Nec populus in eos, qui missi Ro-  
mam erant, mitior fuit. Medio in foro om-  
nes virgis cæsi ac securi percussi. Id pro in-  
môlatis in foro Tarquinienſium Romanis pœ-  
næ hostibus redditum. Res bello bene gestæ,  
ut Samnites quoque amicitiam peterent,  
effecerunt. Legatis eorum <sup>ſententiâ</sup> comiter ab ſenatu  
reſponſum: fœdere in ſocietatem accepti.  
Non eadem domi, quæ militiæ, fortuna erat  
plebi Romanæ. Nam etſi, unciario fœnore  
facto, levata uſura erat, forte ipſa obrue-  
bantur inopes, nexumque inibant. Eo nec  
patricios ambo conſules, neque comitiorum  
curam, publicave ſtudia præ privatis incom-  
modis plebs ad animum admittebat. Conſu-  
latus uterque apud patricios manet. Conſu-  
les creati C. Sulpicius Peticus quartum, M.  
Valerius Publicola iterum. In bellum Etruſ-  
cum intentam civitatem, quia Cæritem po-  
pulum miſericordia conſanguinitatis Tarqui-  
nienſibus adiunctum fama ferebat, legati La-  
tini ad Volſcos convertere, nunciantes, exer-  
citum conſcriptum armatumque jam ſuis fini-

bus imminere : inde (y) populabundos in agrum Romanum venturos esse. Censuit igitur senatus, neutram neglegendam rem esse : utroque legiones scribi, consulesque fortiri provincias iussit. Inclinavit deinde pars major curæ in Etruscum bellum ; postquam literis Sulpicii consulis, cui Tarquinii provincia evenerat, cognitum est, depopulatum agrum circa Romanas salinas, prædæque partem in Cæritum fines <sup>commississet</sup> avertam, & haud dubie juventutem ejus populi inter prædatores fuisse. Itaque Valerium consulem, Volscis obpositum, castraque ad finem Tusculanum habentem, revocatum inde senatus dictatorem dicere iussit. T. Manlium Lucii filium dixit. Is, quum sibi magistrum equitum A. Cornelium Cossium dixisset, consulari exercitu contentus, ex auctoritate Patrum ac populi jussu Cæritibus bellum indixit.

*U. c. 402.  
a. C. 350.*

*T. Manlius dictator.*

XX. Tum primum Cærites, tamquam in verbis hostium vis major ad bellum significandum, quam in suis factis, qui per populationem Romanos lacefferant, esset, verus belli terror invasit : & , quam non suarum virium ea dimicatio esset, cernebant. Pœni-

(y) deinde Grœc. Crœt.

*U. c. 402.  
a. C. 350.*

*Carites  
bellum de-  
precantur.*

tebatque populationis, & Tarquinienſes exſecrabantur defectionis auctores. Nec arma, aut bellum quiſquam adparare, ſed pro ſe quiſque legatos mitti jubebat ad petendam erroris veniam. Legati ſenatum quum adiffent ab ſenatu rejeſti ad populum, Deos rogaverunt, quorum ſacra bello Gallico accepta rite procuraffent, ut Romanos florentes ea ſui miſericordia caperet, quæ ſe rebus adfectis quondam populi Romani cepiſſet; converſique ad delubra Veſtæ, hoſpitiū flaminum Veſtaliumque ab ſe caſte ac religioſe cultum invocabant. « Eane meritos, crederet » quiſquam, hoſtes repente ſine cauſſa factos? » aut, ſi quid hoſtiliter feciſſent, conſilio id » magis, quam furore lapſos, feciſſe, ut » ſua vetera beneficia, locata præſertim apud » tam gratos, novis conrumperent maleficiis? » florentemque populum Romanum ac feliciſſimum bello ſibi deſumerent hoſtem, » cujus adſlicti amicitiam cepiſſent? Ne adpellarent conſilium, quæ vis ac neceſſitas » adpellanda eſſet. Tranſeuntes agmine infeſto » per agrum ſuum Tarquinienſes, quum præter viam nihil petiſſent, traxiſſe quosdam » agreſtium, populationis ejus, quæ ſibi cri-



dictator magistratu abisset, res ad interregnum rediit. In festam inde Patribus plebem interreges quum accepissent, ad undecimum interregem seditionibus certatum est. Legis Liciniae patrocinium tribuni iactabant. Propior dolor plebi fœnoris ingravescentis erat: curæque privatæ in certaminibus publicis erumpebant. Quorum tædio Patres L. Cornelium Scipionem interregem concordiae causa observare legem Liciniam comitiis consulatibus iussere. P. Valerio Publicolæ datus e plebe collega C. Marcius Rutilus. Inclinatorum semel in concordiam animis, novi consules, fœnebrem quoque rem, quæ diffinere unanimos videbatur, levare adgressi, solutionem alieni æris in publicam curam verterunt; quinqueviris creatis, quos mensarios ab dispensatione pecuniæ adpellarunt. Meriti æquitate curaque sunt, ut per omnium annalium monumenta celebres nominibus essent. Fuere autem C. Duilius, P. Decius Mus, M. Papius, Q. Publilius, & Ti. Æmilius: qui rem, difficillimam tractatu, & plerumque parti utrique, semper certe alteri, gravem, quum alia moderatione, tum impendio magis publico, quam iactura, sustinuerunt. Tarda

*U. c. 403.*

*a. C. 349.*

*P. Valerio,*

*C. Marcio*

*II. Coss.*



etiam nomina, & inpeditiona inertia debitorum, quam facultatibus, aut ærarium, mens cum ære in foro positus, dissolvit, ut populo prius caveretur; aut æstimatio æquis rerum pretiis liberavit: ut non modo sine injuria, sed etiam sine querimoniis partis utriusque, exhausta vis ingens æris alieni sit. Terror inde vanus belli Etrusci, quum conjurasse duodecim populos fama esset, dictatorem dici coëgit. Dictus in castris (eo enim ad consules missum senatusconsultum est) C. Julius, cui magister equitum adjectus L. Æmilius. Ceterum foris tranquilla omnia fuere.

U. c. 403.  
a. C. 340.

C. Julius  
dictator.

XXII. TENTATUM domi per dictatorem, ut ambo patricii consules crearentur, rem ad interregnum perduxit. Duo interreges C. Sulpicius & M. Fabius interpositi obtinuerunt, quod dictator frustra tetenderat, mitiore jam plebe ob recens meritum levati æris alieni, ut ambo patricii consules crearentur. Creati ipse C. Sulpicius Peticus, qui prior interregno abiit, & T. Quinctius Pennus. Quidam Cæsonem, alii Cajum nomen Quinctio adjiciunt. Ad bellum ambo profecti, Faliscum Quinctius, Sulpicius Tarquinienſe, nusquam acie

U. c. 404.  
a. C. 348.  
C. Sulpicius  
V. T.  
Quinctio  
Coss.

*U. c. 404.  
a. C. 348.*

*Induciæ  
40 anno-  
rum cum  
Tarqui-  
nienſibus  
& Falſeis.*

congreſſo hoſte, cum agris magis, quam cum hominibus, urendo populandoque geſſerunt bella: cujus lentæ velut tabis ſenio victa utriuſque pertinacia populi eſt, ut primum a conſulibus, dein permiſſu eorum ab ſenatu inducias peterent. In quadraginta annos inpetraverunt. Ita, poſita duorum bellorum, quæ imminebant, cura, dum aliqua ab armis quies eſſet, quia ſolutio æris alieni multarum rerum mutaverat dominos, cenſum agi placuit. Ceterum quum cenſoribus creandis indiſta comitia eſſent, profeſſus cenſuram ſe petere C. Marcius Rutilus, qui primus dictator de plebe fuerat, concordiam ordinum turbavit. Quod videbatur quidem tempore alieno feciſſe; quia ambo tum forte patricii conſules erant, qui rationem ejus ſe habituros negabant. Sed & ipſe conſtantia inceptum obtinuit, & tribuni, omni vi recuperando jus conſularibus comitiis amiſſum, adjuverunt; & quum ipſius viri majeſtas nullius honoris faſtigium non æquabat, tum per eundem, qui ad dictaturam aperuiſſet viam, cenſuram quoque in partem vocari plebes volebat. Nec variatum comitiis eſt, quin cum Manlio Cnæo cenſor Marcius crea-

*C. Marcius  
primus  
cenſor de  
plebe.*

retur. Dictatorem quoque hic annus habuit M. Fabium, nullo terrore belli, sed ne Licinia lex comitiis consularibus observaretur. Magister equitum dictatori additus Q. Servilius. Nec tamen dictatura potentior eum consensum Patrum consularibus comitiis fecit, quam censoriis fuerat.

XXIII. M. POPILLIUS Lænas a plebe consul, a Patribus L. Cornelius Scipio datus. Fortuna quoque illustriorem plebeium consulem fecit. Nam quum ingentem Gallorum exercitum in agro Latino castra posuisse nunciatum esset; Scipione gravi morbo implicito, Gallicum bellum Popillio extra ordinem datum. Is, impigre exercitu, quum omnes extra portam Capenam ad Martis ædem convenire armatos juniores jussisset, signaque eodem quæstores ex ærario deferre, quatuor expletis legionibus, quod superfuit militum, P. Valerio Publicolæ prætori tradidit; auctor Patribus scribendi alterius exercitus, quod ad incertos belli eventus subsidium reipublicæ esset. Ipse, jam satis omnibus instructis comparatisque, ad hostem pergit: cujus ut prius nosceret vires, quam periculo ultimo tentaret; in tumulto, quem proximum castris

*U. c. 405.*

*a. C. 347.*

*M. Popilio*

*III. L.*

*Cornelio*

*Coss.*

*Bellum*

*Gallicum.*

*U. c. 405.*  
*a. C. 347.* Gallorum capere potuit, vallum ducere cœpit. Gens ferox & ingenii avidi ad pugnam, quum, procul visis Romanorum signis, ut extemplo prælium initura, explicuisset aciem; postquam neque in æquum demitti agmen vidit, & quum loci altitudine, tum vallo etiam integri (2) Romanos, perculosos pavore rata, simul obportuniores, quod intenti tum maxime operi essent, truci clamore adgreditur. Ab Romanis nec opus intermissum, *Vincuntur Galli, sed difficulter.* (triarii erant, qui muniebant) & ab hastatis principibusque, qui pro munitioribus intenti armatique steterant, prælium initum. Præter virtutem locus quoque superior adjuvit, ut pila omnia hastæque non, tamquam ex æquo missa, vana (quod plerumque fit) caderent, sed omnia librata ponderibus figerentur; oneratique telis Galli, quibus aut corpora transfixa, aut prægravata inhærentibus gerebant scuta, quum cursu pene in adversum subissent, primo incerti resistere: dein, quum ipsa cunctatio & his animos minuisset, & auxisset hosti, impulsus retro ruere alii super alios, stragemque inter se cæde ipsa foediorem dare. Adeo præcipiti turba obtriti plures, quam ferro necati.

(2) *tegi Gron. Crev.*

XXIV. NECDUM certa Romanis victoria *U. c. 405.*  
 erat. Alia in [campum degreſſis ſupererat *a. C. 347.*  
 moles. Namque multitudo Gallorum, ſenſum  
 omnem talis damni exſuperans, velut nova  
 rurfus exoriente acie, integrum militem ad-  
 verſus victorem hoſtem ciebat. Stetitque ſub-  
 preſſo inpetu Romanus; & quia iterum feſſis  
 ſubeunda dimicatio erat, & quod conſul,  
 dum inter primores incautus agitatur, lævo  
 humero matari prope trajecto, ceſſerat parum-  
 per ex acie. Jamque omiſſa cunctando victo-  
 ria erat, quum conſul, vulnere adligato,  
 reveſtus ad prima ſigna, « Quid ſtas, miles?  
 [inquit]. » Non cum Latino Sabinoque hoſte  
 » res eſt, quem victum armis ſocium ex  
 » hoſte facias. In belluas ſtrinximus ferrum.  
 » Hauriendus aut dandus eſt ſanguis. Propu-  
 » liſtis a caſtris, ſupina valle præcipites egreſ-  
 » ſiſtis, ſtratis corporibus hoſtium ſuperſtatis.  
 » Complete eadem ſtrage campos, qua mon-  
 » tes repleſtis. Nolite exſpectare, dum ſtan-  
 » tes vos fugiant: inferenda ſunt ſigna, &  
 » vadendum in hoſtem. » His adhortationi-  
 » bus iterum coorti pellunt loco primos ma-  
 » nipulos Gallorum; cuneis deinde in medium  
 » agmen perrumpunt. Inde barbari diſſipati,

*U. c. 405.*  
*a. C. 347.* quibus nec certa imperia, nec duces essent; vertunt inpetum in suos; fusique per campos, & præter castra etiam sua fuga prælati, quod editissimum inter æquales tumultos obcurrerebat oculis, arcem Albanam petunt. Consul, non ultra castra infecutus, (quia & vulnus degravabat, & subjicere exercitum pugna fessum tumultis ab hoste occupatis nolebat) præda omni (a) castrorum militi data, victorem exercitum, opulentumque Gallicis spoliis, Romam reduxit. Moram triumpho vulnus consulis adtulit: eademque causa dictatoris desiderium senatui fecit, ut esset, qui ægris consulibus comitia haberet. Dictator L. Furius Camillus dictus, addito magistro equitum P. Cornelio Scipione, reddidit Patribus possessionem pristinam consulatus. Ipse ob id meritum ingenti Patrum studio creatus consul, collegam Ap. Claudium Crassum dixit.

*Dictator  
 L. Furius  
 Camillus.*

XXV. PRIUSQUAM inirent novi consules magistratum, triumphus a Popillio de Gallis

(a) Consul, non ultra castra infecutus, quia & vulnus degravabat, & subjicere exercitum pugna fessum novo labori nolebat, a persequendo hoste continuit, tumultis ab hoste occupatis. Præda omni &c. Gron. Crev.

actus magno favore plebis : mussantesque inter se rogitabant , « num quem plebeii consulis poeniteret ? » Simul dictatorem increpabant , qui legis Liciniæ spretæ mercedem consulatum , privata cupiditate , quam publica injuria , foediorem , cepisset , ut se ipse consulem dictator crearet. Annus multis variisque motibus fuit insignis. Galli ex Albanis montibus , quia hiemis vim pati nequiverant , per campos maritimaque loca vagi populabantur. Mare infestum classibus Græcorum erat , oraque litoris Antiatis , Laurensque tractus , & Tiberis ostia : ut prædones maritimi , cum terrestribus congressi , ancipiti semel prælio decertarint , dubiique discesserint in castra Galli , Græci retro ad naves , victos se , an victores , putarent. Inter hos ( *b* ) longe maximus exstitit terror , concilia populorum Latinorum ad lucum Ferentinæ habita : responsumque haud ambiguum imperantibus milites Romanis datum , « absisterent imperare iis , quorum auxilio egerent. » Latinos pro sua libertate potius , quam pro alieno imperio , laturos arma. » Inter duos simul bella externa , defectione etiam socio-

*U. c. 406.*

*a. C. 346.*

*L. Furio ,*

*Ap. Claudius*

*Coſſ.*

( *b* ) *hæc Gron Crev.*

*U. c. 406.  
a. C. 346.*

*Scribuntur  
decem  
legiones.*

*Alter con-  
sul mori-  
tur*

*Bellum  
Gallicum.*

rum senatus anxius, quum cerneret metu tenendos, quos fides non tenuisset, extendere omnes imperii vires consules delectu habendo jussit. Civili quippe standum exercitu esse, quando socialis cœtus defereret. Undique, non urbana tantum, sed etiam agresti juventute, decem legiones scriptæ dicuntur quaternum millium & ducenorum peditum, equitumque trecenorum. Quem nunc novum exercitum, si qua externa vis ingruat, hæ vires populi Romani, quas vix terrarum capit orbis, contractæ in unum haud facile efficiant: adeo in quæ laboramus sola crevimus, divitias, luxuriamque. Inter cetera tristitia ejus anni, consul alter Ap. Claudius in ipso belli adparatu moritur: redierantque res ad Camillum; cui unico consuli, vel ob aliam dignationem haud subjiciendam dictaturæ, vel ob omen faustum ad Gallicum tumultum cognominis, dictatorem adrogari haud satis decorum visum est Patribus. Consul, duabus legionibus urbi præpositis, octo cum L. Pinario prætore divisus, memor paternæ virtutis, Gallicum sibi bellum extra sortem sumit: prætorem maritimam oram tutari, Græcosque arcere litoribus jussit. Et,



quum in agrum Pomptinum descendisset; *U. c. 406.*  
 (quia neque in campis congredi nulla co- *a. C. 346.*  
 gente re volebat, & prohibendo populatio-  
 tionibus, quos rapto vivere necessitas co-  
 geret, fatis domari credebat hostem) locum  
 idoneum stativis delegit.

XXVI. UBI quum stationibus quieti tem-  
 pus tererent, Gallus processit, magnitudine  
 atque armis insignis: quatiensque scutum  
 hasta, quum silentium fecisset, provocat per  
 interpretem unum ex Romanis, qui secum  
 ferro decernat. M. erat Valerius tribunus *M. Valerii*  
 militum, adolescens, qui haud indigniorem *cum Gallo*  
 eo decore se, quam T. Manlium, ratus, *singulare*  
 prius sciscitatus consulis voluntatem, in me- *certamen.*  
 dium armatus processit. Minus insigne certamen  
 humanum numine interposito Deorum factum.  
 Namque conferenti jam manum Romano cor-  
 vus repente in galea confedit, in hostem *Corvus.*  
 versus, quod primo, ut augurium cœlo mis-  
 sum, lætus accepit tribunus. Precatus deinde,  
 « Si divus, si diva esset, qui sibi præpetem  
 » misisset, volens propitiùs adesset. » Dictum  
 mirabile, tenuit non solum ales captam se-  
 mel sedem, sed, quotiescumque certamen  
 initum est, levans se alis, os oculosque

*U. c. 406.*  
*a. C. 346.*

hostis rostro & unguibus adpetiit : donec  
 territum prodigii talis visu, oculisque simul  
 ac mente turbatum, Valerius obtruncat. Cor-  
 vus e conspectu elatus orientem petit. Hac-  
 tenus quietæ utrimque stationes fuere. Post-  
 quam spoliare corpus cæsi hostis tribunus  
 cœpit, nec Galli se statione tenuerunt, &  
 Romanorum cursus ad victorem etiam ocior  
 fuit. Ibi, circa jacentis Galli corpus con-  
 tracto certamine, pugna atrox concitatur.

*Prælium*  
*committi-*  
*tur, quo*  
*Galli victi*

Jam non manipulis proximarum stationum,  
 sed legionibus utrimque effusis res geritur.  
 Camillus lætum militem victoria tribuni,  
 lætum tam præsentibus ac secundis Diis,  
 ire in prælium jubet : ostentansque insignem  
 spoliis tribunum, « Hunc imitare miles,  
 » [ aiebat ; ] & circa jacentem ducem sterne  
 » Gallorum catervas. » Dii hominesque illi  
 adfuere pugnae : depugnatumque haudqua-  
 quam certamine ambiguo cum Gallis est : adeo  
 duorum militum eventum, inter quos pug-  
 natum erat, utraque acies animis percepe-  
 rat (c). Inter primos, quorum concursus alios  
 exciverat, atrox prælium fuit : alia multitudo,  
 priusquam ad conjectum teli veniret, terga

(c) præceperat Crev.

vertit. Primo per Volscos Falernumque agrum dissipati sunt : inde Apuliam ac mare inferum (d) petierunt. Consul, concione advocata, laudatum tribunum decem bubus (e) aureaque corona donat. Ipse, jussus ab senatu bellum maritimum curare, cum prætore junxit castra. Ibi, quia res trahi segnitia Græcorum non committentium se in aciem videbantur (f), dictatorem comitiorum causa T. Manlium Torquatum ex auctoritate senatus dixit. Dictator, magistro equitum A. Cornelio Cossodicto, comitia consularia (g) habuit, æmulumque decoris sui absentem M. Valerium Corvum ( id enim illi deinde cognominis fuit ) summo favore populi, tres & viginti natum annos, consulem renunciavit. Collega Corvo de plebe M. Popillius Lænas quartum consul futurus datus est. Cum Græcis a Camillo nulla memorabilis gesta res : nec illi terra, nec Romanus mari bellator erat. Postremo, quum litoribus arcerentur, aqua etiam præter cetera necessaria usui deficiente, Ita-

*T. Manlius dicta-*  
*tor.*

*U. c. 407.*  
*a. C. 345.*

*M. Valer-*  
*io, M.*  
*Popillio*  
*IV. Coss.*

(d) *superum* Crev.

(e) *bobus* Gron. Crev.

(f) *videbatur* Cron. Crev.

(g) *consularia comitia* Gron. Crev.

*U. c. 407.* *a. C. 345.* liam relinquere. Cujus populi ea, cujusque gentis ciassis fuerit, nihil certi est. Maxime Siciliae fuisse tyrannos crediderim: nam ulterior Græcia, ea tempestate intestino fessa bello, jam Macedonum opes horrebat.

XXVII. EXERCITIBUS dimissis, quum & foris pax & domi concordia ordinum otium esset, ne nimis lætæ res essent, pestilentia civitatem adorta coëgit senatum imperare decemviris, ut libros Sibyllinos inspicerent; eorumque monitu lectisternium fuit. Eodem anno Satricum ab Antiatibus colonia deducta, restitutaque urbs, quam Latini diruerant. Et

*Fœdus  
cum Car-  
thaginien-  
sibus.*

*U. c. 408.*  
*a. C. 344.*

*T. Manlio,  
C. Plautio  
Coss.*

cum Carthaginien-sibus legatis Romæ fœdus iētum, quum amicitiam ac societatem petentes venissent. Idem otium domi forisque man-sit T. Manlio Torquato, C. Plautio consuli-bus: semunciarium tantum ex unciario fœ-nus factum, & in pensiones æquas triennii, ita ut quarta præsens esset, solutio æris ali-eni dispensata est. Et sic quoque parte plebis adfecta, fides tamen publica privatis difficul-tatibus potior ad curam senatui fuit. Levatæ maxime res, quia tributo ac delectu super-fessum. Tertio anno post Satricum restitutum a Volscis, M. Valerius Corvus, secundum

consul cum C. Pœtelio factus, quum ex Lat-  
 tio nunciatum esset, legatos ab Antio cir-  
 cumire populos Latinorum ad concitandum  
 bellum; priusquam plus hostium fieret, Vols-  
 cis arma inferre iussus, ad Satricum exercitu  
 infesto pergit. Quo quum Antiates aliique  
 Volsci præparatis jam ante, si quid ab Roma  
 moveretur, copiis obcurrissent, nulla mora  
 inter infensos diutino odio dimicandi facta est.  
 Volsci, ferocior ad rebellandum, quam ad  
 bellandum, gens, certamine victi, fuga effusa  
 Satrici moenia petunt: & ne in muris qui-  
 dem fatis firma spe, quum corona militum  
 cincta jam scalis caperetur urbs, ad quatuor  
 millia militum, præter multitudinem inbel-  
 lem, sese dedidere. Oppidum dirutum atque  
 incensum: ab æde tantum Matris Matutæ  
 abstinuere ignem. Præda omnis militi data.  
 Extra prædam quatuor millia deditorum ha-  
 bita. Eos victos consul ante currum trium-  
 phans egit: venditis deinde magnam pecu-  
 niam in ærarium redegit. Sunt, qui hanc  
 multitudinem captivam fervorum fuisse scri-  
 bant: idque magis verisimile est, quam de-  
 ditos veniisse.

*U. c. 307.  
 a. C. 312.*

*M. Vale-  
 rio II. C.*

*Pœtelio  
 Coss.*

*Bellum*

*cum  
 Volscis.*

*Satricum  
 dirutum.*

*U. c. 410.*

*a. C. 342.*

*M. Fabio,  
Ser. Sulpicio  
Coss.*

*Dictator  
L. Furius.*

*Aurunci  
victi.*

*Iuno  
Moneta.*

XXVIII. Hos consules secuti sunt M. Fabius Dorso, Ser. Sulpicius Camerinus. Auruncum inde bellum ab repentina populatione coeptum : metuque, ne id factum populi unius, consilium omnis nominis Latini esset, dictator velut adversus armatum jam Latium L. Furius creatus, magistrum equitum Cn. Manlium Capitolinum dixit. Et quum, (quod per magnos tumultus fieri solitum erat) iustitio indicto, delectus sine vacationibus habitus esset; legiones, quantum maturari potuit, in Auruncos ductæ. Ibi prædonum magis, quam hostium, animi inventi. Prima itaque acie debellatum est (h). Dictator tamen, quia & ultro bellum intulerant, & sine detrectatione se certamini obferebant, Deorum quoque opes adhibendas ratus, inter ipsam dimicationem ædem Junoni Monetæ vovit : cujus damnatus voti quum victor Romam revertisset, dictatura se abdicavit. Senatus duumviros ad eam ædem pro amplitudine populi Romani faciendam creari iussit. Locus in arce destinatus, quæ area ædium M. Manlii Capitolini fuerat. Consules, dictatoris exercitu ad bellum Volscum usi, Soram ex hostibus,

(h) est del. Gron. Crev.

incautos adorti, ceperunt. Anno post, quam vota erat, ædes Monetæ dedicatur, C. Marcio Rutilo tertium, T. Manlio Torquato secundum consulibus. Prædignum ex templo dedicationem secutum, simile vetusto montis Albani prodigio. Namque & lapidibus pluit, & nox interdiu visa intendi: librisque inspectis, quum plena religione civitas esset, senatui placuit, dictatorem feriarum constituendarum causa dici. Dictus P. Valerius Publicola. Magister equitum ei Q. Fabius Ambustus datus est. Non tribus tantum supplicatum ire placuit, sed finitimos etiam populos; ordoque iis, quo quisque die supplicarent, statutus. Judicia eo anno populitristia in foeneratores facta, quibus ab ædilibus dicta dies esset, traduntur. Et res, haud ulla insigni ad memoriam causa, ad interregnum rediit. Ex interregno, ut id actum videri posset, ambo patricii consules creati sunt, M. Valerius Corvus tertium, A. Cornelius Cossus.

*U. c. 415.  
a. C. 340.  
C. Marcio  
III. T.  
Manlio II.  
Coss.*

*P. Valerius  
dictator.*

*U. c. 412.  
a. C. 340.  
M. Valerius  
III. A.  
Cornelio  
Coss.*

XXIX. MAJORA jam hinc bella, & viribus hostium, & longinquitate vel regionum, vel temporum spatium, quibus bellatum est, dicentur. Namque eo anno adversus Samni-

*U. c. 412.* tes, gentem opibus armisque validam, mota  
*a. C. 340.* arma. Samnitium bellum, ancipiti Marte  
 gestum, Pyrrhus hostis, Pyrrhum Pœni se-  
 cuti. Quanta rerum moles? quoties in ex-  
 trema periculorum ventum, ut in hanc magni-  
 tudinem, quæ vix sustinetur, erigi imperium  
 posset? Belli autem causa cum Samnitibus;  
*Samnitici*  
*belli origo.* Romanis, quum societate amicitiaque juncti  
 essent, extrinsecus venit; non orta inter  
 ipsos est. Samnites Sidicinis injusta arma,  
 quia viribus plus poterant, quum intulissent,  
 coacti inopes ad opulentiorum auxilium con-  
 fugere, Campanis sese conjungunt. Campani  
 magis nomen ad præsidium sociorum, quam  
 vires, quum adtulissent, fluentes luxu ab  
 duratis usu armorum in Sidicino pulsi agro,  
 in se deinde molem omnem belli verterunt.  
 Namque Samnites, omissis Sidicinis, ipsam  
 arcem finitimorum Campanos adorti, unde  
 æque facilis victoria, prædæ atque gloriæ plus  
 esset, Tifata, imminentes Capuæ colles, quum  
 præsidio firmo occupassent, descendunt inde  
 quadrato agmine in planitiem, quæ Capuam  
 Tifataque interjacet. Ibi rursus acie dimica-  
 tum: adversoque proelio Campani intra mœ-  
 nia compulsi, quum, robore juventutis suæ



adciso, nulla propinqua spes esset, coacti sunt ab Romanis petere auxilium.

*U. c. 412.  
a. C. 340.*

XXX. LEGATI, introducti in senatum maxime in hanc sententiam locuti sunt: » Populus  
» nos Campanus legatos ad vos, Patres con-  
» scripti, misit; amicitiam in perpetuum,  
» auxilium præsens a vobis petatum. Quam  
» si secundis rebus nostris petissemus, sicut  
» coepta celerius, ita infirmiore vinculo con-  
» tracta esset. Tunc enim, ut qui ex æquo  
» vos venisse in amicitiam meminissemus,  
» amici forsitan pariter ac nunc, subjecti  
» atque obnoxii vobis minus essemus. Nunc;  
» misericordia vestra conciliati, auxilioque in  
» dubiis rebus defensi, beneficium quoque  
» acceptum colamus, oportet; ne ingrati at-  
» que omni ope divina humanaque indigni  
» videamur. Neque, Hercule, quod Samnites  
» priores amici socique vobis facti sunt, ad  
» id valere arbitror, ne nos in amicitiam  
» accipiamur, sed ut vetustate & gradu ho-  
» noris nos præstent; neque enim foedere  
» Samnitium, ne qua nova jungeretis foedera,  
» cautum est. Fuit quidem apud vos semper  
» fatis iusta causa amicitiae, velle eum vobis  
» amicum esse, qui vos adpeteret. Campani,

*Campani  
a senatu  
Romano  
auxilium  
petunt.*

*U. c. 412.* » etſi fortuna præſens magnifice loqui prohi-  
*a. C. 340.* » bet, non urbis amplitudine, non agri uber-

» tate, ulli populo (i) præterquam vobis  
 » cedentes, haud parva (ut arbitror) acceſ-  
 » ſio bonis rebus veſtris, in amicitiam veni-  
 » mus veſtram. Æquis Volſciſque, æternis  
 » hoſtibus hujus urbis, quandocumque ſe  
 » moverint, ab tergo erimus: & quod vos  
 » pro ſalute noſtra priores feceritis, id nos  
 » pro imperio veſtro & gloria ſemper facie-  
 » mus. Subactis iis gentibus, quæ inter nos  
 » vosque ſunt, quod propediem futurum ſpon-  
 » det & virtus & fortuna veſtra, continens  
 » imperium uſque ad nos habebitis. Acerbum  
 » ac miſerum eſt, quod fateri nos fortuna  
 » noſtra cogit. Eo ventum eſt, Patres con-  
 » ſcripti, ut aut amicorum, aut inimicorum  
 » Campani ſimus. Si defenditis, veſtri: ſi de-  
 » feritis, Samnitium erimus. Capuam ergo  
 » & Campaniam omnem veſtris an Samnitium  
 » viribus accedere malitis, deliberate. Om-  
 » nibus quidem, Romani, veſtram miſericor-  
 » diam, veſtrumque auxilium æquum eſt pa-  
 » tere; iis tamen maxime, qui, eam in plo-  
 » rantibus aliis, auxilium dum ſupra vires  
 » ſuas præſtant, omnes ipſi in hanc neceſſi-

(i) populo ulli Crev.

tatem

» tatem venerunt. Quamquam pugnativimus *U. c. 412.*  
 » verbo pro Sidicinis, re pro nobis, quum *a. C. 340.*  
 » videremus finitimum populum nefario latro-  
 » cinio Samnitium peti; &, ubi conflagraf-  
 » ſent Sidicini, ad nos trajecturum illud in-  
 » cendium eſſe. Nec enim nunc, quia dolent  
 » injuriam acceptam Samnites, ſed quia gau-  
 » dent oblatam ſibi eſſe cauſſam, obpugna-  
 » tum nos veniunt. An, ſi ultio iræ hæc,  
 » & non occaſio cupiditatis explendæ eſſet,  
 » parum fuit, quod ſemel in Sidicino agro,  
 » iterum in Campania ipſa legiones noſtras  
 » cecidere? Quæ eſt iſta tam infeſta ira,  
 » quam per duas acies fuſus ſanguis explere  
 » non potuerit? Adde huc populationem agro-  
 » rum, prædas hominum atque pecudum ac-  
 » tas, incendia villarum ac ruinas, omnia  
 » ferro ignique vaſtata. Hiſcine ira expleri  
 » non potuit? Sed cupiditas explenda eſt. Ea  
 » ad obpugnandam Capuam rapit. Aut delere  
 » urbem pulcherrimam, aut ipſi poſſidere  
 » volunt. Sed vos potius, Romani, beneficio  
 » veſtro occupate eam, quam illos habere  
 » per maleficium finatis. Non loquor apud  
 » recuſantem juſta bella populum; ſed tamen,  
 » ſi oſtenderitis auxilia veſtra, ne bello qui-

U. c. 412. » dem arbitror vobis opus fore. Usque ad nos  
 a. C. 340. » contemptus Samnitium pervenit, supra non  
 » escendit (k). Itaque umbra vestri auxilii,  
 » Romani, tegi possumus: quidquid deinde  
 » habuerimus, quidquid ipsi fuerimus, vestrum  
 » id omne existimaturi. Vobis arabitur ager  
 » Campanus, vobis Capua urbs frequentabi-  
 » tur: conditorum, parentum, Deorum in-  
 » mortalium numero nobis eritis. Nulla colo-  
 » nia vestra erit, quæ nos obsequio erga vos  
 » fideque superet. Adnuite, Patres conscripti,  
 » nutum numenque vestrum invictum Cam-  
 » panis, & jubete sperare, incolumem Ca-  
 » puam futuram. Qua frequentia omnium  
 » generum multitudinis prosequente creditis  
 » nos illinc profectos? quam omnia votorum  
 » lacrimarumque plena reliquisse? in qua  
 » nunc expectatione senatum populumque  
 » Campanum, conjuges, liberosque nostros  
 » esse? Stare omnem multitudinem ad por-  
 » tas, viam hinc ferentem prospectantes;  
 » certum habeo, quid illis nos, Patres con-  
 » scripti, sollicitis ac pendentibus animi re-  
 » nunciare jubeatis. Alterum responsum salu-  
 » tem, victoriam, lucem, ac libertatem; al-

(k) *ascendit Crev.*

» terum ominari horreo , quæ ferat. Proinde *U. c. 412.*  
 » ut aut de vestris futuris fociis atque ami- *a. C. 340.*  
 » cis , aut nusquam ullis futuris nobis , con-  
 » sulite. »

XXXI. SUBMOTIS deinde legatis , quum  
 consultus senatus esset , etsi magnæ parti urbs  
 maxima opulentissimaque Italiæ , uberrimus  
 ager marique propinquus ad varietates an-  
 nonæ horreum populi Romani fore videba-  
 tur ; tamen tanta utilitate fides antiquior fuit,  
 responditque ita ex auctoritate senatus con-  
 sul : « Auxilio vos , Campani , dignos censet  
 » senatus : sed ita vobiscum amicitiam institui  
 » par est , ne qua vetustior amicitia ac socie-  
 » tas violetur. Samnites nobiscum fœdere  
 » juncti sunt. Itaque arma , Deos prius , quam  
 » homines , violatura , adversus Samnites vo-  
 » bis negamus. Legatos , sicut fas jusque est ,  
 » ad socios atque amicos precatum mittemus ,  
 » ne qua vobis vis fiat. » Ad ea princeps legatio-  
 nis , ( sic enim domo mandatum adtulerant )  
 « Quandoquidem [ inquit ] nostra tueri adver-  
 » sus vim atque injuriam justa vi non vultis ,  
 » vestra certe defendetis. Itaque populum Cam-  
 » panum , urbemque Capuam , agros , delubra  
 » Deum , divina humanaque omnia in vestram ,

*Negatur  
 auxilium  
 Campanis.*

*U. c. 412.* » Patres conscripti , populique Romani ditio-  
*a. C. 340.* » nem dedimus; quidquid deinde patiemur ,

» dediticii vestri passuri. » Sub hæc dicta omnes,  
 manus ad consules tendentes, pleni lacrimarum  
 in vestibulo curiæ procubuerunt. Commoti

Patres vice fortunarum humanarum , si ille  
 præpotens opibus populus , luxuria superbia-  
 que clarus , a quo paullo ante auxilium fini-  
 timi petissent , adeo infractos gereret animos ,  
 ut se ipse suaque omnia potestatis alienæ

*Accipitur  
 illorum  
 deditio.*

faceret : tum jam fides agi visa , deditos non  
 prodi , nec facturum æqua Samnitium popu-  
 lum censebant , si agrum urbemque , per  
 deditionem factam populi Romani , obpug-

*Legatio  
 Romano-  
 rum ad  
 Samnites.*

narent. Legatos itaque extemplo mitti ad  
 Samnites placuit : data mandata , « ut preces  
 » Campanorum , responsum senatus amicitiae  
 » Samnitium memor , deditionem postremo  
 » factam , Samnitibus exponerent. Peterent  
 » pro societate amicitiaque , ut dediticiis suis  
 » parcerent : neque in eum agrum , qui po-  
 » puli Romani factus esset , hostilia arma in-  
 » ferrent. Si leniter agendo parum profice-  
 » rent , denunciarent Samnitibus populi Ro-  
 » mani senatusque verbis , ut Capua urbe  
 » Campanoque agro abstinerent. » Hæc le-

gatis agentibus in concilio Samnitium adeo *U. c. 412.*  
 est ferociter responsum, ut non solum gestu- *a. C. 340.*  
 ros se esse dicerent id bellum; sed magistra-  
 tus eorum e curia egressi, stantibus legatis,  
 præfectos cohortium vocarent; iisque clara  
 voce imperarent, ut prædatum in agrum  
 Campanum extemplo profiscerentur.

XXXII. HAC legatione Romam relata,  
 positis omnium aliarum rerum curis, Patres,  
 fecialibus ad res repetendas missis, belloque, *Bellum*  
 quia non redderentur, sollemni more indicto, *cum*  
 decreverunt, ut primo quoque tempore de *Samnitibus.*  
 ea re ad populum ferretur: jussuque populi  
 consules ambo cum duobus ab urbe exerciti-  
 bus profecti, Valerius in Campaniam, Cor-  
 nelius in Samnium, ille ad montem Gaurum,  
 hic ad Saticulam castra ponunt. Priori Vale-  
 rio Samnitium legiones (eo namque omnem  
 belli molem inclinaturam censebant) obcur-  
 runt. Simul in Campanos stimulabat ira, tam  
 promptos nunc ad ferenda, nunc ad arcessenda  
 adversus se auxilia. Ut vero castra Romana  
 viderunt, ferociter pro se quisque signum  
 duces poscere, adfirmare, eadem fortuna  
 Romanum Campano laturum opem, qua  
 Campanus Sidicino tulerit. Valerius, levibus

*U. c. 412.  
a. C. 340.*

*Consul  
Romanus  
suos ad  
prælium  
hortatur.*

certaminibus, tentandi hostis causa, haud ita multos moratus dies, signum pugnae proposuit, paucis suos adhortatus: « Ne novum » bellum eos novusque hostis terreret. Quid- » quid ab urbe longius proferrent arma, » magis magisque in inbelles gentes eos pro- » dire. Ne Sidicinorum Campanorumque cla- » dibus Samnitium aestimarent virtutem. Qua- » lescumque inter se certaverint, necesse » fuisse alteram partem vinci. Campanos qui- » dem haud dubie magis nimio luxu fluenti- » bus rebus molitiaque sua, quam vi hos- » tium, victos esse. Quid autem esse duo » prospera in tot seculis bella Samnitium ad- » versus tot decora populi Romani, qui » triumphos pene plures, quam annos ab ur- » be condita, numeret? qui omnia circa se, » Sabinos, Etruriam, Latinos, Hernicos, » Æquos, Volscos, Auruncos, domita armis » habeat? qui Gallos, tot præliis cæfos, » postremo in mare ac naves fuga compule- » rit? Quum gloria belli ac virtute sua quem- » que fretos ire in aciem debere, tum etiam » intueri, cujus ductu auspicioque ineunda » pugna sit: utrum, qui audiendus duntaxat » magnificus adhortator sit, verbis tantum



» ferox, operum militarium expers; an qui  
 » & ipse tela tractare, procedere ante signa,  
 » versari media in mole pugnae sciat. Facta  
 » mea, non dicta, vos, milites [inquit]  
 » sequi volo; nec disciplinam modo, sed  
 » exemplum etiam, a me petere. Non factio-  
 » nibus modo nec per coitiones usitatas no-  
 » bilibus, sed hac dextra, mihi tres consula-  
 » tus summamque laudem peperit. Fuit, quum  
 » hoc dici poterat: Patricius enim eras, &  
 » a liberatoribus patriae ortus; & eodem anno  
 » familia ista consulatum, quo urbs haec con-  
 » sulem, habuit. Nunc jam nobis Patribus  
 » vobisque plebeiis promiscuus consulatus pa-  
 » tet; nec generis, ut ante, sed virtutis est  
 » praemium. Proinde summum quodque spec-  
 » tate, milites, decus. Non, si mihi novum  
 » hoc Corvi cognomen Diis auctoribus ho-  
 » mines dedistis, Publicolarum vetustum fa-  
 » miliae nostrae cognomen memoria excessit.  
 » Semper ego plebem Romanam militiae do-  
 » mique, privatus, in magistratibus parvis  
 » magnisque, aequae tribunus ac consul, eo-  
 » dem tenore per omnes deinceps consulatus,  
 » colo atque colui. Nunc, quod instat, Diis  
 » bene juvantibus, novum atque integrum de  
 » Samnitibus triumphum mecum petite.

U. c. 412.  
 a. C. 340.

U. c. 412.  
a. C. 340.

Valerii  
Corvi  
ingenium.

Prælium  
cum  
Samniti-  
bus  
atrox.

XXXIII. NON alias militi familiarior dux fuit, omnia inter infimos militum haud gravate munia obeundo. In ludo præterea militari, quum velocitatis viriumque inter se æquales certamina ineunt, comiter facilis, vincere ac vinci vultu eodem; nec quemquam adspernari parem, qui se obferret; factis benignus pro re, dictis haud minus libertatis alienæ, quam suæ dignitatis, memor: & quo nihil popularius est, quibus artibus petierat magistratus, iisdem gerebat. Itaque universus exercitus, incredibili alacritate adhortationem profecutus ducis, castris egreditur. Prælium, ut quod maxime unquam, pari spe, utrimque æquis viribus, cum fiducia sui, sine contemptu hostium, commissum est. Samnitibus ferociam augebant novæ res gestæ & paucos ante dies geminata victoria; Romanis contra quadringentorum annorum decora, & conditæ urbi æqualis victoria: utrisque tamen novus hostis curam addebat. Pugna indicio fuit, quos gesserint animos: namque ita conflixerunt, ut aliquamdiu in neutram partem inclinarent acies. Tum consul, trepidationem injiciendam ratus, quando vi pelli non poterant, equitibus inmissis turbare pri-

ma signa hostium conatur : quos ubi nequid- *U. c. 412.*  
 quam tumultuantes in spatio exiguo volvere *a. C. 340.*  
 turmas vidit, nec posse aperire in hostes  
 viam, reiectus ad antesignanos legionum,  
 quum defiluisset ex equo, « Nostrum [ in-  
 quit ] » peditum illud, milites, est opus :  
 » agitedum, ut me videritis, quacumque in-  
 » cesserō in aciem hostium, ferro viam facien-  
 » tem, sic pro se quisque obvios sternite.  
 » Illa omnia, qua nunc erectæ micant hastæ,  
 » patefacta strage vasta cernetis. » Hæc dicta  
 dederat, quum equites consulis jussu discur-  
 runt in cornua, legionibus in mediam aciem  
 aperiunt viam. Primus omnium consul invadit  
 hostem; &, cum quo forte contulit gradum,  
 obtruncat. Hoc spectaculo accensi dextra læ-  
 vaque, ante se quisque, memorandum præ-  
 lium cient (1). Stant obnisi Samnites, quam-  
 quam plura accipiunt, quam inferunt, vul-  
 nera. Aliquamdiu jam pugnatum erat : atrox  
 cædes circa signa Samnitium, fuga ab nul-  
 ladum parte erat : adeo morte sola vinci  
 destinaverant animis. Itaque Romani, quum  
 & fluere jam lassitudine vires sentirent, &  
 diei haud multum superesset, (m) accensi

(1) *cient* Gron. Crev.

(m) *superesse* Gron. Crev.

*U. c. 412.  
a. C. 340.*

*Vincuntur  
Samnites  
in Campa-  
nia.*

ira concitant se in hostem. Tum primum re-  
ferri pedem atque inclinari rem in fugam ad-  
paruit; tum capi, occidi Samnis: nec super-  
fuissent multi, ni nox victoriam magis, quam  
proelium, diremisset. Et Romani fatebantur,  
numquam cum pertinacioris hoste conflictum:  
& Samnites, quum quæreretur, quænam  
prima causa tam obstinatos movisset in fu-  
gam? « Oculos sibi Romanorum ardere vi-  
» fos [aiebant] vefanosque vultus & furen-  
» tia ora: inde plus, quam ex alia ulla re,  
» terroris ortum. » Quem terrorem non  
pugnæ solum eventu, sed nocturna profec-  
tione, confessi sunt. Postero die vacuis hos-  
tium castris Romanus potitur: quo se omnis  
Campanorum multitudo gratulabunda effudit.

*Cornelii  
consulis in  
Samnio  
periculum.*

XXXIV. CETERUM hoc gaudium magna  
prope clade in Samnio foedatum est. Nam  
ab Saticula profectus Cornelius consul exer-  
citus incaute in saltum, cava valle pervium,  
circaque infestum ab hoste, induxit: nec  
prius, quam recipi tuto signa non poterant,  
inminentem capiti hostem vidit. Dum id  
moræ Samnitibus est, quoad totum in vallem  
infimam demitteret agmen, P. Decius tri-  
bunus militum conspicit unum editum in

faltu collem, imminentem hostium castris, *U. c. 412.*  
aditu arduum inpedito agmini, expeditis haud *a. C. 340.*  
difficilem. Itaque consuli territo animi, « Vi-  
» desne tu [inquit] A. Corneli, cacumen  
» illud supra hostem? Arx illa est spei salu-  
» tisque nostræ, si eam, quam cæci reliquere  
» Samnites, inpigre capimus. Ne (n) tu mihi  
» plus, quam unius legionis principes hasta-  
» tosque, dederis : cum quibus ubi evasero  
» in summum, perge hinc omni liber metu,  
» teque & exercitum ferva : neque enim  
» moveri hostis, subjectus nobis ad omnes  
» ictus, sine sua pernicie poterit. Nos deinde  
» aut fortuna populi Romani, aut nostra  
» virtus expediet. » Conlaudatus ab consule,  
accepto præsidio, vadit occultus per saltum;  
nec prius ab hoste est visus, quam loco,  
quem petebat, adpropinquavit. Inde admi-  
ratione paventibus cunctis, quum omnium in  
se vertisset oculos, & spatium consuli dedit  
ad subducendum agmen in æquiorem locum,  
& ipse in summo constitit vertice. Samnites,  
dum huc illuc signa vertunt, utriusque rei  
amissa occasione, neque insequi consulem,  
nisi per eandem vallem, in qua paullo ante

*U. c. 412.* subjectum eum telis suis habuerant, possunt ;  
*a. C. 340.*

nec erigere agmen in captum super se ab Decio tumulum. Sed quum ira in hos magis, qui fortunam gerendæ rei eripuerant, tum propinquitas loci atque ipsa paucitas incitat: & nunc circumdare undique collem armatis volunt, ut a consule Decium intercludant; nunc viam patefacere, ut degressos in vallem adoriantur. Incertos quid agerent, nox obpressit. Decium primum spes tenuit, cum subeuntibus in adversum collem ex superiore loco se pugnaturum: deinde admiratio incescit, quod nec pugnam inirent, nec, si ab eo consilio iniquitate loci deterrerentur, opere se valloque circumdarent. Tum centurionibus ad se vocatis, « Quænam illa inscitia » belli ac pigritia est? aut quonam modo » isti ex Sidicinis Campanisque victoriam » pepererunt? Huc atque illuc signa moveri, ac modo in unum conferri, modo » educi videtis. Opus quidem incipit nemo, » quum jam circumdati vallo potuerimus esse. » Tum vero nos similes istorum simus, si » diutius hic moremur, quam commodum » sit. Agitedum, ite mecum; ut, dum lucis » aliquid superest, quibus locis præsidia po-

» nant, qua pateat hinc exitus, exploremus.» *U. c. 412.*  
 Hæc omnia fagulo gregali amictus, centurio- *a. C. 340.*  
 nibus item manipularium militum habitu duc-  
 tis, ne ducem circumire hostes notarent,  
 perlustravit.

XXXV. VIGILIIS deinde dispositis, ceteris  
 omnibus tesseram dari jubet: « ubi secundæ  
 » vigiliæ buccina datum signum esset, armati  
 » cum silentio ad se convenirent (o). » Quo  
 ubi, sicut edictum erat, taciti convenerunt,  
 « Hoc silentium, milites, [ inquit ] omisso  
 » militari adfensu, in me audiendo servandum  
 » est. Ubi sententiam meam vobis peregero,  
 » tum, quibus eadem placebunt, in dextram  
 » partem taciti transibitis: quæ pars major  
 » erit, eo stabitur consilio. Nunc, quæ  
 » mente agitem, audite. Non fuga delatos,  
 » nec inertia relictos hic vos circumvenit  
 » hostis. Virtute cepistis locum; virtute hinc,  
 » oportet, evadatis. Veniendo huc exercitum  
 » egregium populi Romani servastis; erum-  
 » pendo hinc vosmet ipsos servate. Digni  
 » estis: qui pauci pluribus opem tuleritis,  
 » ipsi nullius auxilio egueritis. Cum eo hoste  
 » res est, qui hesterno die delendi omnis

*Oratio  
 Decii ad  
 milites.*

*U. c. 412.* » exercitus fortuna per focordiam ufus non fit;  
*a. C. 340.*

» hunc tam obportunum collem inminentem  
» capiti fuo non ante viderit, quam captum a  
» nobis; nos tam paucos tot ipſi millibus homi-  
» num nec adſcenſu arcuerint, nec tenentes  
» locum, quum diei tantum ſupereſſet, vallo  
» circumdederint. Quem videntem ac vigi-  
» lantem ſic eluſeritis, ſopitum, oportet, fal-  
» latis; immo neceſſe eſt. In eo enim loco  
» res ſunt noſtræ, ut vobis ego magis neceſ-  
» ſitatis veſtræ index, quam conſilii auctor,  
» ſim. Neque enim, maneatis, an abeatis  
» hinc, deliberari poteſt; quum, præter ar-  
» ma & animos armorum memores, nihil  
» vobis fortuna reliqui fecerit, fameque & ſiti  
» moriendum ſit, ſi plus, quam viros ac  
» Romanos decet, ferrum timeamus. Ergo  
» una eſt ſalus erumpere hinc atque abire.  
» Id aut interdiu aut nocte faciamus, opor-  
» tet. Ecce autem aliud minus dubium:  
» quippe ſi lux exſpectetur, quæ ſpes eſt,  
» non vallo perpetuo ſoſſaque nos ſepturum  
» hoſtem? qui nunc corporibus ſuis ſubjectis  
» undique cinxerit, ut videtis, collem. Atqui,  
» ſi nox obportuna eſt eruptioni, ſicut eſt,  
» hæc proſecto noctis aptiſſima hora eſt.



» Signo secundæ vigiliæ convenistis, quod *U. c. 412.*  
 » tempus mortales somno altissimo premit. *a. C. 340.*  
 » Per corpora sopita vadetis, vel silentio in-  
 » cautos fallentes, vel sentientibus clamore  
 » subito pavorem injecturi. Me modo sequi-  
 » mini, quem secuti estis. Ego eandem,  
 » quæ duxit huc, sequar fortunam. Quibus  
 » hæc salutaria videntur, agitedum, in dex-  
 » tram partem pedibus transite.»

XXXVI. OMNES transierunt, vadentemque  
 per intermissa custodiis loca Decium secuti  
 sunt. Jam evaserant media castra; quum su-  
 perscandens vigilum strata somno corpora  
 miles offenso scuto præbuit sonitum: quo  
 excitatus vigil quum proximum movisset,  
 erectique alios concitarent, ignari cives an  
 hostes essent, præsidium erumperet, an con-  
 sul castra cepisset; Decius, quum non fal-  
 lerent, clamorem tollere jussis militibus,  
 torpidos somno insuper pavore exanimat:  
 quo præpediti, nec arma inpigre capere, nec  
 obsistere, nec insequi poterant. Inter trepi-  
 dationem tumultumque Samnitium, præsidium  
 Romanum, obviis custodibus cæsis, ad castra  
 consulis pervadit. Aliquantum supererat noc-  
 tis, jamque in tuto videbantur esse; quum

U. c. 412. Decius, « Maſti virtute [ inquit ] milites  
 a. C. 340. » Romani , eſte. Veſtrum iter ac reditum  
*Decius ad* » omnia ſecula laudibus ferent. Sed ad conſpi-  
*exercitum* » ciendam tantam virtutem luce ac die opus  
*incolumis* » eſt. Nec vos digni eſtis, quos cum tanta  
*redit.* » gloria in caſtra reduces ſilentium ac nox  
 » tegat. Hic lucem quieti operiamur.» Diſtis  
 obtemperatum : atque ubi primum inluxit,  
 præmiſſo nuncio ad conſulem in caſtra , in-  
 genti gaudio concitantur : & , teſſera data,  
 incolumes reverti , qui ſua corpora pro ſalute  
 omnium haud dubio periculo objeciſſent , pro  
 ſe quiſque obviam effuſi laudant , gratulan-  
 tur , ſingulos univerſosque ſervatores ſuos  
 vocant : Diis laudes gratesque agunt , Decium  
 in cœlum ferunt. Hic Decii caſtrenſis trium-  
 phus fuit , incedentis per media caſtra cum  
 armato præſidio , conſectis in eum omnium  
 oculis , & omni honore tribunum conſuli  
 æquantibus. Ubi ad prætorium ventum eſt ,  
 conſul claffico ad concionem convocat : or-  
 ſusque meritas Decii laudes , interfante ipſo  
 Decio , diſtulit concionem ; qui auctor om-  
 nia poſthabendi , dum occaſio in manibus  
 eſſet , perpulit conſulem , ut hoſtes , & noc-  
 turno pavore adtonitos , & circa collem  
 caſtel-

castellatim dissipatos, adgrederetur : credere etiam aliquos , ad se sequendum emissos, per saltum vagari. Iussæ legiones arma capere : egressæque castris, quum per exploratores notior jam saltus esset, via patientiore ad hostem ducuntur. Quem incautum improviso adortæ, quum palati passim Samnitium milites , plerique inermes, nec coire in unum, nec arma capere, nec recipere intra vallum se possent, paventem primum in castra compellunt , deinde castra ipsa, turbatis stationibus, capiunt. Perfertur circa collem clamor : fugatque ex suis quemque præsidiiis. Ita magna pars absenti hosti cessit. Quos intra vallum egerat pavor ( fuere autem ad triginta millia ) omnes cæsi ; castra direpta.

*U. c. 412.  
a. C. 340.*

*Vincuntur  
Samnites.*

XXXVII. ITA rebus gestis , consul , advocata concione , P. Decii non cœptas solum ante , sed cumulas nova virtute laudes peragit : & præter militaria alia dona , aurea corona eum & centum bubus ; ( *p* ) eximioque uno albo opimo auratis cornibus, donat. Milites , qui in præsidio simul fuerant, duplici frumento in perpetuum , in præsentia ( *p* ) *bobus* Gron. Crev. & sic deinceps.

*Decius  
donatus.*

*U. c. 412.* singulis bubus binisque privis tunicis donati.  
*a. C. 340.*

Secundum consulis donationem legiones gramineam coronam obsidionalem, clamore donum adprobantes, Decio inponunt. Altera corona, ejusdem honoris index, a præsidio suo inposita est. His decoratus insignibus bovem eximium Marti inmolavit; centum boves militibus dono dedit, qui secum in expeditione fuerant. Iisdem militibus legiones libras farris & sextarios vini contulerunt: omniaque ea ingenti alacritate per clamorem militarem, indicem omnium adfensus, gerebantur. Tertia pugna ad Sueffulam commissa est: qua fugatus a M. Valerio Samnitium exercitus, omni robore juventutis domo adcito, certamine ultimo fortunam experiri statuit. Ab Sueffula nuncii trepidi Capuam, inde equites citati ad Valerium consulem, opem oratum, veniunt. Confestim signa mota: relictisque impedimentis castrorum valido præsidio, raptim agitur agmen: nec procul ab hoste locum perexiguum (ut quibus, præter equos, ceterorum jumentorum calonumque turba abesset) castris cepit. Samnitium exercitus, velut haud ulla mora pugnae futura esset aciem instruit: deinde, postquam nemo

*Tertia  
 pugna cum  
 Samniti-  
 bus.*

obvius ibat, infestis signis ad castra hostium succedit. Ibi ut militem in vallo vidit, missique ab omni parte exploratum, quam in exiguum orbem contracta castra essent, paucitatem inde hostium colligentes, retulerunt; fremere omnis acies, complendas esse fossas scindendumque vallum, & in castra inrumpendum: transactumque ea temeritate bellum foret, ni duces continuissent inpetum militum. Ceterum, quia multitudo sua comaeatibus gravis, & prius sedendo ad Sueffulam, & tum (p) certaminis mora, haud procul ab rerum omnium inopia esset; placuit, dum inclusus paveret hostis, frumentatum per agros militem duci: interim & Romano, qui expeditus, quantum humeris inter arma geri posset frumenti, secum adtulisset, defutura omnia. Consul palatos per agros quum vidisset hostes, stationes infrequentes relictas, paucis milites adhortatus, ad castra obpugnanda ducit. Quæ quum primo clamore atque inpetu cepisset, pluribus hostium in tentoriis suis, quam in portis valloque, cæsis, signa captiva in unum locum conferri iussit; relictisque duabus legionibus custodiæ &

*U. c. 412.  
a. C. 340.*

*U. c. 412.*  
*a. C. 340.* præsidiî causa, gravi edicto monitis, ut;  
 donec ipse revertisset, præda abstinere;  
 profectus agmine instructo, quum præmissus  
 eques velut indagine dissipatos Samnites age-  
 ret, cædem ingentem fecit: nam neque quo  
 signo coirent inter se, neque, utrum castra  
 peterent, an longiorem intenderent fugam,  
 territis constare poterat. Tantumque fugæ ac  
 formidinis fuit, ut ad quadraginta millia  
 scutorum, nequaquam tot cæsis, & signa  
 militaria cum iis, quæ in castris capta erant,  
 ad centum septuaginta ad consulem defer-  
 rentur. Tum in castra hostium reditum: ibi-  
 que omnis præda militi data.

XXXVIII. Hujus certaminis fortuna &  
 Faliscos, quum in induciis essent, fœdus pe-  
 tere ab senatu coëgit; & Latinos, jam exer-  
 citibus comparatis, ab Romano in Pelignum  
 vertit bellum. Neque ita rei gestæ fama Italiæ  
 se finibus tenuit: sed Carthaginenses quoque  
 legatos gratulatum Romam misere cum co-  
 ronæ aureæ dono, quæ in Capitolio in Jovis  
 cella poneretur: fuit pondo viginti quinque.  
 Consules ambo de Samnitibus triumpharunt,  
 sequente Decio insigni cum laude donisque:  
 quum incondito militari joco haud minus tri-

*Carthagi-  
 nienses le-  
 gati.  
 Consules  
 trium-  
 phant.*

buni celebre nomen, quam consulum, esset. *U. c. 412.  
a. C. 340.*

Campanorum deinde Sueffanorumque auditæ legationes : precantibusque datum, ut præsidium eo in hiberna mitteretur, quo Samnitium excursions arcerentur. Jam tum minime salubris militari disciplinæ Capua instrumento omnium voluptatum delenitos mili-

tum animos avertit a memoria patriæ : inibanturque consilia in hibernis eodem scelere adimendæ Campanis Capuæ, per quod illi eam antiquis cultoribus ademissent : « Neque

*Consilia  
Rom. mi-  
litum de  
Capua oc-  
cupanda.*

» inmerito suum ipsorum exemplum in eos  
» versurum. Cur autem potius Campani agrum  
» Italiæ uberrimum, dignam agro urbem,  
» qui nec se nec sua tutari possint, quam  
» victor exercitus haberet, qui suo sudore  
» ac sanguine inde Samnites depulisset? An  
» æquum esse, dediticios suos illa fertilitate  
» atque amœnitate perfrui; se, militando  
» fessos, in pestilente atque arido circa ur-  
» bem solo luctari, aut in urbe insidentem  
» tabem crescentis in dies fœnoris pati? »

Hæc agitata occultis conjurationibus, necdum vulgata in omnes consilia, invenit novus consul C. Marcius Rutilus, cui Campania forte provincia evenerat, Q. Servilio col-

*U. c. 413.  
a. C. 339.  
C. Marcius  
IV. Q.  
Servilio  
Coss.*

*U. c. 413.* lega ad urbem relicto. Itaque quum omnia  
*a. C. 339.* ea, sicut gesta erant, per tribunos comperta haberet, & ætate & usu doctus (quippe qui jam quartum consul esset, dictatorque & censor fuisset) optimum ratus, differendo spem, quandocumque vellent, consilii exsequendi, militarem inpetum frustrari; rumorrem dissipat, in iisdem oppidis & anno post præsidia hibernatura; divisa enim erant per Campaniæ urbes, manaverantque a Capua consilia in exercitum omnem. Eo laxamento cogitationibus dato, quievit in præsentia feditio.

*Arte  
 eluduntur.*

XXXIX. CONSUL, educto in æstiva milite, dum quietos Samnites habebat, exercitum purgare missionibus turbulentorum hominum instituit; aliis emerita dicendo stipendia esse, alios graves jam ætate, aut viribus parum validos. Quidam in commeatus mittebantur, singuli primo, deinde & cohortes quædam, quia procul ab domo ac rebus suis hibernassent. Per speciem etiam militarium usuum, quum alii alio mitterentur, magna pars ablegari: quam multitudinem consul alter Romæ prætorque, alias ex aliis fingendo moras, retinebat. Et primo quidem, ignari lu-



dificationis, minime inviri domos revolvebant. *U. c. 413.*  
 Postquam neque reverti ad signa primos, *a. C. 339.*  
 nec ferme alium, quam qui in Campania  
 hibernassent, præcipueque ex iis seditionis  
 auctores mitti viderunt; primum admiratio,  
 deinde haud dubius timor incessit animos,  
 consilia sua emanasse: « Jam quæstiones,  
 » jam indicia, jam occulta singulorum sup-  
 » plicia, inpotensque & crudele consulum ac  
 » Patrum in se regnum passuros. » Hæc, qui  
 in castris erant, occultis sermonibus ferunt,  
 (q) nervos conjurationis ejectos arte con-  
 sulis cernentes. Cohors una, quum haud  
 procul Anxure esset, ad Lautulas saltu an-  
 gusto inter mare ac montes confedit, ad ex-  
 cipiendos, quos consul aliis atque aliis (ut  
 ante dictum est) causis mittebat. Jam valida  
 admodum numero manus erat; nec quidquam  
 ad justî exercitus formam, præter ducem,  
 deerat. Incompositi itaque prædantes in agrum  
 Albanum perveniunt, & sub jugo Albæ lon-  
 gæ castra vallo cingunt. Perfecto inde opere,  
 reliquum diei de imperatore fumendo senten-  
 tiis decertant, nulli ex præsentibus satis fiden-  
 tes. « Quem autem ab Roma posse exciri?

*Seditiofo-  
rum exer-  
citus col-  
ligitur.*

(q) *ferunt* Gron. Crev.

*U. c. 413.  
a. C. 339.*

«quem Patrum aut plebis esse, qui aut se  
» tanto periculo sciens obferat, aut cui ex  
» injuria insanientis exercitus caussa recte  
» committatur? » Postero die, quum eadem  
deliberatio teneret, ex prædatoribus vagis  
quidam compertum adtulerunt, T. Quinctium  
in Tusculano agrum colere, urbis honorum-  
que inmemorem. Patriciæ hic vir gentis erat:  
cui quum militiæ, magna cum gloria actæ,  
finem pes alter ex vulnere claudus fecisset,  
ruri agere vitam procul ambitione ac foro  
constituit. Nomine audito, extemplo agno-  
vere virum: &, quod bene verteret, adciri  
jusserunt. Sed parum spei erat, voluntate  
quidquam facturum: vim adhiberi ac metum  
placuit. Itaque silentio noctis quum tectum  
villæ, qui ad id missi erant, intrassent; som-  
no gravem (r) Quinctium obpressum, nihil  
medium, aut imperium atque honorem, aut,  
ubi resistaret, mortem, ni sequeretur, de-  
nunciantes, in castra pertraxerunt. Impera-  
tor extemplo adveniens adpellatus; insignia-  
que honoris exterrito subitæ rei miraculo  
deferunt, & ad urbem ducere jubent. Suo  
magis inde inpetu, quam consilio ducis, con-

*Eligunt  
ducem  
T. Quinc-  
tium.*

(r) *gravi Gron. Crev.*

vulsis signis, infesto agmine ad lapidem octavum viæ, quæ nunc Appia est, perveniunt: iissentque confestim ad urbem, ni venire contra exercitum, dictatoremque adversus se M. Valerium Corvum dictum audissent, & magistrum equitum L. Æmilium Mamercinum.

*U. c. 413.*

*a. C. 339.*

*Valerius*

*Corvus*

*dictator.*

XL. UBI primum in conspectum ventum est, arma signaque agnovere; extemplo omnibus memoria patriæ iras permulsi. Nondum erant tam fortes ad sanguinem civilem, nec, præter externa, noverant bella: ultimaque rabies secessio ab suis habebatur. Ita jam duces, jam milites utrimque congressus quærere ad conloquia. Quinctius, quem armorum etiam pro patria fatietas teneret, nedum adversus patriam; Corvus, omnes caritate cives, præcipue milites, & ante alios suum exercitum, complexus, ad conloquium processit. Cognito ei extemplo haud minor ab adversariis verecundia, quam ab suis silentium, datum: « Deos [inquit] in- » mortales, milites, vestros, publicos, meos- » que, ab urbe proficiscens ita adoravi, ve- » niamque supplex poposci, ut mihi de vo- » bis concordæ partæ gloriam, non victo-

*Dictatoris  
ad sedito-  
sos oratio.*

*U. c. 413.* » riam, darent. Satis fuit eritque, unde belli  
*a. C. 339.* » decus pariat: hinc pax petenda est. Quod  
 » Deos immortales inter nuncupanda vota  
 » expoposci, ejus me compotem voti vos  
 » facere potestis; si meminisse vultis, non  
 » vos in Samnio, nec in Volscis, sed in  
 » Romano solo castra habere; si illos colles,  
 » quos cernitis, patriæ vestræ esse; si hunc  
 » exercitum civium vestrorum; si me consu-  
 » lem vestrum, cujus ductu auspicioque  
 » priore anno bis legiones Samnitium fudistis,  
 » bis castra vi cepistis. Ego sum M. Valerius  
 » Corvus, milites, cujus vos nobilitatem  
 » beneficiis erga vos, non injuriis, sensistis;  
 » nullius superbæ in vos legis, nullius cru-  
 » delis senatusconsulti auctor; in omnibus  
 » meis imperiis in me severior, quam in vos.  
 » Ac si cui genus, si cui sua virtus, si cui  
 » etiam majestas, si cui honores subdere  
 » spiritus potuerunt; iis eram natus, id spe-  
 » cimen mei dederam, ea ætate consulatum  
 » adeptus eram, ut potuerim, tres & viginti  
 » annos natus, consul Patribus quoque ferox  
 » esse, non solum plebi. Quod meum factum  
 » dictumve consulis gravius, quam tribuni;  
 » audistis? Eodem tenore duo insequentes

» consulatus gessi; eodem hæc imperiosa dic- *U. c. 413.*  
 » tatura geretur: ut neque in hos meos & *a. C. 339.*  
 » patriæ meæ milites mitior, quam in vos,  
 » horreo dicere, hostes. Ergo vos prius in  
 » me strinxeritis ferrum, quam in vos ego.  
 » Istinc signa canent, istinc clamor prius  
 » incipiet atque inpetus, si dimicandum est.  
 » Inducite in animum, quod non induxerunt  
 » patres avique vestri; non illi, qui in Sa-  
 » crum montem secesserunt; non hi, qui  
 » postea Aventinum infederunt. Exspectate,  
 » dum vobis singulis, ut olim Coriolano,  
 » matres conjugesque crinibus passis obviæ ab  
 » urbe veniant. Tum Volscorum legiones, quia  
 » Romanum habebant ducem, quieverunt;  
 » vos, Romanus exercitus, ne (s) destite-  
 » ritis in pio bello? T. Quincti, quocumque  
 » istic loco, seu volens, seu invitus, consti-  
 » tisti, si dimicandum erit, tum tu in novis-  
 » simos te recipito: fugeris etiam honestius,  
 » tergumque civi dederis, quam pugnaveris  
 » contra patriam. Nunc ad pacificandum bene  
 » atque honeste inter primos stabis, & con-  
 » loquii hujus salutaris interpretes fueris. Postu-  
 » late æqua, & ferte: quamquam vel iniquis

*U. c. 413.  
a. C. 339.*

*T. Quinctius suos  
ad pacem  
hortatur.*

» standum est potius, quam inpias inter nos  
» conferamus manus. » T. Quinctius plenus  
lacrimarum, ad suos versus, « Me quoque  
» [inquit] milites, si quis usus mei est, me-  
» liorem pacis, quam belli, habetis ducem.  
» Non enim illa modo Volscus aut Samnis,  
» sed Romanus, verba fecit; vester consul,  
» vester imperator, milites: cujus auspicia  
» pro vobis experti, nolite adversus vos  
» velle experiri. Qui pugnarent vobiscum  
» infestius, & alios duces senatus habuit:  
» qui maxime vobis, suis militibus, parceret,  
» cui plurimum vos imperatori vestro crede-  
» retis, eum elegit. Pacem, etiam qui vin-  
» cere possunt, volunt: quid nos velle oportet?  
» Quin, omissis ira & spe, fallacibus  
» auctoribus, nos ipsos nostraque omnia  
» cognitæ permittimus fidei. »

*Seditio  
composita.*

XLI. ADPROBANTIBUS clamore cunctis,  
T. Quinctius, ante signa progressus, in po-  
testate dictatoris milites fore dixit: oravit,  
(t) ut causam miserorum civium susciperet:  
susceptamque eadem fide, qua rempublicam  
administrare solitus esset, tueretur. « Sibi se  
» privatim nihil cavere: nolle alibi, quam

(t) *oravitque Gron. Crev.*

» in innocentia , spem habere. Militibus ca- *U. c. 413.*  
 » vendum , quod apud Patres semel plebi , *a. C. 339.*  
 » iterum legionibus cautum sit , ne fraudi se-  
 » cessio esset. » Quinctio conlaudato , ceteris bonum animum habere iussis , dictator , equo citato ad urbem revector , auctoribus Patribus , tulit ad populum in luco Petelino , ne cui militum fraudi secessio esset. Oravit etiam bona venia Quirites , ne quis eam rem joco seriove cuiquam exprobraret. Lex quoque sacrata militaris lata est , ne cuius militis scripti nomen , nisi ipso volente , deleretur , additumque legi , ne quis , ubi tribunus militum fuisset , postea ordinum ductor esset. Id propter P. Salonium postulatum est ab conjuratis ; qui alternis prope annis & tribunus militum , & primus centurio erat , quem nunc primipili adpellant. Huic infensi milites erant , quod semper adversatus novis consiliis fuisset , & ne (u) particeps eorum esset , qui ab Lautulis fugissent. Itaque quum hoc unum propter Salonium ab senatu non inpetraretur ; tum Salonius , obtestatus Patres conscriptos , ne suum honorem pluris , quam concordiam civitatis , aestimarent , perpulit , ut id quoque

(u) & ne l. nec Gron. Crev.

U. c. 413. ferretur. Æque inpotens postulatam fuit, ut  
a. C. 339. de (x) stipendio equitum (merebant autem  
 triplex ea tempestate) æra demerentur, quod  
 adversati conjurationi fuissent.

XLII. PRÆTER hæc invenio apud quosdam,  
 L. Genucium, tribunum plebis, tulisse ad  
 populum, ne fœnerare liceret : item aliis  
 plebiscitis cautum, ne quis eundem magistra-  
 tum intra decem annos caperet; neu duos  
 magistratus uno anno gereret; utique lice-  
 ret consules ambos plebeios creari. Quæ si  
 omnia concessa sunt plebi, adparet, haud  
 parvas vires defectionem habuisse. Aliis an-  
 nalibus proditum est, neque dictatorem Va-  
 lerium dictum, sed per consules omnem rem  
 actam : neque, antequam Romam veniretur,  
 sed Romæ, eam multitudinem conjuratorum  
 ad arma consternatam esse : nec in T. Quinc-  
 tii villam, sed in ædes C. Manlii, nocte in-  
 petum factum, eumque a conjuratis compre-  
 hensum, ut dux fieret : inde ad quartum la-  
 pidem profectos loco munito confedis-  
 se : nec ab ducibus mentionem concordiae ortam; sed  
 repente, quum in aciem armati exercitus  
 processissent, salutationem factam : & per-

(x) *de del. Gron.*



mixtos dextras jungere, ac complecti inter *U. c. 413;*  
 se lacrimantes milites cœpisse : coactosque *a. C. 339.*  
 consules, quum viderent averfos a dimica-  
 tione militum animos, retulisse ad Patres de  
 concordia reconcilianda. Adeo nihil, præter-  
 quam seditionem fuisse, eamque compositam,  
 inter antiquos rerum auctores constat. Et  
 hujus fama seditionis, & susceptum cum  
 Samnitibus grave bellum, aliquot populos  
 ab Romana societate avertit : &, præter La-  
 tinorum infidum jam diu fœdus, Privernates  
 etiam Norbam atque Setiam, finitimas colo-  
 nias Romanas, incursione subita depopulati  
 sunt.

# EPITOME

## LIBRI OCTAVI LIVIANI

**L**ATINI cum Campanis defecerunt, & missis legatis ad senatum, conditionem tulerunt, ut, si pacem habere vellent, alterum ex Latinis consulem facerent. Qua legatione perlata, prætor eorum Annius de Capitolio ita prolapsus est, ut exanimaretur. T. Manlius consul filium, quod contra edictum adversus Latinos, quamvis prospere, pugnasset, securi percussit. Laborantibus in acie Romanis, P. Decius, tunc consul cum Manlio, devovit se pro exercitu: & concitato equo quum in medios hostes se intulisset, interfectus, morte sua Romanis victoriam restituit. Latini in deditionem venerunt. T. Manlio in urbem reverso nemo ex juventute obviam processit. Minucia virgo Vestalis incesti damnata est. Ausonibus victis, in oppidum ex iis captum Cales colonia deducta est. Item Fregellæ colonia deductæ sunt. Veneficium complurium matronarum depre-

deprehenſum eſt : quarum plurimæ ſtatim  
epotis medicaminibus perierunt. Lex de  
veneficio tunc primum conſtituta eſt. Pri-  
vernatibus, quum rebellaſſent, victis civi-  
tas data eſt. Palæpolitani, bello & obſi-  
dione victi, in deditionem venerunt. P.  
Publilio, qui eos obfederat, primo &  
imperium prolatum, & pro conſule decre-  
tus triumphus. Plebs nexu liberata eſt  
propter L. Papirii creditoris libidinem,  
qui C. Publilio debitori ſuo ſtuprum in-  
ferre voluerat. Quum L. Papirius dicta-  
tor reverſus in urbem ab exercitu eſſet  
propter auſpicia repetenda, Q. Fabius  
magiſter equitum, occaſione rei bene ge-  
rendæ invitatus, contra ediſtum ejus  
proſpere adverſus Samnites pugnavit. Ob  
eam cauſſam quum dictator de magiſtro  
equitum ſupplicium ſumturus videretur,  
Fabius Romam profugit : &, quum  
cauſſa parum proficeret, populi precibus  
donatus eſt. Res præterea contra Samni-  
tes proſpere geſſas continet.

---

# LIBER VIII

## I.

U. C. 414.  
a. C. 338.

C. Plautio

II. L.

Æmilio

Coss.

Victi Pri-  
vernares.

Cum Vols-  
cis dubio  
Marte  
pugnatum.

**J**AM consules erant C. Plautius secundum, L. Æmilius Mamercinus; quum Setini Norbanique Romam, nuncii defectionis Privernatium, cum querimoniis acceptæ cladis venerunt. Volscorum item exercitum, duce Antiati populo, confedisſe ad Satricum, adlatum est. Utrumque bellum Plautio forte evenit. Prius ad Privernum profectus exemplo acie conflixit. Haud magno certamine devicti hostes: oppidum captum redditumque Privernatibus, præsidio valido inposito: agri partes duæ ademptæ. Inde victor exercitus Satricum contra Antiates ductus. Ibi magna utrimque cæde atrox prælium fuit: & quum tempeſtas eos, neutro inclinata spe, dimicantes diremiſſet, Romani, nihil eo certamine tam ambiguo fessi, in poſterum diem prælium parant. Volscis, recensentibus quos viros in acie amiſſent, haudquaquam idem animus ad iterandum periculum fuit. Nocte pro victis Antium agmine trepido, fauciis ac parte inpedimentorum relicta,

abierunt. Armorum magna vis tum inter  
 cæsa corpora hostium, tum in castris inventa  
 est. « Ea Luæ matri dare se, » consul dixit:  
 finesque hostium usque ad oram maritimam  
 est depopulatus. Alteri consuli Æmilio, in-  
 gressio Sabellum agrum, non castra Samni-  
 tium, non legiones usquam obpositæ. Ferro  
 ignique vastantem agros legati Samnitium  
 pacem orantes adeunt; a quo rejecti ad se-  
 natum, potestate facta dicendi, positis fero-  
 cibus animis, pacem sibi ab Romanis, belli-  
 que jus adversus Sidicinos petierunt. « Quæ  
 » se eo justius petere, quod & (a) in ami-  
 » citiam populi Romani secundis suis rebus,  
 » non adversis, ut Campani, venissent: &  
 » adversus Sidicinos fumerent arma, suos  
 » semper hostes, populi Romani numquam  
 » amicos, qui nec, ut Samnites, in pace  
 » amicitiam, ut Campani, auxilium in bello  
 » petissent, nec in fide populi Romani, nec  
 » in (b) ditione essent.

U. c. 414.  
 a. C. 338.

*Lua mater.*

*Samnites  
 legatos  
 mittunt  
 Romanis.*

II. QUUM de postulatis Samnitium Ti.  
 Æmilius prætor senatum consuluisset, red-  
 dendumque his fœdus Patres censuissent,  
 prætor Samnitibus respondit: « Nec quo

(a) & del. Gron. (b) in del. Gron.

*U. c. 414.  
a. C 338.*

» minus perpetua cum eis amicitia esset, per  
 » populum Romanum stetisse : nec contradici;  
 » quin, quoniam ipsos belli culpa sua con-  
 » tracti tædium ceperit, amicitia de integro  
 » reconcilietur. Quod ad Sidicinos adtineat,  
 » (c) nihil intercedi, quo minus Sam-  
 » niti populo pacis bellicque liberum arbi-  
 » trium sit. » Fœdere isto, quum domum  
 revertissent, extemplo inde exercitus Roma-  
 nus deductus, annuo stipendio & trium men-  
 sium frumento accepto; quod pepigerat con-  
 sul, ut tempus induciis daret, quoad legati  
 redissent. Samnites, copiis iisdem, quibus  
 usi adversus Romanum bellum fuerant, con-  
 tra Sidicinos profecti, haud in dubia spe  
 erant mature urbis hostium potiundæ. Tum  
 ab Sidicinis deditio prius ad Romanos cœpta  
 fieri est : dein, postquam Patres ut feram  
 eam ultimaque tandem necessitate expressam  
 adspernabantur, ad Latinos jam sua sponte in  
 arma motos facta est. Ne Campani quidem  
 (adeo injuriæ Samnitium, quam beneficii  
 Romanorum, memoria præsentior erat) his  
 se armis abstinuere. Ex his tot populis unus

(c) *adtinet Gron. Crev.*

ingens exercitus, duce Latino fines Samnitium ingressus, plus populationibus, quam prœliis, cladium fecit. Et, quamquam superiores certaminibus Latini erant, haud inviti, ne sæpius dimicandum foret, agro hostium excessere. Id spatium Samnitibus datum est Romam legatos mittendi. Qui quum adissent (d) senatum, conquesti eadem se foederatos pati, quæ hostes essent passi, precibus infimis petiere, « ut satis ducerent Romani victoriam, quam Samnitibus ex Campano Sidicinoque hoste eripuissent: ne vinci etiam se ab ignavissimis populis finerent. Latinos Campanosque, si sub ditione populi Romani essent, pro imperio arcerent Samniti agro; sin imperium abnuerent, armis coërcerent. » Adversus hæc responsum anceps datum, quia fateri pigebat, in potestate sua Latinos jam non esse, timebantque, ne arguendo abalienarent: « Campanorum aliam conditionem esse, qui non foedere, sed per deditionem, in fidem venissent; itaque Campanos, seu velint, seu nolint, quieturos. In foedere Latino nihil esse,

*U. c. 414.  
a. C. 338.*

*Latini  
vastant  
agros Samnitium.*

*Id queruntur Samnites apud Romanos.*

*Responsum Romanorum anceps.*

(d) *adiissent.* Gron. Crev.

*U. c. 414.  
a. C. 338.* » quo (e) bellare, cum quibus ipsi velint,  
» prohibeantur.

*Latini  
occulte  
moliuntur  
bellum in  
Roma*

III. QUOD responsum ficut dubios Samnites, quidnam facturum Romanum censerent, dimisit, ita Campanos metu abalienavit; Latinos, velut nihil jam non concedentibus Romanis, ferociores fecit. Itaque, per speciem adversus Samnites belli parandi crebra concilia indicentes, omnibus consultationibus inter se principes occulte Romanum coquebant bellum. Huic quoque adversus servatores suos bello Campanus aderat. Sed quamquam omnia de industria celabantur, priusque, quam moverentur Romani, tolli ab tergo Samnitem hostem volebant; tamen per quosdam, privatis hospitiiis necessitudinibusque conjunctos, indicia conjurationis ejus Romam emanarunt. Jussisque ante tempus consulibus abdicare se magistratu, quomaturius novi consules adversus tantam molem belli crearentur, religio incescit, ab eis, quorum inminutum imperium esset, comitia haberi. Itaque interregnum initum. Duo interreges fuerunt, M. Valerius ac M. Fabius. Creati consules, T. Manlius Torquatus ter-

*U. c. 415.  
a. C. 337.  
T. Manlio  
III. P.  
Decio  
Coss.*

(e) quod Crev.



tium, P. Decius Mus (f). Eo anno Alexandrum, Epiri regem, in Italiam classem adpulisse constat. Quod bellum, si prima fatis prospera fuissent, haud dubie ad Romanos pervenisset. Eadem ætas rerum Magni Alexandri est : quem, sorore hujus ortum, in alio tractu orbis, invictum bellis juvenem, fortuna morbo exstinxit. Ceterum Romani, etsi defectio sociorum nominisque Latini haud dubia erat; tamen, tamquam de Samnitibus, non de se, curam agerent, decem principes Latinorum Romam evocaverunt, quibus imperarent, quæ vellent. Prætores tum duos Latium habebat (g), L. Annum Setinum & L. Numisium (h) Circeiensem, ambo ex coloniis Romanis : per quos, præter Signiam Velitrasque, & ipsas colonias Romanas, Volsci etiam excitati ad arma erant. Eos nominatim evocari placuit. Haud cuiquam dubium erat, super qua re adcirentur. Itaque, concilio prius habito, prætores, quam Romam proficiscerentur, evocatos se

U. c. 415.  
a. C. 337.

X. Principes Latinorum  
Romam evocati

(f) *Is creavit consules T. Manlium Torquatum tertium, P. Decium Murem. Gron. Crev.*

(g) *Latini habebant Gron. Crev.*

(h) *Numicium Gron. Crev.*

*U. c. 415.* ab senatu docent Romano, &, quæ actum  
*a. C. 337.* iri secum credant, quidnam ad ea responderi  
 placeat, referunt.

IV. QUUM aliud alii censerent, tum An-  
 nius : « Quamquam ipse ego retuli, quid  
 » responderi placeret, tamen magis ad sum-  
 » mam rerum nostrarum pertinere arbitror,  
 » quid agendum nobis, quam quid loquendum  
 » sit. Facile erit, explicatis consiliis, adcom-  
 » modare rebus verba. Nam, si etiam nunc  
 » sub umbra fœderis, æqui servitutem pati  
 » possumus, quid abest, quin, proditis Sidi-  
 » cinis, non Romanorum solum, sed Sam-  
 » nitium quoque dicto pareamus, respondeamusque Romanis, nos, ubi innuerint, po-  
 » fituros arma? Sin autem tandem libertatis  
 » desiderium remordet animos, si fœdus est,  
 » si societas æquatio juris est, si consanguini-  
 » neos nos Romanorum esse, quod olim pu-  
 » debat, nunc gloriari licet, si socialis illis  
 » exercitus is est, quo adjuncto duplicent  
 » vires suas, quem secernere ab se consules  
 » bellis propriis ponendis sumendisque nolint;  
 » cur non omnia æquantur? cur non alter  
 » ab Latinis consul datur? Ubi pars virium,  
 » ibi & imperii pars est? Est quidem nobis

» hoc per se haud nimis amplum, quippe con- *U. c. 415.*  
 » cedentibus, Romam caput Latio esse; sed, *a. C. 337.*  
 » ut amplum videri posset, diuturna patientia  
 » fecimus. Atqui, si quando unquam conso-  
 » fociandi imperii, usurpandæ libertatis tem-  
 » pus optastis; en hoc tempus adest, & vir-  
 » tute vestra, & Deum benignitate vobis  
 » datum. Tentastis patientiam negando mili-  
 » tem. Quis dubitat exarsisse eos, quum plus  
 » ducentorum annorum morem solveremus?  
 » Pertulerunt tamen hunc dolorem. Bellum  
 » nostro nomine cum Pelignis gessimus. Qui  
 » ne nostrorum quidem finium nobis per nos  
 » tuendorum jus antea dabant, nihil interces-  
 » serunt. Sidicinos in fidem receptos, Cam-  
 » panos ab se ad nos descisse, exercitus nos  
 » parare adversus Samnites foederatos suos  
 » audierunt, nec moverunt se ab urbe. Unde  
 » hæc illis tanta modestia, nisi a conscientia  
 » virium & nostrarum & suarum? Idoneos  
 » auctores habeo, querentibus de nobis Sam-  
 » nitibus ita responsum ab senatu Romano esse,  
 » ut facile adpareret, ne ipsos quidem jam pos-  
 » sulare, ut Latium sub Romano imperio sit.  
 » Usurpate modo postulando eo, quod illi  
 » vobis taciti concedunt. Si quem hoc metus

*U. c. 415.* » dicere (i) prohibet, en ego ipse, audiente  
*a. C. 337.* » non populo Romano modo senatuque, sed  
 » Jove ipso, qui Capitolium incolit, profi-  
 » teor me dicturum; ut, si nos in foedere  
 » ac societate esse velint, consulem alterum  
 » ab nobis senatusque partem accipiant. » Hæc  
 ferociter non suadenti solum, sed pollicenti,  
 clamore & adsensu omnes permiserunt, ut  
 ageret diceretque, quæ e republica nominis  
 Latini fideque sua viderentur.

V. UBI est Romam ventum, in Capitolio  
 eis senatus datus est. Ibi quum T. Manlius  
 consul egisset cum eis ex auctoritate Patrum,  
 ne Samnitibus foederatis bellum inferrent;  
 Annius, tamquam victor armis Capitolium  
 cepisset, non legatus, jure gentium tutus,  
 loqueretur, « Tempus erat [inquit] T. Manli,  
 » vosque Patres conscripti, tandem jam vos  
 » nobiscum nihil pro imperio agere, quum  
 » florentissimum, Deum benignitate, nunc  
 » Latium armis virisque, Samnitibus bello  
 » victis, Sidicinis Campanisque fociis, nunc  
 » etiam Volscis adjunctis, videretis; colonias  
 » quoque vestras Latinum Romano prætulisse  
 » imperium. Sed quoniam vos, regno inpo-

*Legati La-  
 tini super-  
 ba oratio  
 in senatu  
 Rom.*

(i) dicere metus Gron. Crev.

» tenti finem ut inponatis, non inducitis in  
 » animum : nos , quamquam armis possumus  
 » adferere Latium in libertatem, consanguini-  
 » tati tamen hoc dabimus , ut conditiones pa-  
 » cis feramus æquas utrisque, quoniam vires  
 » quoque æquari Diis immortalibus placuit.  
 » Consulem alterum Roma, alterum ex Latio  
 » creari oportet : senatus partem æquam  
 » ex utraque gente esse : unum populum ,  
 » unam rempublicam fieri : & , ut imperii  
 » eadem sedes sit, idemque omnibus no-  
 » men , quoniam ab alterutra parte concedi  
 » necesse est ; quod utrisque bene vertat, sit  
 » hæc sane patria potior, & Romani omnes  
 » vocemur. » Forte ita accidit, ut parem fero-  
 » ciæ hujus & Romani consulem T. Manlium  
 » haberent : qui adeo non tenuit iram, ut, si  
 » tanta dementia Patres conscriptos cepisset,  
 » ut ab Setino homine leges acciperent, gladio  
 » cinctum in senatum venturum se esse, palam  
 » diceret, & , quemcumque in curia Latinum  
 » vidisset, sua manu interemturum. Et, con-  
 » versus ad simulacrum Jovis, « Audi, Jupi-  
 » ter, hæc scelera [inquit] audite, jus fas-  
 » que. Peregrinos consules & peregrinum  
 » senatum in tuo, Jupiter, augurato templo,

U. c. 475.  
 a. C. 337.

T. Manlii  
 plena in-  
 dignatio-  
 nis respon-  
 sio.

U. c. 415. » captus atque ipse obpressus, visurus es?  
a. C. 337. » Hæccine fœdera Tullus Romanus rex cum  
 » Albanis, patribus vestris, Latini, hæc L.  
 » Tarquinius vobiscum postea fecit? Non  
 » venit in mentem pugna apud Regillum la-  
 » cum? adeo & cladium veterum vestra-  
 » rum, & beneficiorum nostrorum erga vos  
 » obliti estis?

VI. QUUM consulis vocem subsecuta Pa-  
 trum indignatio esset, proditur memoriæ,  
 adversus crebram inplorationem Deum, quos  
 testes fœderum sæpius invocabant consules,  
 vocem Annii, spernentis numina Jovis Ro-  
 mani, auditam. Certe, quum commotus ira  
 se ab vestibulo templi citato gradu proripe-  
 ret, lapsus per gradus, capite graviter ob-  
 fuso, in tactus imo ita est saxo, ut sopire-  
 tur. Exanimatum auctores quoniam non om-  
 nes sunt, mihi quoque in incerto relictum  
 sit: sicut inter fœderum ruptorum testatio-  
 nem ingenti fragore cœli procellam effusam;  
 nam & vera esse, & apte ad repræsentandam  
 iram Deum ficta possunt. Torquatus, missus  
 ab senatu ad dimittendos legatos, quum ja-  
 centem Annum vidisset, exclamat, ita ut  
 populo Patribusque audita vox pariter sit,

« Bene habet. Dii pium movere (k) bellum. *U. c. 415.*

» Est cœleste numen ! es , magne Jupiter ! *a. C. 337.*

» Haud frustra te patrem Deum hominumque

» hac sede sacravimus. Quid cessatis , Quiri-

» tes , vosque , Patres conscripti , arma ca-

» pere Diis ducibus ? Sic stratas legiones La-

» tinorum dabo , quemadmodum legatum ja-

» centem videris. » Adsensu populi excepta

vox consulis tantum ardoris animis fecit , ut

legatos proficiscentes cura magistratuum ma-

gis , qui jussu consulis prosequerentur , quam

jus gentium , ab ira impetuque hominum te-

geret. Consensit & senatus bellum : consu-

lesque , duobus scriptis exercitibus per Mar-

fos Pelignosque profecti , adjuncto Samnitium

exercitu , ad Capuam , quo jam Latini focii-

que convenerant , castra locant. Ibi in quiete

utrique consuli eadem dicitur visa species

viri majoris , quam pro humano habitu , au-

gustiorisque , dicentis : « Ex una acie impera-

» torem , ex altera exercitum Diis manibus

» matrique Terræ deberi ; utrius exercitus

» imperator legiones hostium , superque eas

» se devovisset , ejus populi partisque victo-

» riam fore. » Hos ubi nocturnos visus inter

*Bellum  
Latinum.*

*Spectrum  
per quie-  
tem utri-  
que consuli  
visum.*

*U. c. 415.* se consules contulerunt ; placuit averrun-  
*a. C. 337.* candæ Deum iræ victimas cædi : simul ut,

si extis eadem, quæ somno visa fuerant, portenderentur, alteruter consulum fata impleret. Ubi responsa aruspicum infidenti jam animo tacitæ religioni congruerunt; tum, adhibitis legatis tribunisque, & imperiis Deum, propalam expositis, ne mors voluntaria consulis exercitum in acie terreret, comparant inter se, ut, ab utra parte cedere Romanus exercitus cœpisset, inde se consul devoveret pro populo Romano Quiritibusque. Agitatum etiam in consilio est, ut, si quando unquam severo ullum imperio bellum administratum esset, tunc uti disciplina militaris ad priscos redigeretur mores. Curam acuebat, quod adversus Latinos bellandum erat, lingua, moribus, armorum genere, institutis ante omnia militaribus congruentes : milites militibus, centurionibus centuriones, tribuni tribunis compares collegæque, iisdem præfidiis, sæpe iisdem manipulis permixti fuerant.

*Ne quis  
extra ordi-  
nem pug-  
naret, edi-  
citur.*

Per hæc ne quo errore milites caperentur, edicunt consules, ne quis extra ordinem in hostem pugnaret.



VII. FORTE inter ceteros turmarum præfectos, qui exploratum in omnes partes dimissi erant, T. Manlius consulis filius super castra hostium cum suis turmalibus evasit, ita ut vix teli jactu ab statione proxima abesset. Ibi Tusculani erant equites: præerat Geminus (1) Metius, vir tum genere inter suos, tum factis, clarus. Is ubi Romanos equites, insignemque inter eos præcedentem consulis filium, (nam omnes inter se, utique inlustres viri, noti erant) cognovit, «Unane [ait] » turma Romani cum Latinis sociisque bellum gesturi estis? Quid interea consules, » quid duo exercitus consulares agent? Ad- » runt in tempore [Manlius inquit] & cum » illis aderit Jupiter ipse, foederum a vobis » violatorum testis, qui plus potest, pollet- » que. Si ad Regillum lacum ad satietatem » vestram pugnavimus; hic quoque efficiemus » profecto, ne nimis acies vobis & conlata » signa nobiscum cordi sint. » Ad ea Geminus, paullulum ab suis equo (m) proVectus, » Visne igitur, dum dies ista venit, qua » magno conatu exercitus moveatis, interea

U. c. 415.

a. C. 337.

Manlium  
consulis  
filium Ge-  
minus pro-  
vocat ad  
singulare  
certamen.

(1) Geminus sic semper Gron. Crev.

(m) eo Gron.

U. c. 415.  
a. C. 337.

*Vincit  
Manlius.*

» tu ipse congredi mecum, ut nostro duorum jam hinc eventum cernatur, quantum eques Latinus Romano præstet? » Movet ferocem animum juvenis seu ira, seu detrectandi certaminis pudor, seu inexsuperabilis vis fati. Oblitus itaque imperii patrii, consulumque edicti, præceps ad id certamen agitur, quo, vinceret, an vinceretur, haud multum interesset. Equitibus ceteris velut ad spectaculum submotis, spatio, quod vacui interjacebat campi, adversos concitant equos: &, quum infestis cuspidibus concurrissent, Manlii cuspis super galeam hostis, Metii trans cervicem equi elapsa est. Circumactis deinde equis, quum prior ad iterandum ictum Manlius confurrexisset; spiculum inter aures equi fixit. Ad cujus vulneris sensum quum equus, prioribus pedibus erectis, magna vi caput quateret, excussit equitem: quem cuspidem parmaque innisum, adtollentem se ab gravi casu, Manlius ab jugulo, ita ut per costas ferrum emineret, terræ adfixit; spoliisque lectis ad suos reiectus, cum ovante gaudio turma in castra, atque inde ad prætorium ad patrem, tendit, ignarus fati (n) futurique, laus an poena merita esset, « Ut me omnes,

(n) *facili* Crev.

[in-

» [inquit] pater, tuo sanguine ortum vere *U. c. 415.*  
 » ferrent, provocatus equestria hæc spolia *a. C. 337.*  
 » capta ex hoste cæso porto. » Quod ubi *A patre*  
 » audivit consul, extemplo, filium averſatus, *ſecuri per-*  
*cutitur.*  
 » concionem claffico advocari juffit. Quæ ubi  
 » frequens convenit, « Quandoque (o) [in-  
 » quit] tu, T. Manli, neque imperium con-  
 » ſulare, neque majestatem patriam veritus,  
 » adverſus edictum noſtrum extra ordinem in  
 » hoſtem pugnaſti, &, quantum in te fuit,  
 » diſciplinam militarem, qua ſtetit ad hanc  
 » diem Romana res, ſolvifti, meque in eam  
 » neceſſitatem adduxifti, ut aut reipublicæ  
 » mihi, aut mei meorumque obliviſcendum  
 » fit; nos potius noſtro delicto plectemur,  
 » quam reſpublica tanto ſuo damno noſtrâ  
 » peccata luat. Trifte exemplum, ſed in poſte-  
 » rum ſalubre juventuti, erimus. Me quidem  
 » quum ingenita caritas liberum, tum ſpeci-  
 » men iſtud virtutis, deceptum vana imagine  
 » decoris, in te movet. Sed quum aut morte  
 » tua ſancienda ſint conſulum imperia, aut  
 » impunitate in perpetuum abroganda; ne te  
 » quidem, ſi quid in te noſtri ſanguinis eſt,  
 » recuſare cenſeam, quin diſciplinam milita-

(o) Quandoquidem Gron. Crev.

*U. c. 415.* » rem, culpa tua prolapsam, pœna restituas.

*a. C. 337.* » I, lictor, deliga ad palum. » Exanimati omnes tam atroci imperio, nec aliter quam in se quisque destriictam (p) cernentes securim, metu magis, quam modestia, quieverunt. Itaque, velut emerfo ab admiratione animo, quum silentio defixi stetissent; repente, postquam cervice cæsa fusus est cruor, tum libero conquestu coortæ voces sunt, ut neque lamentis, neque execrationibus parceretur: spoliisque contactum juvenis corpus, quantum militaribus studiis funus ullum celebrari potest, structo extra vallum rogo cremaretur: Manlianaque imperia non in præsentia modo horrenda, sed exempli etiam tristis in posterum essent.

VIII. FECIT tamen atrocitas pœnæ obediētiorem duci militem: &, præterquam quod custodiæ vigiliæque & ordo stationum intensioris ubique curæ erant, in ultimo etiam certamine, quum descensum in aciem est, ea severitas profuit. Fuit autem (q) civili maxime bello pugna similis: adeo nihil apud Latinos dissonum ab Romana re, præter ani-

(p) *distriictam* Gron. Crev.

(q) *enim* Gron.

mos, erat. Clipeis antea Romani usi sunt: *U. c. 415.*  
 deinde, postquam stipendiarii facti sunt, scuta *a. C. 337.*  
 pro clipeis fecere: &, quod antea phalanges *Acies*  
 similes Macedonicis, hoc postea manipula- *quomodo*  
 tim structa acies cœpit esse. Postremo in plu- *structa*  
 res ordines instruebantur (r). Ordo sexage- *apud Ro-*  
 nos milites, duos centuriones, vexillarium *manos.*  
 unum habebat. Prima acies Hastati erant,

(r) *Quæ sequuntur, quum in multis vitiata vi-*  
*deantur, duplici modo edi curavimus: ac 1. textum*  
*ipsum Livii, qualis in vulgatis habetur; 2. eum-*  
*dem textum a Lipsio emendatum hic exhibemus, quod*  
*& Creverius fecit.*

(Ordo sexagenos milites & duos, centurionem &  
 vexillarium unum habebat. Prima acies Hastati erant,  
 manipuli *decem*, distantes inter se modicum spa-  
 tium: manipulus leves videnos milites, aliam tur-  
 bam scutatorum habebat; leves autem, qui hastam  
 tantum gæsaque gererent, vocabantur. Hæc prima  
 frons in acie florem juvenum pubescentium ad mili-  
 tiam habebat. Robustior inde ætas, totidem mani-  
 pulorum, quibus Principibus est nomen, hos seque-  
 bantur, scutati omnes, insignibus maximè armis.  
 Hoc *viginti* manipulorum agmen Antepilanos adpel-  
 labant, quia sub signis jam alii *decem ordine* loca-  
 bantur: ex quibus unusquisque tres partes habe-  
 bat. Earum unamquamque *primam* Pilum vocabant.  
 Tribus ex vexillis constabat, centum octoginta sex  
 homines erant.)

*U. c. 415.* manipuli quindecim , distantes inter se modicum spatium : manipulus leves videnos milites , aliam turbam scutatorum habebat ; leves autem , qui hastam tantum gæsaque gererent , vocabantur. Hæc prima frons in acie florem juvenum pubescentium ad militiam habebat. Robustior inde ætas totidem manipulorum , quibus Principibus est nomen , hos sequebantur , scutati omnes , insignibus maxime armis. Hoc triginta manipulorum agmen Antepilanos adpellabant , quia sub signis jam alii quindecim ordines locabantur : ex quibus ordo unusquisque tres partes habebat. Earum unamquamque primum pilum vocabant. Tribus ex vexillis constabat. Vexillum centum octoginta sex homines erant. Primum vexillum Triarios ducebat , veteranum militem spectatæ virtutis : secundum Rorarios , minus roboris ætate factisque : tertium Accensos , minimæ fiduciæ manum : eo & in postremam aciem rejiciebantur. Ubi his ordinibus exercitus instructus esset , hastati omnium primi pugnam inibant. Si hastati profligare hostem non possent , pede presso eos retrocedentes in intervalla ordinum principes recipiebant. Tum principum pugna erat ; hastati

sequebantur. Triarii sub vexillis confidebant, sinistro crure porrecto, scuta innixa humeris, hastas subrecta cuspide in terra fixas, haud fecus quam vallo septa inhorreret acies, tenentes. Si apud principes quoque haud fatis prospere esset pugnatum, a prima acie ad triarios sensim referebantur. Inde « rem ad triarios redisse, » quum laboratur, proverbio increbruit. Triarii confurgentes, ubi in intervalla ordinum suorum principes & hastatos recepissent, extemplo compressis ordinibus velut claudebant vias: unoque continenti (s) agmine, jam nulla spe post relicta, in hostem incidebant: id erat formidolosissimum hosti, quum, velut victos infecuti, novam repente aciem exurgentem auctam numero cernebant. Scribebantur autem quatuor fere legiones quinis millibus peditum, equitibus in singulas legiones trecenis. Alterum tantum ex Latino delectu adjiciebatur, qui ea tempestate hostes erant Romanis, eodemque ordine instruxerant aciem: nec vexilla cum vexillis tantum, universi hastati cum hastatis, principes cum principibus; sed centurio quoque cum centurione, si ordines turbati non essent;

*U. c. 415;  
a. C. 337.*

*Qui numerus copiarum in exercitiis.*

(s) *continente Gron. Crev.*

*U. c. 415.* concurrentum sibi esse sciebant. Duo primi-  
*a. C. 337.* pili ex utraque acie inter triarios erant :  
 Romanus corpore haudquaquam satis validus,  
 ceterum strenuus vir peritusque militiæ : La-  
 tinus viribus ingens bellatorque primus ; no-  
 tissimi inter se, quia pares semper (t) ordi-  
 nes duxerant. Romano, haud satis fidenti  
 viribus, jam Romæ permissum erat ab con-  
 sulibus, ut subcenturionem sibi, quem vel-  
 let, legeret, qui tutaretur eum ab uno desti-  
 nato hoste : isque juvenis, in acie oblatus,  
 ex centurione Latino victoriam tulit. Pugna-  
 tum est haud procul radicibus Vesuvii mon-  
 tis, qua via ad Veferim ferebat.

*Pugna  
 cum  
 Latinis.*

IX. ROMANI consules prius, quam educe-  
 rent in aciem, inmolaverunt. Decio caput  
 jocinoris (u) a familiari parte cæsum aru-  
 spex dicitur ostendisse ; alioqui acceptam Diis  
 hostiam esse : Manlium egregie litasse. « At-  
 » qui bene habet [ inquit Decius ] si ab col-  
 » lega litatum est. » Instruclis, sicut ante  
 dictum est, ordinibus, processere in aciem.  
 Manlius dextro, Decius lævo cornu præerat.  
 Primo utrimque æquis viribus, eodem ardore

(t) *semper pares Gron. Crev.*

(u) *jecinoris Gron. Crev.*



animorum gerebatur res : deinde ab lævo *U. c. 415.*  
 cornu hastati Romani, non ferentes inpressio- *a. C. 337.*  
 nem Latinorum, se ad principes recepere. In  
 hac trepidatione Decius consul M. Valerium *Decius se*  
 magna voce inclamat : « Deorum [inquit] *devovet.*  
 » ope, Valeri, opus est. Agedum, pontifex  
 » publicus populi Romani, præi verba, qui-  
 » bus me pro legionibus devoveam. » Ponti-  
 fex eum togam prætextam sumere jussit, &  
 velatò capite, manu subter togam ad mentum  
 exserta, super telum subiectum pedibus stan-  
 tem sic dicere. « Jane, Jupiter, Mars pater,  
 » Quirine, Bellona, Lares, Divi Novenses,  
 » Dii indigetes, Divi, quorum est potestas  
 » nostrorum hostiumque, Diique Manes, vos  
 » precor, veneror, veniam petò feroque, uti  
 » populo Romano Quiritium vim victoriam-  
 » que prosperetis ; hostesque populi Romani  
 » Quiritium terrore, formidine, morteque  
 » adficiatis. Sicut verbis nuncupavi, ita pro  
 » republica Quiritium, exercitu, legionibus,  
 » auxiliis populi Romani Quiritium, legiones  
 » auxiliaque hostium mecum Diis Manibus  
 » Tellurique devoveo. » Hæc ita precatus,  
 lictores ire ad T. Manlium jubet, matureque  
 collegæ se devotum pro exercitu nunciare.

U. c. 415.  
a. C. 337. Ipse, incinctus cinctu Gabino, armatus in equum insiluit, ac se in medios hostes immisit. Conspectus ab utraque acie aliquanto augustior humano visu, sicut cœlo missus piaculum omnis Deorum iræ, qui pestem ab suis averfam in hostes ferret: ita omnis terror pavorque cum illo latus signa primo Latinorum turbavit; deinde in totam penitus aciem pervasit. Evidentissimum id fuit, quod, quacunque equo invehctus est, ibi, haud secus quam pestifero fidere icti, pavebant: ubi vero conruit obrutus telis, inde jam haud dubie consternatæ cohortes Latinorum fugam ac vastitatem late fecerunt. Simul & Romani, exsolutis religione animis, velut tum primum signo dato coorti, pugnam integram ediderunt. Nam & rorarii procurrebant inter antepilanos, addiderantque vires hastatis ac principibus: & triarii, genu dextro innisi, nutum consulis ad consurgendum expectabant.

X. PROCEDENTE deinde certamine, quum aliis partibus multitudo superaret Latinorum, Manlius consul, audito eventu collegæ, quum, ut jus fasque erat, lacrimis non minus quam laudibus debitis profecutus tam memorabilem

mortem esset; paullisper addubitavit, an confurgendi jam triariis tempus esset: deinde, melius ratus integros eos ad ultimum discrimen servari, accensos ab novissima acie ante signa procedere jubet. Qui ubi subiere, ex templo Latini, tamquam idem adversarii fecissent, triarios suos excitaverunt: qui aliquamdiu pugna atroci quum & semet ipsi fatigassent, & hastas aut præfregissent, aut hebetassent, pellerent vi tamen hostem, debellatum jam rati, perventumque ad extremam aciem; tum consul triariis, « Confur-  
 » gite nunc [inquit] integri adversus fessos,  
 » memores patriæ parentumque & conjugum  
 » ac liberorum; memores consulis pro vestra  
 » victoria morte occumbentis. » Ubi triarii  
 confurrexerunt integri, refulgentibus armis,  
 nova ex inprovisto exorta acies, receptis in  
 intervalla ordinum antepilanis, clamore sub-  
 lato principia Latinorum perturbant: hastis-  
 que ora fodientes, primo robore virorum  
 cæso, per alios manipulos, velut inermes,  
 prope intacti evasere; tantaque cæde perru-  
 pere cuneos, ut vix quartam partem relin-  
 querent hostium. Samnites quoque, sub radi-  
 cibus montis procul instructi, præbuere ter-

*U. c. 415.  
 a. C. 337.*

*Vincunt  
 Romani.*

*U. c. 415.* rorem Latinis. Ceterum inter omnes cives  
*a. C. 337.* fociosque præcipua laus ejus belli penes  
 consules fuit : quorum alter omnes minas  
 periculaque ab Diis superis inferisque in se  
 unum vertit : alter ea virtute eoque consilio  
 in prælio fuit, ut facile convenerit inter  
 Romanos Latinosque, qui ejus pugnae me-  
 moriam posteris tradiderunt, utrius partis  
 T. Manlius dux fuisset, ejus futuram haud  
 dubie fuisse victoriam. Latini ex fuga se  
 Minturnas contulerunt. Castra secundum  
 prælium capta, multique mortales ibi vivi  
 obpressi, maxime Campani. Decii corpus ne  
 eo die inveniretur, nox quærentes obpressit.  
 Postero die inventum inter maximam hostium  
 stragem, coopertum telis ; funusque ei par  
 morti, celebrante collega, factum est. Illud  
*Devotio-* adjiciendum videtur, licere consuli dictato-  
*num leges.* rique & prætori, quum legiones hostium de-  
 voveat, non utique se, sed quem velit ex  
 legione Romana scripta civem, devovere.  
 Si is homo, qui devotus est, moritur, probe  
 factum videri : ni moritur, tum signum septem  
 pedes altum, aut majus, in terram defodi,  
 & piaculum hostia (x) cædi. Ubi illud fig-

(x) *hostiam* Crev.

num defoffum erit, eo magistratum Romanum efendere fas non efle. Sin autem fefe devovere volet, ficuti Decius devovit; ni moritur, neque fuum, neque publicum divinum pure faciet, qui fefe devoverit. Vulcano arma five cui alii Divo vovere (y) volet, five hoftia five quo alio volet, jus eft (z). Telo, fuper quod ftans confil precatus eft, hoftem potiri, fas non eft : fi potiatur, Marti fuo vetaurilibus piaculum fieri.

U. c. 415.

a. C. 337.

XI. HÆC, (etfi omnis divini humanique moris memoria abolevit, nova peregrinaque omnia prifcis ac patriis præferendo) haud ab re duxi, verbis quoque ipsis, ut tradita nuncupataque funt, referre. Romanis poft proelium demum factum Samnites veniffe fubfidio, exfpectato eventu pugnae, apud quofdam auctores invenio. Latinis quoque ab Lavinio auxilium, dum deliberando terunt tempus, victis demum ferri coeptum. Et, cum jam portis prima figna & pars agminis effet egreffa, nuncio adlato de clade Latinorum, quum converfis fignis retro in urbem rediretur, prætorem eorum nomine Millionium (a)

(y) *devovere* Gron. Crev.(z) *eflo* Crev.(a) *Millionium* Gron. Crev.

*U. c. 415.* dixisse ferunt, » Ipso paullula via magnam  
*a. C. 337.* » mercedem Romanis esse solvendam. » Qui  
 Latinorum pugnae superfuerant, multis itinere-  
 ribus dissipati, quum se in unum conglobas-  
 sent, Vescia urbs eis receptaculum fuit. Ibi  
 in consiliis Numisius imperator eorum, adfir-  
 mando « communem vere Martem belli utram-  
 » que aciem pari caede prostravisse, victoriae-  
 » que nomen tantum penes Romanos esse,  
 » ceteram pro victis fortunam & illos gerere:  
 » funesta duo consulum praetoria, alterum  
 » parricidio filii, alterum consulis devoti  
 » caede; trucidatum exercitum omnem; cae-  
 » fos hastatos principesque; stragem & ante  
 » signa & post signa factam; triarios postre-  
 » mo rem restituisse. Latinorum etsi pariter  
 » adiciendae copiae sint, tamen supplemento vel  
 » Latium propius esse, vel Volscos, quam  
 » Romam. Itaque, si videatur eis, se, ex  
 » Latinis & ex Volscis populis juventute pro-  
 » pere excita, rediturum infesto exercitu Ca-  
 » puam esse; Romanosque, nihil tum minus  
 » quam proelium expectantes, necopinato  
 » adventu perculsurum. » Fallacibus literis  
 circa Latium nomenque Volscum missis, quia,  
 qui non interfuerant pugnae, ad credendum

*Novum  
 exercitum  
 conscri-  
 bunt La-  
 tini.*

temere faciliores erant , tumultuarius undi- *U. c. 415.*  
que exercitus raptim conscriptus convenit. *a. C. 337.*

Huic agmini Torquatus consul ad Trifanum  
(inter Sinuessam Minturnasque is locus est)  
obcurrit. Prius, quam castris locus capere-  
tur, farcinis utrimque in acervum coniectis,  
pugnatum debellatumque est : adeo enim ad-  
cisæ res sunt, ut consuli, victorem exerci-  
tum ad depopulandos agros eorum ducenti,  
dederent se omnes Latini, deditionemque  
eam Campani sequerentur. Latium Capuaque  
agro multati. Latinus ager, Privernati addito  
agro, & Falernus, qui populi Campani fue-  
rat, usque ad Vulturnum flumen, plebi Ro-  
manæ dividitur. Bina in Latino jugera, ita  
ut dodrantem ex Privernati complerent, da-  
ta; terna in Falerno, quadrantibus etiam pro  
longinquitate adjectis. Extra pœnam fuere  
Latinorum Laurentes Campanorumque equi-  
tes, quia non desciverant. Cum Laurentibus  
renovari foedus jussum : renovaturque ex eo  
quotannis post diem decimum Latinarum.  
Equitibus Campanis civitas data : monumen-  
toque ut esset æneam tabulam in æde Castoris  
Romæ fixerunt. Vectigal quoque eis Campa-  
nus populus jussus pendere in singulos quotan-

*Rursus  
victi de-  
dunt se.*

*U. c. 415.* nis ( fuere autem mille & sexcenti ) denarios  
*a. C. 337.* nummos quadringenos quinquagenos.

XII. ITA bello gesto , præmiis pœnaque pro cuiusque merito persolutis , T. Manlius Romam rediit : cui venienti seniores tantum obviam exisse constat ; juventutem , & tunc , & omni vita deinde , averfatam eum exsecratamque. Antiates in agrum Ostiensem , Ardeatem , Solonium incursiones fecerunt. Manlius consul , quia ipse per valetudinem id bellum exsequi nequierat , dictatorem L. Papirium Craffum , qui tum forte erat prætor , dixit : ab eo magister equitum L. Papirius Cursor dictus. Nihil memorabile adversus Antiates ab dictatore gestum est , quum aliquot menses stativa in agro Antiati habuisset. Anno insigni victoria de tot ac tam potentibus populis , ad hoc consulum alterius nobili morte , alterius sicut truci , ita claro ad memoriam , imperio , succedere consules

*U. c. 416.*  
*a. C. 336.*

*Ti. Æmilio , Q. Publilio*  
*Coss.*

*Latinorum*  
*rebellio.*

Ti. Æmilius Mamercinus & Q. Publilius Philo ; neque in similem materiam rerum , & ipsi aut suarum rerum , aut partium in republica magis , quam patriæ , memores. Latinos , ob iram agri amissi rebellantes , in campis Feneſtanis fuderunt , castrisque exuerunt. Ibi



Publilio, cujus ductu auspicio (b) res gestæ *U. c. 416.*  
 erant, in deditionem accipiente Latinos po- *a. C. 336.*  
 pulos, quorum ibi juvenus cæsa erat, Æmi-  
 lius ad Pedum exercitum duxit. Pedanos tue-  
 batur (c) Tiburs, Prænestinus, Veliternus-  
 que populus: venerant & ab Lanuvio (d)  
 Antioque auxilia. Ubi quum præliis quidem  
 superior Romanus esset, ad urbem ipsam Pe-  
 dum castraque sociorum populorum, quæ urbi  
 adjuncta erant, integer labor restaret; bello  
 infecto repente omisso, consul, quia collegæ  
 decretum triumphum audivit, ipse quoque  
 triumphi ante victoriam flagitator Romam re-  
 diit. Qua cupiditate obfensis Patribus, negan-  
 tibusque, nisi Pedito capto aut dedito, trium-  
 phum: hinc alienatus ab senatu Æmilius se-  
 ditiosis tribunatibus similem deinde consula-  
 tum gessit. Nam neque, quoad fuit consul,  
 criminari apud populum Patres destitit, col-  
 lega haudquaquam adversante, quia & ipse  
 de plebe erat: (materiam autem præbebat  
 criminibus ager in Latino Falernoque agro  
 maligne plebei divisus) &, postquam fena-

(b) *auspicioque* Gron. Crev.

(c) *tuebantur* Gron. Crev.

(d) *Lavinio* Gron. Crev.

*U. c. 416.  
a. C. 336.*

*Q. Publius  
dictator.  
Tres leges  
fert adver-  
sas nobili-  
tati.*

tus, finire imperium consulibus cupiens, dictatorem adversus rebellantes Latinos dixi-  
jussit, Æmilius, cujus tum fasces erant, col-  
legam dictatorem dixit: ab eo magister equi-  
tum Junius Brutus dictus. Dictatura popula-  
ris, & orationibus in Patres criminosis fuit,  
& quod tres leges secundissimas plebei, ad-  
versas nobilitati, tulit: unam, ut plebiscita  
omnes Quirites tenerent: alteram, ut legum,  
quæ comitiis centuriatis ferrentur, ante ini-  
tum suffragium Patres auctores fierent: ter-  
tiam, ut alter utique ex plebe, quum eo  
ventum sit, ut utrumque plebeium consulem  
fieri liceret, censor crearetur. Plus eo anno  
domi acceptum cladis ab consulibus ac dicta-  
tore, quam ex victoria eorum bellicisque  
rebus foris auctum imperium, Patres crede-  
bant.

*U. c. 417.  
a. C. 335.  
L. Furio,  
C. Mænio  
Coss.*

XIII. ANNO insequenti, L. Furio Camillo,  
C. Mænio consulibus, quo insignitius omissa  
res Æmilio, superioris anni consuli, expro-  
braretur, Pedum armis virisque & omni vi  
expugnandum ac delendum senatus fremit;  
coactique novi consules omnibus eam rem  
præverri, proficiscuntur. Jam Latio is status  
erat rerum, ut neque bellum neque pacem  
pati

pati possent. Ad bellum opes deerant: pacem ob agri ademti dolorem aspernabantur. Mediis consiliis standum videbatur, ut oppidis se tenerent; ne laceffitus Romanus causam belli haberet: & si cuius oppidi obsidio nunciata esset, undique ex omnibus populis auxilium obseffis ferretur. Neque tamen, nisi admodum a paucis populis, Pedani adjuti sunt. Tiburtes Prænestinique, quorum ager propior erat, Pedum pervenere. Aricinos Lanuvinosque (e) & Veliternos, Antiati- bus Volscis se conjungentes, ad Asturæ flu- men Mænius, inprovise adortus, fudit. Ca- millus ad Pedum cum Tiburtibus, maxime valido exercitu, majore mole, quamquam æque prospero eventu, pugnat. Tumultum maxime repentina inter proelium eruptio op- pidanorum fecit: in quos parte exercitus conversa, Camillus non compulit solum eos intra mœnia, sed eodem etiam die, quum ipsos auxiliaque eorum perculisset, oppidum scalis cepit. Placuit inde, jam majore conatu animoque ab unius expugnatione urbis ad perdomandum Latium victorem circumducere exercitum: nec quievere ante, quam, ex-

*U. c. 417.  
a. C. 335.*

*Latini ne-  
que bel-  
lum, ne-  
que pacem  
pati pos-  
sunt.*

(e) *Laviniosque Gron. Crev.*

*U. c. 417.  
a. C. 335.*

*Latium  
subactum.*

*Camillus  
refert ad  
senatum de  
Latia.*

pugnando aut in deditionem accipiendo singulas urbes, Latium omne subegere. Præfidiis inde dispositis per recepta oppida, Romam ad destinatum omnium consensu triumphum decessere. Additus triumpho honos, ut statuæ equestres eis, rara illa ætate res, in foro ponerentur. Prius, quam comitiis in insequentem annum consules rogarent, Camillus de Latinis populis ad senatum retulit, atque ita differuit : « Patres conscripti, quod » bello armisque in Latio agendum fuit, id » jam Deum benignitate ac virtute militum » ad finem venit. Cæsi ad Pedum Asturam- » que sunt exercitus hostium; oppida Latina » omnia, & Antium ex Volscis, aut vi capta, » aut recepta in deditionem, præfidiis tenen- » tur vestris. Reliqua consultatio est, quo- » niam rebellando sæpius nos sollicitant, » quonam modo perpetua pace quietos obti- » neamus. Dii immortales ita vos potentes » hujus consilii fecerunt, ut, sit Latium de- » inde, an non sit, in vestra amanu posuerint. » Itaque pacem vobis, quod ad Latinos adti- » net, parare in perpetuum, vel sæviendo, » vel ignoscendo, potestis. Vultis crudeliter » consulere in deditos victosque? Licet delere

» omne Latium , vastas inde solitudines fa-  
 » cere , unde sociali egregio exercitu per  
 » multa bella magnaue sæpe usi estis. Vultis  
 » exemplo majorum augere rem Romanam ,  
 » victos in civitatem accipiendo ? Materia  
 » crescendi per summam gloriam subpeditat.  
 » Certe id firmissimum longe imperium est ,  
 » quo obedientes gaudent. Sed maturato opus  
 » est , quidquid statuere placet. Tot populos  
 » inter spem metumque suspensos animi ha-  
 » betis. Et vestram itaque de eis curam quam  
 » primum absolvi , & illorum animos , dum  
 » exspectatione stupent , seu poena , seu bene-  
 » ficio , præoccupari oportet. Nostrum (f)  
 » fuit efficere , ut omnium rerum vobis ad  
 » consulendum potestas esset. Vestrum est de-  
 » cernere , quod optimum vobis rei que pu-  
 » blicæ sit. »

*U. c. 417.  
 a. C. 335.*

XIV. PRINCIPES senatus relationem con-  
 sulis de summa rerum laudare ; sed , quum  
 aliorum causa alia esset , ita expediri posse  
 consilium , dicere , ut pro merito cujusque  
 statueretur , si de singulis nominatim refer-  
 rent populis. Relatum igitur de singulis de-  
 cretumque. Lanuvinis civitas data sacraque

*Senatus-  
 consulta  
 de Latinis.*

(f) add. *enim* Gron. Crev.

*U. c. 417.* sua reddita cum eo , ut ædes lucusque Sospitæ Junonis communis Lanuvinis municipibus cum populo Romano esset. Aricini Nomentanique & Pedani eodem jure , quo Lanuvini , in civitatem accepti. Tusculanis servata civitas , quam habebant ; crimenque rebellionis a publica fraude in paucos auctores versum. In Veliternos , veteres cives Romanos , quod toties rebellassent , graviter sævitum : & muri dejecti , & senatus inde abductus , jussique trans Tiberim habitare : ut ejus , qui cis Tiberim deprehensus esset , usque ad mille pondo clarigatio esset ; nec prius , quam ære perfoluto , is , qui cepisset , extra vincula captum haberet. In agrum senatorum coloni missi : quibus adscriptis , speciem antiquæ frequentiæ Velitræ receperunt. Et Antium nova colonia missa cum eo , ut Antiaribus permetteretur , si & ipsi adscribi coloni vel-  
lent. Naves inde longæ abactæ , interdictumque mari Antiati populo est , & civitas data. Tiburtes Prænestinique agro multati , neque ob recens tantum rebellionis , commune cum aliis Latinis , crimen ; sed quod , tædio imperii Romani , cum Gallis , gente efferata ; arma quondam consociassent. Ceteris Latinis

populis connubia commerciaque & concilia *U. c. 417.*  
inter se ademerunt. Campanis, equitum ho- *a. C. 335.*  
noris causa, quia (g) cum Latinis rebellare  
noluissent, Fundanisque & Formianis, quod  
per fines eorum tuta pacataque semper fuisset  
via, civitas sine suffragio data. Cumanos  
Suessulanosque ejusdem juris conditionisque,  
cujus Capuam, esse placuit. Naves Antiatum  
partim in navalia Romae subductae, partim  
incensae, rostrisque earum subgestum, in foro  
exstructum, adornari placuit: Rostraque id  
templum adpellatum. *Rostra unde dicta.*

XV. C. SULPICIO Longo, P. Ælio Pæto *U. c. 418.*  
consulibus, quum omnia non opes magis Ro- *a. C. 334.*  
manae, quam beneficiis parta gratia bona *C. Sulpicio, P.*  
pace obtineret, inter Sidicinos Auruncosque *Ælio Coss.*  
bellum ortum. Aurunci, a T. Manlio con-  
sule in deditionem accepti, nihil deinde move-  
rant: eo petendi auxilii ab Romanis causa  
justior fuit. Sed prius, quam consules ab  
urbe (jusserat enim senatus defendi Aurun-  
cos) exercitum educerent, fama adfertur,  
Auruncos metu oppidum deseruisse, profu-  
gosque cum conjugibus ac liberis Sueffiam  
communisse, quae nunc Aurunca adpellata;

(g) qui Gron. Crev.

*U. c. 418.  
a. C. 334.*

*C. Claudius dicta-  
tor.*

*Prætor  
plebeius.*

*U. c. 419.  
a. C. 333.  
L. Papirio,  
Cæsone  
Duilio  
Coss.*

mœnia antiqua eorum urbemque ab Sidicinis deletam. Ob ea infensus consulibus senatus, quorum cunctatione proditi focii essent, dictatorem dici iussit. Dictus C. Claudius Regillensis, magistrum equitum C. Claudium Hortatorem dixit. Religio inde injecta de dictatore: &, quum augures vitio creatum videri dixissent, dictator magisterque equitum se magistratu abdicarunt. Eo anno Minucia Vestalis; suspecta primo propter mundiolem iusto cultum, infimulata deinde apud pontifices ab indice servo, quum decreto eorum iussa esset sacris abstinere, familiamque in potestate habere; facto iudicio, viva sub terram ad portam Collinam dextra via strata defossa Scelerato campo. Credo, ab incesto id ei loco nomen factum. Eodem anno Q. Publilius Philo prætor primum de plebe, adversante Sulpicio consule, qui negabat, rationem ejus se habiturum, est factus; senatu, quum in summis imperiis id non obtinuisset, minus in prætura tendente.

XVI. INSEQUENS annus, L. Papirio Crasso, Cæsone Duilio consulibus, Aufonum magis novo, quam magno bello fuit insignis. Ea gens Cales urbem incolebat. Sidicinis finiti-



mis arma conjunxerat : unoque proelio haud sane memorabili duorum populorum exercitus fusus, propinquitate urbium & ad fugam pronior, & in fuga ipsa tutior fuit. Nec tamen omiffa ejus belli cura Patribus, quia toties jam Sidicini aut ipsi moverant bellum, aut moventibus auxilium tulerant, aut cauffa armorum fuerant. Itaque omni ope adnisi sunt, ut maximum ea tempeftate imperatorem M, (h) Valerium Corvum consulem quartum facerent : collega additus Corvo M. Atilius Regulus. Et, ne forte casu erraretur, petatum ab consulibus, ut extra fortem Corvi ea provincia efflet. Exercitu victore a superioribus consulibus accepto, ad Cales, unde bellum ortum erat, profectus, quum hostes, ab superioris etiam certaminis memoria pavidos, clamore atque inpetu primo fudisset; mœnia ipsa obpugnare est adgressus. Et militum quidem is erat ardor, ut jam inde cum scalis succedere ad muros vellent, evafurosque contenderent. Corvus, quia id arduum factum erat, labore militum potius, quam periculo, peragere inceptum voluit. Itaque aggerem & vineas egit, turresque muro ad-

*U. c. 420.  
a. C. 332.*

*M. Valerio IV. M. Atilio  
Coss.*

*Cales  
Aufonum  
oppidum  
capitur.*

(h) M. l. T. Gron.

*U. c. 420.  
a. C. 332.* movit : quarum usum forte oblata obportunitas prævertit. Namque M. Fabius , captivus Romanus , quum , per negligentiam custodum festo die vinculis ruptis , per murum inter opera Romanorum , religata ad pinnam muri recte suspensus , manibus se demisisset ; perpulit imperatorem , ut vino epulisque sopitos hostes adgrederetur : nec majore certamine capti cum urbe Aufones sunt , quam acie fusi erant. Præda capta ingens est : præsidioque inposito Calibus [reductæ Romam legiones. Consul ex senatusconsulto triumphavit : & , ne Atilius expers gloriæ esset , jussi ambo consules adversus Sidicinos ducere exercitum. Dictatorem ante ex senatusconsulto comitiorum habendorum causa dixerunt L. Æmilium Mamercinum : is magistrum equitum Q. Publilium Philonem dixit. Dictatore comitia habente , consules creati sunt T. Veturius , Sp. Postumius. Etsi belli pars cum Sidicinis restabat ; tamen , ut beneficio prævenirent desiderium plebis , de colonia deducenda Cales retulerunt : factoque senatusconsulto , ut duo millia quingenti homines eo scriberentur , triumviros coloniae deducendæ agroque dividendo creaverunt Cæsonem Duilium , T. Quinctium , M. Fabium.

*Triumphat  
M. Valerius.*

*Dictator  
M. Æmilius.*

*U. c. 421.  
a. C. 331.*

*T. Veturius , Sp.  
Postumio  
Coss.*

XVII. Novi deinde consules, a veteribus exercitu accepto, ingressi hostium fines, populando usque ad mœnia atque urbem pervenerunt. Ibi, quia, ingenti exercitu comparato, Sidicini & ipsi pro extrema spe dimicaturi enise videbantur, & Samnium fama erat conciri ad bellum; dictator ab consulibus ex auctoritate senatus dictus P. Cornelius Rufinus; magister equitum M. Antonius. Religio deinde incescit, vitio eos creatos: magistratuque se abdicaverunt. Et, quia pestilentia infecuta est, velut omnibus eo vitio contactis auspiciis, res ad interregnum rediit. Ab interregno inito per quintum demum interregem M. Valerium Corvum creati consules A. Cornelius iterum & Cn. Domitius. Tranquillis rebus, fama Gallici belli pro tumultu valuit, ut dictatorem dici placeret. Dictus M. Papirius Crassus, & magister equitum P. Valerius Publicola: a quibus quum (i) delectus intentius, quam adversus finitima bella, haberetur, exploratores missi adtulerunt, quietam omnia apud Gallos esse. Samnium quoque jam alterum annum turbari novis consiliis suspectum erat: eo ex agro

*P. Cornelius  
dictator.*

*U. c. 422.  
a. C. 330.*

*A. Cornelio, Cn.  
Domitio  
Coss.*

*M. Papirius  
dictator.*

(i) *dum Gron.*

*U. c. 422.* Sidicino exercitus Romanus non est deductus.  
*a. C. 330.*

Ceterum Samnites bellum Alexandri Epirensis in Lucanos traxit : qui duo populi adversus regem , exscensionem a Pæsto facientem , signis conlatis pugnaverunt. Eo certamine superior Alexander , incertum qua fide culturus , si perinde cetera processissent , pacem cum Romanis fecit. Eodem anno census actus , novique cives censi : tribus propter eos additæ Mæcia & Scaptia : censores addiderunt Q. Publilius Philo , Sp. Postumius. Romani facti Acerrani , lege ab L. Papirio prætore lata , qua civitas sine suffragio data. Hæc eo anno domi militiæque gesta.

*Novæ tribus Mæcia & Scaptia.*

*U. c. 423.*  
*a. C. 329.*

*M. Claudio , C. Valerio Coss.*

XVIII. FÆDUS insequens annus seu intemperie cœli , seu humana fraude fuit , M. Claudio Marcello , C. Valerio consulibus. Flac-cum Potitumque varie in annalibus cognomen consulis invenio : ceterum , in eo , parvi refert , quid veri sit. Illud pervelim , ( nec omnes auctores sunt ) proditum falso esse , venenis absultos , quorum mors infamem annum pestilentia fecerit. Sicut proditur tamen res , ne cui auctorum fidem abrogaverim , exponenda est. Quum primores civitatis similibus morbis , eodemque ferme om-

nes eventu, morerentur; ancilla quædam ad *U. c. 423.*  
*a. C. 329.*  
 Q. Fabium Maximum ædilem curulem; indi-  
 caturam se causam publicæ pestis, professæ  
 est, si ab eo fides sibi data esset, haud futu-  
 rum noxæ indicium. Fabius confestim rem  
 ad consules, consules ad senatum referunt: *Veneficia*  
*Matrona-*  
*rum.*  
 consensuque ordinis fides indici data. Tum  
 patefactum, muliebri fraude civitatem premi,  
 matronasque ea venena coquere; &, si se-  
 qui extemplo velint, manifesto deprehendi  
 posse. Secuti indicem, & coquentes quasdam  
 medicamenta, & recondita alia, invenerunt.  
 Quibus in forum delatis, & ad viginti ma-  
 tronis, apud quas deprehensa erant, per via-  
 torem adcitis, duæ ex eis, Cornelia ac Ser-  
 gia, patriciæ utraque gentis, quum ea me-  
 dicamenta salubria esse contenderent, ab con-  
 futante indice bibere iussæ, ut se falsum  
 commentam arguerent; spatio ad conloquen-  
 dum sumto, quum, submoto populo, in con-  
 spectu omnium rem ad ceteras retulissent;  
 haud abnudentibus & illis bibere, epoto me-  
 dicamento, suamet ipsæ fraude omnes inte-  
 rierunt. Comprehenstæ extemplo earum comi-  
 tes magnum numerum matronarum indicave-  
 runt: ex quibus ad centum septuaginta dam-

*U. c. 423.* natae. Neque de veneficiis ante eam diem Ro-  
*a. C. 329.* mae quaesitum est. Prodigii ea res loco habita ;  
 captisque magis mentibus, quam consceleratis, similis visa. Itaque, memoria ex annalibus repetita, in secessionibus quondam plebis clavum ab dictatore fixum, alienatasque discordia mentes hominum eo piaculo compotes sui fecisse, dictatorem clavi figendi causa creari placuit. Creatus Cn. Quinctilius magistrum equitum L. Valerium dixit : qui, fixo clavo, magistratu se abdicaverunt.

*Clavi  
figendi  
causa  
creatus  
dictator.*

*U. c. 425.* XIX. CREATI consules (k) L. Papirius  
*a. C. 327.* Crassus iterum, L. Plautius Venno. Cujus principio anni legati ex Volscis Fabraterni, & Lucani, Romam venerunt, orantes, ut in fidem reciperentur. Si a Samnitium armis defensi essent, se sub imperio populi Romani fideliter atque obedienter futuros. Missi tum ab senatu legati, denunciatumque Samnitibus, ut (l) eorum populorum finibus vim absti-

*L. Papirio  
II. L.  
Plautio  
Coss.*

(k) *Annum circa haec tempora interjiciendum esse consentiunt interpretes omnes. Hic eum interponendum esse Dodwellus existimat, Diss. X. de Cyclis Rom. & in eum consules edit L. Papirium, Sp. F. Cursorem, C. Pœtelium, C. F. Libonem Visolum.*

(l) *ut del. Gron.*

nerent. Valuitque ea legatio, non tam quia *U. c. 425.*  
 pacem volebant Samnites, quam quia non- *a. C. 327.*  
 dum parati erant ad bellum. Eodem anno *Bellum*  
 Privernas bellum initum : cujus socii Fundani, *Privernas,*  
 dux etiam fuit Fundanus, (m) Vitruvius  
 Vaccus; vir non domi solum, sed etiam  
 Romæ clarus. Ædes fuere in Palatio ejus,  
 quæ Vacci prata, diruto ædificio publica-  
 toque solo, adpellata. Adversus hunc, vastan-  
 tem effuse Setinum Norbanumque & Cora-  
 num agrum, L. Papirius profectus, haud  
 procul castris ejus confedit. Vitruvio nec,  
 ut vallo se teneret adversus validiorem hos-  
 tem, sana constare mens, nec, ut longius a  
 castris dimicaret, animus subpetere. Vix tota  
 extra portam castrorum explicata acie, fugam  
 magis retro, quam proelium aut hostem,  
 spectante milite, sine consilio, sine audacia  
 depugnat. Et ut levi momento nec ambigue  
 est victus; ita, brevitate ipsa loci facili-  
 receptu in tam propinqua castra, haud ægre  
 militem a multa cæde est tutatus : nec fere  
 quisquam in ipso certamine, pauci in turba  
 fugæ extremæ, quum in castra ruerent, cæsi;  
 primisque tenebris Privernum inde petitur

*Vidi*  
*Privernas*  
*tes.*

(m) *Fundanus fuit Gron. Crev.*

U. c. 425. agmine trepido, ut muris potius, quam val-  
a. C. 327. lo, sese tutarentur. A Priverno Plautius alter  
 consul, pervastatis passim agris prædaque  
 abacta, in agrum Fundanum exercitum indu-  
 cit. Ingredientibus fines senatus Fundanorum  
 obcurrit; «negant, se pro Vitruvio sectam-  
 » que ejus secutis precatum venisse, sed pro  
 » Fundano populo; quem extra culpam belli  
 » esse, ipsum Vitruvium judicasse, quum re-  
 » ceptaculum fugæ Privernum habuerit, non  
 » patriam Fundos. Priverni igitur hostes po-  
 » puli Romani quærendos persequendosque  
 » esse, qui simul a Fundanis ac Romanis,  
 » utriusque patriæ inmemores, defecerint.  
 » Fundanis pacem esse, & animos Romanos,  
 » & gratam memoriam acceptæ civitatis. Ora-  
 » re se consulem, ut bellum ab innoxio po-  
 » pulo abstineat: agros, urbem, corpora  
 » ipsorum, conjugumque, ac liberorum suo-  
 » rum, in potestate populi Romani esse, fu-  
 » turaque. » Conlaudatis Fundanis, consul,  
 literisque Romam missis, in officio Fun-  
 danos esse, ad Privernum flexit iter. Prius  
 animadversum in eos, qui capita conjuratio-  
 nis fuerant, a consule scribit Claudius: ad  
 trecentos quinquaginta ex conjuratis victos



Romam missos : eamque deditionem ab senatu non acceptam : quod egentium atque humilium poena defungi velle Fundanum populum censuerint.

*U. c. 425.  
a. C. 327.*

XX. PRIVERNUM duobus consularibus exercitibus quum obsideretur , alter consul comitiorum causa Romam revocatus. Carceres eo anno in circo primum statuti. nondum perfunctos cura Privernatis belli tumultus Gallici fama atrox invasit , haud ferme umquam neglecta Patribus. Extemplo igitur consules novi , L. Æmilius Mamercinus & C. Plautius , eo ipso die , Kalendis Quintilibus , quo magistratum (a) inierunt , comparare inter se provincias iussi ; & Mamercinus , cui Gallicum bellum evenerat , scribere exercitum sine ulla vacationis venia. Quin opificum quoque vulgus & fellularii , minime militiæ idoneum genus , exciti dicuntur : Veiosque ingens exercitus contractus , ut inde obviam Gallis iretur. Longius discedi , ne alio itinere hostis falleret ad urbem incedens , non placuit. Paucos deinde post dies , fatis explorata temporis ejus quiete , a Gallis Privernum omnis conversa vis. Duplex inde

*Privernum  
obsidetur.*

*U. c. 426.  
a. C. 326.*

*L. Æmilio  
H. C.  
Plautio  
Coss.*

(n) *magistratus* Gron.

*U. c. 426.  
a. C. 326.*

*Privernum  
captum.*

*Consul refert ad senatum de Privernatibus.*

fama est : alii vi captam urbem , Vitruviumque vivum in potestatem venisse : alii , priusquam ultima adhiberetur vis , ipsos se in deditiōem consulis caduceum præferentes permisisse , auctores sunt , Vitruviumque ab suis traditum. Senatus , de Vitruvio Privernatibusque consultus , consulem Plautium , dirutis Priverni muris , præsidioque valido inposito , ad triumphum arcessit ; Vitruvium in carcerem adservari iussit , quoad consul redisset ; tum verberatum necari. Ædes ejus , quæ essent in Palatio , diruendas , bona Semoni Sanco censuerunt consecranda : quodque æris ex eis redactum est , ex eo ænei orbes facti , positi in facello Sanci versus ( o ) ædem Quirini. De senatu Privernate ita decretum , ut , qui senator Priverni post defectionem ab Romanis mansisset , trans Tiberim lege eadem , qua Veliterni , habitaret. His ita decretis , usque ad triumphum Plautii silentium de Privernatibus fuit : post triumphum consul , necato Vitruvio fociisque ejus noxæ , apud satiatis jam suppliciis nocentium tutam mentionem de Privernatibus ratus ; “ Quoniam auctores defectionis [ inquit ] meritas poenas & ab Diis immortalibus & a vobis ( o ) adversus Crev. ” habent,

» habent, Patres conscripti, quid placet de *U. c. 326,*  
 » innoxia multitudine fieri? Equidem, etsi *a. C. 326,*  
 » meæ partes exquirendæ magis sententiæ,  
 » quam dandæ sunt; tamen, quum videam,  
 » Privernates vicinos Samnitibus esse, unde  
 » nunc nobis incertissima pax est; quam mi-  
 » nimum irarum inter nos illosque relinqui  
 » velim.»

XXI. QUUM ipsa per se res anceps esset;  
 prout cujusque ingenium erat, atrocius mi-  
 tiusve suadentibus; tum incertiora omnia  
 unus ex Privernatibus legatis fecit, magis *Privernatē*  
 conditionis, in qua natus esset, quam præ- *tis legatē*  
 sentis necessitatis, memor: qui, interroga- *ferox re-*  
 tus a quodam tristioris sententiæ auctore, *sponsūm*  
 » quam poenam meritos Privernates censeret?  
 » Eam [inquit] quam merentur, qui se liber-  
 » tate dignos sentent. » Cujus quum feroci  
 responso infestiores factos videret consul eos,  
 qui ante Privernatium causam impugnabant;  
 ut ipse benigna interrogatione mitius respon-  
 sum eliceret, « Quid, si poenam [inquit]  
 » remittimus vobis, qualem nos pacem vo-  
 » biscum habituros speremus? Si bonam de-  
 » deritis [inquit] & fidam, & perpetuam: si  
 » malam, haud diuturnam. » Tum vero mi-

*U. c. 426.* nari, nec id ambigue, Privernatem quidam,  
*a. C. 326.* & illis vocibus ad rebellandum incitari pacatos populos : pars melior senatus ad meliora responsum (*p*) trahere, & dicere, « Viri, & » liberi, vocem auditam. An credi posse, » ullum populum, aut hominem denique, in » ea conditione, cujus eum poeniteat, diutius, quam necesse fit, mansurum ? Ibi » pacem esse fidam, ubi voluntarii pacati sint : » neque eo loco, ubi servitutem esse velint, » fidem sperandam esse. » In hanc sententiam maxime consul ipse inclinavit animos, idem tamen ad principes sententiarum consulares, uti exaudiri posset a pluribus, dicendo, « Eos » demum, qui nihil, præterquam de libertate, » cogitent, (*q*) dignos esse, qui Romani » fiant. » Itaque & in senatu causam obtinere, & ex auctoritate Patrum latum ad populum est, ut Privernatibus civitas daretur. Eodem anno Anxur trecenti in coloniam missi sunt : bina jugera agri acceperunt.

*Privernatibus civitas datur.*

*U. c. 427.* XXII. SECUTUS est annus nulla re bellidomive insignis, P. Plautio Procuro, P. Cornelio Scapula consulibus; præterquam quod  
*a. C. 325.*  
*P. Plautio, P. Cornelio*  
*Coss.* (*p*) *responsa* Gron. Crev.  
 (*q*) *cogitant* Gron.

Fregellas (Sidicinorum is ager, deinde Volf-  
 corum fuerat) colonia deducta; & populo  
 visceratio data a M. Flavio in funere matris.  
 Erant, qui, per speciem honorandæ parentis,  
 meritam mercedem populo solutam interpre-  
 tarentur; quod eum, die dicta ab ædilibus,  
 crimine stupratæ matrisfamilie absolvisset.  
 Data visceratio in præteritam judicii gratiam,  
 honoris etiam ei causa fuit: tribunatumque  
 plebei, proximis comitiis, absens petentibus  
 præfertur. Palæpolis fuit haud procul inde, *Palæpolis.*  
 ubi nunc Neapolis sita est: duabus urbibus  
 populus idem habitabat. Cumis erant oriundi.  
 Cumani ab Chalcide Euboica originem tra-  
 hunt. Classe, qua advecti ab domo fuerant,  
 multum in ora maris ejus, quod adcolunt,  
 potuere. Primo in insulas Ænariam & Pithe-  
 cusas egressi, deinde in continentem ausi se-  
 des transferre. Hæc civitas, quum suis viri-  
 bus, tum Samnitium infida adversus Roma-  
 nos societate freta, sive pestilentie, quæ  
 Romanam urbem adorta nunciabatur, fidens,  
 multa hostilia adversus Romanos, agrum Cam-  
 panum Falernumque incolentes, fecit. Igi-  
 tur, L. Cornelio Lentulo, Q. Publilio Phi-  
 lone iterum consulibus, fecialibus Palæpo-

*U. c. 427.  
 a. C. 325.*

*U. c. 428.  
 a. C. 324.  
 L. Corne-  
 lio, Q.  
 Publilio  
 II. Coss.*

*U. c. 428.  
a. C. 324.*

*Palæpoli-  
tanis bel-  
lum infer-  
tur.*

*Samnium  
suspectum.*

*Legati ad  
Samnites.*

lim ad res repetendas missis, quum relatum esset a Græcis, gente lingua magis strenua, quam factis, ferox responsum; ex auctoritate Patrum populus Palæpolitani bellum fieri iussit. Inter consules, provinciis comparatis, bello Græci persequendi Publilio venerunt; Cornelius altero exercitu Samnitibus, si qua se moverent, obpositus. Fama autem erat, defectioni Campanorum imminentes admoturos castra. Ibi optimum visum Cornelio stativa habere. Ab utroque consule, exiguam spem pacis cum Samnitibus esse, certior fit senatus.

XXIII. PUBLILIUS, duo millia Nolanorum militum & quatuor Samnitium, magis Nolanis cogentibus, quam voluntate Græcorum, recepta Palæpolim, (r) miserat: Cornelius, delectum indictum a magistratibus, univsum Samnium erectum, ac vicinos populos, Privernatem, Fundanumque, & Formianum, haud ambigue sollicitari. Ob hæc quum legatos mitti placuisset prius ad Samnites, quam bellum fieret; responsum redditur ab Samnitibus ferox. Ultro incusabant injurias Romanorum: neque eo neglegentius ea, quæ

(r) *Palæpoli* Cron. Crév.

ipsis objicerentur, purgabant. « Haud ullo *U. c. 428.*  
 » publico consilio auxiliove juvari Græcos : *a. C. 324.*  
 » nec Fundanum Formianumve a se sollicita-  
 » tos ; quippe minime pœnitere se virium  
 » suarum , si bellum placeat. Ceterum non  
 » posse dissimulare , ægre pati civitatem Sam-  
 » nitium , quod Fregellas , ex Volscis captas  
 » dirutasque ab se , restituerit Romanus popu-  
 » lus , coloniamque in Samnitium agro inpo-  
 » fuerit , quam coloni eorum Fregellas ad-  
 » pellent. Eam se contumeliam injuriamque ,  
 » ni sibi ab iis , qui fecerint , dematur , ipsos  
 » omni vi depulsuros esse. » Quum Romanus  
 legatus ad disceptandum eos ad communes  
 focios atque amicos vocaret : « Quid per-  
 » plexe agimus ? [ inquit ]. Nostra certamina,  
 » Romani , non verba legatorum , nec homi-  
 » num quisquam disceptator , sed campus Cam-  
 » panus , in quo concurrendum est , & arma,  
 » & communis Mars belli decernet. Proinde  
 » inter Capuam Sueffulamque castra castris  
 » conferamus : & , Samnis Romanusne im-  
 » perio Italiam regat , decernamus. » Legati  
 Romanorum quum se , non quo hostis vo-  
 casset , sed quo imperatores sui duxissent ,  
 ituros esse respondissent ; jam Publilius , inter

U. c. 428.  
a. C. 324.

*Palæpolis  
obsessa.*

*M. Claudius  
dictator.*

Palæpolim Neapolimque loco opportune capto, diremerat hostibus societatem auxilii mutui; qua, ut quisque locus premeretur, inter se usi fuerant. Itaque quum & comitiorum dies instaret, &, Publilium, inminentem hostium muris, avocari ab spe capiendæ in dies urbis, haud e republica esset; actum cum tribunis est, ad populum ferrent, ut, quum Publilius Philo. consulatu abisset, pro consule rem gereret, quoad debellatum cum Græcis esset. L. Cornelio (quia ne eum quidem in Samnium jam ingressum revocari ab inpetu belli placebat) literæ missæ, ut dictatorem comitiorum causâ diceret. Dixit M. Claudium Marcellum: ab eo magister equitum dictus Sp. Postumius. Nec tamen ab dictatore comitia sunt habita, quia, vitione creatus esset, in disquisitionem venit. Consulti augures, vitiosum videri dictatorem, pronunciaverunt. Eam rem tribuni suspectam infamemque criminando fecerunt. « Nam ne- » que facile fuisse id vitium nosci, quum » consul oriens (s) nocte silentio diceret » dictatorem: neque ab consule cuiquam pu- » blice privatimve de ea re scriptum esse:

(s) oriente Gron.



» nec quemquam mortalium exstare, qui se *U. c. 248.*  
 » vidisse aut audisse quid dicat, quod auspi- *a. C. 324.*  
 » cium dirimeret : neque augures divinare  
 » Romæ sedentes potuisse, quid in castris  
 » consuli vitii obvenisset. Cui non adparere,  
 » quod plebeius dictator sit, id vitium augu-  
 » ribus visum ? » Hæc aliaque ab tribunis  
 nequidquam jactata : tamen ad interregnum  
 res redit : dilatisque alia atque alia de causâ  
 comitiis, quartusdecimus demum interrex L.  
 Æmilius consules creat C. Pœtelium, L. Pa-  
 pirium Mugillanum. Cursorem in aliis anna-  
 libus invenio.

*U. c. 429.*  
*a. C. 323.*

*C. Pœtelio*  
*II. L. Pa-*  
*pirio Coss.*

*Alexandri*  
*Epirensis*  
*fata.*

XXIV. EODEM anno Alexandriam in  
 Ægypto proditum conditam ; Alexandrum-  
 que, Epiri regem, ab exfule Lucano inter-  
 fectum, fortès Dodonæi Jovis eventu adfir-  
 maffe. Adcito ab Tarentinis in Italiam data  
 dictio erat, « caveret Acherusiam aquam Pan-  
 » dosiamque urbem : ibi fatis ejus terminum  
 » dari. » Eoque ocius transmisit in Italiam,  
 ut quam maxime procul abesset urbe Pando-  
 sia in Epiro & Acheronte amni, quem ex  
 Molosside fluentem in stagna Inferna accipit  
 Thesprotius (1) sinus. Ceterum (ut ferme

(1) *Thesprotinus Gron.*

U. c. 429.  
a. C. 323.

fugiendo in media fata ruitur ) quum sæpe Bruttias Lucanasque legiones fudisset ; Hera-  
 cleam Tarentinorum coloniam, Consentiam  
 ex Lucanis, Sipontumque, Bruttiorum Teri-  
 nam, alias inde Messapiorum ac Lucanorum  
 cepisset urbes, & trecentas familias inlustres  
 in Epirum, quas obsidum numero haberet,  
 misisset ; haud procul Pandosia urbe inminente  
 (u) Lucanis ac Bruttiis finibus, tris tumu-  
 los, aliquantum inter se distantes, infedit ;  
 ex quibus incurfiones in omnem partem agri  
 hostilis faceret. Et ducentos ferme Lucanorum  
 exsules circa se pro fidis habebat, ut plera-  
 que ejus generis ingenia sunt, cum fortuna  
 mutabilem gerentes fidem. Imbres continui,  
 campis omnibus inundantes, quum interclu-  
 sissent trifariam exercitum a mutuo inter se  
 auxilio, duo præsidia, quæ sine rege erant,  
 inprovifo hostium adventu obprimuntur : de-  
 letisque eis, ad ipsius obsidionem omnes  
 conversi. Inde ab Lucanis exsulibus ad suos  
 nuncii missi sunt : pactoque reditu promissum  
 est, regem, aut vivum, aut mortuum, in pote-  
 statem daturos. Ceterum cum delectis ipse,  
 egregium facinus ausus, per medios erumpit

(u) *imminentes Gron. Crev.*

hostes, & ducem Lucanorum cominus con-  
 gressum obtruncat : contrahensque suos ex  
 fuga palatos, pervenit ad amnem, ruinis re-  
 centibus pontis, quem vis aquæ abstulerat,  
 indicantem iter. Quem quum incerto vado tran-  
 saret agmen, fessus metu ac labore miles, incre-  
 pans nomen abominandum fluminis, « Jure  
 » Acherus vocaris, » inquit. Quod ubi ad aures  
 accidit regis; adjecit extemplo animum fatis  
 suis; substititque dubius, an transiret. Tum  
 Sotimus minister ex regiis pueris, « quid in  
 » tanto discrimine periculi cunctaretur » in-  
 terrogans, indicat, Lucanos insidiis quærere  
 locum. Quos ubi respexit rex procul grege  
 facto venientes, stringit gladium, & per  
 medium amnem transmittit equum. Jamque  
 in vadum egressum eminus veruto Lucanus  
 exul transfigit. Lapsus inde cum inhærente  
 telo corpus exanime detulit amnis in hostium  
 præsidia. Ibi foeda laceratio corporis facta.  
 Namque, præciso medio, partem Consentiam  
 misere : pars ipsis retenta ad ludibrium. Quæ  
 quum jaculis saxisque procul incesceretur,  
 mulier una, ultra humanarum irarum fidem  
 sævienti turbæ inmixta, ut parumper susti-  
 nerent precata, flens ait, « virum sibi liberos.

*U. c. 4293*  
*a. C. 3230*

*U. c. 429.* » que captos apud hostes esse ; sperare , cor-  
*a. C. 323.* » pore regio utcumque mulcato se suos redem-  
 » turam. » Is finis lacerationi fuit. Sepultum-  
 que Consentiaë, quod membrorum reliquum  
 fuit , cura mulieris unius : ossaque Metapon-  
 tum ad hostes remissa ; inde Epirum devecta  
 ad Cleopatram uxorem sororemque Olympia-  
 dem : quarum mater Magni Alexandri altera ,  
 soror altera fuit. Hæc de Alexandri Epirensis  
 tristi eventu quamquam Romano bello fortuna  
 eum abstinuit , tamen , quia in Italia bella ges-  
 sit , paucis dixisse satis sit.

*Quintum  
 Lectisternium.*

XXV. EODEM anno lectisternium Romæ ,  
 quinto post conditam urbem , iisdem , quibus  
 ante , placandis habitum est Diis. Novi dein-  
 de consules jussu populi quum misissent , qui  
 indicerent Samnitibus bellum ; & ipsi majore  
 conatu , quam adversus Græcos , cuncta pa-  
 rabant ; & alia nova nihil tum animo tale  
 agitantibus accesserunt auxilia. Lucani atque  
 Apuli , quibus gentibus nihil ad eam diem cum  
 Romano populo fuerat , in fidem venerunt ,  
 arma virosque ad bellum pollicentes. Foedere  
 ergo in amicitiam accepti. Eodem tempore  
 etiam in Samnio res prospere gesta. Tria op-  
 pida in potestatem venerunt , Allifæ , Callifæ ,

Ruffrium: aliufque ager primo adventu confulum longe lateque eft pervaftatus. Hoc bello tam profpere commiffo, alteri quoque bello, quo Græci obfidebantur, jam finis aderat. Nam, præterquam quod, interfeptis munimentis hoftium, pars parti abfciffa erat, foediora aliquanto intra muros iis, quibus hoftis territabat, patiebantur: & velut capti a fuismetipfis præfidiis, indigna jam liberis quoque ac conjugibus, & quæ captarum urbium extrema funt, patiebantur. Itaque quum, & a Tarento & a Samnitibus, fama effet, nova auxilia ventura, Samnitium plus, quam vellent, intra mœnia effe rebantur: Tarentinorum juventutem, Græci Græcos, haud minus per quos Samniti Nolanoque, quam ut Romanis hoftibus refifterent, exspectabant. Postremo leviffimum malorum deditio ad Romanos vifa. Charilaus & Nymphius, principes civitatis, communicato inter fe confilio, partes ad rem agendam divifere, ut alter ad imperatorem Romanorum transfugeret, alter fubfisteret ad præbendam opportunam confilio urbem. Charilaus fuit, qui ad Publilium Philonem venit: &, «quod bonum, fauftum, felix (x)

U. c. 420.  
a. C. 323.

U. c. 429. » Palæpolitani populoque Romano esset,  
 a. C. 323. » tradere se [ait] mœnia statuisse. Eo facto  
*Palæpolis* » utrum ab se prodita, an servata, patria  
*tradita.* » videatur, in fide Romana positum esse. Sibi  
 » privatim nec pacisci quidquam, nec petere:  
 » publice petere, quam pacisci, magis, ut,  
 » si successisset inceptum, cogitaret populus  
 » Romanus, potius cum quanto studio peri-  
 » culoque reditum in amicitiam suam esset,  
 » quam qua stultitia & temeritate de officio  
 » decessum.» Conlaudatus ab imperatore, tria  
 millia militum ad occupandam eam partem  
 urbis, quam Samnites infidebant, accepit:  
 præsidio ei L. Quinctius tribunus militum  
 præpositus.

XXVI. EODEM tempore & Nymphius præ-  
 torem Samnitium arte adgressus perpulerat,  
 ut, quoniam omnis Romanus exercitus aut  
 circa Palæpolim aut in Samnio esset, fineret  
 se classe circumvehi ad Romanum agrum,  
 non oram modo maris, sed ipsi urbi propin-  
 qua loca depopulaturum. Sed, ut falleret,  
 nocte proficiscendum esse, extemploque na-  
 ves deducendas. Quod quo maturius fieret,  
 omnis juventus Samnitium, præter necessa-  
 rium urbis præsidium, ad litus missa: ubi

dum Nymphius in tenebris & multitudine *U. c. 429.*  
 semet ipsa inpediente, sedulo aliis alia impe- *a. C. 323.*  
 ria turbans, terit tempus; Charilaus, ex  
 composito ab fociis in urbem receptus, quum  
 summa urbis Romano milite inpleffet, tolli  
 clamorem iussit: ad quem Græci, signo  
 accepto a principibus, quievere. Nolani per  
 averfam partem urbis via Nolam ferente effu-  
 giunt. Samnitibus exclusis ab urbe, ut expe-  
 ditior in præsentia fuga, ita fœdior, post-  
 quam periculo evaserunt, visa: quippe qui  
 inermes, nulla rerum suarum non relicta in-  
 ter hostes, ludibrium non externis modo,  
 sed etiam popularibus, spoliati atque egentes  
 domos rediere. Haud ignarus opinionis alterius,  
 qua hæc proditio ab Samnitibus facta tradi-  
 tur, quum auctoribus hoc dedi, quibus  
 dignius credi est, tum fœdus Neapolitanum  
 (eo enim deinde summa rei Græcorum venit)  
 similis vero facit, ipsos in amicitiam redisse.  
 Publilio triumphus decretus; quod satis  
 credebatur, obsidione domitos hostes in fi-  
 dem venisse. Duo singularia hæc ei viro  
 primum contingere; prorogatio imperii non  
 ante in ullo facta, & acto honore trium-  
 phus.

U. c. 429.

a. C. 323.

*Tarentino-  
rum indig-  
natio in  
Romanos.*

XXVII. ALIUD subinde bellum cum alterius oræ Græcis exortum. Namque Tarentini, quum rem Palæpolitānam vana spe auxilii aliquamdiu sustinuisſent, poſtquam Romanos urbe potitos acceperē, velut deſtituti, ac non qui ipſi deſtituiſſent, increpare Palæpolitānos: ira atque invidia in Romanos furere; eo etiam, quod Lucanos & Apulos (nam utraque eo anno ſocietas cœpta eſt) in fidem populi Romani veniſſe adlatum eſt. « Quippe » propemodum perventum ad ſe eſſe: jam » que in eo rem fore, ut Romani aut hoſtes, » aut domini habendi ſint. Diſcrimen proſecto » rerum ſuarum in bello Samnitium eventu- » que ejus verti. Eam ſolam gentem reſtare, » nec eam ipſam ſatis validam, quando Luca- » nus defecerit. Quem revocari adhuc, in- » pelliſſe ad abolendam ſocietatem Roma- » nam poſſe, ſi qua ars ferendis diſcordiis » adhibeatur. » Hæc conſilia quum apud cupidos rerum novandarum valuiffent; ex juventute quidam Lucanorum pretio adſciti, clari magis inter populares, quam honeſti, inter ſe mulcati ipſi virgis, quum corpora nuda intuliſſent in civium cœtum, vociferati ſunt, ſe, quod caſtra Romana ingredi

*Concitant  
Lucanos.*



ausi essent, a consule virgis cæsos, ac prope securi percussos esse. Deformis suapte natura *U. c. 429.  
a. C. 323.*  
res quum speciem injuriæ magis, quam doli, præ se ferret, concitati homines cogunt clamore suo magistratus senatum vocare: & alii, circumstantes concilium, bellum in Romanos poscunt: alii ad concitandam in arma multitudinem agrestium discurrunt: tumultuque etiam sanos consternante animos, decernitur, ut societas cum Samnitibus renovaretur; legati que ad eam rem mittuntur (y). Repentina res quia quam causam nullam, tam ne fidem quidem habebat, coacti a Samnitibus & obsides dare, & præsidia in loca munita accipere, cæci fraude & ira nihil recusarunt. Dilucere deinde brevi fraus cœpit, postquam criminum falsorum auctores Tarentum commigravere: sed, amissa omni de se potestate, nihil ultra, quam ut pœniteret frustra, restabat.

XXVIII. Eo anno plebi Romanæ velut aliud initium libertatis factum est, quod nexi (z) desierunt: mutatum autem jus ob

(y) *renovetur, legati que ad eam rem mittantur;*  
Gron. Crev.

(z) *ligari nexi* Gron.

*U. c. 429.  
a. C. 323.*

*Papirii  
fœnerato-  
ris fœda  
libido.*

unius fœneratoris simul libidinem, simul crudelitatem insignem. - L. Papirius is fuit : cui quum se C. Publilius ob æs alienum paternum, nexum dedisset ; quæ ætas formaque misericordiam elicere poterat, ad libidinem & contumeliam animum accenderunt : & , florem ætatis ejus fructum adventicium crediti ratus, primo perlicere adolescentem sermone incesto est conatus : dein , postquam aspernabantur flagitium aures, minis territare, atque idemtidem admonere fortunæ : postremo, quum ingenuitatis magis, quam præsentis conditionis, memorem videret, nudari jubet, verberaque adferri. Quibus laceratus juvenis, quum se in publicum proripuisset, libidinem crudelitatemque conquerens fœneratoris ; ingens vis hominum, quum ætatis miseratione atque indignitate injuriæ accensa, tum suæ conditionis liberumque suorum respectu, in forum, atque inde, agmine facto, ad curiam concurrit. Et quum consules, tumultu repentino coacti, senatum vocarent, introëuntibus in curiam Patribus laceratum juvenis tergum, procumbentes ad singulorum pedes, ostentabant. Victum eo die ob impotentem injuriam unius ingens vinculum fidei :

jussi-

jussuque consules ferre ad populum, ne quis, *U. c. 429.*  
 nisi qui noxam meruisset, donec poenam *a. C. 323.*  
 lueret, in compedibus aut in nervo teneretur : pecuniæ creditæ bona debitoris, non  
 corpus, obnoxium esset. Ita nexi soluti; *Nexi soluti,*  
 cautumque in posterum, ne necerentur. *cautumque ne necerentur.*

XXIX. EODEM anno, quum satis per se  
 ipsum Samnitium bellum & defectio repens  
 Lucanorum, auctoresque defectionis Taren-  
 tini sollicitos haberent Patres, accessit, ut &  
 Vestinus populus Samnitibus sese conjunge-  
 ret. Quæ res sicut eo anno sermonibus ma-  
 gis passim hominum jactata, quam in publi-  
 co ullo concilio est; ita insequentis anni con-  
 sulibus, L. Furio Camillo iterum, Junio  
 Bruto Scævæ, nulla prior potiorque visa est,  
 de qua ad senatum referrent. Et, quamquam  
 nova res erat, tamen tanta cura Patres in-  
 cessit, ut pariter eam susceptam neglectam-  
 que timerent : ne aut impunitas eorum lasci-  
 via superbiaque, aut bello poenæ expetitæ  
 metu propinquo atque ira concirent finitimos  
 populos. Et erat genus omne abunde bello  
 Samnitibus par, Marfi Pelignique & Marru-  
 cini : quos, si Vestinus adtingeretur, omnes  
 habendos hostes. Vicit tamen pars, quæ in

*U. c. 430.*  
*a. C. 322.*

*L. Furio*  
*II. D. Ju-*  
*nio Coss.*

*U. c. 430.  
a. C. 322.*

*Vestinis  
bellum in-  
dictum*

*L. Papi-  
rius  
dictator.*

præsentia videri potuit majoris animi, quam consilii: sed eventus docuit, fortes fortunam juvare. Bellum ex auctoritate Patrum populus adversus Vestinos jussit. Provincia ea Bruto, Sarnium Camillo forte evenit. Exercitus utroque ducti, & cura tuendorum finium hostes prohibiti conjungere arma. Ceterum alterum consulem L. Furium, cui major moles rerum inposita erat, morbo gravi implicatum fortuna bello subtraxit: jussusque dictatorem dicere rei gerendæ causa, longe clarissimum bello ea tempestate dixit L. Papirium Cursorem; a quo Q. Fabius Maximus Rullianus magister equitum est dictus: par nobile rebus in eo magistratu gestis; discordia tamen, qua prope ad ultimum dimicationis ventum est, nobilius. Ab altero consule in Vestinis multiplex bellum, nec usquam vario eventu, gestum est. Nam & pervastavit agros, & populando atque urendo testâ hostium fataque, in aciem invitos extraxit: & ita prælio uno adcidit Vestinorum res, haudquaquam tamen incruento milite suo, ut non in castra solum refugerent hostes, sed, jam ne vallo quidem ac fossis freti, dilaberentur in oppida, situ urbium moenibusque se defensuri.

Postremo oppida quoque vi expugnare (a) *U. c. 430.*  
 adortus, primo Cutinam ingenti ardore mili- *a. c. 322.*  
 tum aut vulnerum ira, quod haud fere quis-  
 quam integer prælio excefferat, scalis cepit:  
 deinde Cingiliam. Utriusque urbis prædam  
 militibus, quodeos neque portæ, neque muri  
 hostium arcuerant, concessit.

XXX. IN Samnium incertis itum auspiciis  
 est: cuius rei vitium non in belli eventum,  
 quod prospere gestum est, sed in rabiem at-  
 que iras imperatorum vertit. Namque Papi-  
 rius dictator, a pullario monitus, quum ad  
 auspicium repetendum Romam proficiscere-  
 tur, magistro equitum denunciavit, ut sese  
 loco teneret, neu, absente se, cum hoste  
 manum confereret. Fabius quum post profec-  
 tionem dictatoris per exploratores comperis-  
 set, perinde omnia soluta apud hostes, ac si  
 nemo Romanus in Samnio esset; seu ferox  
 adolescens indignitate accensus, quod omnia  
 in dictatore viderentur reposita esse; seu oc-  
 casione bene gerendæ rei inductus; exercitu  
 instructo paratoque profectus ad Imbrinium,  
 (ita vocant locum) acie cum Samnitibus  
 conflixit. Ea fortuna pugnae fuit, ut nihil

*Fabius M.  
 E. absente  
 dictatore,  
 rem bene  
 gerit.*

(a) oppugnare Gron.

*U. c. 430.*  
*a. C. 322.*

relictum sit, quo, si adfuisset dictator, res melius geri potuerit : non dux militi, non miles duci defuit. Eques etiam, auctore L. Cominio tribuno militum, qui aliquoties inpetu capto perrumpere non poterat hostium agmen, detraxit frenos equis ; atque ita concitatos calcaribus permisit, ut sustinere eos nulla vis posset. Per arma, per viros late stragem dedere. Secutus pedes inpetum equitum, turbatis hostibus intulit signa. Viginti millia hostium cæsa eo die traduntur. Auctores habeo, bis cum hoste signa conlata, dictatore absente, bis rem egregie gestam. Apud antiquissimos scriptores una hæc pugna invenitur : in quibusdam annalibus tota res prætermissa est. Magister equitum, ut ex tanta cæde, multis potitus spoliis, congesta in ingentem acervum hostilia arma subdito igne concremavit : seu votum id Deorum cuipiam fuit ; seu credere libet Fabio auctori, eo factum, ne suæ gloriæ fructum dictator caperet, nomenque ibi scriberet, aut spolia in triumpho ferret. Literæ quoque de re prospere gesta ad senatum, non ad dictatorem, missæ, argumentum fuere minime cum eo communicantis laudes (b). Ita certe dictator id fac-

(b) *laudem* Gron. Crev.

tum accepit, ut, lætis aliis victoria parta, præ se ferret iram tristitiamque. Misso itaque repente senatu, se ex curia proripuit: tum vero, non Samnitium magis legiones, quam majestatem dictatoriam & disciplinam militarem, a magistro equitum victam & everfam dictitans, si illi inpune spretum imperium fuisset. Itaque plenus minarum iræque, profectus in castra, quum maximis itineribus isset, non tamen prævenire famam adventus sui potuit. Præcucurrerant enim ab urbe, qui nunciarent, dictatorem avidum poenæ venire, alternis pene verbis T. Manlii factum laudantem.

XXXI. FABIVS, concione extemplo advocata, obtestatus milites est, « ut, qua virtute » rempublicam ab infestissimis hostibus defen- » dissent, eadem se, cujus ductu auspicioque » vicissent, ab inpotenti crudelitate dictatoris » tutarentur. Venire amentem invidia, ira- » tum virtuti alienæ felicitatique : furere, » quod, se absente, res publica egregie gesta » esset : malle, si mutare fortunam posset, » apud Samnites, quam Romanos, victoriam » esse. Imperium dictitare spretum, tanquam » non eadem mente pugnari vetuerit, qua

*U. c. 430.  
a. C. 322.*

*Dictator  
indignatur*

*Fabii ora-  
tio ad mi-  
lites.*

*U. e. 430.* » pugnatum doleat : & tunc invidia inpedire  
*a. C. 322.* » virtutem alienam voluisse , cupidissimisque  
 » arma ablaturum fuisse militibus , ne , se  
 » absente , moveri possent : & nunc id furere , id  
 » ægre pati quod sine L. Papirio , non inermes ,  
 » non manci milites fuerint ; quod se Q. Fa-  
 » bius magistrum equitum duxerit , ac non  
 » accensum dictatoris. Quid illum facturum  
 » fuisse , si , quod belli casus ferunt , Mars-  
 » que communis , adversa pugna evenisset ;  
 » qui sibi , devictis hostibus , re publica bene  
 » gesta , ita ut non ab illo unico duce me-  
 » lius geri potuerit , supplicium magistro equi-  
 » tum minetur ? Neque illum magistro equi-  
 » tum infestiores , quam tribunis militum ,  
 » quam centurionibus , quam militibus esse.  
 » Si possit , in omnes sæviturum fuisse : quia  
 » id nequeat , in unum sævire. Etiam invi-  
 » diam , tamquam ignem , summa petere ; in  
 » caput consilii , in ducem incurrere. Si se  
 » simul cum gloria rei gestæ exstinxisset ,  
 » tunc victorem , velut in capto exercitu do-  
 » minantem , quidquid licuerit in magistro  
 » equitum , in militibus aufurum. Proinde  
 » adestent in sua causa omnium libertati. Si  
 » consensum exercitus eundem , qui in præ-



»lio fuerit, in tuenda victoria videat, & *U. c. 436.*  
 »salutem unius omnibus curæ esse; inclina- *a. C. 322.*  
 »turum ad clementiorem sententiam animum.  
 »Postremo se vitam fortunasque suas illo-  
 »rum fidei virtutique permittere.

XXXII. CLAMOR e tota concione ortus,  
 uti bonum animum haberet: neminem illi  
 vim adlaturum, falsis legionibus Romanis.  
 Haud multo post dictator advenit: classi-  
 coque extemplo ad concionem advocavit.  
 Tum, silentio facto, præco Q. Fabium ma-  
 gistrum equitum citavit. Qui simul ex infe-  
 riore loco ad tribunal accessit, tum dictator,  
 «Quæro [inquit] de te, Q. Fabi, quum *Dictatoris*  
 »summum imperium dictatoris sit, pareant- *oratio ad*  
 »que ei consules, regia potestas, prætores *M. E.*  
 »iisdem auspiciis, quibus consules, creati;  
 »æquum censeas, necne, magistrum equitum  
 »dicto audientem esse? Itemque illud inter-  
 »rogo, quum me incertis auspiciis profec-  
 »tum ab domo scirem, utrum mihi turbatis  
 »religionibus res publica in discrimen com-  
 »mittenda fuerit, an auspicia repetenda, ne  
 »quid dubiis Diis agerem? Simul illud,  
 »quæ dictatori religio impedimento ad rem  
 »gerendam fuerit, num ea magister equitum

*U. c. 430.* » solutus ac liber potuerit esse? Sed quid  
*a. C. 322.*

» ego hæc interrogo? quum, si ego tacitus  
 » abissem, tamen tibi ad voluntatis interpre-  
 » tationem meæ dirigenda tua sententia fue-  
 » rit. Quin tu respondes, vetuerimne, te quid-  
 » quam rei, me absente, agere? vetuerimne fig-  
 » na cum hostibus conferre? Quo tu imperio  
 » meo spreto, incertis auspiciis, turbatis re-  
 » ligionibus, adversus morem militarem disci-  
 » plinamque majorum & numen Deorum,  
 » ausus es cum hoste configere. Ad hæc,  
 » quæ interrogatus es, responde. Extra ea,  
 » cave, vocem mittas. Accede, lictor. » Ad-  
 » versus quæ singula (c) quum respondere  
 » haud facile esset, & nunc quereretur, eum-  
 » dem accusatorem capitis sui ac iudicem esse;  
 » modo, vitam sibi eripi citius, quam gloriam  
 » rerum gestarum, posse, vociferaretur; pur-  
 » garetque se invicem, atque ultro accusaret;  
 » tunc Papirius, redintegrata ira, spoliari ma-  
 » gistrum equitum, ac virgas & secures expe-  
 » diri iussit. Fabius, fidem militum inplorans,  
 » lacerantibus vestem lictoribus, ad triarios,  
 » tumultum jam in concione miscentes, sese  
 » recepit. Inde clamor in totam concionem est  
 » perlatum: alibi preces, alibi minæ audiebantur.

*Milites  
 Fabii de-  
 fensionem  
 adripiunt.*

(c) add. *Q. Fabio Gron. Crev.*

tur. Qui proximi forte tribunal steterant, *U. c. 430;*  
quia subiecti oculis imperatoris noscitari *a. C. 322,*  
poterant, orabant, ut parceret magistro equi-  
tum, neu cum eo exercitum damnaret. Ex-  
trema concio & circa Fabium globus incre-  
pabant inclementem dictatorem: nec procul  
seditione aberant. Ne tribunal quidem fatis  
quietum erat. Legati circumstantes sellam  
orabant, ut rem in posterum diem differret,  
& iræ suæ spatium, & consilio tempus da-  
ret: « Satis castigatam adolescentiam Fabii  
» esse: fatis deformatam victoriam: ne ad  
» extremum finem supplicii tenderet: neu  
» unico juveni, neu patri ejus, clarissimo  
» viro, neu Fabiæ genti eam injungeret igno-  
» miniam. » Quum parum precibus, parum  
caussa proficerent, « intueri sævientem con-  
» cionem » jubebant. « Ita inritatis militum  
» animis subdere ignem ac materiam seditioni,  
» non esse ætatis, non prudentiæ ejus. Ne-  
» minem id Q. Fabio, pœnam deprecanti  
» suam, vitio versurum, sed dictatori, si ob-  
» cœcatus ira infestam multitudinem in se  
» pravo certamine movisset. Postremo, ne id  
» se gratiæ dare Q. Fabii crederet, se jus-  
» jurandum dare paratos esse; non videri e

*U. c. 430.* » republica, in Q. Fabium eo tempore animi-  
*a. C. 322.* » adverti.»

*Fabius  
 Romam  
 fugit.*

*Sequitur  
 dictator.*

XXXIII. His vocibus quum in se magis incitarent dictatorem, quam in magistrum equitum placarent, jussi de tribunali descendere legati : & , silentio nequidquam per præconem tentato, quum, præ strepitu ac tumultu, nec ipsius dictatoris, nec adparitorum ejus vox audiretur; nox, velut in prælio, certamini finem fecit. Magister equitum, jussus postero die adesse, quum omnes adfirmarent, infestius Papirium exarsurum, agitatam contentione ipsa exacerbatumque, clam ex castris Romam profugit : & , patre auctore M. Fabio, qui ter jam consul dictatorque fuerat, vocato extemplo senatu, quum maxime conquereretur apud Patres vim atque injuriam dictatoris, repente strepitus antecuriam lictorum submoventium auditur : & ipse infensus aderat, postquam comperit profectum ex castris, cum expedito equitatu secutus. Iterata deinde contentio (d) : & prendi Fabium Papirius (e) jussit. Ubi quum, deprecantibus primoribus Patrum atque universo

(d) add. *est* Gron. Crev.

(e) *Papirius Fabium* Gron. Crev.

senatu, perstaret in incepto inmitis animus; *U. c. 430.*  
tum pater M. Fabius, « Quandoquidem [ in- *a. C. 322.*  
» quit ] apud te nec auctoritas senatus, nec *Fabii pa-*  
» ætas mea, cui orbitatem paras, nec virtus *ter Tr. Pl.*  
» nobilitasque magistri equitum, a te ipso *adpellat.*  
» nominati, valet, nec preces, quæ sæpe  
» hostem mitigavere, quæ Deorum iras pla-  
» cant; tribunos plebis adpello, & provoco  
» ad populum. Eumque tibi, fugienti exerci-  
» tus tui, fugienti senatus iudicium, iudicem  
» fero, qui certe unus plus, quam tua dicta-  
» tura, potest polletque. Videro, cessurusne  
» provocationi sis, cui Rex Romanus Tullus  
» Hostilius cessit. » Ex curia in concionem  
itur. Quo cum paucis dictator, cum omni  
agmine principum magister equitum quum  
descendisset; deduci eum de rostris Papirius  
in partem inferiorem iussit. Secutus pater,  
« Bene agis [ inquit ] quum eo nos deduci  
» iussisti, unde & privati vocem mittere  
» possemus. » Ibi (f) primo non tam perpe-  
tuæ orationes, quam altercatio, exaudiebantur.  
Vicit deinde strepitum vox & indignatio  
Fabii senis, increpantis superbiam crudeli-  
tatemque Papirii: « Se quoque dictatorem

(f) In Gron. Crev.

*U. c. 430.* » Romæ fuisse, nec a se quemquam, ne ple-  
*a. c. 322.* » bis quidem hominem, non centurionem,  
*Fabii senis* » non militem, violatum; Papirium, tam-  
*oratio.* » quam ex hostium ducibus, sic ex Romano  
 » imperatore victoriam & triumphum petere.  
 » Quantum interesset inter moderationem  
 » antiquorum, & novam superbiam crudeli-  
 » tatemque. Dictatorem Quinctium Cincin-  
 » natum in L. Minucium consulem, ex obfi-  
 » dione a se ereptum, non ultra sævisse,  
 » quam ut legatum eum ad exercitum pro  
 » consule relinqueret. M. Furium Camillum  
 » in L. Furio, qui, contempta sua senectute  
 » & auctoritate, foedissimo cum eventu pug-  
 » nasset, non solum in præsentia moderatum  
 » iræ esse, ne quid de collega secus populo  
 » aut senatui scriberet, sed, quum revertis-  
 » set, potissimum ex tribunis consularibus  
 » habuisse, quem ex collegis, optione ab se-  
 » natu data, focium sibi imperii delegerit.  
 » Nam populi quidem, penes quem potestas  
 » omnium rerum esset, ne iram quidem um-  
 » quam atrociorē fuisse in eos, qui teme-  
 » ritate atque inscitia exercitus amisissent,  
 » quam ut pecunia eos multaret. Capite an-  
 » quisitum ob rem bello male gestam de im-

» peratore nullo ad eam diem esse. Nunc du- *U. c. 4303*  
 » cibus populi Romani, quæ ne victis quidem *a. C. 3223*  
 » bello fas fuerit, virgas & secures victori-  
 » bus, & iustissimos meritis triumphos, in-  
 » tentari. Quid enim tandem passurum fuisse  
 » filium suum, si exercitum amisisset? si fu-  
 » sus, fugatus, castris exutus fuisset? Quo  
 » ultra iram violentiamque ejus excessuram  
 » fuisse, quam ut verberaret necaretque?  
 » Quam conveniens esse, propter Q. Fabium  
 » civitatem in lætitia, victoria, supplicationi-  
 » bus, ac gratulationibus esse: eum, propter  
 » quem Deum delubra pateant, aræ sacrificiis  
 » fument, honore, donis cumulentur, nudatum  
 » virgis lacerari in conspectu populi Romani,  
 » intuentem Capitolium atque arcem, Deosque  
 » ab se duobus proeliis haud frustra advoca-  
 » tos? Quo id animo exercitum, qui ejus  
 » ductu auspiciisque vicisset, laturum? quem  
 » luctum in castris Romanis, quam lætitiā  
 » inter hostes fore? » Hæc, simul jurgans,  
 » querens, Deum hominumque fidem obtestans,  
 » & complexus filium, plurimis cum lacrimis  
 » agebat.

XXXIV. STABAT cum eo senatus majestas,  
 favor populi, tribuniciū auxilium, memō-

*U. c. 430.* ria absentis exercitus. Ex parte altera « im-  
*a. C. 322.* » perium invictum populi Romani, & disci-

» plina rei militaris, & dictatoris edictum  
 » pro numine semper observatum, & Manlia-  
 » na imperia, & posthabita filii caritas pu-  
 » blicæ utilitati, » jactabantur. « Hoc etiam  
 » L. Brutum, conditorem Romanæ libertatis,  
 » antea in duobus liberis fecisse. Nunc patres  
 » comes, & senes faciles de alieno imperio  
 » spreto, tamquam rei parvæ, disciplinæ mi-  
 » litaris everfæ juventuti gratiam facere. Se  
 » tamen perstaturum in incepto: nec ei, qui  
 » adversus dictum suum, turbatis religionibus  
 » ac dubiis auspiciis, pugnasset, quidquam ex  
 » justa pœna remissurum. Majestas imperii  
 » perpetua ne esset, non esse in sua potestate.  
 » L. Papirium nihil de ejus jure deminuturum.  
 » Optare, ne potestas tribunicia, inviolata  
 » ipsa, violet intercessione sua Romanum  
 » imperium, neu populus (g) in se potissi-  
 » mum dictatorem & jus dictaturæ extin-  
 » guat. Quod si fecisset, non L. Papirium;  
 » sed tribunos, sed pravum populi judicium,  
 » nequidquam posteros accusaturos: quum,  
 » polluta semel militari disciplina, non miles

(g) add. *Romanus* Gron. Crev.



» centurionis, non centurio tribuni, non tri- *U. c. 430.*  
 » bunus legati, non legatus consulis, non *a. C. 322.*  
 » magister equitum dictatoris pareat imperio;  
 » nemo hominum, nemo Deorum verecun-  
 » diam habeat; non edicta imperatorum, non  
 » auspicia observentur; sine commeatu vagi  
 » milites in pacato, in hostico errent; inme-  
 » mores sacramenti, licentia sola se, ubi  
 » velint, exauctorent; infrequentia deferan-  
 » tur signa; neque conveniatur ad edictum,  
 » nec discernatur, interdiu nocte, æquo ini-  
 » quo loco, jussu injussu imperatoris pugnent;  
 » & non signa, non ordines servant; latro-  
 » cinii modo cæca & fortuita, pro sollemni  
 » & sacra militiæ sit. Horum criminum vos  
 » reos in omnia secula obferte, tribuni plebi:  
 » vestra obnoxia capita pro licentia Q. Fabii  
 (h) objicite.

XXXV. STUPENTES tribunos & suam jam  
 vicem magis anxios, quam ejus, cui auxi-  
 lium ab se petebatur, liberavit onere con-  
 sensus populi Romani, ad preces & obtesta- *P. R. exo-*  
 tionem versus, ut sibi poenam magistri equi- *rat dicta-*  
 tum dictator remitteret. Tribuni quoque, *torem.*  
 inclinatam rem in preces subsecuti, orare

(h) Q. Fabio Gron. Crev.

*U. c. 430.*  
*a. C. 322.*

dictatorem insistant, ut veniam errori humanam, veniam adolescentiae Q. Fabii daret: satis eum poenarum dedisse. Jam ipse adolescens, jam pater M. Fabius contentioni obli-  
 ti, procumbere ad genua, & iram deprecari dictatoris. Tum dictator, silentio facto,  
 „Bene habet [inquit] Quirites. Vicit disciplina militaris, vicit imperii majestas, quae  
 „in discrimine fuerunt, an ulla post hanc  
 „diem essent. Non noxae eximitur Q. Fabius,  
 „qui contra edictum imperatoris pugnavit;  
 „sed, noxae damnatus, donatur populo Romano,  
 „donatur tribuniciae potestati, precarium non justum auxilium ferenti. Vive,  
 „Q. Fabi, felicior hoc consensu civitatis ad  
 „tuendum te, quam, qua paulo ante exultabas, victoria. Vive, id facinus ausus,  
 „cujus tibi ne parens quidem, si eodem loco  
 „fuiisset, quo fuit L. Papirius, veniam dedisset. Mecum, ut voles, reverteris in gratiam: populo Romano, cui vitam debes,  
 „nihil majus praestiteris, quam si hic tibi  
 „dies satis documenti dederit, ut bello ac  
 „pace pati legitima imperia possis.” Quum se nihil morari magistrum equitum pronuntiasset, degressum eum templo laetus senatus,  
 laetior

lætior populus, circumfusi, ac gratulantes hinc magistro equitum, hinc dictatori, prosecuti sunt: firmatumque imperium militare haud minus periculo Q. Fabii, quam supplicio miserabili adolescentis Manlii, videbatur. Forte ita eo anno evenit, ut, quotiescumque dictator ab exercitu recessit, hostes in Samnio moverentur. Ceterum in oculis exemplum erat Q. Fabius M. Valerio legato, qui castris præerat, ne quam vim hostium magis, quam trucem dictatoris iram, timeret. Itaque, frumentatores quum, circumventi ex insidiis, cæsi loco iniquo essent, creditum vulgo est, subveniri eis ab legato potuisse, ni tristitia edicta exhorruisset. Ea quoque ira alienavit a dictatore militum animos, jam ante infensos, quod implacabilis Q. Fabio fuisset; &, quod suis precibus negasset, ejus populo Romano veniam dedisset.

XXXVI. POSTQUAM dictator, præposito in urbe L. Papirio Crasso magistro equitum, Q. Fabio vetito quidquam pro magistratu agere, in castra rediit; neque civibus satis lætus adventus ejus fuit, nec hostibus quidquam adtulit terroris. Namque postero die, seu ignari venisse dictatorem, seu, adesset an

*U. c. 430.* abesset, parvi facientes, instructa acie ad  
*a. C. 322.* castra accesserunt. Ceterum tantum momenti  
 in uno viro L. Papirio fuit, ut, si ducis  
 consilia favor subsecutus militum foret, debel-  
 lari eo die cum Samnitibus potuisse, pro  
 haud dubio habitum sit: ita instruxit aciem  
 loco ac subsidiis, ita omni arte bellica fir-  
 mavit. Cessatum a milite, ac de industria,  
 ut obtrectaretur laudibus ducis, impedita  
 victoria est. Plures Samnitium cecidere:  
 plures Romani vulnerati sunt. Sensit peritus  
 dux, quæ res victoriæ obstaret: temperan-  
 dum ingenium suum esse, & severitatem  
 miscendam comitati. Itaque, adhibitis lega-  
 tis, ipse circum faucios milites inferens in-  
 tentoria caput, singulos, ut sese haberent,  
 rogitans, curam eorum nominatim legatis,  
 tribunisque, & præfectis demandabat: rem  
 per se popularem ita dexter egit, ut, meden-  
 dis corporibus, animi multo prius militum  
 imperatori reconciliarentur; nec quidquam  
 ad salubritatem efficacius fuerit, quam quod  
 grato animo ea cura accepta est. Refecto  
 exercitu, cum hoste congressus haud dubia  
 spe sua militumque, ita fudit fugavitque Sam-  
 nites, ut ille ultimus eis dies conferendi

*Legiones  
 Romanæ  
 de indust-  
 ria male  
 pugnant.*

*Dictator  
 comior  
 factus.*

*Samnites  
 vincit.*

signa cum dictatore fuerit. Incessit deinde, *U. c. 430.*  
*a. C. 322.*  
qua duxit prædæ spes, victor exercitus;  
perlustravitque hostium agros, nulla arma,  
nullam vim, nec apertam, nec insidiis, ex-  
pertus. Addebat alacritatem, quod dictator  
prædam omnem edixerat militibus: nec ira  
magis publica, quam privatum compendium,  
in hostem acuebat. His cladibus subacti Sam-  
nites pacem a (i) dictatore petiere: cum  
quo pacti, ut singula vestimenta militibus,  
& annuum stipendium darent; quum ire ad  
senatum jussi essent, secuturos se dictatorem  
responderunt, unius ejus fidei virtutisque  
causam suam commendantes. Ita deductus ex  
Samnitibus exercitus.

XXXVII. DICTATOR triumphans urbem *U. c. 431.*  
*a. C. 321.*  
est ingressus: &, quum se dictatura abdicare  
vellet, jussu Patrum, priusquam abdicaret,  
consules creavit C. Sulpicium Longum ite- *C. Sulpi-*  
*cio II. Q.*  
*Æmilio*  
*Coss.*  
rum, Q. Æmilium Cerretanum. Samnites,  
infecta pace, quia de conditionibus agebatur,  
inducias annuas ab urbe retulerunt. Nec ea-  
rum ipsarum sancta fides fuit: adeo, post-  
quam Papirium abisse magistratu nunciatum  
est, adrecti ad bellandum animi sunt. C. Sul-

(i) *ab Gron Crev.*

*U. c. 431.  
a. C. 321.*

picio, Q. Æmilio (Aulium quidam annales habent) consulibus (k), ad defectionem Samnitium Apulum novum bellum accessit. Utroque exercitus missi. Sulpicio Samnites, Apuli Æmilio forte evenerunt. Sunt, qui non ipsis Apulis bellum inlatum, sed socios ejus gentis populos ab Samnitium vi atque injuriis defensos scribant. Ceterum fortuna Samnitium, vix a se ipsis eo tempore propulsantium bellum, propius ut sit vero, facit; non Apulis ab Samnitibus arma inlata, sed cum utraque simul gente bellum Romanis fuisse. Nec tamen res ulla memorabilis acta: ager Apulus Samniumque evastatum: hostes nec hic, nec illic inventi. Romæ nocturnus terror ita ex somno trepidam repente civitatem excivit, ut Capitolium atque arx, mœniaque & portæ, plena armatorum fuerint: & quum concursatum conclamatumque ad arma omnibus locis esset, prima luce nec auctor, nec causa terroris comparuit. Eodem anno de Tusculanis Flavia rogatione populi fuit judicium. M. Flavius tribunus plebis tulit ad populum, ut in Tusculanos animad-

*Judicium  
de Tuscu-  
lanis.*

(k) *consulibus, Aulium quidam annales habent, ad &c. Crev.*

# LIBER VIII CAP. XXXVIII 181

verteretur; quorum eorum ope ac consilio Veliterni Privernatesque populo Romano bellum fecissent. Populus Tusculanus cum conjugibus ac liberis Romam venit. Ea multitudo, veste mutata, & specie reorum, tribus circuit, genibus se omnium advolvens. Plus itaque misericordia ad poenae veniam impetrandam, quam causa ad crimen purgandum valuit. Tribus omnes, praeter Polliam, antiquarunt legem. Polliae sententia fuit, puberes verberatos necari, conjuges liberosque sub corona lege belli venire: memoriamque ejus irae Tusculanis in poenae tam atrocis auctores mansisse ad (1) patrum aetatem constat, nec quemquam ferme ex Pollia tribu candidatum Papiriam ferre solitum.

*U. c. 437.  
a. C. 321.*

XXXVIII. INSEQUENTI anno, Q. Fabio, L. Fulvio consulibus, A. Cornelius Arvina dictator & M. Fabius Ambustus magister equitum, metu gravioris in Samnio belli (conducta enim pretio a finitimis juvenus dicebatur) intentiore delectu habito, egregium exercitum adversus Samnites duxerunt. Castra in hostico incuriose ita posita, tamquam procul abesset hostis: quum subito

*U. c. 432.  
a. C. 320.*

*Q. Fabio,  
L. Furio  
Coss.*

*A. Cornelius  
dictator.*

(1) in Crev.

*U. c. 432.  
a. C. 320.*

*Nocte  
castra  
relinquit.*

advenere Samnitium legiones tanta ferocia ; ut vallum usque ad stationem Romanam inferrent. Nox jam adpetebat : id prohibuit munimenta adoriri : nec dissimulabant , orta luce postero die facturos. Dictator , ubi propiorem spe dimicationem vidit , ne militum virtuti damno locus esset , ignibus crebris relictis , qui conspectum hostium frustrarentur , silentio legiones educit : nec tamen fallere propter propinquitatem castrorum potuit. Eques extemplo infecutus ita institit agmini , ut , donec lucefceret , prælio abstineret. Ne pedestres quidem copiae ante lucem castris egressæ. Eques , luce demum ausus incurfare in hostem , carpendo novissimos , premendoque iniquis ad transitum locis , agmen detinuit. Interim pedes equitem adsecutus ; & totis jam copiis Samnis urgebat. Tum dictator , postquam sine magno incommodo progredi non poterat , eum ipsum , in quo constiterat , locum castris dimetari iussit. Id vero , circumfuso undique equitatu , ut vallum peteretur , opusque inciperet , fieri non poterat. Itaque , ubi neque eundi , neque manendi copiam esse videt , instruit aciem , impedimentis ex agmine remotis. Instruunt contra & hostes , & ani-

*Prælium  
atrox com-  
mittitur.*



mis & viribus pares. Auxerat id maxime animos, quod, ignari loco iniquo, non hosti, cessum, velut fugientes ac territos terribiles ipsi secuti fuerant. Id aliquamdiu æquavit pugnam, jam pridem defueto Samnite clamorem Romani exercitus pati. At, hercule, illo die ab hora diei tertia ad octavam ita anceps dicitur certamen fletisse, ut neque clamor, ut primo semel concursu est sublatus, iteratus sit; neque signa promota loco, retrove recepta; neque recursum ab ulla sit parte. In suo quisque gradu obnixi, urgentes scutis, sine respiratione ac respectu pugnant. Fremitus æqualis, tenorque idem pugnae in defatigationem ultimam aut noctem spectabat. Jam viris vires, jam ferro sua vis, jam consilia ducibus deerant: quum subito Samnitium equites, quum, turma una longius provecta, accepissent, impedimenta Romanorum procul ab armatis sine præsidio, sine munimento stare, aviditate prædæ inpetum faciunt. Quod ubi dictatori trepidus nuncius adtulit; « Sine modo [inquit] sese » præda præpediant. » Alii deinde super alios, diripi passim ferrique fortunas militum, vociferabantur. Tum magistro equitum adcito,

U. c. 432. « Vides tu [ inquit ] M. Fabi, ab hostium  
a. c. 320. » equite omiffam pugnam? hærent inpediti  
 » inpedimentis noſtris. Adgredere, quod in-  
 » ter prædandum omni multitudinî evenit,  
 » diffipatos : raros equis infidentes, raros,  
 » quibus ferrum in manu fit, invenies :  
 » equosque dum præda onerant, cæde iner-  
 » mes, cruentamque illis prædam redde. Mihi  
 » legiones peditumque pugna curæ erunt :  
 » penes te equeſtre fit decus. »

*Vincuntur  
 Samnites.*

XXXIX. **EQUITUM** acies, qualis quæ eſſe inſtructiſſima poteſt, inveſta in diffipatos inpeditosque hoſtes, cæde omnia replet. Inter farcinas omiſſas repente, obſidentes pedibus fugientium conſternatorumque equorum, neque pugnæ, neque fugæ ſatis potentes, cæduntur. Tum, delero prope equitatu hoſtium, M. Fabius, circumductis paullulum alis, ab tergo pedestrem aciem adoritur. Clamor inde novus accidens & Samnitium terruit animos; & dictator, ubi reſpectantes hoſtium antefignanos, turbataque ſigna, & fluctuantem aciem vidit, tum adpellare, tum adhortari milites, tribunos principesque ordinum nominatim ad iterandam ſecum pugnam vocare. Novato clamore, ſigna inferuntur; &, quid-

quid progrediebantur, magis magisque turbatos hostes cernebant. Eques ipse jam primis erat in conspectu : & Cornelius, respiciens ad manipulos militum, quod manu, quod voce poterat, monstrabat, vexilla se fuorum parmasque cernere equitum. Quod ubi auditum simulque visum est, adeo repente laboris, per diem pene totum tolerati, vulnerumque obliti sunt, ut haud secus, quam si tum integri e castris signum pugnae accepissent, concitaverint se in hostem. Nec ultra Samnis tolerare terrorem equitum, peditumque vim potuit : partim in medio caesi, partim in fugam dissipati sunt. Pedes restantes ac circumventos cecidit : ab equite fugientium strages est facta ; inter quos & ipse imperator cecidit. Hoc demum praelium Samnitium res

« minime id quidem mirum esse, si in pio  
» bello, & contra foedus suscepto, infestio-  
» ribus merito Diis quam hominibus, nihil  
» prospere agerent. Expiandum id bellum  
» magna mercede, luendumque esse. Id re-  
» ferre tantum, utrum supplicia noxio pauco-  
» rum, an omnium innoxio praebent fan-  
» guine.» Audebantque jam quidam nominare

*U. c. 432.*  
*a. C. 320.*

*Pacem  
orant  
frustra.*

U. c. 432. auctores armorum. Unum maxime nomen per  
a. C. 320. consensum clamantium Brutuli Papii exaudiebatur. Vir nobilis potensque erat, haud dubie proximarum induciarum ruptor. De eo coacti referre prætores decretum fecerunt. « Ut » Brutulus Papius Romanis dederetur, & cum » eo præda omnis Romana, captivique ut » Romam mitterentur; quæque res per feciales ex foedere repetitæ essent, secundum » jus fasque restituerentur. » Feciales Romam, ut censuerunt, missi, & corpus Brutuli examine: ipse morte voluntaria ignominiae se ac supplicio subtraxit. Placuit cum corpore bona quoque ejus dedi. Nihil tamen earum rerum, præter captivos, ac si qua cognita ex præda sunt, acceptum est: ceterarum rerum inrita fuit deditio. Dictator ex senatusconsulto triumphavit. Hoc bellum a consulibus bellatum, quidam auctores sunt, eosque de Samnitibus triumphasse: Fabium etiam in Apuliam processisse, atque inde magnas prædas egisse.

XL. NEC discrepat, quin dictator eo anno A. Cornelius fuerit. Id ambigitur, belline gerendi causa creatus sit; an ut esset, qui ludis Romanis, quia L. Plautius prætor gravi

morbo forte implicitus erat, signum mittendis quadrigis daret; functusque eo haud sane memorandi imperii ministerio, se dictatura abdicaret : nec facile est, aut rem rei, aut auctorem auctori præferre. Vitiata memoriam funebribus laudibus reor, falsisque imaginum titulis, dum familia ad se quæque famam rerum gestarum honorumque fallente mendacio trahunt. Inde certe & singulorum gesta, & publica monumenta rerum confusa. Nec quisquam æqualis temporibus illis scriptor exstat, quo satis certo auctore stetur.

*U. c. 432.  
a. C. 320.*

# EPITOME

## LIBRI NONI LIVIANI

**T**ITUS Veturius & Sp. Postumius apud Caudinas Furcas, deducto in locum artum exercitu, quum nulla spes evadendi esset, fœdere cum Samnitibus facto, & sexcentis equitibus Romanis obsidibus datis, ita exercitum abduxerunt, ut omnes sub jugum mitterentur. Iidemque, auctore Sp. Postumio consule, (qui in senatu suaserat, ut eorum deditioe, quorum culpa tam deforme fœdus ictum erat, publica fides liberaretur) cum duobus tribunis plebis & omnibus, qui fœdus sponponderant, dediti Samnitibus, non sunt recepti: nec multo post, fufis a Papirio Cursore Samnitibus & sub jugum missis, receptisque sexcentis equitibus Romanis, qui obsides dati erant, pudor prioris flagitii abolitus est. Tribus duæ adjectæ sunt, Ufentina & Falerina. Sueffa & Ponticæ colonicæ deductæ sunt. Ap. Claudius censor aquam perduxit: viam stravit, quæ Appia vocata est: liberti-

*norum filios in senatum legit. Ideoque, quoniam is ordo videbatur inquinatus indignis, sequentis anni consules in senatu legendo observaverunt, quemadmodum ante per proximos censores observatum fuerat.*

*Res præterea contra Apulos, Etruscos, Umbros, Marfos, Pelignos, Æquos & Samnites, quibus fœdus erat restitutum, prospere gestas continet. Flavius scriba, libertino patre natus, ædilis curulis fuit per forensem factionem creatus: quæ quum comitia & campum turbaret, & in iis propter nimias vires dominaretur, a Q. Fabio censore in quatuor tribus redacta est, quas urbanas adpellavit. Eaque res Fabio Maximo nomen dedit. In hoc libro mentio Alexandri Magni, qui temporibus his fuit; &, æstimatis populi Romani viribus, quæ tunc erant, colligitur, si Alexander in Italiam trajecisset, non tam facilem ei victoriam de populo Romano fore, quam de iis gentibus, quas ad Orientem imperio suo subjecerat.*

---

# LIBER IX

## I.

*U. c. 433.*

*a. C. 319.*

*T. Veturio*

*II. Sp.*

*Postumio*

*II. Coss.*

*Pontii  
Samnitis  
oratio.*

SEQUITUR hunc annum nobilis clade Romana Caudina pax, T. Veturio Calvino, Sp. Postumio consulibus. Samnites eo anno imperatorem C. Pontium, Herennii filium, habuerunt, patre longe prudentissimo natum, primum ipsum bellatorem ducemque. Is, ubi legati, qui ad dedendas res missi erant, pace infecta redierunt, « Ne nihil actum [ in- » quit ] hac legatione censeatis, expiatum » est, quidquid ex foedere rupto irarum in » nos coelestium fuit. Satis scio, quibuscum- » que Diis cordi fuit, subigi nos ad necessi- » tatem dedendi res, quæ a nobis ex foedere » repetitæ fuerant, iis non fuisse cordi tam » superbe ab Romanis foederis expiationem » spretam. Quid enim ultra fieri ad placan- » dos Deos mitigandosque homines potuit, » quam quod nos fecimus? Res hostium in » præda captas, quæ belli jure nostræ vide- » bantur, remisimus: auctores belli, quia » vivos non potuimus, perfunctos jam fato » dedidimus: bona eorum, ne quid ex con-



» tagione noxæ remaneret penes nos, Romam *U. c. 433.*  
 » portavimus. Quid ultra tibi, Romane, *a. C. 319.*  
 » quid fœderi, quid Diis arbitris fœderis  
 » debeo? Quem tibi tuarum irarum, quem  
 » meorum suppliciorum judicem feram, ne-  
 » minem, neque populum, neque privatum,  
 » fugio. Quod si nihil cum potentiore juris  
 » humani relinquitur inopi, at ego ad Deos  
 » vindices intolerandæ superbiæ confugiam;  
 » & precabor, ut iras suas vertant in eos,  
 » quibus non suæ redditæ res, non alienæ  
 » accumulatæ fatis sint; quorum sævitiam  
 » non mors noxiorum, non deditio exanima-  
 » torum corporum, non bona sequentia do-  
 » mini deditionem exfatient. Placari nequeunt,  
 » (a) nisi hauriendum sanguinem laniandaque  
 » viscera nostra præbuerimus. Justum est  
 » bellum, Samnites, quibus necessarium; &  
 » pia arma, quibus nulla nisi in armis relin-  
 » quitur spes. Proinde, quum rerum humana-  
 » rum maximum momentum sit, quam pro-  
 » pitiis rem, quam adversis agant Diis, pro  
 » certo habete, priora bella adversus Deos  
 » magis, quam homines, gessisse; hoc, quod  
 » instat, ducibus ipsis Diis gesturos.»

(a) nequeant Gron. Crev.

*U. c. 433.  
a. C. 319.*

*Samnites  
ad Caudium castra locant.*

II. HÆC, non læta magis, quam vera, vaticinatus, exercitu educto, circa Caudium castra, quam potest occultissime, locat: inde ad Calatiam, ubi jam consules Romanos castraque esse audiebat, milites decem pastorum habitu mittit: pecoraque diversos, alium alibi, haud procul Romanis pascere jubet præfidiis: ubi inciderint in prædatores, ut idem omnibus sermo constet, « legiones » Samnitium in Apulia esse, Luceriam omnibus copiis circumfedere: nec procul abesse, quin vi capiant. » Jam is etiam rumor ante, de industria vulgatus, venerat ad Romanos: sed fidem auxere captivi, eo maxime, quod sermo inter omnes congruebat. Haud erat dubium, quin Lucerinis opem Romanus ferret, bonis ac fidelibus fociis; simul ne Apulia omnis ad præsentem terrorem deficeret. Ea modo, qua irent, consultatio fuit. Duæ ad Luceriam ferebant viæ; altera præter oram superi maris patens aperta que, sed, quanto tutior, tanto fere longior; altera per Furculas Caudinas brevior. Sed ita natus locus est. Saltus duo alti angusti silvosque sunt, montibus circa perpetuis inter se juncti: jacet inter eos satis patens clausus in medio

cam-

campus, herbidus aquosusque, per quem *U. c. 433.*  
medium iter est. Sed ante, quam venias ad *a. C. 312.*  
eum, intrandæ primæ angustiae sunt, & aut  
eadem, qua te insinuaveris, retro viâ repe-  
tenda; aut, si ire porro pergas, per alium  
saltum artiolem inpeditioremque evadendum.  
In eum campum via alia per cavam rupem,  
Romani, demisso agmine, quum ad alias  
angustias protinus pergerent, septas dejectu  
arborum, faxorumque ingentium objacentem  
molem (b) invenere. Quum fraus hostilis *Capiti*  
adparuisset, praesidium etiam in summo saltu *fraude loci*  
conspicitur. Citati inde retro, qua venerant, *Romani,*  
pergunt repetere viam. Eam quoque clausam  
sua obice armisque inveniunt. Sistunt inde  
gradum sine ullius imperio: stuporque om-  
nium animos, ac velut torpor quidam inso-  
litus membra tenet: intuentesque alii alios  
(quum alterum quisque compotem magis  
mentis ac consilii ducerent) diu immobiles  
silent. Deinde ubi praetoria consulum erigi  
videre, & expedire quosdam utilia operi,  
quamquam ludibrio fore munientes, perditis  
rebus ac spe omni adempta, cernebant; tamen,  
ne culpam malis adderent, pro se quisque,

(b) *objacente mole Gron. Crev. 3*

*Tom. III.*

N

*U. c. 433.* nec hortante ullo nec imperante, ad munien-  
*a. C. 319.* dum versi, castra propter aquam vallo cir-  
 cumdant; sua ipsi opera laboremque inritum  
 (præterquam quod hostes superbe increpa-  
 bant) cum miserabili confessione eludentes.  
 Ad consules mœstos, ne advocantes quidem  
 in consilium, (quando nec consilio nec auxi-  
 lio locus esset) sua sponte legati ac tribuni  
 conveniunt: militesque ad prætorium (c)  
 versi, opem, quam vix Dii immortales ferre  
 poterant, ab ducibus exposcunt.

*Consilium  
 expedire  
 non pos-  
 sunt.*

III. QUERENTES magis, quam consultantes,  
 nox obpressit, quum pro ingenio quisque  
 fremerent: alius, « per obices viarum; »  
 alius, « per adversa montium, per silvas,  
 » qua ferri arma poterunt, eamus. Modo ad  
 » hostem pervenire liceat, quem per annos  
 » jam prope triginta vincimus; omnia æqua  
 » & plana erunt Romano, in perfidum Sam-  
 » nitem pugnanti: » alius, « Quo, aut qua  
 » eamus? Num montes moliri sede sua para-  
 » mus? Dum hæc imminebunt juga, qua tu  
 » hostem venies? Armati, inermes, fortes,  
 » ignavi, pariter omnes capti atque victi su-  
 » mus. Ne ferrum quidem ad bene morien-

(c) in prætorium Gron. Crev.

» dum oblaturus est hostis : sedens bellum *U. c. 433.*  
 » conficiet.» His in vicem sermonibus, qua *a. C. 319.*  
 cibi, qua quietis inmemor, nox traducta est.  
 Ne Samnitibus quidem consilium in tam lætis  
 subpetebat rebus. Itaque universi Herennium *Herennii*  
 Pontium, patrem imperatoris, per literas *discordiæ*  
 consulendum censent. Jam is gravis annis, non *responsa.*  
 militaribus solum, sed civilibus quoque ab-  
 cefferat muneribus : in corpore tamen ad-  
 fecto vigeat vis animi consiliique. Is, ubi  
 accepit, ad Furculas Caudinas inter duos  
 saltus clausos esse exercitus Romanos, con-  
 sultus ab nuncio filii, censuit, omnes inde  
 quam primum inviolatos dimittendos. Quæ  
 ubi sprete sententia est, iterumque, eodem  
 remeantē nuncio, consulebatur; censuit, ad  
 unum omnes interficiendos. Quæ ubi tam  
 discordia inter se, velut ex ancipiti oraculo,  
 responsa data sunt; quamquam filius ipse in  
 primis jam animum quoque patris consensuisse  
 in adfecto corpore rebatur; tamen consensu  
 omnium victus est, ut ipsum in consilium  
 adciret. Nec gravatus fenex, plaustro in  
 castra dicitur advectus, vocatusque in consi-  
 lium ita ferme locutus esse, ut nihil senten-  
 tiæ suæ mutaret; causas tantum adjiceret :

*U. c. 433.* « Priore se consilio , quod optimum duceret ;  
*a. C. 319.* » cum potentissimo populo per ingens bene-  
 » ficiū perpetuam firmare pacem amicitiam-  
 » que : altero consilio in multas ætates , qui-  
 » bus , amissis duobus exercitibus , haud fa-  
 » cile receptura vires Romana res esset , bel-  
 » lum differre : tertium nullum consilium esse. »  
 Quum filius aliique principes percunctando  
 exsequerentur , « Quid si media via consilii  
 » caperetur ; ut & dimitterentur incolumes ,  
 » & leges iis jure belli victis inponerentur ?  
 » Ista quidem sententia [inquit] ea est , quæ  
 » neque amicos parat , neque inimicos tollit.  
 » Servate modo , quos ignominia inritaveri-  
 » tis. Ea est Romana gens , quæ victa quies-  
 » cere nesciat. Vivet semper in pectoribus  
 » illorum , quidquid istuc præsens necessitas  
 » inusserit ; neque eos ante multiplices pœnas  
 » expetitas a vobis quiescere finet. »

IV. NEUTRA sententia accepta. Herennius  
 domum e castris est avectus. Et in castris  
 Romanis quum frustra multi conatus ad  
 erumpendum capti essent , & jam omnium  
 rerum inopia esset ; victi necessitate legatos  
 mittunt , qui primum pacem æquam pete-  
 rent : si pacem non inpetrarent , uti provoca-

rent ad pugnam. Tum Pontius, « debellatum  
 « esse, » respondit : « & , quoniam ne victi  
 » quidem ac capti fortunam fateri scirent,  
 » inermes cum singulis vestimentis sub jugum  
 » missurum : alias conditiones pacis æquas vic-  
 » tis ac victoribus fore ; si (d) agro Samnitium  
 » decederetur, coloniæ abducerentur, suis  
 » deinde legibus Romanum ac Samnitem æquo  
 » fœdere victurum. His conditionibus para-  
 » tum se esse fœdus cum consulibus ferire :  
 » si quid eorum displiceat, legatos redire ad  
 » se » vetuit. Hæc quum legatio renunciare-  
 » tur, tantus gemitus omnium subito exortus  
 » est, tantaque mœstitia incessit, ut non gra-  
 » vius accepturi viderentur, si nunciaretur ;  
 » omnibus eo loco mortem obpetendam esse.  
 » Quum diu silentium fuisset, nec consules  
 » aut pro fœdere tam turpi, aut contra fœdus  
 » tam necessarium hiscere possent ; tum L. Len-  
 » tulus, qui tum princeps legatorum virtute  
 » atque honoribus erat, « Patrem meum  
 » [inquit] consules, sæpe audiui memoran-  
 » tem, se in Capitolio unum non fuisse aucto-  
 » rem senatui redimendæ auro a Gallis civi-  
 » tatis, quando nec fossa valloque ab igna-

U. c. 433.  
 a. C. 319.

*Leges  
 a Pontio  
 dictæ  
 Romanis,*

*Lentulo  
 suadente,*

(d) si del. Gron. Crev.

V. c. 433.

a. C. 319.

» viffimo ad opera ac muniendum hofte claufi  
 » effent ; & erumpere fi non fine periculo  
 » magno, tamen fine certa perniciæ poſſent.  
 » Quod fi, ut illis decurrere ex Capitolio  
 » armatis in hoſtem licuit, (quo ſæpe modo  
 » obſeſſi in obſidentes eruperunt) ita nobis  
 » æquo aut iniquo loco dimicandi tantum-  
 » modo cum hoſte copia eſſet ; non mihi pa-  
 » terni animi indoles in conſilio dando de-  
 » eſſet. Equidem mortem pro patria præcla-  
 » ram eſſe fateor : & me vel devovere pro  
 » populo Romano legionibusque, vel in me-  
 » dios me inmittere hoſtes paratus ſum. Sed  
 » hic patriam video, hic quidquid Romana-  
 » rum legionum eſt : quæ, niſi pro ſe ipsis  
 » ad mortem ruere volunt, quid habent, quod  
 » morte ſua ſervent ? Teſta urbis, dicat ali-  
 » quis, & mœnia, & eam turbam, a qua  
 » urbs incolitur. Immo hercule, produntur  
 » ea omnia, deleta hoc exercitu, non ſer-  
 » vantur. Quis enim ea tuebitur ? Inbellis  
 » videlicet atque inermis multitudo ? tam,  
 » hercule, quam a Gallorum inpetu defendit.  
 » An a Veiis exercitum Camillumque ducem  
 » inplorabunt ? Hic omnes ſpes opesque ſunt,  
 » quas ſervando patriam ſervamus : dedendo



» ad necem , patriam deferimus ac prodimus. *U. c. 433.*  
 » At foeda atque ignominiosa deditio est. Sed *a. C. 319.*  
 » ea caritas patriæ est , ut tam ignominia eam,  
 » quam morte nostra , si opus sit , servemus.  
 » Subeatur ergo ista , quantacumque est , in-  
 » dignitas ; & pareatur necessitati , quam ne  
 » Dii quidem superant. Ite , consules , redi-  
 » mite armis civitatem , quam auro majores  
 » vestri redemerunt. »

V. CONSULES profecti ad Pontium in con- *Accipiuntur.*  
 loquium , quum de foedere victor agitaret ,  
 negarunt , injussu populi foedus fieri posse :  
 nec sine fecialibus cerimoniaque sollemni.  
 Itaque non , ut vulgo credunt , Claudiusque  
 etiam scribit , foedere pax Caudina , sed per  
 sponsonem , facta est. Quid enim aut spon-  
 soribus in foedere opus esset aut obsidibus ,  
 ubi præcatione res transigitur ? « per quem  
 » populum fiat , quo minus legibus dictis ste-  
 » tur , ut eum ita Jupiter feriat , quemadmo-  
 » dum a fecialibus porcus feriatur. » Sponpon-  
 derunt consules , legati , quæstores , tribuni  
 militum ; nominaque omnium , qui sponpon-  
 derunt , exstant : ubi , si ex foedere acta res  
 esset , præterquam duorum fecialium , non  
 exstarent. Et propter necessariam foederis dila-

*U. c. 433.  
a. C. 319.*

tionem obsides etiam sexcenti equites imperati, qui capite luerent, si pacto non staretur. Tempus inde statutum tradendis obsidibus exercituque inermi mittendo. Redintegravit luctum in castris consulum adventus, ut vix ab iis abstinere manus, quorum temeritate in eum locum deducti essent; quorum ignavia foedius inde, quam venissent, abituri. Illis non ducem locorum, non exploratorem fuisse: belluarum modo cæcos in foveam missos. Alii alios intueri, contemplari arma mox tradenda, & inermes futuras dextras, obnoxiaque corpora hosti. Proponere sibi met ipsi ante oculos jugum hostile, & ludibria victoris, & vultus superbos, & per armatos inermium iter: inde foedi agminis miserabilem viam, per sociorum urbes reditum in patriam ac (e) parentes, quo sæpe ipsi majoresque eorum triumphantes venissent. Se solos sine vulnere, sine ferro, sine acie victos: sibi non stringere licuisse gladios, non manum cum hoste conferre: sibi nequidquam arma, nequidquam vires, nequidquam animos datos. Hæc frementibus hora fatalis ignominiae advenit,

*Sub jugum  
mittuntur  
Romani.*

(e) *ad Crev.*

omnia tristiora experiundo factura, quam *U. c. 433.*  
quæ præceperant animis. Jam primum cum *a. C. 319.*  
singulis vestimentis inermes extra vallum  
exire jussi, & primi traditi obsides, atque in  
custodiam abducti. Tum a consulibus abire  
lictores jussi, paludamentaue detracta: tan-  
tam id inter ipsos, qui, paullo ante eos exse-  
crantes, dedendos lacerandosque censuerant,  
miserationem fecit, ut, suæ quisque condi-  
tionis oblitus, ab illa deformatione tantæ  
majestatis, velut ab nefando spectaculo, aver-  
teret oculos.

VI. PRIMI consules prope seminudi sub  
jugum missi: tum, ut quisque gradu proxi-  
mus erat, ita ignominiae objectus: tum dein-  
ceps singulæ legiones. Circumstabant armati  
hostes, exprobrantes eludentesque: gladii  
etiam plerisque intentati: & vulnerati quidam  
necatique, si vultus eorum indignitate rerum  
acrior victorem obfendisset. Ita traducti sub  
jugum, &, quod pene gravius erat, per  
hostium oculos. Quum e saltu evasisent,  
etsi, velut ab inferis extracti, tum primum  
lucem adspicere visi sunt; tamen ipsa lux  
ita deforme intuentibus agmen omni morte  
tristior fuit. Itaque, quum ante noctem Ca-

U. c. 433.  
a. C. 319.

*Capuam  
veniunt.*

puam pervenire possent, incerti de fide sociorum, & quod pudor præpediebat, circa viam haud procul Capua omnium egeni (f) corpora humi prostraverunt. Quod ubi est Capuam nunciatum, evicit miseratio iusta sociorum superbiam ingentem Campanis. Confestim insignia sua consulibus, fasces, lictores, arma, equos, vestimenta, commeatus militibus benigne mittunt : & venientibus Capuam cunctus senatus populusque, obviam egressi, iustis omnibus hospitalibus, privatisque & publicis funguntur officiis. Neque illis sociorum comitas, vultusque benigni, & adloquia non modo sermonem elicere, sed ne, ut oculos quidem adtollerent, aut consolantes amicos contra intuerentur, efficere poterant. Adeo super moerorem pudor quidam fugere conloquia & cœtus hominum cogebat. Postero die quum juvenes nobiles, missi a Capua, ut proficiscentes ad finem Campanum prosequerentur, revertissent; vocatique in curiam percunctantibus maioribus natu, « multo sibi mœstiores & abjectioris animi visos, » referrent; « adeo silens, ac prope mutum agmen inces-

(f) *egena* Crev.

» fiffe : tacere indolem illam Romanam, ab- *U. c. 433*  
 » latosque cum armis animos. Non reddere *a. C. 319.*  
 » salutem, non salutantibus dare responsum,  
 » non hifcere quemquam præ metu potuiffe,  
 » tamquam ferentibus adhuc cervicibus jugum,  
 » sub quo emiffi effent. Habere Samnites  
 » victoriam, non præclaram solum, fed etiam  
 » perpetuam. Cepiffe enim eos non Romam,  
 » ficut ante Gallos, fed, quod multo bellicofius  
 » fuerit, Romanam virtutem ferociamque.»

VII. QUUM hæc dicerentur audirenturque,  
 & deploratum pene Romanum nomen in con-  
 cilio fociorum fidelium effet; dicitur Ofilius  
 Calavius, Ovii filius, clarus genere factis-  
 que, tum etiam ætate verendus, longe ali-  
 ter fe habere rem dixiffe : « Silentium illud  
 » obftinatum, fixosque in terram oculos, &  
 » furdas ad omnia folatia aures, & pudorem  
 » intuendæ lucis, ingentem molem irarum  
 » ex alto animo (g) cientis indicia effe : aut  
 » Romana fe (h) ignorare ingenia, aut silen-  
 » tium illud Samnitibus flebiles brevi clamo-  
 » res gemitusque excitaturum; Caudinæque  
 » pacis aliquanto Samnitibus, quam Romanis,

*Ofilii de  
 Romano-  
 rum silen-  
 tio judi-  
 cium.*

(g) *animi Gron. Crev.*

(h) *fe Romana Gron. Crev.*

*U. c. 433.* » tristioremem memoriam fore. Quippe suos  
*a. C. 319.* » quemque eorum (*i*) animos habiturum ,  
 » ubicumque congressuri sint : saltus Caudi-  
 » nos non ubique Samnitibus fore. » Jam  
 Romæ etiam (*k*) sua infamis clades erat.  
 Obsessos primum audierunt : tristior deinde  
 ignominiosæ pacis magis, quam periculi,  
 nuncius fuit. Ad famam obsidionis delectus  
 haberi cœptus erat : dimissus deinde auxilio-  
 rum adparatus, postquam deditionem tam  
 fœde factam acceperunt : extemploque sine  
 ulla publica auctoritate consensum in omnem  
 formam luctus est. Tabernæ circa forum clau-  
 sæ, iustitiumque in foro sua sponte cœptum  
 prius, quam indictum : lati clavi, annuli  
 aurei positi : pene mœstior exercitu ipso  
 civitas esse : nec ducibus solum atque aucto-  
 ribus sponforibusque pacis irasci, sed inno-  
 xios etiam milites odisse, & negare urbe  
 tectisque accipiendos. Quam concitationem  
 animorum fregit adventus exercitus, etiam  
 iratis miserabilis. Non enim tamquam in pa-  
 triam revertentes ex insperato incolumes, sed  
 captorum habitu vultuque ingressi sero in

(*i*) *eorum* l. *coram* Gron. Crev.

(*k*) *Jam & Romæ sua &c.* Gron. Crev.

urbem, ita se in suis quisque tectis abdiderunt, ut postero atque insequentibus diebus nemo eorum forum aut publicum adspicere vellet. Consules, in privato abditi, nihil pro magistratu agere, nisi quod expressum senatusconsulto est, ut dictatorem dicerent comitiorum causa. Q. Fabium Ambustum dixerunt, & P. Ælium Pætum magistrum equitum: quibus vitio creatis, subiecti M. Æmilius Papus dictator, L. Valerius Flaccus magister equitum. Nec per eos comitia habita: &, quia tædebat populum omnium magistratuum ejus anni, res ad interregnum rediit. Interreges Q. Fabius Maximus, M. Valerius Corvus. Is consules creavit Q. Publium Philonem & L. Papirium Cursorem iterum, haud dubio consensu civitatis, quod nulli ea tempestate duces clariores essent.

*U. c. 433.  
a. C. 319.*

*Q. Fabius  
dictator.*

*M. Æmi-  
lius  
dictator.*

*U. c. 434.  
a. C. 318.*

*Q. Publi-  
lio III.  
L. Papirio  
II. Coss.*

VIII. Quo creati sunt die, eo (sic enim placuerat Patribus) magistratum inierunt, sollemnibusque senatusconsultis perfectis, de pace Caudina retulerunt. Et Publilius, penes quem fasces erant, « Dic Sp. Postumi » inquit. Qui ubi surrexit, eodem illo vultu, quo sub jugum missus erat, « Haud sum ignarus [in- » quit ] consules, ignominiae, non honoris

*Postumii  
magnani-  
ma senten-  
tia.*

U. c. 434.

a. C. 318.

» causa me primum excitatum jussumque  
 » dicere, non tamquam senatorem, sed tam-  
 » quam reum qua infelicitis belli, qua igno-  
 » miniosæ pacis. Ego tamen, quando neque  
 » de noxa nostra neque de pœna retulistis,  
 » omiſſa defenſione, quæ non difficillima  
 » eſſet apud haud ignaros fortunarum huma-  
 » narum neceſſitatumque, ſententiã de eo;  
 » de quo retulistis, paucis peragam: quæ  
 » ſententia teſtis erit, mihine, an legioni-  
 » bus veſtris pepercerim, quum me ſeu turpi  
 » ſeu neceſſaria ſponſione obſtrinxi. Qua ta-  
 » men, quando injuſſu populi facta eſt, non  
 » tenetur populus Romanus; nec quidquam  
 » ex ea, præterquam corpora noſtra deben-  
 » tur Samnitibus. Dedamur per feciales nudi  
 » vinctique: exſolvamus religione populum,  
 » ſi qua obligavimus; ne quid divini huma-  
 » nive obſtet, quo minus juſtum piumque de  
 » integro ineatur bellum. Interea conſules  
 » exercitum ſcribere, armare, educere pla-  
 » cet; nec prius ingredi hoſtium fines, quam  
 » omnia juſta in deditiõem noſtram perfectã  
 » erunt. Vos, Dii immortales, precor quæ-  
 » ſoque, ſi vobis non fuit cordi, Sp. Poſtu-  
 » mium, T. Veturium conſules cum Samni-



» tibus prospere bellum gerere ; at vos satis *U. c. 434;*  
 » habeatis , vidisse nos sub jugum missos , *a. C. 318.*  
 » vidisse sponſione infami obligatos , videre  
 » nudos vinctosque hoſtibus deditos , omnem  
 » iram hoſtium noſtris capitibus excipientes.  
 » Novos conſules legionesque Romanas ita  
 » cum Samnite gerere bellum velitis , ut  
 » omnia ante nos conſules bella geſta ſunt. »  
 Quæ ubi dixit , tanta ſimul admiratio miſe-  
 ratioque viri inceſſit omnes , (1) ut modo vix  
 crederent , illum eundem eſſe Sp. Poſtumium ,  
 qui auctor tam ſcædæ pacis fuiſſet : modo  
 miſerarentur , quod vir talis etiam præci-  
 puum apud hoſtes ſupplicium paſſurus eſſet  
 ob iram diremtæ pacis. Quum omnes , lau-  
 dibus modo proſequentes virum , in ſenten-  
 tiam ejus pedibus irent ; tentata paullisper  
 interceſſio eſt ab L. Livio & Q. Mælio , *Interce-*  
 tribunis plebis : qui , « neque exſolvi reli- *dunt duo*  
 » gione populum [ aiebant ] deditioe ſua , *tribuni,*  
 » niſi omnia Samnitibus , qualia apud Cau-  
 » dium fuiſſent , reſtituerentur : neque ſe  
 » pro eo , quod , ſpondendo pacem , ſervaſ-  
 » ſent exercitum populi Romani , poenam  
 » ullam meritos eſſe ; neque ad extremum ,

(1) *homines* Gronq. Crev.

*U. c. 434.* » quum sacrosancti essent, dedi hostibus vios  
*a. C. 318.* » larive posse. »

*Postumii  
 adversus  
 tribunos  
 oratio.*

IX. Tum Postumius, « Interea dedite [ in-  
 » quit ] profanos nos, quos salva religione  
 » potestis : dedetis deinde & istos sacrosanc-  
 » tos, quum primum magistratū abierint ; sed,  
 » si me audiat, prius, quam dedantur, hic  
 » in comitio virgis cæsos, hanc jam ut in-  
 » tercalatæ poenæ usuram habeant. Nam  
 » quod deditioe nostra negant exsolvi reli-  
 » gione populum, id istos magis, ne dedan-  
 » tur, quam quia ita se res habeat, dicere,  
 » quis adeo juris fecialium expers est, qui  
 » ignoret? Neque ego inficias eo, Patres  
 » conscripti, tam sponsiones quam fœdera  
 » sancta esse apud eos homines, apud quos  
 » juxta divinas religiones fides humana colli-  
 » tur : sed injussu populi nego quidquam  
 » sanciri posse, quod populum teneat. An,  
 » si eadem superbia, qua sponsionem istam  
 » expresserunt nobis Samnites, coëgissent nos  
 » verba legitima dedentium urbes nuncupare,  
 » deditum populum Romanum vos tribuni  
 » diceretis, & hanc urbem, templa, delubra,  
 » fines, aquas, Samnitium esse? Omitto de-  
 » ditionem, quoniam de sponsione agitur.

Quid

» Quid tandem, si spondissemus, urbem *U. c. 434.*  
 » hanc relicturum populum Romanum? si *a. C. 318.*  
 » incensurum? si magistratus, si senatum, si  
 » leges non habiturum? si sub regibus futu-  
 » rum? Dii meliora, inquis! Atqui non in-  
 » dignitas rerum sponfionis vinculum levat.  
 » Si quid est, in quo (m) obligari populus  
 » possit, in omnia potest. Et ne illud quidem,  
 » quod quosdam forsitan moveat, refert, con-  
 » sul, an dictator, an prætor sponderit. Et  
 » hoc ipsi etiam Samnites judicaverunt, qui-  
 » bus non fuit satis consules spondere, sed  
 » legatos, quæstores, tribunos militum  
 » spondere coëgerunt. Nec a me nunc quis-  
 » quam quæsiyerit, quid ita sponderim?  
 » quum id nec consulis jus esset; nec illis  
 » spondere pacem, quæ mei non erat arbi-  
 » trii, nec pro vobis, qui nihil mandaveratis,  
 » possem. Nihil ad Caudium, Patres conscripti,  
 » humanis consiliis gestum est. Dii immorta-  
 » les & vestris & hostium imperatoribus  
 » mentem ademerunt. Nec nos in bello fatis  
 » cavimus; & illi male partam victoriam  
 » male perdiderunt, dum vix locis, quibus  
 » vicerant, credunt, dum quacumque condi-

(m) quod Gron. Crev.

U. c. 434.  
a. C. 318.

» tione arma viris in arma natis auferre festi-  
 » nant. An, si sana mens fuisset, difficile  
 » illis fuit, dum senes ab domo ad consul-  
 » tandum arcessunt, mittere Romam legatos?  
 » cum senatu, cum populo, de pace ac  
 » foedere agere? Tridui iter expeditis erat.  
 » Interea in induciis res fuisset; donec ab  
 » Roma legati aut victoriam illis certam,  
 » aut pacem adferrent. Ea demum sponsio  
 » esset, quam populi jussu spondidissimus.  
 » Sed neque vos tulissetis, nec nos sponpon-  
 » didissimus: nec fas fuit alium rerum exitum  
 » esse, quam ut (n) illi, velut somnio læ-  
 » tiore, quam quod mentes eorum capere  
 » possent, nequidquam eluderentur: &  
 » nostrum exercitum eadem, quæ inpedierat,  
 » fortuna expediret: vanam victoriam vanior  
 » inritam faceret pax: sponsio interponeretur,  
 » quæ neminem, præter sponsorem, obliga-  
 » ret. Quid enim vobiscum, Patres conscripti,  
 » quid cum populo Romano actum est? quis  
 » vos adpellare potest? quis se a vobis dicere  
 » deceptum? Hostis? an civis? Hosti nihil  
 » spondidistis: civem neminem spondere pro  
 » vobis iussistis. Nihil ergo vobis nec nobis-

(n) *ut* & Crev.

» cum est, quibus nihil mandastis; nec cum *U. c. 434.*  
 » Samnitibus, cum quibus nihil egistis. Sam- *a. C. 318.*  
 » nitibus sponsores nos sumus, rei fatis lo-  
 » cupletes: in id, quod nostrum est; in id,  
 » quod præstare possumus, corpora nostra  
 » & animos; in hæc sæviant, in hæc ferrum,  
 » in hæc iras acuunt. Quod ad tribunos ad-  
 » tinet, consulite, utrum præsens deditio  
 » eorum fieri possit, an in diem differatur. Nos  
 » interim, T. Veturi, vosque ceteri, vilia  
 » hæc capita luendæ sponsonis feramus, &  
 » nostro supplicio liberemus Romana arma.»

X. MOVIT Patres conscriptos tum caussa,  
 tum auctor; nec ceteros solum, sed tribu-  
 nos etiam plebei, ut se in senatus dicerent  
 fore potestate. Magistratu inde se extemplo  
 abdicaverunt, traditique fecialibus cum cete-  
 ris Caudium ducendi. Hoc facto senatuscon-  
 sulto, lux quædam adfulsisse civitati visa est.  
 Postumius in ore erat; eum laudibus ad cœ-  
 lum ferebant: devotioni P. Decii consulis,  
 aliis claris facinoribus æquabant. « Emerfisse  
 » civitatem ex obnoxia pace, illius consilio  
 » & opera: ipsum se cruciatibus & hostium  
 » iræ obferre, piaculæque pro populo Roma-  
 » no dare.» Arma cuncti spectant & bellum.

*Sponsores  
 pacis de-  
 duntur.*

*U. c. 434.* « En umquam futurum, ut congredi armatis  
*a. C. 318.* » cum Samnite liceat ? » In civitate, ira  
 odioque ardente, delectus prope omnium  
 voluntariorum fuit. Rescriptæ ex eodem mi-  
 lite novæ legiones, ductusque ad Caudium  
 exercitus. Prægressi feciales, ubi ad portam  
 venire, vestem detrahi pacis sponforibus  
 jubent, manus post tergum vinciri. Quum  
 adparitor verecundia majestatis Postumium  
 laxè vinciret, « Quin tu [ inquit ] adducis  
 » lorum, ut justa fiat deditio ? » Tum, ubi  
 in cœtum Samnitium & ad tribunal ventum  
 Pontii est, A. Cornelius Arvina fecialis ita  
 verba fecit : « Quandoque hîc homines in-  
 » jussu populi Romani Quiritium fœdus iſtum  
 » iri sponponderunt, atque ob eam rem noxam  
 » nocuerunt ; ob eam rem, quò populus Roma-  
 » nus scelere inpio fit solutus, hosce homines  
 » vobis dedo. » Hæc dicenti feciali, Postu-  
 mius genu femur, quanta maxime poterat  
 vi, perculit, & clara voce ait, « se Samni-  
 » tem civem esse, illum legatum ; fecialem  
 » a se contra jus gentium violatum ; eo justius  
 » bellum gesturos.

*Pontii non  
 accipientis  
 deditionem  
 oratio.*

XI. Tum Pontius, « Nec ego istam dedi-  
 » tionem accipiam [ inquit ] nec Samnites

» ratam habebunt. Quin tu, Sp. Postumi, *U. c. 434.*  
 » si Deos esse censes, aut omnia inrita facis, *a. C. 318.*  
 » aut pacto stas? Samniti populo omnes,  
 » quos in potestate habuit, aut pro eis pax  
 » debetur. Sed quid ego te adpello, qui te  
 » captum victori, cum quā potes fide, resti-  
 » tuis? Populum Romanum adpello; quem si  
 » sponfionis ad Furculas Caudinas factæ pœ-  
 » nitet, restituat legiones intra saltum, quo  
 » septæ fuerunt. Nemo quemquam deceperit;  
 » omnia pro infecto sint: recipiant arma,  
 » quæ per pactionem tradiderunt: redeant  
 » in castra sua. Quidquid pridie habuerunt,  
 » quam in conloquium est ventum, habeant:  
 » tum bellum & fortia consilia placeant, tunc  
 » sponfio & pax repudietur. Ea fortuna, iis  
 » locis, quæ ante pacis mentionem habuimus,  
 » geramus bellum: nec populus Romanus  
 » consulum sponfionem, nec nos fidem po-  
 » puli Romani accusemus. Numquamne caussa  
 » defiet, cur victi pacto non stetis? Obsides  
 » Porſenæ dedistis; furto eos subduxistis:  
 » auro civitatem a Gallis redemistis; inter  
 » accipiendum aurum cæsi sunt: pacem no-  
 » biscum pepigistis, ut legiones vobis cap-  
 » tas restitueremus; eam pacem inritam faci-

U. c. 434.  
x. C. 318.

» tis, & semper aliquam fraudi speciem juris  
» inponitis. Non probat populus Romanus  
» ignominiosa pace legiones servatas? Pacem  
» sibi habeat, legiones captas victori restituat:  
» hoc fide, hoc foederibus, hoc fecialibus  
» ceremoniis dignum erat. Ut tu quidem,  
» quod petisti, per pacem habebas, tot  
» cives incolumes; ego pacem, quam hosti  
» tibi remittendo pactus sum, non habeam:  
» hoc tu, A. Corneli, hoc vos, feciales, ju-  
» ris gentibus dicitis? Ego vero istos, quos  
» dedi simulatis, nec accipio, nec dedi arbi-  
» tror; nec moror, quo minus in civitatem  
» obligatam sponfione commissa, iratis omni-  
» bus Diis, quorum eluditur numen, redeant.  
» Gerite bellum, quando Sp. Postumius modo  
» legatum fecialem genu perculit. Ita Dii  
» credent, Samnitem civem Postumium, non  
» civem Romanum esse, & a Samnite lega-  
» tum Romanum violatum: eo vobis justum  
» in nos factum esse bellum. Hæc ludibria  
» religionum non pudere in lucem proferre?  
» & vix pueris dignas ambages senes ac con-  
» sulares fallendæ fidei exquirere? I, licitor,  
» deme vincla Romanis: moratus sit nemo,  
» quo minus, ubi visum fuerit, abeant.» Et



illi quidem, forſitan & publica, ſua certe *U. c. 434.*  
 liberata fide, ab Caudio in caſtra Romana *a. C. 318.*  
 inviolati redierunt.

XII. SAMNITIBUS, pro ſuperba pace in- *Bellum*  
 feſtiſſimum cernentibus renatum bellum, *renasſcitur.*  
 omnia, quæ deinde venerunt, non in animis  
 ſolum, ſed prope in oculis eſſe: & ſero ac  
 nequidquam laudare ſenis Pontii utraque con-  
 ſilia; inter quæ ſe media lapſos, victoriæ  
 poſſeſſionem pace incerta mutaſſe, &, bene-  
 ficii & maleficii occaſione amiſſa, pugnatu-  
 ros cum eis, quos potuerint in perpetuum  
 vel inimicos tollere, vel amicos facere. Adeo-  
 que, nullodum certamine inclinatis viribus,  
 poſt Caudinam pacem animi mutaverant, ut  
 clariorem inter Romanos deditio Poſtunium,  
 quam Pontium incruenta victoria inter Samni-  
 tes faceret: & geri poſſe bellum Romani pro  
 victoria certa haberent, Samnites ſimul rebel-  
 laſſe & viciffe crederent Romanum. Inter  
 hæc Satricani ad Samnites defecerunt, &  
 Fregellæ colonia necopinato adventu Samni-  
 tium ( fuiſſe & Satricanos cum iis fatiſ  
 conſtat ) nocte occupata eſt. Timor inde  
 mutuus utroſque uſque ad lucem quietos  
 tenuit: lux pugnae initium fuit; quam ali-

*U. c. 434.  
a. C. 318.*

quamdiu æquam, & quia pro aris ac focus dimicabatur, & quia ex testis adjuvabat inbellis multitudo, tamen Fregellani sustinuerunt. Fraus deinde rem inclinavit, quod vocem audiri præconis passi sunt, « Incolumem » abiturum, qui arma posuisset. » Ea spes remisit a certamine animos, & passim arma jactari cœpta. Pertinacior pars armata per averfam portam erupit; tutiorque eis audacia fuit, quam incautus ad credendum ceteris pavor: quos circumdatos igni, nequidquam Deos fidemque invocantes, Samnites concremaverunt. Consules, inter se partiti provincias, Papirius in Apuliam ad Luceriam pergit, ubi equites Romani obsides ad Caudium dati custodiebantur: Publilius in Samnio subsistit adversus Caudinas legiones. Distendit ea res Samnitium animos; quod nec ad Luceriam ire, ne ab tergo instaret hostis, nec manere, ne Luceria interim amitteretur, satis audebant. Optimum visum est committere rem fortunæ, & transigere cum Publilio certamen. Itaque in aciem copias educunt.

*Prælio  
vincuntur  
Samnites  
a Publilio.*

XIII. ADVERSUS quos Publilius consul quum dimicaturus esset, prius adloquendos

milites ratus, concionem advocari jussit. Ceterum sicut ingenti alacritate ad prætorium concursus est, ita præ clamore poscentium pugnam nulla adhortatio imperatoris audita est. Suus cuique animus memor ignominie adhortator aderat. Vadunt igitur in prælium urgentes signiferos : & , ne mora in concursu pilis emittendis stringendisque inde gladiis esset, pila, velut dato ad id signo, abjiciunt, strictisque gladiis cursu in hostem feruntur. Nihil illic imperatorie artis ordinibus aut subsidiis locandis fuit : omnia ira militaris prope vesano inpetu egit. Itaque non fusi modo hostes sunt; sed, ne castris quidem suis fugam impedire ausi, Apuliam dissipati petiere : Luceriam tamen, coacto rursus in unum agmine, est perventum. Romanos ira eadem, quæ per mediam aciem hostium tulerat, & in castra pertulit. Ibi plus, quam in acie, sanguinis ac cædis factum, prædæque pars major ira corrupta. Exercitus alter cum Papirio consule locis maritimis pervenerat Arpos per omnia pacata, Samnitium magis injuriis & odio, quam beneficio ullo populi Romani. Nam Samnites, ea tempestate in montibus vicatim habitantes, cam-

*U. c. 434.  
a. C. 318.*

*U. c. 434*  
*a. c. 318.*

*Papirius*  
*obsidet*  
*Luceriam.*

pestria & maritima loca, contempto cultorum molliore atque, ut evenit fere, locis (o) simili genere, ipsi montani atque agrestes depopulabantur. Quæ regio si fida Samnitibus fuisset, aut pervenire Arpos exercitus Romanus nequisset, aut interjecta inter Romam & Arpos, penuria rerum omnium, exclusos a com meatibus absumfisset. Tum quoque profectos inde ad Luceriam, juxta obsidentes obsessosque, inopia vexavit. Omnia ab Arpis Romanis subpeditabantur; ceterum adeo exigue, ut militi, occupato stationibus vigiliisque & opere, eques folliculis in castra ab Arpis frumentum veheret; interdum obcurfu hostium cogeretur, abjecto ex equo frumento, pugnare. Obsessis (p) prius, quam alter consul victore exercitu advenit, & com meatus ex montibus Samnitium inventi erant, & auxilia intromissa. Artiora omnia adventus Publilii fecit; qui, obsidione delegata in curam collegæ, vacuus per agros cuncta infesta com meatibus hostium fecerat. Itaque quum spes nulla esset, diutius obsessos inopiam laturos, coacti Samnites, qui ad

(o) *loci Gron. Crev.*

(p) & *obsessis Gron. Crev.*

Luceriam castra habebant, undique contractis viribus, signa cum Papirio conferre. *U. c. 434.  
a. C. 318.*

XIV. PER id tempus, parantibus utrisque se ad proelium, legati Tarentini interveniunt, denunciantes Samnitibus Romanisque, ut bellum omitterent. Per utros stetit, quominus discederetur ab armis, adversus eos se pro alteris pugnatueros. Ea legatione Papirius audita, perinde ac motus dictis eorum, cum collega se communicaturum respondit: adcitoque eo, quum tempus omne in adparatu consumsisset, conlocutus de re haud dubia, signum pugnae proposuit. Agentibus divina humanaque, quæ adsolent, quum acie dimicandum est, consulibus, Tarentini legati obcurfare, responsum expectantes, quibus Papirius ait; « Auspicia secunda esse, Tarentini, pullarius nunciat. Litatum præterea » est egregie. Auctoribus Diis, ut videtis, » ad rem gerendam proficiscimur. » Signa inde ferri iussit, & copias eduxit, vanissimam increpans gentem, quæ, suarum inpotens rerum præ domesticis seditionibus discordiisque, aliis modum pacis ac belli facere æquum censeret. Samnites ex parte altera, quum omnem curam belli remisissent, quia

*U. c. 434.  
a. C. 318.*

aut pacem vere cupiebant, aut expediebat  
simulare, ut Tarentinos sibi conciliarent,  
quum instructos repente ad pugnam Romanos  
conspexissent, vociferari, « se in auctoritate  
» Tarentinorum manere, nec descendere in  
» aciem, nec extra vallum arma ferre. De-  
» ceptos potius, quodcumque casus ferat,  
» passuros, quam ut sprevisse pacis auctores  
» Tarentinos videantur. Accipere se omen,  
» [consules aiunt] & eam precari mentem  
» hostibus, ut ne vallum quidem defendant.»  
Ipsi, inter se partitis copiis, succedunt hos-  
tium munimentis, & simul undique adorti,  
quum pars fossas explerent, pars vellerent  
vallum, atque in fossas proruerent, nec vir-  
tus modo insita, sed ira etiam, exulceratos  
ignominia stimulare animos, castra invasere;  
& pro se quisque, « non hæc furculas, nec  
» Caudium, nec saltus invios esse, ubi erro-  
» rem fraus superbe vicisset; sed Romanam  
» virtutem, quam nec vallum, nec fossæ  
» arcerent, » memorantes, cædunt pariter  
resistentes fusosque, inermes atque armatos,  
servos, liberos, puberes, inpuberes, homi-  
nes, jumentaue. Nec ullum superfuisset  
animal, ni consules receptui signum dedis-

*Iterum  
vincuntur  
Samnites  
& Coss.*

sent, avidosque cædis milites e castris hostium imperio ac minis expulissent. Itaque apud infensos ob interpellatam dulcedinem iræ, confestim oratio habita est, ut doceretur miles, « minime cuiquam militum consules odio in hostes cessisse, aut cessuros : » quin duces, sicut belli, ita insatiabilis supplicii, futuros fuisse, ni respectus equitum sexcentorum, qui Luceriæ obsides tenerentur, præpedisset animos : ne desperata venia hostes cæcos in supplicia eorum ageret, perdere prius, quam perire, optantes. » Laudare ea milites, lætarique, obviam itum iræ suæ esse, ac fateri, omnia patienda potius, quam proderetur salus tot principum Romanæ juventutis.

XV. DIMISSA concione, consilium habitum, omnibusne copiis Luceriam premerent, an altero exercitu & duce Apuli circa, gens dubiæ ad id voluntatis, tentarentur. Publilius consul, ad peragrandam profectus Apuliam, aliquot expeditione una populos aut vi subegit, aut conditionibus in societatem accepit. Papirio quoque, qui obsessor Luceriæ restiterat, brevi ad spem eventus respondit. Nam, insecsis omnibus viis, per

*U. c. 434.  
a. C. 318.*

*Luceria  
capta.*

*U. c. 434.* quas commeatus ex Samnio subvehebantur,  
*a. C. 318.* famæ domiti Samnites, qui Luceriæ in præ-  
 fidio erant, legatos misere ad consulem Ro-  
 manum, ut, receptis equitibus, qui causâ belli  
 essent, absisteret obsidione. His Papirius ita  
 respondit: « Debuisse eos Pontium, Herennii  
 » filium, quo auctore Romanos sub jugum  
 » misissent, consulere, quid victis patiendum  
 » censeret. Ceterum, quoniam ab hostibus in  
 » se æqua statui, quam in se ipsi ferre, ma-  
 » luerint, nunciare Luceriam » jussit, « arma,  
 » sarcinas, jumenta, multitudinem omnem  
 » inbellem intra mœnia relinquerent; militem  
 » se cum singulis vestimentis sub jugum mis-  
 » surum, ulciscensem inlatam, non novam  
 » inferentem ignominiam. » Nihil recusatum.  
 Septem millia militum sub jugum missa,  
 prædaque ingens Luceriæ capta, receptis  
 omnibus signis armisque, quæ ad Caudium  
 amiserant; &, quod omnia superabat gau-  
 dia, equitibus recuperatis, quos pignora  
 pacis custodiendos Luceriam Samnites dede-  
 rant. Haud ferme alia mutatione subita re-  
 rum clarior victoria populi Romani est: si-  
 quidem etiam (quod quibusdam in annalibus  
 invenio) Pontius, Herennii filius, Samni-

*Sub jugum  
 missi Sam-  
 nites.*



tium imperator, ut expiaret consulum ignominiam, sub jugum cum ceteris est missus. *U. c. 434.  
a. C. 318.*

Ceterum id minus miror, obscurum esse de hostium duce dedito missoque sub jugum: id magis mirabile est, ambigi, Luciusne Cornelius dictator cum L. Papirio Cursore, magistro equitum, eas res ad Caudium, atque inde Luceriam gesserit, ultorquē unicus Romanæ ignominiae, haud sciam an iustissimo triumpho ad eam ætatem secundum Furium Camillum, triumphaverit; an consulum Papiriique præcipuum id decus sit. Sequitur hunc errorem alius error, Cursorne Papirius proximis comitiis cum Q. Aulio Cerretano iterum, ob rem bene gestam Luceriae continuato magistratu, consul tertium creatus sit; an L. Papirius Mugillanus; & in cognomine erratum sit.

*U. c. 435.  
a. C. 317.*

*L. Papirio  
III. Q.  
Aulio II.  
Coss.*

XVI. CONVENIT, jam inde per consules reliqua belli perfecta. Aulius cum Ferentanis uno secundo prælio debellavit; urbemque ipsam, quo se fusa contulerat acies, obsidibus imperatis, in deditionem accepit. Pari fortuna consulum alter cum Satricanis, qui cives Romani post Caudinam cladem ad Samnites defecerant, præsidiumque eorum in

U. c. 435. urbem acceperant, rem gessit. Nam quum ad  
a. C. 317. moenia Satrici admotus esset exercitus, lega-  
 tisque, missis ad pacem cum precibus peten-  
 dam, triste responsum ab consule redditum  
 esset, « nisi præsidio Samnitium interfecto  
 » aut tradito, ne ad se remearent; plus ea  
 voce, quam armis inlatis, terroris colonis  
 injectum. Itaque subinde exsequentes quæ-  
 rendo a consule legati, quonam se pacto  
 paucos & infirmos crederet præsidio tam va-  
 lido & armato vim adlaturos, ab iisdem con-  
 siliis petere iussi, quibus auctoribus præsi-  
 dium in urbem accepissent, discedunt: ægre-  
 que inpetrato, ut de ea re consuli senatum,  
 responsaque ad se referri sineret, ad suos  
 redeunt. Duæ factiones senatum distinebant;  
 una, cujus principes erant defectionis a po-  
 pulo Romano auctores; altera, fidelium ci-  
 vium. Certatum ab utrisque tamen est, ut  
 ad reconciliandam pacem consuli opera nava-  
 retur. Pars altera ( quum præsidium Samni-  
 tium, quia nihil satis præparati erat ad ob-  
 sidionem tolerandam, excessurum proxima  
 nocte esset ) enunciare consuli satis habuit,  
 qua noctis hora, quaque porta, & quam in  
 viam egressurus hostis foret. Altera, quibus  
 invi-

invitis descitum ad Samnites erat , eadem *U. c. 435.*  
 nocte portam etiam consuli aperuerunt , ar- *a. C. 317.*  
 matosque clam hostes in urbem acceperunt.  
 Ita duplici proditione & præsidium Samni-  
 tium , in seffis circa viam silvestribus locis ,  
 necopinato obpressum est , & ab urbe plena  
 hostium clamor sublatus ; momentoque unius  
 horæ cæsus Samnis ( q ) , Satricanus captus ,  
 & omnia in potestate consulis erant. Qui ,  
 quæstione habita , quorum opera defectio  
 esset facta , quos fontes comperit , virgis  
 cæsos securi percussit : præsidioque valido  
 inposito , arma Satricanis ademit. Inde ad  
 triumphum decessisse Romam Papirium Cur-  
 forem scribunt , qui eo duce Luceriam re-  
 ceptam , Samnitesque sub jugum missos aucto-  
 res sunt. Et fuit vir haud dubie dignus omni  
 bellica laude , non animi solum vigore , sed *Laus*  
 etiam corporis viribus excellens. Præcipua *Papirii*  
*Cursoris.*  
 pedum pernitas inerat , quæ cognomen etiam  
 dedit : victoremque cursu omnium ætatis suæ  
 fuisse ferunt : & seu virium vi , seu exerci-  
 tatione multa , cibi vinique eundem capacis-  
 simum : nec cum ullo asperiores ( quia ipse  
 invicti ad laborem corporis esset ) fuisse mi-

( q ) *Samnis Cæsus* Gron. Crev.

*U. c. 435.  
a. C. 317.*

litiam pediti pariter equitique. Equites etiam aliquando ausos ab eo petere, ut sibi pro re bene gesta laxaret aliquid laboris : quibus ille : « Ne nihil remissum dicatis , remitto » [ inquit ] ne utique dorsum demulceatis , » quum ex equis descendetis. » Et vis erat in eo viro imperii ingens pariter in socios civesque. Prænestinus prætor per timorem segnius ex subsidiis suos duxerat in primam aciem. Quem quum inambulans ante tabernaculum vocari jussisset, lictorem expedire securim jussit. Ad quam vocem exanimi stante Prænestino , « Agedum, lictor , excide radicem hanc [ inquit ] incommodam ambulanti tibus : » perfusumque ultimi supplicii metu, multa dicta , dimisit. Haud dubie illa ætate, qua nulla virtutum feracior fuit , nemo unus erat vir , quo magis innisa res Romana staret. Quin eum parem destinant animis Magno Alexandro ducem, si arma, Asia perdomita, in Europam vertisset.

*Disputatio de Alexandro M. & Romanis.*

XVII. NIHIL minus quæsitum a principio hujus operis videri potest, quam ut plus justo ab rerum ordine declinarem ; varietatibusque distinguendo opere, & legentibus velut deverticula amœna, & requiem animo

meo quærerem. Tamen tanti regis ac ducis mentio, quibus sæpe tacitis cogitationibus volutavit animum, eas evocat in medium: ut quædere libeat, quinam eventus Romanis rebus, si cum Alexandro foret bellatum, futurus fuerit. Plurimum in bello pollere videntur militum copia & virtus, ingenia imperatorum, fortuna per omnia humana, maxime in res bellicas, potens. Eâ, & singula intuenti & universa, sicut ab aliis regibus gentibusque, ita ab hoc quoque, facile præstant invictum Romanum imperium. Jam primum, ut ordiar ab ducibus comparandis, haud equidem abnuo, egregium ducem fuisse Alexandrum; sed clariorem tamen eum facit, quod unus fuit, quod adolescens in incremento rerum, nondum alteram fortunam expertus, decessit. Ut alios reges claros ducesque omittam, magna exempla casuum humanorum; Cyrum, quem maxime Græci laudibus celebrant, quid, nisi longa vita, sicut Magnum modo Pompeium, vertenti præbuit fortunæ? Recenseam duces Romanos, nec omnes omnium ætatum, sed ipsos eos, cum quibus consulibus aut dictatoribus Alexandro fuit bellandum; M. Valerium Corvum, C.

*U. c. 435;  
a. C. 317.*

*Alexandri  
& ducum  
Rom. col-  
latio.*

*U. c. 435.* Marcium Rutilum, C. Sulpicium, T. Man-  
*a. C. 317.* lium Torquatum, Q. Publilium Philonem,  
 L. Papirium Curforem, Q. Fabium Maximum,  
 duos Decios, L. Volumnium, M'. Curium.  
 Deinceps ingentes sequuntur viri, si Puni-  
 cum Romano prævertisset bellum, senior-  
 que in Italiam trajecisset. Horum in quolibet  
 tum indoles eadem, quæ in Alexandro erat,  
 animi ingeniique; tum disciplina militaris,  
 jam inde ab initiis urbis tradita per manus,  
 in artis perpetuis præceptis ordinatæ modum  
 venerat. Ita reges gesserant bella; ita deinde  
 exactores regum Junii Valeriique, ita deinceps  
 Fabii, Quinctii, Cornelii; ita Furius  
 Camillus, quem juvenes ii (r), quibus cum  
 Alexandro dimicandum erat, senem viderant.  
 Militaria opera pugnando obeunti Alexandro  
 (nam ea quoque haud minus clarum eum  
 faciunt) cecisset videlicet in acie oblatus par  
 Manlius Torquatus, aut Valerius Corvus,  
 insignes ante milites, quam duces? Cecissent  
 Decii, devotis corporibus in hostem ruentes?  
 Cecisset Papirius Cursor, illo corporis robore,  
 illo animi? Victus esset consiliis juvenis unius,  
 ne singulos nominem, senatus ille, quem qui

ex regibus constare dixit , unus veram speciem Romani senatus cepit ? Id vero erat periculum , ne solertius , quam quilibet unus ex iis , quos nominavi , castris locum caperet , commeatus expediret , ab insidiis præcaveret , tempus pugnae deligeret , aciem instrueret , subsidiis firmaret. Non cum Dario rem esse dixisset : quem , mulierum ac spadonum agmen trahentem , inter purpuram atque aurum , oneratum fortunæ adparatibus suæ , (s) prædam verius , quam hostem , nihil aliud quam bene ausus vana contemnere , incruentus devicit. Longe alius Italiæ , quam Indiæ , per quam temulento agmine comissabundus incessit , visus illi habitus esset , saltus Apuliæ ac montes Lucanos cernenti & vestigia recentia domesticæ cladis , ubi avunculus ejus nuper Epiri rex Alexander absumentus erat.

XVIII. Et loquimur de Alexandro nondum merso secundis rebus , quarum nemo intolerantior fuit. Qui , si ex habitu novæ fortunæ novique , ut ita dicam , ingenii , quod sibi victor induerat , spectetur , Dario magis similis , quam Alexandro , in Italiam venisset ;

(s) *suæ adparatibus Gron. Crev.*

U. c. 435.  
a. C. 317.

& exercitum Macedoniae oblitum degenerantemque jam in Persarum mores adduxisset. Referre in tanto rege piget superbam mutationem vestis, & desideratas humi jacentium adulationes, etiam victis Macedonibus graves, nedum victoribus, & foeda supplicia, & inter vinum & epulas caedes amicorum, & vanitatem ementiendae stirpis. Quid, si vini amor in dies fieret acrior? Quid, si trux ac praefervida ira? (nec quidquam dubium inter scriptores refero). Nullane haec damna imperatoriis virtutibus ducimus? Id vero periculum erat, quod levissimi ex Graecis, qui Parthorum quoque contra nomen Romanum gloriae favent, dicere solent, ne maiestatem nominis Alexandri (quem ne fama quidem illis notum arbitror fuisse) sustinere non potuerit populus Romanus; &, adversus quem Athenis, in civitate fracta Macedonum armis, cernente tum maxime prope fumantes Thebarum ruinas, concionari libere ausi sint homines, (id quod ex monumentis orationum patet) adversus eum nemo ex tot proceribus Romanis vocem liberam missurus fuerit. Quantalibet magnitudo hominis concipiatur animo, unius tamen ea magnitudo



hominis erit , conlecta paullo plus decem annorum felicitate : quam qui eo extollunt , quod populus Romanus , etsi nullo bello , multis tamen proeliis victus sit , Alexandro nullius pugnæ non secunda fortuna fuerit ; non intelligunt , se hominis res gestas , & ejus juvenis , cum populi jam octingentesimum bellantis annum rebus conferre. Miremur , si , quum ex hac parte secula plura numerentur , quam ex illa anni , plus in tam longo spatio , quam in ætate tredecim annorum , fortuna variaverit ? Quin tu hominis cum homine , & ducis cum duce , fortunam cum fortuna confers ? Quot Romanos duces nominem , quibus numquam adversa fortuna pugnæ fuit ? Paginas in annalibus magistratum fastisque percurrere licet , consulum , dictatorumque , quorum nec virtutis , nec fortunæ ullo die populum Romanum pcenituit. Et , quo sint mirabiliores , quam Alexander aut quisquam rex , denos vicanosque dies quidam dictaturam , nemo plus quam annum consulatum gessit : ab tribunis plebis delectus impediti sunt : post tempus ad bella ierunt : ante tempus comitiorum causa revocati sunt : in ipso conatu rerum circumegit

U. c. 435.  
a. C. 317.

*Fortunæ  
Alexandri  
conlatio  
cum fortu-  
na P. Rom.*

*U. c.* 435.  
*a. C.* 317.

se annus : collegæ nunc temeritas, nunc pravitas, impedimento aut damno fuit : male gestis rebus alterius successum est : tironum aut mala disciplina institutum exercitum acceperunt. At, Hercule, reges non liberi solum impedimentis omnibus, sed domini rerum temporumque, trahunt consiliis cuncta, non sequuntur. Inviçtus ergo Alexander cum invictis ducibus bella gessisset, & eadem fortunæ pignora in discrimen detulisset. Immo etiam eo plus periculi subisset, quod Macedones unum Alexandrum habuissent, multis casibus non solum obnoxium, sed etiam obferentem se : Romanis multi fuissent, Alexandro, vel gloria, vel rerum magnitudine, pares; quorum suo quisque fato, sine publico discrimine, viveret morereturque.

*Conlatio  
copiarum.*

XIX. RESTAT, ut copiæ copiis comparentur vel numero, vel militum genere, vel multitudine auxiliorum. Censebantur ejus ætatis lustris ducena quinquagena millia capitum. Itaque, in omni defectione sociorum Latini nominis, urbano prope delectu decem scribebantur legiones. Quaterni quinque exercitus sæpe per eos annos in Etruria, in Um-

bria, Gallis hostibus adjunctis, in Samnio, *U. c. 435.*  
in Lucanis gerebant bellum. Latium deinde *a. C. 317.*  
omne cum Sabinis, & Volscis, & Æquis,  
& omni Campania, & parte Umbriæ Etruriæ-  
que, & Picentibus, & Marfis, Pelignisque,  
ac Vestinis atque Apulis, adjunctaque omni  
ora Græcorum inferi maris a Thuriis Nea-  
polim & Cumas, & inde Antio atque Ostiis  
tenus Samnites, aut focios validos Romanis,  
aut fractos bello invenisset hostes. Ipse tra-  
jecisset mare cum veteranis Macedonibus,  
non plus triginta millibus hominum & qua-  
tuor millibus equitum, maxime Theſſalorum:  
hoc enim roboris erat. Perſas, Indos, alias-  
que ſi adjunxiſſet gentes, impedimentum ma-  
jus, quam auxilium, traheret. Adde, quod  
Romanis ad manum domi ſupplementum  
eſſet: Alexandro, (quod poſtea Hannibali  
accidit) alieno in agro bellanti, exercitus  
conſenuiſſet. Arma, clipeus ſariſſæque illis;  
Romano ſcutum, majus corpori tegumentum,  
& pilum, haud paullo, quam haſta, vehe-  
mentius ictu miſſuque telum. Statarius uter-  
que miles, ordines fervans: ſed illa phalanx  
inmobilis, & unius generis: Romana acies  
diſtinctior, ex pluribus partibus conſtans:

U. c. 435.  
a. C. 317.

facilis partienti, quacumque opus esset, facilis jungenti. Jam in opere quis par Romano miles? quis ad tolerandum laborem melior? Uno prælio victus Alexander, bello victus esset. Romanum, quem Caudium, quem Cannæ non fregerunt, quæ fregisset acies? Næ ille sæpe, etiamsi prima prospere evenissent, Persas & Indos & inbellem Asiam quæfisset, & cum feminis sibi bellum fuisse dixisset: quod Epiri regem Alexandrum, mortifero vulnere ictum, dixisse ferunt, sortem bellorum in Asia gestorum ab hoc ipso juvene cum sua conferentem. Equidem, quum per annos quatuor & viginti primo Punico bello classibus certatum cum Pœnis recorder, vix ætatem Alexandri subsecuturam fuisse reor ad unum bellum. Et forsitan, quum & foederibus vetustis juncta Punica res Romanæ esset, & timor par adversus communem hostem duas potentissimas armis virisque urbes armaret, simul Punico Romanoque obrutus bello esset. Non quidem Alexandro duce, nec integris Macedonum rebus, sed experti tamen sunt Romani Macedonem hostem adversus Antiochum, Philippum, Persen, non modo cum clade ulla,

sed ne cum periculo quidem suo. Absit invidia verbo (t), & civilia bella fileant, numquam ab equite hoste, numquam a pedite, numquam aperta acie, numquam æquis, utique numquam nostris locis laboravimus. Equitem, sagittas, saltus inpeditos, avia commeatibus loca gravis armis miles timere potest. Mille acies, graviores quam Macedonum atque Alexandri, avertit, avertetque; modo sit perpetuus hujus, qua vivimus, pacis amor & civilis cura concordiae.

XX. M. FOSLIUS Flaccinator inde & L. Plautius Venno consules facti. Eo anno ab frequentibus Samnitium populis de fœdere renovando legati, quum senatum humi strati movissent, rejecti ad populum haudquaquam tam efficaces habebant preces. Itaque, fœdere negato (u), induciæ biennii, quum per aliquot dies fatigassent singulos precibus, inpetratae. Et ex Apulia Teanenſes Canusini-que populationibus fessi, obsidibus L. Plautio consuli datis, in deditiōem venerunt. Eodem anno primum præfecti Capuæ creari cœpti, legibus ab L. Furio prætore datis:

(t) vero Gron. Crev.

(u) de fœdere negatum Gron. Crev.

U. c. 437.  
a. C. 317.

U. c. 436.  
a. C. 316.  
M. Foslio,  
L. Plautio  
Coss.

*Tribus  
novæ.*

*U. c. 437.  
a. C. 315.*

*C. Junio,  
Q. Æmilio  
Coss.*

quum utrumque ipsi pro remedio ægris rebus discordia intestina petissent. Et duæ Romæ additæ tribus, Ufentina ac Falerina.

Inclinatis semel in Apulia rebus, Teates quoque Apuli ad novos consules, C. Junium Bubulcum, Q. Æmilium Barbulam, fœdus petatum venerunt (x), pacis per omnem Apuliam præstandæ populo Romano auctores. Id audacter spondendo inpetravere, ut fœdus daretur: neque ut æquo tamen fœdere, sed ut in ditione populi Romani essent. Apulia perdomita, (nam Forento quoque valido oppido Junius potitus erat) in Lucanos perrectum. Inde repentino adventu Æmilii consulis Nerulum vi captum. Et postquam res Capuæ stabilitas Romana disciplina fama per socios vulgavit; Antiatibus quoque, qui se sine legibus certis, sine magistratibus agere querebantur, dati ab senatu ad jura statuenda ipsius coloniæ patroni: nec arma modo, sed jura etiam Romana late pollebant.

*U. c. 438.  
a. C. 314.*

*Sp. Nautio,  
M. Popillio  
Coss.*

XXI. C. JUNIUS Bubulcus & Q. Æmilius Barbula consules exitu anni non consulibus ab se creatis, Sp. Nautio & M. Popillio,

(x) *venere* Gron. Crev.

ceterum dictatori L. Æmilio legiones tradiderunt. Is, cum L. Fulvio magistro equitum Saticulam obpugnare adortus, rebellandi causam Samnitibus dedit. Duplex inde terror inlatus Romanis. Hinc Samnis, magno exercitu coacto ad eximendos obsidione focios, haud procul castris Romanorum castra posuit: hinc Saticulani magno cum tumultu, patefactis repente portis, in stationes hostium incurrerunt. Inde pars utraque, spe alieni magis auxilii, quam viribus freta suis, iusto mox prælio inito Romanos urgent. Et, quamquam anceps dimicatio erat, tamen utrimque tutam aciem dictator habuit; quia & locum haud facilem ad circumveniendum cepit, & diversa statuit signa. Infestior tamen in erumpentes incessit: nec magno certamine intra mœnia compulit. Tum totam aciem in Samnites obvertit. Ibi plus certaminis fuit. Victoria sicut fera, ita nec dubia, nec varia fuit. Fusi in castra Samnites, extinctis nocte ignibus, tacito agmine abeunt: &, spe abjecta Saticulæ tuendæ, Plisiam ipsi, socios Romanorum, ut parem dolorem hosti redderent, circumfidunt.

*U. c. 438.  
a. C. 314.*

*L. Æmilius  
dictator.*

*Fusi  
Samnites.*

U. c. 437.

a. C. 313.

L. Papirio

IV. Q.

Publilio

IV. Coss.

Q. Fabius

dictator.

XXII. ANNO circumacto, bellum deinceps ab dictatore Q. Fabio gestum est. Consules novi, sicut superiores, Romæ manserunt: Fabius, ad accipiendum ab Æmilio exercitum, ad Saticulam cum supplemento venit: neque enim Samnites ad Plisiam manserant; sed, aditis ab domo novis militibus, multitudine freti, castra eodem, quo antea, loco posuerunt, lacescentesque proelio Romanos avertere ab obsidione conabantur. Eo intentius dictator in mœnia hostium versus, id bellum tantum ducere, quod urbem obpugnabat: securior ab Samnitibus agere, stationibus modo obpositis, ne qua in castra vis fieret. Eo ferocius adequitare (y) Samnites vallo, neque otium pati. Et quum jam prope in portis castrorum esset hostis, nihil consulto dictatore, magister equitum Q. Aulius Cerretanus, magno tumultu cum omnibus turmis equitum evectus, submovit hostem. Tum in minime pertinaci genere pugnae sic fortuna exercuit opes, ut insignes (z) utrimque clades & clara ipsorum ducum ederet funera. Prior Samnitium imperator, ægre patiens,

(y) obequitare Gron.

(z) insignis Gron. Crev.



quo tam ferociter adequitasset, inde se fundi  
 fugarique, orando hortandoque equites præ-  
 lium integravit : in quem, insignem inter  
 suos cientem pugnam, magister equitum Ro-  
 manus infesta cuspide ita permisit equum,  
 ut uno ictu exanimem equo præcipitaret;  
 nec, ut fit, ad ducis casum perculsa magis,  
 quam inritata, est multitudo. Omnes, qui  
 circa erant, in Aulium, temere invec-  
 tum per hostium turmas, tela conjecerunt. Fratri  
 præcipuum decus uli Samnitium imperato-  
 ris dederunt. Is victorem detractum ex equo  
 magistrum equitum, plenus mœroris atque  
 iræ, trucidavit : nec multum afuit, quin  
 corpore etiam, quia inter hostiles ceci-  
 derat turmas, Samnites potirentur. Sed  
 extemplo ad pedes descensum ab Romanis est,  
 coactique idem Samnites facere. Et repentina  
 acies circa corpora ducum pedestre prælium  
 iniit, quo haud dubie superat Romanus :  
 recuperatumque Aulii corpus, mixta cum  
 dolore lætitia, victores in castra referunt.  
 Samnites, duce amisso, & per equestre cer-  
 ramen tentatis viribus, omiſſa Saticula, quam  
 nequidquam defendi rebantur, ad Plisitiæ ob-  
 sidionem redeunt; intraque paucos dies Sati-

*U. c. 439.  
 a. C. 313.*

*Saticula  
 capta.*

*U. c. 439.* cula Romanus per deditionem, Plifia per  
*a. C. 313.* vim Samnis potitur.

*Sora de-  
 feſtio ad  
 Samnites.*

XXIII. MUTATA inde belli fedes eſt. Ad Soram ex Samnio Apuliaque traductæ legiones. Sora ad Samnites defecerat, interfectis colonis Romanorum. Quo quum prior Romanus exercitus, ad ulciſcendam civium necem recuperandamque coloniam, magnis itineribus præveniſſet (a), & ſparſi per vias ſpeculatores, ſequi legiones Samnitium, nec jam procul abeſſe, alii ſuper alios, nunciarent; obviam itum hoſti, atque ad Lautulas ancipiti prælio dimicatum eſt. Non cædes, non fuga alterius partis, ſed nox incertos, victi victoresne eſſent, diremit. Invenio apud quosdam, adverſam eam pugnam Romanis fuiſſe, atque in ea cecidiſſe Q. Aulium, magiſtrum equitum. Subſectus in locum Aulii C. Fabius magiſter equitum cum exercitu novo ab Roma advenit; &, per præmiſſos nuncios conſulto dictatore, ubi ſubiſteret, quove tempore, & qua ex parte hoſtem adgrederetur, ſubſtitit occultus, ad omnia ſatis exploratis conſiliis. Dictator, quum per aliquot dies poſt pugnam continuiffet ſuos intra vallum, obſeſſi magis quam obſidentis modo,

(a) *perveniffet Crev.*

*ſignum*

signum repente pugnæ proposuit ; & , effica- U. c. 439.  
 cius ratus ad accendendos virorum fortium ani- a. C. 313.  
 mos , nullam alibi , quam in semet ipso , cui-  
 quam relictam spem , de magistro equitum  
 novoque exercitu militem celavit : & , tan-  
 quam nulla , nisi in eruptione , spes esset ,  
 « Locis [inquit] angustis , milites , depre-  
 » hensi , nisi quam victoria patefecerimus ,  
 » viam nullam habemus. Stativa nostra mu-  
 » nimento satis tuta sunt ; sed inopia eadem  
 » infecta. Nam & circa omnia defecerunt ,  
 » unde subvehi commeatus poterant ; & , si  
 » homines juvare velint , iniqua loca sunt.  
 » Itaque non frustrabor ego vos , castra hic  
 » relinquendo , in quæ , infecta victoria , sicut  
 » pristino die , vos recipiatis. Armis munimenta  
 » non munimentis arma tuta esse debent. Castra  
 » habeant repetantque , quibus operæ est trahere  
 » bellum : nos omnium rerum respectum , præ-  
 » terquam victoriæ , nobis abscindamus. Ferte  
 » signa in hostem : ubi extra vallum agmen  
 » exceßerit , castra , quibus imperatum est ,  
 » incendant : damna vestra , milites , omnium  
 » circa , qui defecerunt , populorum præda  
 » farcientur. » Et (b) oratione dictatoris ,  
 (b) *Ea Gron.*

*U. c. 439.  
a. C. 313.*

quæ necessitatis ultimæ index erat , milites accensi vadunt in hostem , & respectus ipse ardentium castrorum , quamquam proximis tantum ( ita enim jusserat dictator ) ignis est subditus , haud parvum fuit irritamentum. Itaque , velut vecordes inlati , signa primo inpetu hostium turbant ; & in tempore , postquam ardentia procul vidit castra magister equitum , ( id convenerat signum ) hostium terga invadit. Ita circumventi Samnites , quæ potest quisque , fugam per diversa petunt. Ingens multitudo , in unum metu conglobata , ac semet ipsam turba inpediens , in medio cæsa. Capta hostium castra direptaque ; quorum præda onustum militem in Romana castra dictator reducit , haudquaquam tam victoria lætum , quam quod , præter exiguam deformatam incendio partem , cetera contra spem salva invenit.

*Victoria  
de  
Samniti-  
bus.*

*U. c. 440.  
a. C. 312.*

*M. Pæte-  
lio , C.  
Sulpicio  
III. Coss.*

XXIV. AD Soram inde reditum ; novique consules M. Pætelius , C. Sulpicius exercitum ab dictatore Fabio accipiunt , magna parte veterum militum dimissa , novisque cohortibus in supplementum adductis. Ceterum , quum propter difficilem urbis situm nec obpugnandi satis certa ratio iniretur , & aut

tempore longinqua , aut præceps periculo *U. c. 440.*  
victoria effet ; Soranus transfuga, clam ex *a. C. 312.*  
oppido profectus , quum ad vigiles Romanos  
penetrasset , duci se extemplo ad consules ju-  
bet , deductusque traditurum urbem promittit.  
Visus inde ( quum , quonam modo id præsta-  
turus effet , percunctantes doceret ) haud  
vana adferre , perpulit , prope adjuncta mœ-  
nibus Romana castra ut sex millia ab oppido  
removerentur : fore , ut minus intentæ in  
custodiam urbis diurnæ stationes ac nocturnæ  
vigiliæ essent. Ipse insequenti nocte , sub op-  
pido silvestribus locis cohortibus insidere  
jussis , decem milites delectos secum per ar-  
dua ac prope invia in arcem ducit ; pluribus,  
quam pro numero virorum , missilibus telis  
eo conlatis. Ad hæc saxa erant , & temere  
jacentia ( ut fit ) in aspretis , & de industria  
etiam , quo locus tutior esset , ab oppidanis  
congesta. Ubi quum constituisset Romanos ,  
femitamque angustam & arduam , erectam  
ex oppido in arcem , ostendisset ; » Hoc qui-  
» dem adscensu [ inquit ] vel tres armati  
» quamlibet multitudinem arcuerint : vos &  
» decem numero , & quod plus est , Romani ,  
» Romanorumque fortissimi viri estis , & locus

*U. c. 440.* » pro vobis ; & nox erit , quæ omnia ex  
*a. C. 312.* » incerto majora territis ostentat. Ego jam  
 » terrore omnia implebo : vos arcem intenti  
 » tenete.» Decurrit inde , quanto maxime  
 poterat , cum tumultu , « Ad arma , & pro  
 » vestram fidem , cives ? » clamitans , « arx  
 » ab hostibus capta est ; ite , defendite.»  
 Hæc incidens principum foribus , hæc obviis,  
 hæc excurrentibus in publicum pavidis increpat. Acceptum ab uno pavorem plures  
 per urbem ferunt. Trepidi magistratus , missis  
 ad arcem exploratoribus , quum tela & armatos tenere arcem multiplicato numero audirent ,  
 avertunt animos a spe recuperandæ arcis. Fuga cuncta complentur , portæque  
 ab semisomnis ac maxima parte inermibus refringuntur : quarum per unam præsidium  
 Romanum clamore excitatum inrumpit , & concursantes per viam pavidos cædit. Jam  
 Sora capta erat , quum consules prima luce advenere ; & , quos reliquos fortuna ex nocturna cæde ac fuga fecerat , in deditionem accipiunt. Ex his ducentos viginti quinque , qui omnium consensu destinabantur & infandæ colonorum cædis & defectionis auctores , vinctos Romam deducunt. Ceteram multitu-

*Sora  
 capitur.*

dinem incolumen , præsidio inposito , Soræ *U. c. 440.*  
 relinquunt. Omnes, qui Romam deducti erant, *a. C. 312.*  
 virgis in foro cæsi, ac securi percussi summo  
 gaudio plebis; cujus maxime intererat, tutam  
 ubique , quæ passim in colonias mitteretur ,  
 multitudinem esse.

XXV. Consules, ab Sora profecti , in agros *Aufonum*  
 atque urbes Aufonum bellum intulerunt. *gens bello*  
*adpetita.*  
 Mota namque omnia adventu Samnitium ,  
 quum apud Lautulas dimicatum est , fuerant,  
 conjurationesque circa Campaniam passim  
 factæ ; nec Capua ipsa crimine caruit : quin  
 Romam quoque & ad principum quosdam  
 inquirendos ventum est. Ceterum Aufonum  
 gens proditione urbium, sicut Sora, in potesta-  
 tem venit. Aufona , & Minturnæ , & Vescia,  
 urbes erant : ex quibus principes juven-  
 tutis duodecim numero , in proditionem  
 urbium suarum conjurati, ad consules veniunt :  
 docent , « suos , jampridem exoptantes Sam-  
 » nitium adventum , simul ad Lautulas pugna-  
 » tum audierunt, pro victis Romanos habuisse :  
 » juventute , armis (c) Samnites juvisse. Fuga-  
 » tis inde Samnitibus , incerta pace agere , nec  
 » claudentes portas Romanis , ne arcessant bel-

(c) & armis Gron. Cræv.

U. c. 440.  
a. C. 312.

lum; & obstinatos claudere, si exercitus ad-  
» moveatur. In ea fluctuatione animorum;  
» obprimi incautos posse. » His auctoribus  
mota propius castra: missique eodem tempore  
circa tria oppida milites, partim armati, qui  
occulti propinqua moenibus insiderent loca;  
partim togati, tectis veste gladiis, qui sub  
lucem apertis portis urbes ingrederentur. Ab  
his (d) simul custodes trucidari coepti, si-  
mul datum signum armatis, ut ex infidiis  
concurrerent. Ita portæ occupatæ, triaque  
oppida eadem hora eodemque consilio capta.  
Sed, quia absentibus ducibus inpetus est  
factus, nullus modus cædibus fuit; dele-  
& *deleva.* taque Aufonum gens, vix certo defectionis  
crimine, perinde ac si internecivo (e) bello  
certasset.

XXVI. EODEM anno, prodito hostibus Ro-  
mano præsidio, Luceria Samnitium facta. Nec  
diu proditoribus impunita res fuit. Haud pro-  
cul inde exercitus Romanus erat: cujus pri-  
mo inpetu urbs, sita in plano, capitur. Luce-  
rini ac Samnites ad internecionem cæsi: eo-  
que ira processit, ut Romæ quoque, quum

(d) *iis Gron. Crev.*

(e) *internecino Gron. Crev.*



de colonis mittendis Luceriam confuleretur  
 fenatus, multi delendam urbem cenferent. *U. c. 440.  
 a. C. 312.*

Præter odium, quod execrabile in his cap-  
 tos erat, longinquitas quoque abhorre-  
 re a  
 relegandis tam procul ab domo civibus inter  
 tam infestas gentes cogebat. Vicit tamen  
 sententia, ut mitterentur coloni. Duo millia  
 & quingenti missi. Eodem anno, quum omnia  
 infida Romanis essent, Capuæ quoque occultæ  
 principum conjurationes factæ. De quibus  
 quum ad senatum relatum esset, haudquaquam  
 neglecta res est. Quæstiones decretæ, dicta-  
 toremque quæstionibus exercendis dici pla-  
 cuit. C. Mænius dictus. Is M. Foslium ma-  
 gistrum equitum dixit. Ingens erat magistra-  
 tus ejus terror. Itaque sive timore ejus,  
 seu conscientia, Calavios, Ovium Noviumque,  
 (ea capita conjurationis fuerant) priusquam  
 nominarentur apud dictatorem, mors haud  
 dubie ab ipsis conscita judicio subtraxit. Dein-  
 de, ut quæstioni Campanæ materia decessit,  
 versa Romam interpretando res: non nomi-  
 natim, qui Capuæ, sed in universum, qui  
 usquam coissent conjurassentve adversus rem-  
 publicam, quæri senatum jussisse: & coitio-  
 nes, honorum adipiscendorum causa factas,

*C. Mænius  
 dictator  
 quæstioni-  
 bus exer-  
 cendis.*

*U. c. 440.* adversus rempublicam esse : latiorque & re  
*a. C. 312.* & personis quæstio fieri , haud abnuente  
dictatore , sine fine ulla quæstionis suæ jus  
esse. Postulabantur ergo nobiles homines :  
adpellantibusque tribunos nemo erat auxilio,  
quin nomina reciperentur. Inde nobilitas ,  
nec hi (f) modo , in quos crimen intende-  
batur , sed universi simul , negare , nobilium  
id crimen esse , quibus , si nulla obstat  
fraude , pateat via ad honorem , sed hominum  
novorum : ipsos adeo dictatorem magistrum-  
que equitum reos magis , quam quæsitores  
idoneos ejus criminis esse : intellecturosque  
ita id esse , simul magistratu abissent. Tum  
enimvero Mænius , jam famæ magis , quam  
imperii , memor , progressus in concionem  
ita verba fecit : « Et omnes anteaactæ vitæ  
» vos confcios habeo , Quirites , & hic ipse  
» honos , delatus ad me , testis est innocen-  
» tiæ meæ. Neque enim , quod sæpe alias ,  
» quia ita tempora postulabant reipublicæ ,  
» qui bello clarissimus esset , sed qui maxime  
» procul ab his coitionibus vitam egisset ,  
» dictator deligendus exercendis quæstionibus  
» fuit. Sed quoniam quidam nobiles homines

(f) ii Gron. Crev.

» (qua de caussa, vos existimare, quam me *U. c. 440.*  
 » pro magistratu quidquam incompertum di- *a. C. 312.*  
 » cere, melius est) primum ipsas expugnare  
 » quæstiones omni ope adnisi sunt; dein,  
 » postquam ad id parum potentes erant, ne  
 » causam dicerent, in præsidia adversariorum,  
 » adpellationem & tribunicium auxilium, pa-  
 » tricii confugerunt; postremo repulsi inde  
 » (adeo omnia tutiora, quam ut innocentiam  
 » suam purgarent, visa) in nos inruerunt,  
 » & privatis dictatorem poscere reum vere-  
 » cundiae non fuit: ut omnes Dii homines-  
 » que sciant, ab illis, etiam quæ non pos-  
 » sint, tentari, ne rationem vitæ reddant; me  
 » obviam ire crimini, & obferre me inimi-  
 » cis reum, dictatura me abdicō. Vos quæso, *Abdicat se*  
 » consules, si vobis datum ab senatu nego- *dictatura.*  
 » tium fuerit, in me primum & hunc M. Fos-  
 » lium quæstiones exerceatis; ut adparëat,  
 » innocentia nostra nos, non maiestæte hono-  
 » ris, tutos a criminationibus istis esse. » Ab-  
 » dicat inde se dictatura, & post eum con-  
 » festim Foslius magisterio equitum: primique  
 » apud consules (iis enim ab senatu mandata  
 » res est) rei facti, adversus nobilium testimo-  
 » nia egregie absolvuntur. Publilius etiam Philo, *Reus fac-*  
*tus absol-*  
*vitur.*

*U. c. 440.  
a. C. 312.*

multiplicatis fummis honoribus, post res tot  
domi belloque gestas, ceterum invisus nobi-  
litati, causam dixit, absolutusque est. Nec  
diutius, ut fit, quam dum recens erat, quæstio  
per clara nomina reorum viguit. Inde labi  
cœpit ad viliora capita, donec coitionibus  
factionibusque, adversus quas comparata erat,  
obpressa est.

XXVII. EARUM fama rerum, magis tamen  
spes Campanæ defectionis, in quam conjura-  
tum erat, Samnites, in Apuliam versos,  
rursus ad Caudium revocavit: ut inde ex  
propinquo, si qui motus occasionem aperiret,  
(g) Capuam Romanis eriperent. Eo consules  
cum valido exercitu venerunt. Et primo circa  
saltus, quum utrimque ad hostem iniqua via  
esset, cunctati sunt: deinde Samnites per  
aperta loca brevi circuitu in loca plana,  
Campanos campos, agmen demittunt, ibique  
primum castra in conspectu hostibus data:  
deinde levibus præliis, equitum sæpius, quam  
peditum, utrimque periculum factum: nec  
aut eventus eorum Romanum, aut moræ,  
qua trahebant bellum, poenitebat. Samnitium  
contra ducibus, & carpi parvis quotidie dam-

*Prælium  
cum Sam-  
nitibus.*

(g) *aperirent Gron. Crev.*

nis, & fenescere dilatione belli vires suæ *U. c. 440.*  
videbantur. Itaque in aciem procedunt, equi- *a. C. 312.*  
tibus in cornua divisīs : quibus præceptum  
erat, intentiores ad respectum castrorum,  
ne qua eo vis fieret, quam ad prælium, sta-  
rent : aciem pediti tutam fore. Consul (h)  
Sulpicius in dextro, Poetelius in lævo cornu  
consistunt. Dextra pars, qua & Samnites  
raris ordinibus, aut ad circumeundos hostes,  
aut ne ipsi circumirentur, constiterant, latius  
patefacta stetit. Sinistris, præterquam quod  
confertiores steterant, repentino consilio  
Poetelii consulis additæ vires : qui subsidia-  
rias cohortes, quæ integræ ad longioris pugnæ  
casus reservabantur, in primam aciem exem-  
plo emisit ; universisque hostem primo inpetu  
viribus impulit. Commota pedestri acie Sam-  
nitium, eques in pugnam subcedit. In hunc,  
transverso agmine inter duas acies se infe-  
rentem, Romanus equitatus concitat equos ;  
signaque & ordines peditum atque equitum  
confundit, donec universam ab ea parte avertit  
aciem. In eo cornu non Poetelius solus, sed  
Sulpicius etiam, hortator adfuerat, auctus  
ab suis nondum conferentibus manus ad cla-

(h) *Consules Gron. Crev.*

*U. c. 440.  
a. C. 312.*

morem, ab sinistra parte prius exortum. Unde, haud dubiam victoriam cernens, quum ad suum cornu tenderet cum mille ducentis viris, dissimilem ibi fortunam invenit: Romanos loco pulsos, victorem hostem signa in perculsos inferentem. Ceterum omnia mutavit, repente consulis adventus. Nam & conspectu ducis refectus militum est animus: & majus quam pro numero auxilium, advenerant (i) fortes viri: & partis alterius victoria audita, mox visa etiam, proelium restituit. Tota deinde jam vincere acie Romanus, & omisso certamine, cædi capique Samnites; nisi qui Maleventum, cui nunc urbi Beneventum nomen est, perfugerunt. Ad triginta millia cæsa aut capta Samnitium, proditum memoriæ est.

*Vincunt  
Romani.*

XXVIII. CONSULES, egregia victoria parta, protinus inde ad Bovianum obpugnandum legiones ducunt: ibique hiberna egerunt, donec ab novis consulibus L. Papirio Curre quintum, C. Junio Bubulco iterum, nominatus dictator C. Poetelius cum M. Foslio magistro equitum exercitum accepit. Is, quum audisset arcem Fregellanam ab Samnitibus

*U. c. 441.  
a. C. 311.*

*L. Papirio  
C. Junio  
II. Coss.  
Poetelius  
dictator.*

(i) *advenerat* Gron. Crev.

captam, omisso Boviano ad Fregellas pergit: unde, nocturna Samnitium fuga sine certamine receptis Fregellis, præsidioque valido inposito, in Campaniam reditum maxime ad Nolam armis repetendam. Eo se intra mœnia, sub adventum dictatoris, & Samnitium omnis multitudo & Nolani agrestes contulerant. Dictator, urbis situ circumspecto, quo apertior aditus ad mœnia esset, omnia ædificia (& frequenter ibi habitabatur) circumjecta muris incendit: nec ita multo post, sive a Pætelio dictatore, sive ab C. Junio consule, (nam utrumque traditur) Nola est capta. Qui captæ decus Nolæ ad consulem trahunt, adjiciunt, Atinam & Calatiam ab eodem captas; Pœtelium autem, pestilentia orta, clavi figendi causa dictatorem dictum. Sueffa & Pontia eodem anno coloniæ deductæ sunt. Sueffa Auruncorum fuerat: Volsci Pontias, insulam sitam in conspectu litoris sui, incoluerant. Et, Interamna & Casinum ut deducerentur coloniæ, senatusconsultum factum est: sed triumviros creavere, ac misere colonorum quatuor millia insequentes consules M. Valerius, P. Decius.

*U. c. 441,  
a. C. 311.*

*Nola  
capta.*

*U. c. 442,  
a. C. 310.*

*M. Vale-  
rio, P.  
Decio  
Coss.*

*U. c. 442.  
a. C. 310.*

XXIX. PROFLIGATO fere Samnitium bello, priusquam ea cura decederet Patribus Romanis, Etrusci belli fama exorta est. Nec erat ea tempestate gens alia, cujus secundum Gallicos tumultus arma terribiliora essent, quum propinquitate agri, tum multitudine hominum. Itaque, altero consulum in Samnio reliquias belli persequente, P. Decius, qui graviter æger Romæ restiterat, auctore senatu dictatorem C. Junium Bubulcum dixit. Is, prout rei magnitudo postulabat, omnes juniores sacramento adigit: arma, quæque alia res poscit, summa industria parat: nec tantis adparatibus elatus de inferendo bello agitatur, quieturus haud dubio, nisi ultro arma Etrusci inferrent. Eadem in comparando cohibendoque bello consilia & apud Etruscos fuere. Neutri finibus egressi. Et censura clara eo anno Ap. Claudii, & C. Plautii fuit; memoriæ tamen felicioris ad posteros nomen Appii, quod viam munivit, & aquam in urbem duxit, eaque unus perfecit; quia, ob infamem atque invidiosam senatus lectionem verecundia victus, collega magistratu se abdicaverat. Appius, jam inde antiquitus insitam pertinaciam familiæ gerendo, solus censuram

*Appia via.*



obtinet. Eodem Appio auctore, Potitii, *U. c. 442.*  
 gens (k), cujus ad aram Maximam Herculis *a. C. 310.*  
 familiare sacerdotium fuerat, feros publicos,  
 ministerii delegandi causa, sollemnia ejus  
 sacri docuerat. Traditur inde dictu mirabile,  
 & quod dimovendis statu suo sacris religio-  
 nem facere posset, quum duodecim familiae  
 ea tempestate Potitiorum essent, puberes ad  
 triginta, omnes intra annum cum stirpe ex-  
 stinctos: nec nomen tantum Potitiorum in-  
 terisse, sed censores etiam Appium, memori  
 Deum ira, post aliquot annos luminibus  
 captum.

XXX. ITAQUE consules, qui eum annum *U. c. 443.*  
 secuti sunt, C. Junius Bubulcus tertium & *a. C. 309.*  
 Q. Æmilius Barbula iterum, initio anni *C. Junio*  
 questi apud populum, deformatum ordinem *III. Q.*  
 prava lectione senatus, qua potiores aliquot *Æmilio*  
 lectis præteriti essent; negaverunt, eam lec- *II. Coss.*  
 tionem se, quæ sine recti pravique discrimine  
 ad gratiam ac (l) libidinem facta esset, ob-  
 servaturos: & senatum extemplo citaverunt  
 eo ordine, qui ante censores Ap. Claudium  
 & C. Plautium fuerat. Et duo imperia eo an-

(k) *Potitia gens* Gron. Crev.

(l) & Gron. Crev.

*U. c. 443.  
a. C. 309.*

*Duumviri  
navales  
creati.*

*Tibicines  
abeunt.*

no dari cœpta per populum, utraque perti-  
nentia ad rem militarem : unum, ut tribuni  
militum feni deni in quatuor legiones a po-  
pulo crearentur ; quæ antea, perquam paucis  
suffragio populi relictis locis, dictatorum &  
consulum ferme fuerant beneficia. Tulere  
eam rogationem tribuni plebei L. Atilius,  
C. Marcius. Alterum, ut duumviros navales  
classis ornandæ reficiendæque causâ idem  
populus juberet. Lator hujus plebisciti fuit  
M. Decius tribunus plebis. Ejusdem anni rem  
dictu parvam præterirem, ni ad religionem  
visa esset pertinere. Tibicines, quia prohibiti  
a proximis censoribus erant in æde Jovis  
vesci, quod traditum antiquitus erat, ægre  
passi, Tibur uno agmine abierunt : adeo ut  
nemo in urbe esset, qui sacrificiis præcineret.  
Ejus rei religio tenuit senatum ; legatosque  
Tibur miserunt, ut darent operam, ut hi  
homines Romanis restituerentur. Tiburtini,  
benigne polliciti, primum adcitatos eos in cu-  
riam hortati sunt, uti reverterentur Romam :  
postquam perpelli nequibant, consilio, haud  
abhorrente ab ingeniis hominum, eos adgre-  
diuntur. Die festo alii alios per speciem cele-  
brandarum cantu epularum causâ invitant,

& vino, cujus avidum ferme genus est, oneratos sopiunt : atque ita in plaustra fomno vinctos (m) conjiciunt, ac Romam deportant : nec prius sensere, quam, plaustris in foro relictis, plenos crapulæ eos lux obprescit. Tunc concursus populi factus, inpetratoque, ut manerent, datum, ut triduum quotannis ornati, cum cantu atque hac, quæ nunc sollemnis est, licentia per urbem vagarentur : restitutumque in æde vescendi jus iis, qui sacris præcinerent. Hæc inter duorum ingentium bellorum curam gerebantur.

XXXI. CONSULES inter se provincias partiti; Junio Samnites, Æmilio novum bellum Etruria forte obvenit. In Samnio Cluviam, præsidium Romanum, quia nequiverat vi capi, obsessum fame in deditionem acceperant Samnites, verberibusque foedum in modum laceratos occiderant deditos. Huic insensu crudelitati Junius, nihil antiquius obpugnatione Cluviana ratus, quo die adgressus est mœnia, vi cepit, atque omnes puberes interfecit. Inde victor exercitus Bovianum ductus. Caput hoc erat Pentrorum Samnitium, longe ditissimum atque opulentissimum armis

U. c. 443.  
a. C. 309.  
*Revehuntur Romam*

*Res gestæ  
in  
Samnio.*

(m) *victos Gron. Crev.*

Tom. III.

R

*U. c. 443.* virisque. Ibi quia haud tantum irarum erat;  
*a. C. 309.* spe prædæ milites accensi, oppido potiuntur.

Minus itaque sævitum in hostes est : prædæ plus pene, quam ex omni Samnio umquam, egestum, benigneque omnis militi concessa. Et postquam præpotentem armis Romanum nec acies subsistere ullæ, nec castra, nec urbes poterant; omnium principum in Samnio eo curæ sunt intentæ, ut insidiis quæreretur locus, si qua licentia populando effusus exercitus excipi ac circumveniri posset. Transfugæ agrestes & captivi quidam, pars forte, pars consilio oblatis, congruentia ad consulem adferentes, quæ & vera erant, pecoris vim ingentem in saltum avium compulsam esse, perpulerunt, ut prædatum eo expeditæ ducerentur legiones. Ibi ingens hostium exercitus itinera occultus infederat, &, postquam intrasse Romanos vidit saltum, repente exortus cum clamore ac tumultu incautos invadit. Et primo nova res trepidationem fecit, dum arma capiunt, sarcinas congerunt in medium : dein, postquam, ut quisque liberaverat se onere, aptaveratque armis, ad signa undique coibant, & notis ordinibus in vetere disciplina militiæ, jam sine præcepto ullius

fua ſponte ſtruebatur acies; conſul, ad an- U. c. 443.  
a. C. 309.  
cipitem maxime pugnam adveſtus, deſilit ex  
equo, & Jovem, Martemque atque alios  
teſtatur Deos, « ſe nullam ſuam gloriam inde,  
» ſed prædam militi quærentem, in eum lo-  
» cum deveniſſe : neque in ſe aliud, quam  
» nimiam ditandi ex hoſte militis curam, re-  
» prehendi poſſe : ab eo ſe dedecore nullam  
» rem aliam, quam virtutem militum, vin-  
» dicaturam. Conniterentur modo uno animo  
» omnes invadere hoſtem, victum acie, caſtris  
» exutum, nudatum urbibus, ultimam ſpem  
» furto infidiarum tentantem, & loco, non  
» armis, fretum. Sed quem eſſe jam virtuti  
» Romanæ inexpugnabilem locum? » Fregel-  
lana arx, Soranaque, & ubicumque iniquo  
ſucceſſum erat loco, memorabantur. His  
accenſus miles, omnium inmemor difficulta-  
tium, vadit adverſus imminentem hoſtium  
aciem. Ibi paullum (n) laboris fuit, dum in  
adverſum clivum erigitur agmen : ceterum,  
poſtquam prima ſigna planiciem ſummam  
ceperunt, ſenſitque acies æquo ſe jam inſti-  
tiſſe loco, verſus extemplo eſt terror in  
infidiatores, eaſdemque latebras, quibus ſe

(n) *paullulum* Gron. Crev.

*U. c. 443.* paullo ante texerant, palati atque inermes  
*a. C. 309.* fuga repetebant : sed loca difficilia, hosti  
 quæsitâ, ipsos tum sua fraude inpediebant.  
 Itaque ergo perpaucis effugium patuit : cæsa  
 ad viginti millia hominum, victorque Ro-  
 manus ad oblatam ultro ab hoste prædam  
 pecorum discurrit.

*Etrusci  
 Sutrium*

*obpugnant*

XXXII. Dum hæc geruntur in Samnio,  
 jam omnes Etruriæ populi præter Arretinos  
 (o) ad arma ierant, ab obpugnando Sutrio,  
 quæ urbs, focia Romanis, velut claustra  
 Etruriæ erat, ingens orsi bellum. Eo alter  
 consulum Æmilius cum exercitu ad liberan-  
 dos obsidione focios venit. Advenientibus  
 Romanis, Sutrini commeatus benigne in  
 castra ante urbem posita advexere. Etrusci  
 diem primum consultando, maturarent, trahe-  
 rentne bellum, traduxerunt. Postero die,  
 ubi celeriora, quam tutiora, consilia magis  
 placuere ducibus, sole orto signum pugnae  
 propositum est, armatique in aciem proce-  
 dunt. Quod postquam consuli nunciatum est,  
 extemplo tesseram dari jubet, ut prandeat  
 miles, firmatisque cibo viribus arma capiat.  
 Dicto paretur. Consul, ubi armatos paratosque

(o) *Arretinos Gron.*

vidit, signa extra vallum proferri iussit, & haud procul hoste instruxit aciem. Aliquamdiu intenti utrimque steterunt, expectantes ut ab adversariis clamor & pugna inciperet : & prius sol meridie se inclinavit, quam telum hinc aut illinc emissum est. Inde, ne infecta re abiretur, clamor ab Etruscis oritur, concinuntque tubæ, & signa inferuntur. Nec segnius ab Romanis pugna initur : concurrunt infensis animis : numero hostis, virtute Romanus superat. Anceps prælium multos utrimque, & fortissimum quemque, absomit : nec prius inclinata res est, quam secunda acies Romana ad prima signa, integri fessis successerunt. Etrusci, quia nullis recentibus subsidiis fulta prima acies fuit, ante signa circaque omnes ceciderunt. Nullo umquam prælio, fugæ minus, nec plus cædis fuisset, ni obstinatos mori Tuscos nox texisset ; ita ut victores prius, quam victi, pugnandi finem facerent. Post occasum solis signum receptui datum est : nocte ab utroque in castra reditum. Nec deinde quidquam eo anno rei memoria dignæ apud Sutrium gestum est ; quia & ex hostium exercitu prima tota acies deleta uno prælio fuerat, subsidiariis modo.

*U. c. 443.  
a. C. 309.*

relictis, vix quod fatis esset ad castrorum præsidium : & apud Romanos tantum vulnerrum fuit, ut plures post prælium faucii decesserint, quam ceciderant in acie.

*U. c. 444.  
a. C. 308.*

*Q. Fabio  
II C.  
Marcio  
Coss.*

XXXIII. Q. FABIVS insequentis anni consul, bellum ad Sutrium excepit. Collega Fabio C. Marcius Rutilus darus est. Ceterum & Fabius supplementum ab Roma adduxit, & novus exercitus domo aditus Etruscis venit. Permulti anni jam (p) erant, quum inter patricios magistratus tribunosque (q) nulla certamina fuerant : quum ex ea familia, quæ velut fatalis tum tribunis ac plebi erat, certamen oritur. Ap. Claudius censor, circumactis decem & octo mensibus, quod Æmilia lege finitum censuræ spatium temporis erat, quum C. Plautius collega ejus magistratu se abdicasset, nulla vi compelli, ut abdicaret, potuit. P. Sempronius erat tribunus plebis, qui finiendæ censuræ intra legitimum tempus actionem susceperat, non popularem magis, quam justam, nec in vulgus, quam optimo cuique, gratiorem. Is, quum idemdem legem Æmiliam recitaret, auctoremque ejus

*Ap. Clau-  
dius  
censuram  
ultra  
legitimum  
tempus re-  
sinet.*

(p) *jam anni* Gron. Crev.

(q) *add. plebis* Gron. Crev.



Mam. Æmilium dictatorem laudibus ferret; *U. c. 444*  
 qui quinquennalem ante censuram, & lon- *a. C. 308*  
 ginitate potestatem dominantem, intra sex  
 mensium & anni coegisset spatium: » Dic,  
 » agedum [ inquit ] Ap. Claudii, quidnam  
 » facturus fueris, si eo tempore, quo C. Fu-  
 » rius & M. Geganius censores fuerunt, cen-  
 » sor fuisses. » Negare Appius, « interroga-  
 » tionem tribuni magno opere ad causam  
 » pertinere suam. Nam, etsi tenuerit lex Æmi-  
 » lia eos censores, quorum in magistratu lata  
 » esset, quia post illos censores creatos eam  
 » legem populus iussisset, quodque postre-  
 » mum iussisset, id jus ratumque esset; non  
 » tamen aut se, aut eorum quemquam, qui  
 » post eam legem latam creati censores essent,  
 » teneri ea lege potuisse.

XXXIV. HÆC sine ullius adfensu cavil- *P. Sempro-*  
 lante Appio, « En [ inquit ] Quirites, illius *nii Tr. Pl.*  
 » Appii progenies, qui, decemvir in annum *oratio in*  
 » creatus, altero anno se ipse creavit: tertio, *Claudium.*  
 » nec ab se, nec ab ullo creatus, privatus  
 » fasces & imperium obtinuit: nec ante con-  
 » tinuando abstinit magistratu, quam obrue-  
 » rent (r) eum male parta, male gesta, male

(r) *obruerunt* Cron. Crev.

U. c. 444.  
a. C. 308.

» retenta imperia. Hæc est eadem familia ;  
 » Quirites , cujus vi atque injuriis compulsi,  
 » extorres patria , Sacrum montem cepistis :  
 » hæc , adversus quam tribuniciū auxilium  
 » vobis comparastis : hæc , propter quam duo  
 » exercitus Aventinum infedistis : hæc , quæ  
 » foenebres leges : hæc , quæ agrarias semper  
 » inpugnavit : hæc connubia Patrum & plebis  
 » interrupit : hæc plebi ad curules magistra-  
 » tus iter obsepsit : hoc est nomen multo ,  
 » quam Tarquiniorum , infestius vestræ liber-  
 » tati. Itane tandem , Ap. Claudī , quum cen-  
 » tesimus jam annus sit ab Mam. Æmilio  
 » dictatore , tot censores fuerint , nobilissimi  
 » fortissimique viri , nemo eorum duodecim  
 » tabulas legit ? nemo id jus esse , quod postre-  
 » mo populus jussisset , scivit ? Immo vero  
 » omnes sciverunt ; & ideo Æmiliæ potius  
 » legi paruerunt , quam illi antiquæ , qua pri-  
 » mum censores creati erant , quia hanc postre-  
 » mam jusserat populus : (s) & quia , ubi  
 » duæ contrariæ leges sunt , semper antiquæ  
 » obrogat nova. An hoc dicis , Appi , non  
 » teneri Æmilia lege populum ? an populum  
 » teneri , te unum exlegem esse ? Tenuit

(s) *populus* del. Gron. Crev.

» Æmilia lex violentos illos censores , C. Fu-  
 » rium & M. Geganium , qui , quid iste ma-  
 » gistratus in republica mali facere posset ,  
 » indicarunt , quum , ira finitæ potestatis ,  
 » Mam. Æmilium , principem ætatis suæ belli  
 » domique , ærarium fecerunt. Tenuit dein-  
 » ceptus omnes censores intra centum annorum  
 » spatium. Tenet C. Plautium collegam tuum ,  
 » iisdem auspiciis , eodem jure creatum. An  
 » hunc non , ut qui optimo jure censor crea-  
 » tus esset , populus creavit ? tu unus exi-  
 » mius es , in quo hoc præcipuum ac singu-  
 » lare valeat ? Quem tu regem sacrificiorum  
 » crees , amplexus regni nomen , ut qui opti-  
 » mo jure rex Romæ creatus sit , creatum se  
 » dicet ? Quem semestri dictatura , quem in-  
 » terregno quinque dierum contentum fore  
 » putes ? quem clavi figendi , aut ludorum  
 » causa dictatorem audacter crees ? Quam isti  
 » stolidos ac focordes videri creditis eos , qui  
 » intra vicesimum diem , ingentibus rebus  
 » gestis , dictatura se abdicaverunt , aut qui  
 » vitio creati abierunt magistratu ? Quid ego  
 » antiqua répetam ? Nuper intra decem annos  
 » C. Mænius dictator , quia , quum quæstio-  
 » nes severius , quam quibusdam potentibus

U. c. 444.  
 a. C. 358.

*U. c. 444.* » tutum erat, exercebat, contagio ejus, quod  
*a. C. 308.* » quærebat ipse (t), criminis objectata ab

» inimicis est, ut privatus obviam iret crimi-  
 » ni, dictatura se abdicavit. Nolo ego istam  
 » in te modestiam : ne degeneraveris a fami-  
 » lia imperiosissima & superbissima : non die,  
 » non hora citius, quam necesse est, magis-  
 » tratu abieris; modo ne excedas finitum tem-  
 » pus. Satis est, aut diem, aut mensem cen-  
 » suræ adjicere? Triennium, inquit, & sex  
 » menses ultra, quam licet Æmilia lege,  
 » censuram geram, & solus geram. Hoc  
 » quidem jam regno simile est. An collegam  
 » subrogabis, quem ne in demortui quidem  
 » locum subrogari fas est? Poenitet enim,  
 » quod antiquissimum sollemne, & solum ab  
 » ipso, cui sit, institutum Deo, ab nobilissi-  
 » mis antistitibus ejus sacri ad fervorum mi-  
 » nisterium religiosus censor deduxisti; gens  
 » antiquior originibus urbis hujus, hospitio  
 » Deorum immortalium sancta, propter te ac  
 » tuam censuram intra annum ab stirpe ex-  
 » tincta est : nisi universam rempublicam eo  
 » nefario obstrinxeris, quod ominari etiam  
 » reformidat animus. Urbs eo lustro capta

(t) *ipsi criminis Gron. Crev.*

» est, quo, demortuo collega C. Julio cen-  
 » fore, L. Papirius Curfor (u), ne abiret ma-  
 » gistratu, M. Cornelium Maluginensem col-  
 » legam subrogavit. Et quanto modestior illius  
 » cupiditas fuit, quam tua, Appi? Nec solus,  
 » nec ultra finitum lege tempus L. Papirius  
 » censuram gessit; tamen neminem invenit, qui  
 » se postea auctorem sequeretur: omnes dein-  
 » ceptim censores post mortem collegæ se magis-  
 » tratu abdicarunt. Te, nec quod dies exit (x)  
 » censuræ, nec quod collega magistratu abiit,  
 » nec lex, nec pudor coercet: virtutem in  
 » superbia, in audacia, in contemptu Deorum  
 » hominumque ponis. Ego te, Ap. Claudii,  
 » pro istius magistratus majestate ac vere-  
 » cundia, quem gessisti, non modo manu  
 » violatum, sed ne verbo quidem inclemen-  
 » tiori a me adpellatum vellem: sed & hæc,  
 » quæ adhuc egi, pervicacia tua & superbia  
 » coegit me loqui; & nisi Æmiliæ legi pa-  
 » rueris, in vincula duci jubebo; nec, quum  
 » ita comparatum a majoribus sit, ut, comi-  
 » tiis censoriis nisi duo confecerint legitima  
 » suffragia, non renunciato altero comitia

U. c. 444.  
 a. C. 308.

(u) *Censor Gron.*

(x) *exiit Gron Crev.*

*U. c. 444.* » differantur , ego te , qui solus censor creari  
*a. C. 308.* » non possis , solum censuram gerere patiar. »

Hæc taliaque quum dixisset , prendi cenforem ,  
 & in vincula duci iussit. Adprobantibus sex  
 tribunis actionem collegæ , tres adpellanti  
 Appio auxilio fuerunt ; summaque invidia  
 omnium ordinum solus censuram gessit.

*Fabii  
 prælium  
 cum  
 Etruscis.*

XXXV. Dum ea Romæ geruntur , jam  
 Sutrium ab Etruscis obsidebatur : consuli que  
 Fabio , imis montibus ducenti ad ferendam  
 opem fociis tentandasque munitiones , si qua  
 posset , acies hostium instructa occurrit ; quo-  
 rum ingentem multitudinem quum ostende-  
 ret subjecta late planicies ; consul , ut loco  
 paucitatem suorum adjuvaret , flectit paullu-  
 lum in clivos agmen : ( aspreta erant strata  
 faxis ) inde signa in hostem obvertit. Etrusci ,  
 omnium , præterquam multitudinis suæ , qua  
 sola freti erant , inmemores , prælium ineunt  
 adeo raptim & avide , ut , abjectis missilibus ,  
 quo celerius manus confererent , stringerent  
 gladios , videntes in hostem. Romanus contra  
 nunc tela , nunc faxa , quibus eos adfatim  
 locus ipse armabat , ingerere. Igitur scuta  
 galeæque ictæ quum etiam , quos non vulnera-  
 verant , turbarent ( neque subire erat facile ad

propiore pugnam, neque missilia habebant, *U. c. 444.*  
 quibus eminus rem gererent) stantes & ex- *a. C. 308.*  
 positos ad ictus quum jam satis nihil tegeret,  
 quosdam etiam pedem referentes, fluctuan-  
 temque & instabilem aciem, redintegrato  
 clamore, strictis gladiis hastari & principes  
 invadunt. Eum inpetum non tulerunt Etrusci,  
 versisque signis, fuga effusa castra repetunt.  
 Sed equites Romani, prævecti per obliqua  
 campi, quum se fugientibus obtulissent,  
 omisso ad castra itinere, montes petunt. Inde  
 inermi pene agmine ac vexato vulneribus in  
 silvam Ciminiam penetratum. Romanus, mul-  
 tis millibus Etruscorum cæsis, duodequadra-  
 ginta signis militaribus captis, castris etiam  
 hostium cum præda ingenti potitur. Tum de  
 persequendo hoste agitari coeptum.

XXXVI. SILVA erat Ciminia magis tum *Ciminia*  
 invia atque horrenda, quam nuper fuere Ger- *silva.*  
 manici saltus, nulli ad eam diem ne merca-  
 torum quidem adita. Eam intrare haud fere  
 quisquam, præter ducem ipsum, audebat :  
 aliis omnibus cladis Caudinæ nondum memo-  
 ria aboleverat. Tum ex iis, qui aderant,  
 (consulis fratrem M. Fabium, Cæsonem alii,  
 C. Claudium quidam matre eadem, qua

*U. c. 444.* consulem, genitum tradunt ) speculatum se  
*a. C. 308.* iturum professus, brevique omnia certa ad-  
laturum. Cære educatus apud hospites, Etruf-  
cis inde literis eruditus erat, linguamque  
Etruscam probe noverat. Habeo auctores,  
vulgo tum Romanos pueros, sicut nunc Græ-  
cis, ita Etruscis literis erudiri solitos. Sed  
propius est vero præcipuum aliquid fuisse in  
eo, qui se tam audaci simulatione hostibus  
inmiscuerit. Servus ei dicitur comes unus  
fuisse, nutritus una, eoque haud ignarus lin-  
guæ ejusdem : nec quidquam aliud proficif-  
centes, quam summatim regionis, quæ in-  
tranda erat, naturam ac nomina principum  
in populis accipere; ne qua inter conloquia  
insigni nota hæsitantes deprehendi possent. Iere  
pastorali habitu, agrestibus telis, falcibus  
gæsisque binis armati. Sed neque commer-  
cium linguæ, nec vestis armorumve habitus  
sic eos texit, quam quod adhorrebat ab fide,  
quemquam externum Ciminios saltus intra-  
turum. Usque ad Camertes Umbros pene-  
trasse dicuntur. Ibi, qui essent, fateri Roma-  
num ausum : introductumque in senatum con-  
sulis verbis egisse de societate amicitiaque :  
atque inde comi hospitio acceptum, nunciare



Romanis jussu, commeatum exercitui dierum triginta præsto fore, si ea loca intrasset; U. c. 444.  
a. c. 308.  
juventutemque Camertium Umbrorum in armis paratam imperio futuram. Hæc quum relata consuli essent, impedimentis prima vigilia præmissis, legionibus post impedimenta ire jussis, ipse substitit cum equitatu: & luce orta, postero die obequitavit stationibus hostium, quæ extra saltum dispositæ erant: & quum satis diu tenuisset hostem, in castra sese recepit; portaque altera egressus, ante noctem agmen adsequitur. Postero die, luce prima, juga Ciminii montis tenebat. Inde, contemplatus opulenta Etruriæ arva, milites emittit. Ingenti jam abacta præda, tumultuariæ agrestium Etruscorum cohortes, repente a principibus regionis ejus concitatæ, Romanis obcurrunt, adeo incompositæ, ut vindices prædarum prope ipsi prædæ fuerint. Cæsis fugatisque iis, late depopulato agro, victor Romanus, opulentusque rerum omnium copia, in castra rediit. Eo forte quinque legati cum duobus tribunis plebis venerant, denunciatum Fabio senatus verbis, ne saltum Ciminium transiret. Lætati serius se, quam ut impedire bellum possent, venisse, nuncii victoriæ Romam revertuntur.

U. c. 444.  
a. C. 308.

*Ingens  
Etrusco-  
rum exerci-  
tus conli-  
gitur.*

XXXVII. HAC expeditione consulis motum latius erat, quam profligatum, bellum. Vastationem namque sub Ciminii montis radicibus jacens ora senserat, conciveratque indignatione non Etruriæ modo populos, sed Umbriæ finitima. Itaque, quantus non umquam antea, exercitus ad Sutrium venit: neque e (y) silvis tantummodo promota castra, sed etiam aviditate dimicandi quam primum in campos delata acies: deinde instructa primo suo stare loco, relicto hostibus ad instruendum (z) contra spatio: dein (a), postquam detrectare hostem sensere pugnam, ad vallum subeunt. Ubi postquam stationes quoque receptas intra munimenta sensere, clamor repente circa duces ortus, ut « eo » sibi e castris cibaria ejus diei deferri juberent; mansuros se sub armis, & aut nocte, » aut certe luce prima castra hostium invafuros. » Nihilo quietior Romanus exercitus imperio ducis continetur. Decima erat fere diei hora, quum cibum capere consul milites jubet; præcipit, ut in armis sint, quacumque diei noctisque hora signum dederit. Paucis milites

(y) in Gron.

(a) deinde Gron. Crev.

(z) instruendam Gron. Crev.

milites adloquitur, Samnitium bella extollit, *U. c. 444.*  
 elevat Etruscos: « nec hostem hosti, nec mul- *a. C. 308.*  
 » titudinem multitudini comparandam ait esse.  
 » Præterea telum aliud occultum scituros in  
 » tempore: interea taceri opus esse. » His  
 ambagibus prodi simulabat hostes, quo ani-  
 mus militum multitudine territus restituere-  
 tur: &, quod sine munimento confederant,  
 verisimilius erat, quod simulabatur. Curati  
 cibo corpora quieti dant, & quarta fere vi-  
 gilia sine tumultu excitati arma capiunt. Do-  
 labræ calonibus dividuntur ad vallum pro-  
 ruendum fossasque implendas: intra muni-  
 menta instruitur acies: delectæ cohortes ad  
 portarum exitus conlocantur. Dato deinde *Etrusci*  
 signo paullo ante lucem, quod æstivis noc- *obpressi in*  
 tibus sopitæ maxime quietis tempus est, pro- *castris.*  
 ruto vallo erupit acies: stratos passim inva-  
 dit hostes: alios immobiles, alios semifom-  
 nos in cubilibus suis, maximam partem ad  
 arma trepidantes, cædes obpressit: paucis  
 armandi se datum spatium est. Eos ipsos,  
 non signum certum, non ducem sequentes,  
 fundit Romanus, fugatos eques persequitur.  
 Ad castra, ad silvas diversi tendebant. Silvæ  
 tutius dedere refugium; nam castra in campis

*U. c. 444.  
a. C. 308.*

sita eodem die capiuntur : aurum argentumque iussu referri ad consulem : cetera prædâ militis fuit. Cæsa aut capta eo die hostium millia ad sexaginta. Eam tam claram pugnam trans Ciminiam silvam ad Perusiam pugnatam , quidam auctores sunt ; metuque in magno civitatem fuisse, ne interclusus exercitus tam infesto saltu, coortis undique Tusci Umbrisque, obprimeretur. Sed, ubicumque pugnatum est, res Romana superior fuit : itaque a Perusia , & Cortona, & Arretio, quæ ferme capita Etruriæ populorum ea tempestate erant , legati , pacem foedusque ab Romanis petentes, inducias in triginta annos inpetraverunt.

*Classis  
Romana.*

XXXVIII. DUM hæc in Etruria geruntur, consul alter C. Marcius Rutilus Allifas de Samnitibus vi cepit. Multa alia castella vicique, aut deleta hostiliter, aut integra in potestatem venere. Per idem tempus & classis Romana a P. Cornelio, quem senatus maritimæ oræ præfecerat, in Campaniam acta, quum adpulsa Pompeios esset; focii inde navales ad depopulandum agrum Nucerinum profecti, proximis raprim vastatis, unde reditus tutus ad naves esset, dulcedine (ut fit)

prædæ longius progressi, excivere hostes. *U. c. 444.*  
 Palatis per agros nemo obvius fuit, quum *a. C. 308.*  
 occidione occidi possent: redeuntes agmine  
 incauto haud procul navibus adsecuti agrestes  
 exuerunt præda, partem etiam occiderunt:  
 quæ superfuit cædi, trepida multitudo ad  
 naves compulsæ est. Profectio Q. Fabii trans  
 Ciminiam silvam quantum Romæ terrorem  
 fecerat, tam lætam famam in Samnium ad  
 hostes tulerat: « interclusum Romanum exer-  
 » citum obsideri, cladisque imaginem Furcu-  
 » las Caudinas » memorabant: « eadem te-  
 » meritate avidam ulteriorum semper gentem  
 » in saltus invios deductam, septam non hos-  
 » tium magis armis, quam locorum iniquita-  
 » tibus esse. » Jam gaudium invidia quadam  
 miscebatur, quod belli Romani decus ab Sam-  
 nitibus fortuna ad Etruscos avertisset. Itaque  
 armis virisque ad obterendum C. Marcium  
 consulem concurrunt; protinus inde Etruriam  
 per Marfos ac Sabinos petaturi, si Marcius  
 dimicandi potestatem non faciat. Obvius iis  
 consul fuit. Dimicatum prælio utrimque  
 atroci, atque incerto eventu est. Et quum  
 anceps cædes fuisset, adversæ tamen rei fama  
 in Romanos vertit, ob amissos quosdam

*Anceps  
 prælium  
 cum Sam-  
 nitibus.*

*U. c. 444.  
a. C. 308.*

equestris ordinis, tribunosque militum, atque unum legatum, & (quod insigne maxime fuit) consulis ipsius vulnus. Ob hæc etiam aucta fama (ut solet) ingens terror Patres invasit, dictatoremque dici placebat: nec, quin Curfor Papirius diceretur, in quo tum summa rei bellicæ ponebatur, dubium cuiquam erat: sed nec in Samnium nuncium perferri, omnibus infestis, tuto posse, nec vivere Marcium consulem satis fidebant. Alter consul Fabius infestus privatim Papirio erat: quæ ne ira obstaret bono publico, legatos ex consularium numero mittendos ad eum senatus censuit: qui sua quoque eum, non publica solum, auctoritate moverent, ut memoriam simultatum patriæ remitteret. Profecti legati ad Fabium quum senatusconsultum tradidissent, adjecissentque orationem convenientem mandatis, consul, demissis in terram oculis, tacitus ab incertis, quidnam acturus esset (b), legatis recessit. Nocte deinde silentio (ut mos est) L. Papirium dictatorem dixit: cui quum ob animum egregie victum legati gratias agerent, obstinatum silentium obtinuit, ac sine responso ac men-

*Fabius  
Papirium  
dictatorem  
dicit.*

(b) *esset acturus* Gron. Crev.

tione facti sui legatos dimisit, ut adpareret, insignem dolorem ingenti comprimi animo. *U. c. 444.  
a. C. 308.*  
Papirius C. Junium Bubulcum magistrum equitum dixit : atque ei, legem curiatam de imperio ferenti, triste omnem diem diffidit, quod Fautia curia fuit principium, duabus insignis cladibus, captæ urbis, & Caudinæ pacis : quod utroque anno eadem curia (c) fuerat principium. Macer Licinius tertia etiam clade, quæ ad Cremeram accepta est, abominandam eam curiam facit.

XXXIX. DICTATOR postero die, auspiciis repetitis, pertulit legem; &, profectus cum legionibus, ad terrorem traducti silvam Ciminiam exercitus nuper scriptis, ad Longulam pervenit : acceptisque a Marcio consule veteribus militibus, in aciem copias eduxit : nec hostes detrectare visi pugnam. Instructos deinde armatosque (quum ab neutris prælium inciperet) nox obpressit. Quieti aliquamdiu, nec suis diffidentes viribus, nec hostem spernentes, stativa in propinquo habuere. Interea res in Etruria gestæ. Nam & cum Umbro-  
rum exercitu acie depugnatum est; (fusi *Res in  
Etruria  
bene gesta.*  
tamen magis, quam cæsi, hostes, quia

(c) ejusdem curiæ Gron. Crev.

*U. c. 444.* cœptam acriter non tolerarunt pugnam )  
*a. C. 308.* & ad Vadimonis lacum Etrusci , lege sacrata  
 coactō exercitu , quum vir virum legisset ,  
 quantis numquam alias antea simul copiis ,  
 simul animis , dimicarunt : tantoque irarum  
 certamine gesta res est ( *d* ) , ut ab neutra  
 parte emissā sint tela. Gladiis pugna cœpit ,  
 & , acerrime commissā , ipso certamine , quod  
 aliquamdiu anceps fuit , accensa est : ut non  
 cum Etruscis toties victis , sed cum aliqua  
 nova gente , videretur dimicatio esse. Nihil  
 ab ulla parte movetur fugæ : cadunt antesignani : & , ne nudentur propugnatoribus signa ,  
 fit ex secunda prima acies. Ab ultimis deinde  
 subsidiis cietur miles : adeoque ad ultimum  
 laboris ac periculi ventum est , ut equites  
 Romani , omiſſis equis , ad primos ordines  
 peditum per arma , per corpora evaserint :  
 ea velut nova inter fessos exorta acies tur-  
 bavit signa Etruscorum. Secuta deinde inpe-  
 tum eorum , utcumque adfecta erat , cetera  
 multitudo tandem perrumpit ordines hostium.  
 Tunc vinci pertinacia cœpta , & averti ma-  
 nipuli quidam : & , ut semel dedere terga ,  
 etiam certioſorem capeſſere fugam. Ille primum

( *d* ) *res gesta est* Gron. Crev.



dies fortuna veteri abundantes Etruscorum *U. c. 444.*  
 fregit opes. Cæsum in acie, quod roboris *a. C. 308.*  
 fuit ; castra eo inpetu capta direptaque.

XL. PARI subinde periculo gloriæque even-  
 tu bellum in Samnitibus erat ; qui , præter  
 ceteros belli adparatus , ut acies sua fulgeret *Samnitium*  
 novis armorum insignibus , fecerunt. Duo *acies*  
 exercitus erant : scuta alterius auro , alterius *insignibus*  
 argento cælaverunt. Forma erat scuti : sum- *armis*  
 mum latius , qua pectus atque humeri tegun- *fulgens.*  
 tur , fastigio æquali ; ad imum cuneatior ,  
 mobilitatis causa. Spongia pectori tegumen-  
 tum : & sinistrum crus ocrea tectum. Galeæ  
 cristatæ , quæ speciem magnitudini corpo-  
 rum adderent. Tunica auratis militibus ver-  
 ficolores , argentatis linteæ candidæ : his dex-  
 trum cornu datum : illi in sinistro consistunt.  
 Notus jam Romanis adparatus insignium ar-  
 morum fuerat : doctique a ducibus erant ,  
 „ horridum militem esse debere ; non cæla-  
 „ tum auro & argento , sed ferro & animis  
 „ fretum : quippe illa prædam verius , quam  
 „ arma , esse ; nitentia ante rem , deformia  
 „ inter sanguinem & vulnera. Virtutem esse  
 „ militis decus , & omnia illa victoriam fe-  
 „ qui ; & ditem hostem quamvis pauperis

U. c. 444.  
a. C. 308.

» victoris præmium esse. » His Cursor vocibus instinctos milites in prælium ducit. Dextro ipse cornu consistit; sinistro præfecit magistrum equitum. Simul est concursus, ingens fuit cum hoste certamen; non segnius inter dictatorem & magistrum equitum, ab utraque parte victoria inciperet. Prior forte Junius commovit hostem, lævo dextrum cornu, sacros more Samnitium milites, eoque candida veste & paribus candore armis insignes. » Eos se Orco mactare » Junius dictitans, quum intulisset signa, turbavit ordines, & haud dubie impulit aciem. Quod ubi sensit dictator, « Ab lævone cornu victoria incipiet, [inquit] & dextrum cornu, dictatoris acies, alienam pugnam sequetur, non partem maximam victoriæ trahet? » Concitavit milites. Nec peditum virtuti equites, aut legatorum studia ducibus cedunt. M. Valerius a dextro, P. Decius ab lævo cornu, ambo consulares ad equites in cornibus positos evehuntur: adhortatique eos, ut partem secum capefferent decoris, in transversa latera hostium incurrunt. Is novus additus terror, quum ex parte utraque circumvasisset aciem, & ad terrorem hostium legiones

Romanæ, redintegrato clamore, intulissent *U. c. 444.*  
 gradum, tum fuga ab Samnitibus cœpta. *a. C. 308.*  
*Vincitur.*  
 Jam strage hominum armorumque insignium  
 campi repleti. Ac primo pavidos Samnites  
 castra sua accepere: deinde ne ea quidem  
 retenta. Captis direptisque ante noctem in-  
 jectus ignis. Dictator ex senatusconsulto  
 triumphavit: cujus triumpho longe maximam  
 speciem captiva arma præbuere. Tantum mag-  
 nificentiae visum in iis, ut aurata scuta do-  
 minis argentariarum (e) ad forum ornandum  
 dividerentur. Inde natum initium dicitur fori  
 ornandi ab ædilibus, quum tensæ ducerentur.  
 Et Romani quidem ad honorem Deum insigni-  
 bus armis hostium usi sunt: Campani, ab  
 superbia & odio Samnitium, gladiatores (quod  
 spectaculum inter epulas erat) eo ornatu  
 armarunt, Samnitiumque nomine compella-  
 runt. Eodem anno cum reliquis Etruscorum  
 ad Perusiam, quæ & ipsa induciarum fidem  
 ruperat, Fabius consul nec dubia nec difficili  
 victoria dimicat. Ipsum oppidum (nam ad  
 mœnia victor accessit) cepisset, ni legati  
 dedentes urbem exissent. Præsidio Perusiæ  
 inposito, legationibus Etruriæ amicitiam pe-

(e) *argentariorum* Gron.

tentibus præ se Romam ad senatum missis ; consul , præstantiore etiam , quam dictator , victoria triumphans , urbem eî investus. Quin etiam devictorum Samnitium decus magna ex parte ad legatos , P. Decium & M. Valerium , est versum : quos populus proximis comitiis ingenti consensu consulem alterum , alterum prætorem declaravit.

*U. c. 445.  
a. C. 307.*

*O. Fabio  
III. P.  
Decio II.  
Coss.*

*Bene res  
gesta con-  
tra Sam-  
nites.*

*Contra  
Etruscos.*

XLI. FABIO ob egregie perdomitam Etruriam continuatur consulatus ; Decius collega datur. Valerius prætor quartum creatus. Consules partiti provincias. Etruria Decio , Samnium Fabio evenit. Is profectus ad Nuceriam Alfaternam , tum pacem petentes , quod uti ea , quum daretur , noluiissent , adspernatus , obpugnando ad deditionem subegit. Cum Samnitibus acie dimicatum. Haud magno certamine hostes victi : neque ejus pugnae memoria tradita foret , ni Marfi eo primum prælio cum Romanis bellassent. Secuti Marforum defectionem Peligni , eandem fortunam habuerunt. Decio quoque alteri consuli secunda belli fortuna erat. Tarquiniensem metu subegerat frumentum exercitui præbere , atque inducias in quadraginta annos petere. Volsinensium castella aliquot vi cepit : quædam

ex iis diruit, ne receptaculo hostibus essent: *U. c. 445.*  
circumferendoque passim bello, tantum terro- *a. C. 307.*  
rem sui fecit, ut nomen omne Etruscum fœ-  
dus ab consule peteret. Ac de eo quidem ni-  
hil inpetratum. Induciæ annuæ datæ. Stipen-  
dium exercitui Romano ab hoste in eum an-  
num pensum, & binæ tunicæ in militem  
exactæ. Ea merces induciarum fuit. Tranquil-  
las res jam Etruscis turbavit repentina de-  
fectio Umbrorum, gentis integræ a cladibus  
belli, nisi quod transitum exercitus ager fen-  
derat. Ii, concitata omni juventute sua, &  
magna parte Etruscorum ad rebellionem com-  
pulsæ, tantum exercitum fecerant, ut, relicto  
post se in Etruria Decio, ad obpugnandam  
inde Romam ituros, magnifice de se, ac  
contemptim de Romanis loquentes, jactarent.  
Quod inceptum eorum ubi ad Decium con-  
sulem perlatum est, ad urbem ex Etruria mag-  
nis itineribus pergit, & in agro Pupinienfi ad  
famam intentus hostium confedit. Nec Romæ  
spernebatur Umbrorum bellum: & ipsæ mi-  
næ metum fecerant expertis a Gallica clade,  
quam intuitam urbem incolerent. Itaque legati  
ad Fabium consulem missi sunt, ut, si quid  
laxamenti a bello Samnitium esset, in Um-

*U. c. 445.  
a. C. 307.*

*Contra  
Umbros.*

briam propere exercitum duceret. Dicto paruit consul, magnisque itineribus ad Mevaniam, ubi tum copiae Umbrorum erant, perrexit. Repens adventus consulis, quem procul Umbria in Samnio bello alio occupatum crediderant, ita exterruit Umbros, ut alii recedendum ad urbes munitas, quidam omitendum bellum censerent. Plaga una (Materinam ipsi adpellant) non continuit modo ceteros in armis, sed confestim ad certamen egit. Castra vallantem Fabium adorti sunt. Quos ubi effusos ruere in munimenta consul vidit, revocatos milites ab opere, prout loci natura tempusque patiebatur, ita instruxit; cohortatusque prædicatione vera qua in Tuscis, qua in Samnio partorum decorum, exiguum adpendicem Etrusci belli conficere jubet, & vocis impiæ pœnas expetere, qua se urbem Romanam obpugnaturos minati sunt. Hæc tanta sunt alacritate militum audita, ut clamor, sua sponte ortus, loquentem interpellaverit ducem. Ante imperium deinde concentu tubarum ac cornuum cursu effuso in hostem feruntur. Non tamquam in viros aut armatos incurrunt: (mirabilia dictu!) signa primo eripi cœpta signiferis; deinde

ipsi signiferi trahi ad consulem, armatique milites ex acie in aciem transferri: & sic, ubi est certamen, scutis magis, quam gladiis, geritur res. Umbronibus incussaue ala sternuntur hostes. Plus capitur hominum, quam cæditur: atque una vox ponere arma iubentium per totam fertur aciem. Itaque inter ipsum certamen facta deditio est a primis auctoribus belli. Postero insequentibusque diebus & ceteri Umbrorum populi deduntur. Ocriculani sponfione in amicitiam accepti.

XLII. FABIVS, alienæ fortis victor belli, in suam provinciam exercitum reduxit. Itaque ei, ob res tam feliciter gestas, sicut priore anno populus continuaverat consulatum, ita senatus in insequentem annum (f), quo Ap. Claudius, L. Volumnius consules fuerunt, prorogavit, maxime Appio adversante, imperium. Appium censorem petisse consulatum, comitiaque ejus ab L. Furio tribuno plebis interpellata, donec se censura abdicavit, in quibusdam annalibus invenio. Creatus consul, quum collegæ novum bellum, Sallentinii hostes decernerentur, Romæ mansit, ut urbanis artibus opes augeret, quando belli.

U. c. 445.  
a. C. 307.

U. c. 446.  
a. C. 306.  
Ap. Claudio, L.  
Volumnio  
Coss.

Sallentinii  
victi.

(f) *Senatus insequente anno Gron. Crey.*

*U. c. 446.  
a. C. 306.*

decus penes alios esset. Volumnium provinciae haud poenituit. Multa secunda proelia fecit : aliquot urbes hostium vi cepit. Prædæ erat largitor, & benignitatem per se gratam comitate adjuvabat : militemque iis artibus fecerat & periculi & laboris avidum. Q. Fabius proconsul ad urbem Allifas cum Samnitium exercitu signis conlatis confligit. Minime ambigua res fuit. Fusi hostes, atque in castra compulsi : nec castra forent retenta, ni exiguum superfuisset diei : ante noctem tamen sunt circumfessa, & nocte custodita, ne quis elabi posset. Postero die, vixdum luce certa, deditio fieri cœpta : & pacti, qui Samnitium forent, ut cum singulis vestimentis emitterentur. Hi omnes sub jugum missi. Sociis Samnitium nihil cautum : ad septem millia sub corona veniere. Qui se civem Hernicum dixerat, seorsum in custodia habitus. Eos omnes Fabius Romam ad senatum misit : &, quum quæsitum esset, delectu, an voluntarii pro Samnitibus adversus Romanos bellassent, per Latinos populos custodiendi dantur : iussique eam integram rem novi consules, P. Cornelius Arvina, Q. Marcius Tremulus, (ii enim jam creati erant)

*Samnites  
victi.*

*U. c. 447.  
a. C. 305.*

*P. Corne-  
lio, Q.  
Marcio  
Coss.*



ad senatum referre. Id ægre passi Hernici, *U. c. 447.*  
 concilium populorum omnium habentibus *a. C. 305.*  
 Anagninis in circo, quem Maritimum vo-  
 cant, præter Alatrinatem, Ferentinatēque,  
 & Verulanum, omnes Hernici nominis po-  
 pulo Romano bellum indixerunt.

XLIII. IN Samnio quoque, quia decesserat  
 inde Fabius, novi motus exorti. Calatia &  
 Sora, præsidiaque, quæ in iis Romana erant,  
 expugnata : & in captivorum corpora mili-  
 tum fœde sævitum. Itaque eo P. Cornelius  
 cum exercitu missus. Marcio novi hostes  
 (jam enim Anagninis Hernicisque aliis bel-  
 lum jussum erat) decernuntur. Primo ita  
 omnia obportuna loca hostes inter consulum  
 castra interceperunt, ut pervadere expeditus  
 nuncius non posset, & per aliquot dies in-  
 certi rerum omnium, suspensique de statu  
 alterius, uterque consul ageret, Romanque  
 is metus manaret : adeo ut omnes juniores  
 sacramento adigerentur, atque ad subita re-  
 rum duo iusti scriberentur exercitus. Ceterum  
 Hernicum bellum nequaquam pro præsentī  
 terrore ac vetustate gentis gloriæ fuit. Nihil  
 usquam dictu dignum ausi, trinis castris in-  
 tra paucos dies exuti, triginta dierum inducias,

*Bellum  
 Hernicum.*

U. c. 447.  
a. C. 305.

ita ut ad senatum Romam legatos mitterent,  
 pacti sunt bimestri stipendio frumentoque,  
 & singulis in militem tunicis. Ab senatu ad  
 Marcium rejeſti, cui ſenatusconſulto permiſ-  
 ſum de Hernicis erat: iſque eam gentem in  
 deditionem accepit. Et in Samnio alter con-  
 ſul ſuperior viribus, locis inpeditiore erat.  
 Omnia itinera obſeperant hoſtes, ſaltusque  
 pervios ceperant, ne qua ſubvehi commea-  
 tus poſſent: neque eos, quum quotidie ſigna  
 in aciem conſul proferret, elicere ad certa-  
 men poterat: ſatisque adparebat, neque Sam-  
 nitem certamen præſens, nec Romanum dila-  
 tionem belli laturum. Adventus Marcii, qui,  
 Hernicis ſubactis, maturavit collegæ venire  
 auxilio, moram certaminis hoſti exemit. Nam,  
 ut qui ne alteri quidem exercitui ſe ad certamen  
 credidiſſent pares, conjungi utique paſſi duos  
 (g) conſulares exercitus, nihil crederent ſu-  
 pereſſe ſpei, advenientem incompoſito agmine  
 Marcium adgrediuntur. Raptim conlatae farci-  
 nae in medium; &, prout tempus patiebatur,  
 inſtructa acies. Clamor primum in ſtativa  
 perlatus, dein conſpectus procul pulvis, tu-  
 multum apud alterum conſulem in caſtris  
 fecit. Iſque, conſeſtim arma capere juiſſis,

(g) *duo* Gron. Crev.

*raptim.*

raptimque eductis in aciem militibus, trans-  
 versam hostium aciem, atque alio certamine  
 occupatam invadit; clamitans, « summum  
 » flagitium fore, si alterum exercitum utrius-  
 » que victoriæ compotem sinerent fieri, nec  
 » ad se sui belli vindicarent decus. » Qua  
 inpetum dederat, perrumpit; aciemque per  
 mediam in castra hostium tendit, & vacua  
 defensoribus capit atque incendit. Quæ ubi  
 flagrantia Marcianus miles conspexit, & hos-  
 tes respexere, tum passim fuga coëpta Sam-  
 nitium fieri; sed omnia obtinet cædes, nec  
 in ullam partem tutum perfugium est. Jam;  
 triginta millibus hostium cæsis, signum recep-  
 tui consules dederant, conligebantque in  
 unum copias, in vicem inter se gratantes;  
 quum repente visæ procul hostium novæ  
 cohortes, quæ in supplementum scriptæ fue-  
 rant, integravere cædem: in quas, nec jussu  
 consulum, nec signo accepto, victores va-  
 dunt; « malo tirocinio inbuendum Samnitum, »  
 clamitantes. Indulgent consules legionum  
 ardori, ut qui probe scirent, novum militem  
 hostium inter percussos fuga veteranos ne  
 tentando quidem satis certamini fore. Nec  
 eos opinio fefellit. Omnes Samnitium copias,

*U. c. 447.  
 a. C. 305.*

*Visti  
 Samnites.*

*U. c. 447.  
a. C. 305.*

veteres novæque , montes proximos fuga capiunt. Eo & Romana erigitur acies ; nec quidquam satis tuti loci vicinis est , & de jugis , quæ ceperant , funduntur ; jamque una voce omnes pacem petebant. Tum , trium mensium frumento imperato , & annuo stipendio , ac singulis in militem tunicis , ad senatum pacis oratores missi. Cornelius in Samnio relictus. Marcius de Hernicis triumphans in urbem rediit ; statuaque equestris in foro decreta est , quæ ante templum Castoris posita est. Hernicorum tribus populis , Alatrinati , Verulano , Ferentinati , quia maluerunt , quam civitatem , suæ leges redditæ : connubiumque inter ipsos , quod aliquamdiu soli Hernicorum (h) habuerunt , permixtum. Anagninis , quique arma Romanis intulerant , civitas sine suffragii latrone data : concilia connubiaque adempta : & magistratibus , præterquam sacrorum curatione , interdictum. Eodem anno ædes Salutis a C. Junio Bubulco censore locata est , quam consul bello Samnitium voverat. Ab eodem collega ejus M. Valerio Maximo viæ per agros publicâ inpena factæ. Et cum Carthaginensibus eo.

*Ædes  
Salutis.*

*Carthagi-  
nienses  
legati.*

(h) *Hernicorum soli Gron. Crev.*

dem anno fœdus tertio renovatum : legatis-  
que eorum, qui ad id venerant, comiter  
munera missa.

XLIV. DICTATOREM idem annus habuit  
P. Cornelium Scipionem, cum magistro equi-  
tum P. Decio Mure. Ab iis, propter quæ creati  
erant, comitia consularia habita, quia neuter  
consulum potuerat bello abesse. Creati con-  
sules L. Postumius, Ti. Minucius. Hos con-  
sules Piso Q. Fabio & P. Decio subgerit,  
biennio exempto, quo Claudium Volumnum-  
que, & Cornelium cum Marcio consules  
factos tradidimus. Memoria ne fugerit in anna-  
libus digerendis, an consulto binos consules,  
falsos ratus, transcenderit, incertum est.  
Eodem anno in campum Stellatæ agri Cam-  
pani Samnitium incursiones factæ. Itaque am-  
bo consules, in Samnium missi, quum diver-  
sas regiones, Tifernum Postumius, Bovianum  
Minucius, petissent; Postumii prius ductu ad  
Tifernum pugnatum. Alii haud dubie Samni-  
tes victos, ac viginti millia (i) hominum  
capta tradunt : alii Marte æquo discessum,  
& Postumium, metum simulantem nocturno  
itinere, clam in montes copias abduxisse:

*P. Corne-  
lius  
dictator.*

*U c. 448.  
a. C. 304.*

*L. Postu-  
mio, Ti.  
Minucio  
Coss.*

*Coss. in  
Samnium  
eunt.*

(i) add. *inde* Gron.

*U. c. 448.* *a. C. 304.* hostes secutos duo millia inde locis munitis & ipsos confedisse. Consul, ut stativa tuta copiosaque (& ita erant) petisse videretur, postquam & munimentis castra firmavit, & omni adparatu rerum utilium instruxit; relicto firmo præsidio, de vigilia tertia, qua duci proxime potest, expeditas legiones ad collegam, & ipsum adversus alios sedentem, ducit. Ibi, auctore Postumio, Minucius cum hostibus signa confert; & quum anceps prælium in multum diei processisset, tum Postumius integris legionibus defessam jam aciem hostium improviso invadit. Itaque, quum lassitudo ac vulnera fugam quoque præpedissent, occisione occisi hostes, signa unum & viginti capta: atque inde ad castra Postumii perrectum. Ibi duo victores exercitus perculsum jam fama hostem adorti fundunt fugantque: signa militaria sex & viginti capta, & imperator Samnitium Statius Gelius, multique alii mortales, & castra utraque capta: & Bovianum, ubi postero die cœptum obpugnari, brevi capitur: magnaue gloria rerum gestarum consules triumpharunt. Minucium consulem, cum vulnere gravi relatum in castra, mortuum, quidam auctores

*Samnites  
vincuntur.*

sunt, & M. Fulvium in locum ejus consulem subiectum : & ab eo, quum ad exercitum Minucii missus esset, Bovianum captum. Eodem anno Sora, Arpinum, Censennia, recepta ab Samnitibus. Herculis magnum simulacrum in Capitolio positum dedicatumque.

XLV. P. SULPICIO Saverione, P. Sempronio Sopho consulibus, Samnites, seu finem, seu dilationem belli quærentes, legatos de pace Romam misere. Quibus suppliciter agentibus responsum est, « nisi sæpe bellum parantes pacem petissent Samnites, oratione ultro, citroque habita, de pace transigi potuisse. Nunc, quando verba vana ad id locorum fuerint, rebus standum esse. P. Sempronium consulem cum exercitu brevi in Samnio fore : eum, ad bellum pacemne inclinent animi, falli non posse : comperta omnia senatui relaturum : decedentem ex Samnio consulem legati sequerentur. » Eo anno quum pacatum Samnium exercitus Romanus, benigne præbito commeatu, peragrasset, foedus antiquum Samnitibus redditum. Ad Æquos inde veteres hostes, ceterum per multos annos sub specie infidæ pacis quietos, versa arma Romana : quod, incolumi

*U. c. 449.*

*a. C. 303.*

*P. Sulpicio, P. Sempronio Coss. Pacem petunt Samnites.*

*U. c. 449.* Hernico nomine, missitaverant simul cum iis  
*a. C. 303.* Samniti auxilia; &, post Hernicos subactos, universa prope gens, sine dissimulatione consilii publici, ad hostes desciverat: & postquam, icto Romæ cum Samnitibus fœdere, feciales venerant res repetitum, «tentationem [aiebant] esse, ut, terrore incusso belli, Romanos se fieri paterentur: quod quantopere optandum foret, Hernicos docuisse: quum, quibus licuerit, suas leges Romanæ civitati præoptaverint: quibus legendi, quid malum lent, copia non fuerit, pro poena necessariam civitatem fore.» Ob hæc vulgo in conciliis jactata, populus Romanus bellum fieri Æquis iussit: consulesque ambo, ad novum profecti bellum, quatuor millibus a castris hostium confederunt. Æquorum exercitus, (ut qui suo nomine permultos annos inbelles egissent) tumultuario similis, sine ducibus certis, sine imperio, trepidare. Alii exeundum in aciem, alii castra tuenda censent: movet plerosque vastatio futura agrorum, ac deinceps cum levibus præfidiis urbium relictarum excidia. Itaque, postquam inter multas sententias unâ, quæ, ommissa cura communium, ad respectum suarum quem-

*Bellum  
 cum  
 Æquis.*



que rerum vertisset, audita; ut prima vigilia diverſi e caſtris ad deportanda omnia tuendaque mœnibus in urbes abirent; cuncti eam ſententiam ingenti adſenſu acceperunt. Palatis hoſtibus per agros, prima luce Romani, ſignis prolatis, in acie conſiſtunt; &, ubi nemo obviuſ ibat, pleno gradu ad caſtra hoſtium tendunt. Ceterum, poſtquam ibi neque ſtationes pro portis, nec quemquam in vallo, nec fremitum conſuetum caſtrorum animadverſerunt; inſolito ſilentio moti, metu inſidiarum ſubſiſtunt. Tranſgreſſi deinde vallum, quum deſerta omnia inveniſſent, pergunt hoſtem veſtigiiſ ſequi: ſed veſtigia, in omnes æque ferentia partes, ut in dilapſiſ paſſim, primo errorem faciebant; poſt, per exploratores compertiſ hoſtium conſiliis, ad ſingulas urbes circumferendo bello, unum & quadraginta oppida intra dieſ quinquaginta omnia obpugnando ceperunt; quorum pleraque diruta atque incenſa, nomenque Æquorum prope ad internecionem deletum. De Æquiſ triumphatum: exemploque eorum cladeſ fuit, ut Marrucini, Marſi, Peligni, Frentani mitterent Romam oratoreſ pacis petendæ amicitiaque. Iiſ populis foedus petentibuſ datum.

U. c. 449.  
a. C. 303.

Æqui prope ad internecionem deleti.

U. c. 449.

a. C. 303.

*C. Flavius**ædilis**curulis.*

XLVI. EODEM anno Cn. Flavius Cn. filius scriba, patre libertino, humili fortuna ortus, ceterum callidus vir & facundus, ædilis curulis fuit. Invenio in quibusdam annalibus, quum adpareret ædilibus, fierique se pro tribu ædilem videret, neque accipi nomen, quia scriptum faceret; tabulam posuisse, & jurasse, se scriptum non facturum. Quem aliquanto ante desisse (k) scriptum facere, arguit Macer Licinius, tribunatu ante gesto triumviratibusque, nocturno altero, altero coloniae deducendae. Ceterum (id quod haud discrepat) contumacia adversus contemnentes humilitatem suam nobiles certavit. Civile jus, repositum in penetralibus pontificum, evulgavit; fastosque circa forum in albo proposuit, ut, quando lege agi posset, sciretur: ædem Concordiae in area Vulcani summa invidia nobilium dedicavit; coactusque consensu populi Cornelius Barbatum pontifex maximus verba præire, quum more majorum negaret, nisi consulem aut imperatorem, posse templum dedicare. Itaque ex auctoritate senatus latum ad populum est, ne quis templum aramve injussu senatus aut tribunorum

(k) antea desisse Gron. Crev.

plebei partis majoris dedicaret. Haud memorabilem rem per se, nisi documentum sit adversus superbiam nobilium plebeiae libertatis, referam. Ad collegam ægrum visendi causa Flavius quum venisset, consensuque nobilium adolescentium, qui ibi adsidebant, adsurrectum ei non esset; curulem adferri sellam eoque jussit, ac sede honoris sui anxios invidia inimicos spectavit. Ceterum Flavium dixerat ædilem forensis factio, Ap. Claudii censura vires nata, qui senatum primus libertinorum filiis lectis inquinaverat: & postquam eam lectionem nemo ratam habuit, nec in curia adeptus erat, quas petierat, opes urbanas; humilibus per omnes tribus divisas, forum & campum corrupit. Tantumque Flavii comitia indignitatis habuerunt, ut plerique nobilium annulos aureos & phaleras deponerent. Ex eo tempore in duas partes discessit civitas. Aliud integer populus, fautor & cultor bonorum, aliud forensis factio tenebat; donec Q. Fabius & P. Decius censores facti: & Fabius, simul concordiae causa, simul ne humillimorum in manu comitia essent, omnem forenses turbam excretam in quatuor tribus conjecit, urbanasque eas adpellavit.

U. c. 449.

a. C. 303.

U. c. 449.  
a. C. 303. Adeoque eam rem acceptam grâti animis  
ferunt, ut Maximi cognomen, quod tot vic-  
toriiis non pepererat, hac ordinum tempera-  
tione pareret. Ab eodem institutum dicitur,  
ut equites Idibus Quinctilibus transveheren-  
tur.

*FINIS TOMI TERTII.*

*ARGENTORATI,*  
Typis FRANCISCI GEORGH LEVRAULT.

---

*PERMISSU SUPERIORUM.*











A circular library stamp from the University of Wisconsin Libraries. The text "UNIVERSITY OF WISCONSIN LIBRARIES" is arranged in a circle around the perimeter. In the center, the date "1968" is stamped. The stamp is slightly faded and tilted.

